



3.4.522









DELECTUS

OPUSCULORUM

MEDICORUM.

*VOL. I.*



DELECTUS  
OPUSCULORUM  
MEDICORUM

ANTEHAC IN  
GERMANIAE DIVERSIS ACADEMIIS  
EDITORUM.

---

QUAE

In Auditorum commodum collegit, & cum  
notis hinc inde aucta recudi curavit

IOANNES PETRUS FRANK M. D.

*Medicinae Clinicae in Regia Academia Ticinensi  
Professor p. & o. Academiae Scientiarum  
Regiae Goettingensis & Electoralis  
Moguntinae Sedalis.*

---

VOL. I.

---

TICINI  
IN TYPOGRAPHEO PETRI GALEATII  
PRAESID. REI LITTER. PERMITT.  
ANNO MDCCCLXXXV.





## PRAEFATIO.

*V*irorum Illustrissimorum HALLERI, SANDIFORTII, BALDINGERI, GRUNERI, WITTWERI, WASSERBERGII, aliorumque exemplo, sed ratione adhuc longe alia, suffultus, praesentem collectionem non sine fructu, artisque Medicae apud nos emolumento comparituram confido. CAESARIS AUGUSTISSIMI gratia ITALIAE me incolam esse, atque praxeos ad lectos aegrotorum regulas in celeberrima Academia Ticinensi docere non ita pridem iussit: hoc ipso autem, gratissimum mihi imposuit officium, ut huic me orbis terrarum parti felicissimae, in quantum vires permittant, utilem redderem atque proficuum. Dolebam saepissime, cum in patria dilectissima adhuc morarer, & medici practici per multos annos, dein Professoris Medicinae practicae in GEORGIA AUGUSTA munere fungebar, dolebam, inquam, GERMANIAM tot egregiis ITALIAE operibus medicis, postquam in hac iam diu apparuerint, per plu-

res, ad minimum, annos privari: praecipue cum vel rariores sint, vel minoris Voluminis libelli, quam ut bibliopolarum attentionem excitare queant. In ITALIAM translatus, minus adhuc esse huic cum GERMANIA in rebus literariis, quam isti cum Italia commercium, non minori animi adfectu sentio. Non quod egregii in hac parte Viri Medici non eadem, qua nos aequitate, alienos quoque in arte profectus agnoscant, atque eorum mox participes fieri desiderent; sed quod innumera se hic opponant, quorum pars magna a bibliopolis est, impedimenta. Hi enim cum GERMANIAE bibliopolis libros nullos commutant, sed aere crudo opus omne absolunt, magnoque, & ob locorum distantiam, insigniter aucto pretio, chartas illorum paucas atque notissimas saltem sibi comparare, suisque vendere consueverunt.

Sed alia latet mali origo! . . . . infelix scilicet Latini sermonis inter utriusque regionis eruditos neglectus fere aequalis, & scribendi, si legi velis, idiomate patrio, in dies aucta necessitas. Memoriam torquent GERMANIAE filii, & temporis in addiscendis peregrinarum natio-

num linguis, quamplurimam partem consumunt, ut, iam fere fractis viribus, aliorum demum populorum scriptis gaudeant, illisque pro ingenio utantur: in qua parte quidem, taediis certe plenissima, a nullo alio populo facile superantur. Ast, an temporis impensi lucrum capiant, & an non longe maiorem laborum fructum acquisituri essent, si non rerum tantum septenis Nominibus, sed ipsi mox SCIENTIAE consecrare daretur indefessa certe ingenia, dubium, mihi saltem (qui hanc ipsam tamen viam feci) superesse non potest. In hisce terris, praeter Gallicae, & hinc inde Anglicae linguae studium, a medicis vix ullum studiosius colitur, & quamvis libri idiomate Latino exarati, ob suam cum Italico sermone affinitatem, facilius intelligantur, ut plurimum tamen patria conscripti sunt lingua, & ad exteros hanc ob rationem difficilius emigrant.

Sic igitur Latini sermonis apud eruditos abolitio, utrumque fere populum Commercio privat Litterario, quod certe, si maius inter nos existeret, unicuique messem largiretur ditio- rem, & animos redderet in diiudicandis inge-

niis , atque veris in artem meritis , ex utraque parte aequiores .

*Natum exhinc in me est desiderium , ITALIAE Medicis , praecipue iuvenibus , qui me duce artem salutarem addiscunt , aut in aliis locis a GERMANIA magis adhuc dissitis , excolunt , partem saltem non ignobilem laborum praecipue Academicorum , quos illa vel dedit vel datura est , in manus tradere : pro ut iisdem tum praelectiones proprias illustrari , tum potiores artis cognitiones & medendi methodos ulterius propagari , aut confirmari crediderim .*

*Regulam mihi in eligendis iis , quae typis recudenda exhibiturus sum , imponere aliam nolui , quam ut ea , quae praecipuis aliis Collectionibus supradictorum inprimis Virorum industria inserta leguntur , evitarem , utque non nisi ea exhiberem , quae in hisce praecipue terris utilia fore credidero . Praxim Medicam quidem pro primario Collectionis meae obiecto habiturus sum ; interim neque Chirurgica scripta excludam , neque alia , quae artis praecipue exercitium propius concernunt . Scientia , nullibi adhuc magis , ac in GERMANIA exculta , cuius*



tamen populo pernecessaria, *MEDICINA* scilicet *FORENSIS*, locum hic eo potiore obtinebit: quo magis hanc artis nostrae eximiam partem, in fertili *ITALIAE* solo radices denuo figere fructusque optarem ferre maturiores, postquam prima certe huius, uti tot aliarum scientiarum semina, hanc ipsam pro patria quondam agnoverint.

Nova mihi hic loci videbuntur, quaecumque, ob praedictas rationes, ab *Eruditis ITALIAE*, vel nunquam fere, vel tardo nimis comparari poterunt paucisque sic tantum innotescunt, cum tamen omnibus innotuisse mererentur. Hinc inde ex meis aliqua, prout alii labores permittant, adiiciam, atque, ne alienis commisceantur, Asterisco (\*) notari curabo. Interim non omnia, quae adnotationibus propriis destituta hic legentur, in me ipsum suscipiam; sed sententias auctorum diversorum lectori tradam ulterius diiudicandas. Neque materiarum ordinandarum mihi potior, quam novitatis erit ratio: quilibet enim ex quovis volumine secuturo ea sibi eligit eoque ordine tandem disponat, quem sibi commodissimum esse noverit. Voluminum numerum tempusque editionis apud me esse volui; quin tamen,

si gratum esse opus & aliis, senserim, licentia  
hac mihi praesumpta abusurus sim. Aliud mihi  
in caeterum, quam ut aliis, praesertim AUDITO-  
RIBUS meis, prodessem, ab hoc opere emolu-  
mentum non proposui. Forte & meae quondam  
patriae, ITALIAE sic fructus medicos, in fasci-  
culum collectos, ut iisdem mox frui possit, sin-  
gulis annis transmittam: felix, si & hoc tan-  
dem modo, litterarum, in quo prima mei pars  
officii consistit, medicarum studium promoveam  
atque rerum utilium circulationem pro viribus  
secundem.

---

---

## HYPOCHONDRIASIS

*Disputatio inauguralis, Praeside GEORG. MATH.*

*GATTENHOFF, Auctore FRANCISCO ZUC-*

*CARINI. Heidelbergae, 1769. (\*)*.

### §. I.

**M**Orbus, a viscerum sub hypochondriis sitorum adfectione a veteribus iam notatus, varia toties symptomatum syndrome illudens, insulso-

---

(\*) In Germaniae Academiis, veri scriptorum eiusmodi auctores vel ipse Neodoctoris Praefes, vel alii, artis iam peritiores, viri sunt. Paucis iuvenibus medicis datum est, materias practicas, si observationes singulares, sub alienis auspiciis institutas excipias, ita elaboratas tradere: ut vel novitate, vel alio titulo, attentionem Eruditorum sibi arripiant; quamvis non ignorem, aliquando ex iuvenilibus omnino manibus, dissertationes prodiiisse, quae perutilem saltem compilationem fitebant. Lex illa academica, quam in omni Germania & a Batavis, dein quoque Edimburgi, nec minus in Sueciae, Daniae Academiis, observatam vidimus, & qua singuli Doctoratus Candidati, scientiae suae specimen publicum edere tenentur, optimis certe ansam dedit elaborationibus, illique omnino magnam

que a Gallis vaporum ( les vapeurs ) titulo illus-  
sus , potissimum litteratorum miserum stipendium

---

artis nostrae partem debemus . Interim fateor , institutum hoc , ob cuius eximios saepe fructus , Exteri nobis invidebant , quodque ab his nova lege subinde receptum fuisse non ignoramus , finem suum utplurimum aberrasse , hinc non immerito , prout mihi saltem videtur , a SUMMO IMPERATORE , cum alia utiliorique lege fuisse commutatum . Dissertatio , uti vidimus , a Neodoctore ipso vel raro admodum , vel utplurimum ita conscripta , ut ex ea , novae dignitatis argumentum capi non potuerit , nullam certe Candidato in publico fidem conciliare potuit maiorem ; cum interim expensarum pro illo rationem augere , & , quod potioris momenti est , sat magnam temporis Academici partem operi tam saepe inutili , impendere debuit . Voluit ergo IOSEPHUS II. , ut rigorofo ad lectos aegrotorum examine , quid valeant Neodoctoris humeri , quid ferre recusent , publice comprobaretur , crumenae vero Candidati ( forte pauperioris , quam ut Professoris sui filios litterarios adoptare posset ) parceretur , temporisque Academici maior haberetur ratio . Nulli interim hoc ipso vetitum erit , scientiae suae tentamen , si libeat , edere , & si quid , publica attentione dignum dicendum habeat , typis mandare : eo enim nunc vivimus saeculo , quo praela , absque lege id iubente , pridem forte necessaria , satis abunde sudant , quin ex instituto inundationis Litterariae augeatur periculum . — Quod ad praesentem dissertationem spectat , difficile est ,

3

audiit, nunc suo in plebem ipsam dominio, Medicorum consilia ingeniaque fatigat; ut tum a sua nostro aevo frequentia pertractationem academicam mereatur, tum ut a vagis vulgi ac Medicorum quorundam praeiudiciis in tyrannum gratiam salutisque publicae commoda depuretur.

## §. II.

Varia nascentis mali, varia adulti facies est. Lentis plerumque gradibus obrepit; aliquando sub diuturna animi occultaque aegritudine, moerore ac tacito curarum morfu, subita adfectuum, plerumque spasticorum, fallaci vehementia erumpit.

I. Insolita quaedam pressio in praecordiis molestia a cibo capto, facilisque nec adpetitui cibi modo respondens satietas, cum levi dyspnoea, lassitudinis insueto sensu, meridiani somni cupidine, accedentibus brevibus cordis palpitacionibus, somnique nocturni excussa subito iucundia, initia ducunt, plerumque contempta; flatuum,

---

Viri summi, mihiq̃ amicissimi GATTENHOFFII, qui & meis aliquando studiis profuit, eruditionem stilumque nitidissimum, in ea non recognoscere.

fatigant molestiae, multifonoque murmure venter flagrat, atque in hos, dum molestiarum suarum causas refundunt, facile sibi satisfaciunt, ac in essentiarum suarum stomachicarum usu, addito a cibis solertiori Coffeae potu, adquiescunt; vini saltem generosioris usui eadem ex medela vacant, atque nonnisi leni addita crapula vespertina, somni quietem conciliant; alimenta interim duriora toties melius, quam molliora tolerant digeruntque.

2. Pluribus licet a prandio coenave haec molestiae sint; videris nihilominus, quos ventriculi potius vacuati tempore, circa vesperum, ante coenam maneque, incommoda premunt singularis, quam explicare nequeant, anxietatis, absque ulla quidem spirandi difficultate, palpitantis cordis, capitis nubili, levique sed fere continua vertigine nutantis sibi visi, suoque, ut credunt, muneri imparis, animi inquietioris, cum levi etiam artuum tremore iuncto. Quod molestiarum genus cibo capto, continuo adeoque a summo mane modici cibi vinique usu, totumque vorando diem, solarentur.

3. Fugaces de nocte somni, atque dum sensim obrepunt, subitis interpellati pavoribus, cum sensu saepe subitaneae, fulminei instar ictus, viscerum abdominalium concussionis iuncto, an-

xietates cum cordis palpitationibus cumulant ;  
metuque nunc apoplexiae , nunc catharri suffoca-  
tivi , nunc epilepsiae terrent (\*) : sed rediens  
a sequente tranquillo demum somno animus ,  
manens corporis vigor & adeptitus integritas haec  
solatur mala , metuque tantisper exuit .

4. Crebrae phlogoses , atque capitis praeci-  
pue , saepe extremorum artuum incalescentia ,  
cum intercurrentibus etiam horroribus , aliquan-  
do maiori mali gradu , continuo fere manuum pe-  
dumque frigore tremoreque , inter anxietates ani-  
mi futurorumque malorum praefagia , febris ideam  
ingerunt , atque sub proprio mali sui continuo  
studio , perpetua pulsus proprii percontatione ,  
febris hecticae pavores animo volvunt revolvunt-  
que ; ac Medicos , tum ut sua , quam e venis

---

(\*) Senis Venerabilis , a iuventute Hypochondriaci  
exemplum habui , qui cum in caeteris omnibus  
prae aliis saperet , levi satis morbo laborans ,  
ventriculum sibi *perforatum* esse credidit , & cum  
ego per plures dies opinioni restitissim , ipsius  
quoque GATTENHÖFFII consilium expetiit .  
Post alios tandem dies fidem consolantibus nobis  
adhibuit . Heu ! mortis post triennium futurae  
naturam tristeque fatum praesensisse Virum inté-  
gerrimum diceret : ut qui , exhibito sibi ene-  
mate , perfossoque a situla , per Chirurgum  
ruditer intrusa , intestino recto , infelix obiit .

manuum nunc valde intumescantibus, nunc sub-  
sidentibus colligunt, plethora per VSectiones,  
liberentur, tum febris suae curationes adsignen-  
tur, a summo Archiattrorum ordine ad infimam  
plebis medicastrae sortem, ex anicularum, car-  
nificum, quin & saepe sacerdotum, urinas ex  
voto olentium, classe, per totam sensim provin-  
ciam fatigant; sed nullorum demum, ex propria  
nullius hactenus successus experientia, nisi pro-  
prij studii consentanea sequuntur consilia.

5. Febris vero, siqua veris comitatur phoe-  
nomenis, aut aliis, saepe epidemicis e causis  
nata, omnino irregularis, multa difficultate tum  
e coctionis criseosque perturbatione, tum con-  
valescendi labore stipatur, verum natae ipsius  
vi morbi febris, omnino irregularis, observa-  
tiones in semetipsis referunt cl. Viri (a); quae  
variabili plane typo, apyrexia vix perfecta,  
redierit, l. maiori bono, aliarum febrium more,  
paroxysmum sudore finierit, aut levarit saltem.

6. Alvus aliquibus tardior est, tardissima-  
que aliquando (b), ut nonnisi siccissima dimit-

---

(a) GARBOE *experim. ca. mal. hyp.* §. VI. HOP-  
PE *Hamb. Mag.* Vol. VIII. p. 604. 608. Vol.  
IX. p. 340.

(b) Alvi ad 3. septimanas obstipatae in hypochon-



tat (\*) ; aliis ac plerisque mollior , stercoraria , male mixta , biliosa , rufa , subatra , saepe pallida , saepe foedissima , repetito per diem nisu , fere tenesmode , secedunt : interque ea alvi phaenomena tumentibus haemorrhodium tuberculis anus flagrat , aut iis per intervalla fluentibus , aut perpetuo etiam , ut novi , quotidiano pauci sanguinis fluxu notantur : sed & de inventis maiorum suorum in aurea vena causis , naturaeque per eam molimine lactantur , atque inter

*Op. Med. Vol. I. B*

driaco exemplum habet KAEMPF *de infarct. ventric. Vol. III. diss. pract. Hall. it. SWIETEN. T. III. p. 492.*

- (\*) Caprarum stercori similia magnis conatibus quamplures alvo excernunt : quae omnino de magna tanti intestini , saepeque satis diuturna contractione spastica testari possunt . Monere iuvenes medicos hic expedit : impossibile saepe sub hoc statu esse clysteris adplicationem , nisi , cum Chirurgo supra memorato , intestinum laesionis velint exponere periculo . Post breve quandoque tempus , imminuto spasmu intestinali ( quem apud inassuetos & operationem hanc extimescentes homines , vel recusantes illam infantes , novi fuisse considerabilem ) facillimum erit , fistulam ano immittere , opusque hoc feliciter absolvere : quod , communissimum scilicet , saepe nimis rudibus committi manibus , & magnis sic multisque intestini morbis ansam porrigere , doleo .

amicorum Medicorumque etiam adgratulationes ;  
 animum feliciore erigunt augurio ; aureos morbi  
 sui fontes aequanimius terunt , obstetricante Me-  
 dico , eos nunc fodiente , nunc fovente , emol-  
 liente , nunc irritante , nunc fugente , nunc  
 quocunque artis suae , plerumque arcano genere  
 consulente .

7. Palpitationis quidam sensus , uti omnes  
 aliquando vel varias saltem partes , sensu ac  
 irritabilitatis vi gaudentes , ferit , uti refert  
 FRACASSINI (a) ; atque in se ipso tremoris  
 ac palpitationis subtercutaneae specie sensit GAR-  
 BOE (b) ; ita & potissimum partes interiores  
 tenet , & trementis cordis , aut Aortae , aut  
 Coeliacae palpitantis sensu , polypi latentis aut  
 aneurismatis formidine repleverit aegrum Medi-  
 cumque , ut novi , alias fat celebrem ; aliquando  
 coniuncta perpetua quasi circa ventriculum pres-  
 sionis molestia , ac continuo plerumque ingesto-  
 rum vomitu , pancreatis scirrhusi & iamiam car-  
 cinomatosi specie prognosique fefellerit (c) .

(a) FRACASSINI *Opusc. Pathol.* p. 273.

(b) GARBOE l. c. §. VIII.

(c) Pulsationem in aorta , art. mammaria , coelia-  
 ca tam vehementem , ut aneurisma simularet ,  
 adnotat FRACASSINI l. c. p. 243. 272.

8. Sed aliis has similesque inter molestias ; fortior auctusque adpetitus (a) sponte deficit hos mentis pavores ; immo aucta saepe animi laetitia , atque in risus proclivitas , aucta salacitas , nocturna per somnum *λαγνύματα* vegetioris etiam corporis ideas substituunt ; ut praematuris sibi consulant matrimoniis , vel naturae vires scortando iactitent ; nihilominus sua , quae cum Medico maxima esse solet , amicitia , suas vel haemorrhoidibus , vel flatulentis , vel aliis quaevisque causis potius , quam turpitudini querelas deferunt .

9. Aliae imi ventris afflictiones variant ; saepe lumborum , ossis sacri dolores , saepe tormina & cardialgiae vexant ; alios stranguria affligit ; alios modo cum lento stillante humore aliaque affectione genitalium molesta , urinae emissio , modo eius etiam absque ullo dolore in vesica suppressio vexat . Saepe sub anxietatis ac viscerum palpitantium sensu ingruente , urinae copiosae aquosaeque fluunt ! ut & hac ratione varias morborum formas simulent , aegrosque novis terroribus compleant : ita diabetem cum

B 2

---

(a) WHYTT *Abhandl. von der Hypochondr.* pag. 183. *It. not. ad HALESI haemat.* p. 178.

passione hypochondriaca coniunctum describit KRAZENSTEIN (a); calculum renalem saepe mentiri, observat FRACASSINI (b).

10. Verum non soli hi viscerum abdominis limites sunt, morbi huius saevitiam mirabilefque formas concludentes; quin in alias simul partes, totumque corpus saepe numero porrigatur: praeter anxietates cordisque palpitaciones, pectus dyspnaeae quodam genere, quod subito ingruens, peripnevmoniam notham, catarrhi suffocativi speciem, aemulatur, per intervalla affligitur: sed, uti subito animi adfectu, terrore saepe, nascitur: ita eo mutato, cedit, contrariifque ideis evanescit, ructibus flatibusque sursum deorsum, liberato Aeolo, mirabili per intestina murmure spirantibus. Aliis saliva copiosior (c),

(a) *De diabete Vol. IV. Dissert. pract. Hall.* p. 56.

(b) *L. c.* p. 241. 249.

(c) SWIETENIUS T. III. p. 507. ROPER *de ptyalismo Vol. I. disp. pract. Hall.* p. 453.

(\*) Constantissimum fere morbi huius symptoma esse observavi, mucii tenacioris, fauces matutino ut plurimum tempore obsidentis, continuam fere excreationem: ita ut perpetuas medico, de tenacitate humorum, querelas moveant, & spissum accusent sanguinem, cui incidendo atque resolvendo, copiosissima adhibet, ex omni remediorum genere, plebs medica. Idem fere mucii

aliquando dulcis (a) ; alios haemoptoe crebra ; alios anginae quaedam spasmodicae , absque conspicuo faucium vitio , torquent , saepe redeuntes (b) .

ii. Atque in tanto symptomatum numero ; capitis mala maxima esse solent , ut cephalaeae non tam periodicae vel vagae , modo caput univsum , modo has , modo illas partes saevo tormento occupent , nunc obtusae tensionis , nunc frigoris , nunc gravantis ponderis , stuporis , saepe vertiginosi relicto sensu : ictus cuiusdam celerrimi & quasi fulminei , caput traicientis sensum , sensibili cum sono , velut fidei in tetrachordo nimis tensae , subito nunc ruptae

B. 3

affluxus a prima emeticorum in ventriculi nervos actione insequitur , eundemque fere a quovis animi pathemate fortiore effectum in liquida oris cavum irrorantia observo : ita ut mox siccum hoc fieri & viscidum sentiamus , quod brevi antea madidissimo rore humectabatur . Prima quoque febrium invasio , hoc signo stipari solet : ex quibus omnibus colligendum esse duco , nervorum potius in glandulas faucium & oesophagi imperio , hanc mucii secretionem augeri , mutari ; nec ab hoc signo , ad praeternaturalem humorum crasin praepostere esse concludendum .

(a) HALLERUS *Elem. T. V. p. 115.*

(b) SWIETENIUS *T. II. p. 706.*

tinnitu , tempore obrepentis somni , expertus est GARBOE ; alii plures dantur , eo toties sensu territi .

12. Crebras inter subitaneasque phlogoses , motus in variis faciei musculis oscillatorii perspicui repunt ; ut celerrime mox palpebra vibret , modo labia tremant , modo sensus saltem aliquis tracti ad latus labii , vel cuti inhaerentis irritantisque pili , quem manu iterato absterferint , divexet .

13. Oculis scintillae subitae , modo muscarum volantium , nigrarumque macularum spectra obversantur , ut imminentis iterum apoplexiae , vel saltem coecitatis , variosque alios irritosque metus animo agitent .

14. Cum qua corporis conditione peculiaris nequitur hypochondriacorum psychologia ; cumque repente per fibras celeri inordinatoque motu , nervorum flaminum inordinatae cientur vibrationes , a mente haud regendae satis ; atque inter varias phantasiae turbas , series cogitationum male cohaeret : celerrimis vividisque ideis phantasia luxuriat , ut ingenii etiam vi acriore polleant , qua obiectum in omnibus notionum particulis constantius accuratiusque perlustrant ; nisi quidem imaginationis vis maior iudicium

rationemque perturbet (a) : haecque illa vis est, quam animum Entheon Poëtae vocant ; quae vivacissimis , quas fertilis imaginatio subministrat, ideis summos artifices reddit , atque ad optima quaeque opera excitat (b) ; languens languorem corpori animoque inducit ; donec excitata quacunque ratione , ad pristina opera excellentiora redeat : novit homines eruditos BOERHAVIUS (c) , qui in loco quodam sapientissimi erant , sed inde egressi , insaniebant prae melancholia , reduces iterum sapientes erant . Ita in contraria toties , mutato ordine idearum , animus trahitur , ut in omnia etiam animi pathemata excedat ; mox in risus cachinnosque leviusculo momento diffunditur , rumpantur , ut ilia Codro ; mox ad tristitiam lacrymasque facili e causa redit : homines scenicos , qui avidam plebem , risum movendo , auro emulgent , gestu faciles salibusque

## B 4

---

(a) Imaginationi indulgentes , attentione & iudicio minus valere *Conf. KLOEKHOF de morb. animi* p. 56.

(b) Maracum Poëtam Syracusanum , ex DONATO memorat Boerhave *de morb. nerv.* p. 406. , qui optima sua carmina non nisi furens & mente captus componebat , sed sedatus , nihil praestabat excellens .

(c) BOERHAVE l. c.

plenes, plerumque hypochondriacos esse, & sibi solis vix sufficere, tum demum ridiculos, quando ad officium redeunt, & confluxu hominum excitantur, adnotat BOERHAVE (a); addit HALLERUS celebre exemplum PEQUELINI de MOLIERE, qui aliis facetissimus, sibi tristis vitaeque pertaesus. Mox tacitis animi furoribus nonnisi hostium suorum, quos fingunt, damna necesse spirant, militumque fortissimorum ideas fabricant; mox data occasione, canes in aula iovis legatos apud PHAEDRUM adparente DIVI Maiestate, aemulantur. Impavidi nunc, molestiarum suarum impatientes, ultima sibi fata vovent expectantque; mox mortis imagine metuque pavidi, inter tristia sensorii communis nubila terentur, torquentur: amore nunc rapiuntur, nunc odio; animusque commissi criminis conscientia ac poenitudine lacrymis culpam expiat, sed ad idem mox facili occasione rediturus: qua in sensorii communis mobilitate rectiores probitatis ideae, quas constantius servant, intercurrentibus antiquis, queis adsuevere (b),

---

(a) BOERHAVE *prael. ad instit.* §. 327.

(b) Eae sunt, quas Poëta canit: *Naturam expellas furca, tamen usque recurret.*



1. iis certe, quas averfando diuturnas inter animi luctas sibi imprimunt, turbantur ideis; quas sub mediis pietatis exercitiis, variis motibus ac gesticulationibus totidem velut diabolos, quasi muscas, abigere velle videantur. Tanta saepe phantasiae luxuries est, ut alieno idearum ordini si avidius inhient, sibi in iis placendo, eas sensorio communi vividiores reddunt, in malenchioliam ipsam maniamque proximam sibi viam parent.

15. Hac corporis mentisque conditione sunt, qui victas dant manus, lectoque victas; corpus similibus malis debile, caussarum externarum, quas omnes sibi nocivas ominantur, serie, ipsiusque æeris liberioris usura eximunt; quæ sita vitæ in omni genere mollitiæ summa, turbas suas solantur; demumque sensim societatis humanæ officiis excussi, rectisque corporis & mentis usibus desueti, irritis pharmacorum dispensatoriis, suas inter curas medendique studia tabescunt, tenuisque propediem, ut credunt, relinquent exuvias, angelica mox chrysalide avolaturi. Advocatum describit GARBOE (a) per octo annos lecto affixum, quem sensim abf-

---

(a) GARBOE l. c. §. X.

que pharmacis , nisi solius rhei tenui ac repetita dosi . ad artuum suorum usus atque communis aurae pabulum reducendo , sola diaeta sanaverit . Alii dantur per plures annos lectis suis affixi , Medicorum consiliis oblucentes (\*) . Felicior fors aegro adfulsit , quem MEAD (a) describit : qui ingravescente morbo mortem sibi instantem denuntiat , iubetque igitur , ut moris est , campanam funebrem in templo , aedibus suis vicino , pulsari , quasi neniam suam ante supremam vitae horam audire volens ; campanarum autem pulsator , cum male rem agere videatur , iratus e lecto surgit , manibus suis modum rectius pulsandi monstraturus ; quod cum fecerat , totus sudoribus diffluens , ad lectum redit , mox

---

(\*) Quamplurimos Medicos cum hypochondriacis iniuncte satis procedere , observare possumus . Vel enim credulos nimis , remediis obruunt ; vel querelis crudeliter irrident , neque sensuum testimonio fidem adhibent ; qui , licet aegrotos , absque maiori causa , pavescere morbumque periculo plenum credere faciant ; non tamen ob id , mali nihil subesse , omneque disturbium ab IMAGINATIONE proficisci , docere possunt . Ipsa hic imaginatio nimium tenia , morbus est ; quem , si amica consolatio lenire potest , non physico destituitur illa principio , maleque a ridente Medico exasperatur .

(a) MEAD mon. & praecept. med. p. 149.

expiraturus . Vitam autem reddidit iste labor ;  
& convaluit .

### §. III.

Verum & ad morbi historiam pertinet ;  
subiecta morbo hypochondriaco obnoxia , eiuf-  
que mutationes varias , quas fida crebraque  
observatio demonstrat , consideremus .

1. Quanquam huc praecipue tenuioris cor-  
poris habitus pertineat , nativa nervosi flaminis  
partisque solidae teneritudine constans ; cum  
qua a parentum simili morbo toties traduce  
haereditario diffunditur morbus : dantur ni-  
hilominus

2. Teste TRALLES (a) lacertosi , robusti  
torresque viri , nihilominus hypochondriaci ,  
dantur sanguine succisque pleni , aequae ac ma-  
cilentis ; dantur exercitati mobilique vitae ge-  
neri addicti perinde , ac sedentarii otiosique ,  
hac adfecti aegritudine , sed praecipue huc per-  
tinent , si recte attenderis , tum ii ,

(a) TRALLES *de Opio* . P. III. p. 37.

(\*) Quadratos viros , aratrum ducentes , & ego  
plures vere hypochondriacos , vidi : viderunt alii  
practici .

3. Quos delicatior parentum sinus a teneris mollissimo vitae genere fovit, atque a quovis caussarum externarum liberiorisque ac frigidioris aurae adflatu sollicitè custodit non tam, quam simul prima animi, in mala propensi, licentiorisque vitae germina aluit explicuitque. Tum ii,

4. Qui sub rigidiore Praeceptorum imperio teneram iam aetatem studiis meditationibusque manciparunt, vitamque non nisi severioribus studiis terunt. Tum ii,

5. Qui primos pubertatis stimulos secuti, vel vaga venere, vel, quo non aliud turpius perniciosiusque, quod Cl. TISSOT describit, scelere, vel praemature matrimonio, molliora adhuc systematis nervosi stamina pessumdant. Tum ii,

6. Quos duro egestatis iugo, vel alia quavis e causa perpetuas inter curas animique moerore tenet necessitas. Tum ii,

7. Qui e vitae norma, quam sine fraeno duxere, per omne libidinum genus vagam; nunc continuo vel religionis ductu, vel initi matrimonii honore imperiove; vel adsecuti muneris gratia, virum strenuum severumque agunt, suisque inclusi cubiculis ad fornacis angulos vel suis negotiis, vel devotionis etiam exercitiis vacant.

## §. IV.

Mutationes morbi addi oportet, quas experientia demonstrat. I. Morbus a nativa debilitate nervorumque teneritudine natus, licet nunquam perfecte tollatur (a); mitescit saltem adultiori aetate, atque mutato vitae genere, priorumque errorum emendatione fere cessat (b).

II. Aliis in podagram demum fatiscit morbus (c).

III. Circa annum aetatis quinquagesimum in scorbutum vel arthritidem mutari, observat LIEUTAUD (d).

IV. In phthisin nervosam maiori gradu mutari, observationes Franconicae adnotant (e), testaturque MORTONUS (f); quae demum in phthisin pulmonalem abiret; phthisi etiam pulmonali obnoxios hypochondriacos, eaque a pri-

(a) WHYTT l. c. p. 249.

(b) WHYTT l. c. p. 49. BILGUER *von der Hypoch.* p. 906.

(c) BILGUER p. 903. 907. LUDWIG *inst. Cl.* §. 556. LOESECKE *Th. Spec.* p. 209.

(d) LIEUTAUD *Synops. prax. med.* p. 89.

(e) *Fraenck. Samml.* Vol. VIII. p. 132. 146.

(f) MORTONUS *phthisiol.* p. 92.

stina anxiaeque malorum serie liberari, adnotant Cl. viri (a).

V. Aliquando per exanthemata (\*), glandularum subcutanearum suppurationes, solvi visus est morbus (b).

VI. Alios deiectiones atrabilariae vel vomitus iuvare (c).

VII. Notandum huc pertinet, hypochondriacos minus inflammationibus, aut & febribus acutis obnoxios esse, quod observat Cl. WHYTT (d); imo pesti, aut aliis epidemicis morbis

(a) FRACASSINI l. c. p. 383. WHYTT l. c. p. 248. HILL. *von der Hyp.* p. 17. 18.

(\*) Quadragesimo suo anno, Vir nobilis, iam plurimo tempore ex hoc malo miserrimus, sanitatem mox a maculis lividis, latis, copiosissimis, manus praecipue obtegentibus, recuperavit. Has maculas usque ad septuagesimum quintum annum eo quidem cum successu eflorere vidit; ut quotiescumque minor esset, vel retrocederet illarum eruptio; mox pristina symptomata & inquietudinem magnam pateretur; facta vero nova ad cutem depositione, optima mox iterum gauderet valetudine.

(b) WHYTT l. c. p. 114. HILL. l. c. p. 23.

(c) LUDWIG. l. c. §. 556. HAEN *rar. med.* P. IV. p. 30. KAEMPF *de infarctu vas. ventr.* Vol. III. HALL. *Diff. pr.* p. 121.

(d) WHYTT l. c. p. 250.

rarius obnoxios, sed correptos acrius laborare \*  
BILGUERUS adnotat (a).

### §. V.

Alia aliorum celeberrimorum virorum experimenta observationesque huc pertinent. Sanguinem ipsum hypochondriaci analysi Chemicæ subiecit Cel. COLBATCH, referente HALLE-RO (b); qua constitit portionem urinofam sanguinis fuisse maximam, oleosi principii minorem rationem (c), carbonis minus (d) detectum fuisse. Alii sectiones cadaverum eorum, qui hoc morbo obiisse fuerunt visi, referunt: BONETUS (e) sanguinem atrum in variis partibus collectum; item omenti vitia describit; it. vasa coeliaca, mesenterica præcipue affecta (f); varices in mesenterio, variasque viscerum lases, hepatis præcipue ac lienis varias corruptelas refert (g); diversas viscerum obstructions mutationesque

(a) BILGUER l. c. p. 904.

(b) HALLER *Elem.* T. II. p. 104.

(c) HALLER l. c. p. 109.

(d) HALLER l. c. p. 111.

(e) BONETUS *Sepulch.* p. 226. T. I.

(f) BONETUS l. c. p. 231. 242. T. I.

(g) BONETUS l. c. p. 294. 301. 308. 309.

adnotat WHYTT (a) ; longam earum seriem LIEUTAUD (b) , describit ; in qua illa notatu dignior , qua venam portarum vidit adeo dilatam & ampliata , ut genuini intestini molem ac faciem adsequeretur : similem VP. ramum sub coli intestini fine pollicis crassitiem aequasse ; vidit KUPFERUS (c) ; quam eandem venarum mesentericarum dilatationem BONETUS (d) describit ; vasa mesenterii intestinorumque atro sanguine infarcta , nullam caeterum visceris laesionem , intestinorum gracilitatem flaciditatemque , colorem varie mutatum , describunt observationes Franco-ricaë (e) ; imo & saepe nullas viscerum observari mutationes adnotat WHYTT (f) ; uti crebrae infelicissimorum illorum sectiones docent , qui toties a nece , sibi met illata , cultro anatomico legalique examini , ad determinandam ex viscerum conditione melancholiam , subiici , traducta a VVbus stricta lege solent .

---

(a) WHYTT l. c. p. 152.

(b) LIEUTAUD l. c. p. 91.

(c) KUPFER *de volvulo sanguineo* Vol. III. Diff. pr. Hall. p. 374.

(d) BONETUS l. c. p. 227. 242.

(e) *Fraenk. Anmerck.* Vol. VIII. p. 147. 155.

(f) WHYTT l. c. p. 168.



## §. VI.

Haëtenus experientiae : queis rationes medicæ demum securius innitantur . Atque si phœnomena descripta , quæ proprie strictiusque ad morbum spectant , qui ex immenso symptomatum numero morborum ilias quibusdam audit , recte perspiciamus ; certe nonnisi spasmodica generisque nervosi affectione esse fundata , apparet ; si morbi non per viscera sola abdominis , sed per universum corpus dominium , eadem fere utrobique concussionis subitæ phœnomena ( §. II. n. 3. 11. ) si palpitacionis nunc abdominis ( §. II. n. 7. ) nunc pectoris & capitis ( §. c. n. 12. ) nunc cutis universæ ( §. c. n. 4. ) diffusos sensus ; si immensam quandam morbi mutabilitatem , qui a summis terroribus facile ad lætitiæ functionumque naturalem ordinem redit ( §. c. n. 3. 8. 14. ) ; si affectuum animi imperium ( §. c. n. 10. ) in hoc morbo vel mutando vel producendo ( §. III. n. 4. 5. 6. 7. ) si causas potissimum in nervos agentes ( §. III. n. 4. 5. ) si morbi mutationes spontaneas ( §. IV. n. I. ) atque in phthisin nervosam ( §. IV. n. IV. ) exitum ; si denique nullas detectas viscerum mutationes ( §. V. ) ; si alia morbi phœnomena , solo nervorum systemate comparentia , sedulo comparaverimus . Rectius

*Op. Med. Vol. I. C*

certe Nevrophatiam appellari mavult MORAGNUS (a); atque morbum solum spasmodicum, a spirituum ataxia pendentem, statuit FRACASSINI (b) it. FR. HOME (c), aliique, quo inordinatis spirituum motibus, spasmodicis fibrarum contracticium stricturis, plus minusve diuturnis constantibusque, illa phoenomenorum effingitur varietas, ut modo ventriculi intestinorumque ac praecipue coli (d) vel duodeni (e) spasmis, inclusi, qui semper praesens est (f) aëris, rarefactique immenso volumine, summa diaphragmati, hepati, vasisque omnibus abdominalibus iniuria cum ingenti anxietatis sensu inferatur; inde dyspnaea (§. II. n. 10.) angu-

(a) MORGAGNUS *de sed. & caus. morb. Ep. XLV. n. 18.*

(b) FRACASSINI l. c. p. 240. 245.

(c) HOME *princ. med.* p. 223.

(d) Coli tensionem praecipue accusat LUDW. *inst. cl.* §. 553. it. PITCARNE *Elem. medic. Methodemat.* p. 191.

(e) Duodenum accusat Zach. VOGEL *Kranckengeschichte* P. I. p. 74. SCHMIEDEL *de duod. dign.* §. XII.

(f) Facili ingestorum, cumque liquidis nostris mixtorum fermentatione ac putredine nascitur; uti salivam, liquoresque ventriculi & intestinorum aëre valde elastico scatere demonstravit HALES. *haemast. Exp.* 23. §. V. cui experimenta WALLAEI, SCHUYLI apud LISTERUM conveniunt.

stiori pectoris area nascitur: inde spastica tensione per oesophagum porrecta, anginae spasmodicae sensus ( §. II. n. c. ) inde pylori vel duodeni eodem vitio ingestorum vomitus ( §. II. n. 7. ); qua immani intestinorum distensione, nunc constrictione spastica, alternis vicibus per totum canalem citissime saepe excurrente, flatuum non tam murmura obrepunt, globosque abdominis volvunt revolvuntque, quam vasorum tum per intestinorum tunicas repentium, tum vicinorum truncorum compressione, angustatione, inter varia vitalis circuitus obstacula, sanguis in vasa liberiora maiori momento pellitur: inde capitis artuumque incalescentia subita alternansque, vasorum intumescencia ( §. II. n. 4. ) faciei rubor saepe subitaneus, vasorum dilatatio, ut ampliatis orificiis sanguinem fundant, cum crebra saepe haemoptoë ( §. II. n. 10. ) aliove haemorrhagiae genere; cordis ipsius auctus labor ac palpitatio, pulsationes in variis partibus enascuntur (a): inde in venis abdominalibus congestus sanguis, vasorumque sensim maiore atonia cummulatus, varia haemorrhoidum molestia (b),

## C 2

---

(a) Ab obstructionibus repetit MORGAGNUS l. c. Ep. XXXIX. n. 19. a convulsionibus l. c. n. 20. it. HALLER *Elem.* T. II. p. 246.

(b) Haemorrhoides a solis saepe flatibus recte dedu-

Intestinum Rectum, vicinas perinaei partes, ipsam vesicam urinariam ( §. II. n. 6. 11. ), imo altiora intestinorum loca mulctat; quorum vasis dilatatis, sanguis in intestina effusus, moraque corruptus, sensim grumorum foecisque atrabilariae specie effunditur ( §. IV. n. VI. ); indeque tanta venarum dilatatio observata, sanguinisque atri conditio pendet. Vasorum spasms crebrae illae tum in maioribus vasis pulsationes, aneurisma aemulantes, tum in minoribus, per ambitum corporis dispersis flagrant ( §. II. n. 7. ); alternosque illos caloris frigorisque sensus pariunt (a); visque motrix, quae in fibra musculari residet, tantopere irritata, in toto eiusdem systemate diversa motuum producit phaenomena, modo concussionis subitae ( §. II. n. 3. 11. ) modo muscutorum tractionis inaequalis, vel eiusdem saltem sensus ( §. II. n. 12. ); in ventriculo auctum saepe appetitum (b) ( §. II. n. 8. ); alias in aliis partibus turbas, ac praeci-

---

gunt *Fraenck. Anmerck.* Vol. VI. p. 312. Vol. VII. p. 506. it. MORGAGNUS l. c. *Ep.* XXXII. n. 10. Duodeni affectionem hic latere toties, *conf. Zach. VOGEL* l. c. p. 74.

(a) WHYTT l. c. p. 169.

(b) Ventriculi pathemata a turbata fibrarum actione repetit FRACASSINI l. c. p. 258.

pue capitis adfectiones (a) ; secretionis renalis ( §. II. n. 9. ) nunc auctae , nunc imminutae phoenomena efformat : Atque turbata sanguinis abdominalis circulatione , maior vis vasis spermaticis illata , copiosiorem seminis secretionem , generisque nervosi irritati mobilissimique ( §. II. n. 14. ) stimulos addit ( §. c. n. 8. §. III. n. 5. ) ipso usu , maioreque vasorum iniuria , cum crescente in dies debilitate incremente ; quae veneris phoenomena semper imbecillitatem nervosi generis , morbos hinc spasmodicos , aut praegressos , uti Arthritidem , Nephritidem , Epilepsiam , aut comitantes praecipue sequi , observat GAUBIUS (b) ; eademque ratione in rabie canina , quae meris phoenomenis spasticis consistit , hos canum fere lascivientium mores adnotat LISTERUS (c) : eadem hic phoenomena , quae in canibus exsecto liene visa , adplicat BOERHAVE (d) .

## C 3

---

(a) WHYTT l. c. p. 173.

(b) GAUBIUS *pathol.* §. 821.

(c) LISTERUS *de variol.* p. 6.

(d) BOERHAVE *prael. ad inst.* §. 327.

## §. VII.

Sed quae demum illa nervorum mutatio, unde tanta fibrarum vis, motuumque turbæ pendent? Quae quanquam ex ignorata hæcenus intimiore nervorum Encephalique fabrica, ignotaque plane spirituum materie indoleque, in tam abdito naturæ sinu, atque inscrutabili immensæ subtilitatis arcano haud pateat: attamen observatis constat, hunc uti moruum sensuumque fontem, ita mutatum, earum functionum vitia, a summa immobilitate ac stupore, successiva mutationum scala, ad summos sensibilitatis gradus inferre. Tactum ipsum aliosque sensus, mutatis nervis, ita perverti, exemplis constat, ut imminui pervertique ita visus fuerit, ut se ipsum vix cognoscere potuerit homo (a); nunc perpetuus quasi frigidae auræ sensus incommodus esset; cutisque tam sensibilis redderetur, ut subtilissima tela pulcherrimaque Belgarum lintea aspera visa sint; neque holoserici tactus, neque Persici mali tenera pubes ferri potuerit (b): in

---

(a) Exemplum in hysterica refert VANDERMON-  
DE *Recueil periodique* T. VI. P. I. Art. IV.  
Conf. GAUBIUS *Patbol.* §. 693.

(b) Exempla colligit HALLERUS *Elem.* T. V.  
p. 95.

morbis spasmodicis universam fere corporis superficiem ita tenerefcere , adnotat GAUBIUS (a) , ut vel intentatus modo attractus etiam formidinem incutiat : tantam a discendente dolore hysterico carniū teneritudinem , quae tangi recuset , relinqui , observat SYDENHAM (b) : Hydrophobia certe ad summum sensibilitatis augmentum redit ; ut absque rabie canina in morbis nervosi generis observata sit (c) a solo terrore (d) it. a colica pictonum (e) aliisque morborum causis , in genus nervosum praecipue agentibus , singulari certe nervorum mutatione , quae non tam aquae aut cuiusvis liquidi , quam aëris lucisque tactum intolerabilem horrendumque reddit (f) : Eadem in omni

(a) GAUBIUS *Pathol.* §. 694.

(b) SYDENHAM p. 269. 491.

(\*) Monachum Hypochondriacum novit ill. *Weikardus* , qui , dum manum dextram cum sinistra per aliquod tempus fricabat , tandem rursus vehementes expellere incipiebat , qui & post frictionem aliquamdiu continuare solebant : quod quidem experimentum pro voluntatis arbitrio repetebat . Ipsi *Weikardo* , hoc pridem malo adfecto , dum femora fricabat , rursus mox edere facile erat. *Vermischte Medicinische Schriften* , II. St. S. 11.

(c) MEAD T. II. p. 111.

(d) *Conf. Comment. in sc. natur. & med. gestis* T. XI. p. 55.

(e) TRONCHIN *de Colic. pic.* p. 18. 49.

(f) Aerophobos testatur MEAD *de venen.* pag. 104.

genere sensuum mutationes, mutatis nervis, dominantur: Olfactum acutissimum caninumque in hydrophobia BORELLUS refert (a); eundem in femina a morbo convulsivo natum refert Promptuarium HAMBURG. (b) ut amisso visu, eodem discernere homines potuerit: Mirabile plane phoenomenon est foetor perpetuus, a sola nervorum irritatione in hypochondriis, quod MORGAGNUS (c) describit: Visus obscuracionem antecedere paroxysmum hystericum adnotat HEUERMANN (d): Ea saepe sensibilitas corpori flagrat, ut levi cathartico vel emetico, vel sola cantharidum adplicatione, vel levi quovis terrore in motus convulsivos incidant (e): feminam refert BOYLE (f) sono pulsatae cam-

SWIETEN T. III. p. 555. LISTER *de morb. chr.* p. 41. MORGAGNUS l. c. Ep. VIII. n. 28. 29. HAMB. MAG. Vol. XX. p. 548. Vol. XII. p. 401. 409. Lucis impatientiam testatur DESPREST *vid. Goetting. Anzeig.* an. 1758. p. 1152. MEAD l. c. HAMB. MAG. Vol. XII. l. c.

(a) BORELLUS Cent. III. obs. 68.

(b) HAMB. MAG. Vol. XX. p. 301.

(c) MORGAGNUS l. c. Ep. XIV. n. 28.

(d) Foetoris perpetui, ab irritatione per *taeniam* in cavo intestinali, exempla observavi, & ad signum Vermium ille pertinet.

(e) HEUERMANN *phys. T. II. p. 990.*

(f) WHYTT l. c. p. 86.

(f) Conf. WHYTT l. c. p. 87.



panae vel alio graviore ; in summam semper syncopen delapsae . Quas licet nervorum mutationes ratio humana adsequatur neutiquam , effectibus certe manifestis constant perversae mutataeque sensibilitatis partium ; quae maximam phaenomenorum hypochondriacorum partem non tam , quam ipsam causam proximam sibi vendicat ; unde potissimum supra dicta morbi symptomata oriuntur (a) . Inde solidarum CH. partium vitia maxima parte fundantur , quae ad explicandam morbi originem requirunt cel. Viri : fibrae solidae debilitatem atque atoniam , relaxatum primarum viarum robur accusant (b) , causarumque relaxantium classes , uti calidorum potuum abusum advocant . Quanquam autem relaxationis & atoniae vitio omnino celerrimus ille partium motus , summaque in eum proclivitas posito stimulo , repugnet , quae in nimia laxitate adest ; atque contradicat torosi robustique & exercitati corporis , nihilominus hypochondriaci , observatio §. III. n. 2. , morbique saepe sine reliquis fere corporis noxis , diutissime

(a) Mutatae perversaeque sensationi papillarum in ventriculo dispositarum famem & appetitum auctum adscribit WHYTT l. c. p. 181.

(b) CARTHEUSER *path.* P. II. p. 244. CHEYNE *act. Edinb.* T. VI. p. 134. 136.

protracti diuturnitas, demum sensim disprens ( §. IV. n. I. ); debilitatem tamen, sed eius peculiare genus in fibra motrice accusaverimus; quod cum generis nervosi vitio connexum, nimiam irritabilitatem, teneritudinem, mutatam perversamque sensibilitatem, eiusque specifica vitia sistit (a); quæ ab ea certe, quæ a ventriculi inflammatione aliisque morbis oritur, distinctissima, toties iis læditur commoveturque, quæ maxime innocua, insipida, omnique stimulo carent; commode acriora, aromata, spiritus calidos, quin & cum solatio perfert, absurda toties adpetit, reliqua nauseat. Atque licet hæc solidæ partis conditio iis nervorum vitiis per universum corpus porrigatur; ut recte quidem morbus universalis, non solum hypochondriorum appellari debeat (b); præ reliquis tamen vel incipientis morbi, vel adultæ etiam, potior in canale intestinali sedes est; cuius perversa sensibilitate inordinatisque motibus deflagrat (c), licet absque digestionis vitio

---

(a) WHYTT l. c. p. 83. 84. temperamentum omnino irritabile, constitutio corporis tænea, macra, pallida huc potissimum refertur a BILGUE-RO l. c. p. 252.

(b) FRACASSINI l. c. p. 237. 241. 244.

(c) In ventriculo sedem præcipuam ponit Fr. HOFFMANN *med. consult.* P. I. p. 216. 292. in ventriculo & intestinis WHYTT l. c. p. 96.

(a) ; quae etiam duriora melius commodiusque ; quam molliora digerat ( §. II. n. 1. ) . Recte FRACASSINI (b) morbum solum spasmodicum a spirituum potius ataxia , quam viscerum coctioni inservientium dyscrasia pendere , adserit .

### §. VIII.

Fluidorum vitia an mali huius vel produ-  
cendi vel fovendi partem sibi vendicent , dissen-  
tiant Cel. VIRI ; uti FRACASSINI (c) nullum  
in fluidis vitium concurrere , pluribus differit  
momentis . Verum , si liquidi nervei in ence-  
phalo secretio leges secretionis universales reli-  
quorum in C. H. humorum sequitur ; ut positis  
definitis vasorum secretoriorum conditionibus ,  
tum pro copia advehti arteriosi sanguinis , tum  
qualitate variet ; atque adeo eiusdem determinata  
copia ac dotibus naturalibus , spirituum vigor ,  
eiusdem inopia , debilitas , sed & qualitate mu-  
tata , liquidi nervei vitiosa indoles sit (d) ; qua-  
tenus ut humor secretus , ex mixtione humorum

(a) WHYTT l. c. p. 97.

(b) FRACASSINI l. c. p. 241 244.

(c) FRACASSINI l. c. p. 245.

(d) Conf. LUDWIG de contentione studiorum oec-  
deranda §. IX.

universali pendet, huiusque depravatae vitio imbutur. Recte ita BOERHAVE (a) a tenuitate sanguinis maiorem ad functiones laesas cerebri cerebellique dispositionem inferri statuit; eademque ratione turbatam sanguinis crasin, & deficientem densitatem inter affectuum nervosorum causas retulit WHYTT (b); uti videmus quotidie teneras puellas virosque, quibus hoc nimiae tenuitatis vitium in sanguine obtinet, a levissimo animi adfectu turbari, a minimo fragore totos contremiscere, aliaque debilitatis nervosae phaenomena prodere. Adeo sanguinis aut & reliquorum humorum vitia haud esse excludenda e causarum classe, adparet; quatenus aut ipsius liquidi nervei secretioni servantur, aut per tenuissima vasa, ubique nervorum non tam involucris, quam ipsi nervorum substantiae immersa (c), varia nervis irritamenta adfricant: dispositionem inde corporis scorbuticam inter causas occasionales refert WHYTT (d). Adfinitemque hos inter morbos ipse saltem ex

(a) BOERHAVE *de morb. nerv.* p. 154.

(b) WHYTT l. c. p. 138.

(c) BOERHAVE *de morb. nerv.* p. 57. HALLER *elem. T. IV.* p. 189. HEUERMANN *Chyr. T. I.* p. 38.

(d) WHYTT l. c. p. 115. 294.

effectu FRACASSINI (a) statuit ; atque in scorbutum facile terminari demum Hypochondriasin constat ( §. IV. n. III. ) ; ipsaque COLBATCHII in sanguine hypochondriacorum experimenta ( §. V. ) conspirant , quae & tenuitatem & acrimoniam testantur . Pertinet huc certe acre in sanguine genitum , atque inter causas proëgumenas refertur (b) ; peculiarem lymphæ morbosæ indolem nonnunquam subesse , statuit LIEUTAUD (c) ; inde morbos cutaneos repressos (d) , it. fonticulos , ulcera antiqua siccata (e) ad ea mali genera conferre , observatio testatur ; inde & felici naturæ molimine , natis in cute exanthematibus solvitur , vel mitescit morbus ( §. IV. n. V. ) : eadem ratione a febribus diu durantibus , sibi que relictis , ea in solidis fluidisque partibus vitia inducuntur aliquando , quae succedenti hypochondriasi faveant (f) ; dum repetito febris attritu , calorisque vi , & solidæ & fluidæ partes exsolvuntur sensim , atque a naturali cohaesionis gradu ac

(a) FRACASSINI l. c. p. 368. PITCARNE l. c. p. 192.

(b) WHYTT l. c. p. 108.

(c) LIEUTAUD l. c. p. 442.

(d) HILL l. c. p. 23.

(e) WHYTT l. c. p. 115. 137.

(f) WHYTT l. c. p. 84.

specifica crasi deiciuntur (a). Inter causas remotas adeo eae referuntur omnes, quae densitatem specificam sanguinis, naturalemque liquidorum tenuiorum crasin pervertunt; unde vasorum viscerumque functio, imminuta coctionis opera, partis solidae robur fatiscit, visque ipsa nervea, quae in singulis partibus definitis & specificis sensationibus praestit, depravatur, facillimeque alienis oscillat stimulis: quorum haemorrhagiae nimiae per partum abortumve, vulnera, V. Sies nimis crebrae, it. vehementiores aliae per vomitum alvumque evacuationes referuntur; iisque de causis a puerperio vel abortu frequens malum observavit FR. HOFFMANN (b), it. SYDENHAM (c). Eadem ratione diaetae vitia varia id agunt, ut defectu probae nutritiae gelatinae, tum spirituum materie depauperetur sanguis, tum proba e crasi deficiat, tum fibrae solidae ner-

(a) HALLER *elem.* T. II. p. 97. 106. 114. 133. Sanguinem a febre saepe resolvi. Confer. SENAC *de recondita febris natura* p. 250. Sanguinem reddi scorbuticum. HEUERMANN *Be-merck.* P. I. p. 73.

(b) FR. HOFFMANN *med. rat. syst.* T. II. p. 112. Testatur WHYTT p. 84. HOME *princ. med.* p. 222. Crebrae purgantiae ad hunc morbum disponere notat FR. HOFFMANN *med. consult.* P. I. p. 292.

(c) SYDENHAM p. 536.

veaeque vires cadant : Diuturnam hinc a carnis  
 bus abstinentioniam incusat SYDENHAM (a); diae-  
 tam mere vegetabilem CHEYNE (b); abstinentioniam  
 inediaamque WHYTT (c), alique : qua  
 ipso vitali attritu dissolvitur compages sanguinis,  
 acre salinum oleosumque evehitur : victu vegeta-  
 bili liquida animalia, ipsamque crustam inflam-  
 matoriam sanguinis dissolvi, suis evicit experi-  
 mentis Theoph. LOBB (d); ut perpetuum inde  
 effectum in mole corporis imminuta (e), debi-  
 litate (f), imo paralytica adfectione inducta,  
 viderit. Fructuum horaeorum eadem ratio ac  
 noxa est, in dissoluto ab abusu sanguine (g),  
 ipsoque naturali, quod a muco fibras involvente  
 est, munimine nimis absterfo (h), aucta sensu-

(a) SYDENHAM p. 504.

(b) CHEYNE *act. Edinb.* T. VI. p. 28.

(c) WHYTT p. 312. HOME l. c.

(d) *Th.* LOBB *de calc.* p. 34. HALLER *elem.* T. VI. p. 200.

(e) *Th.* LOBB p. 131.

(f) *Th.* LOBB p. 234.

(g) Ex immodico fructuum horaeorum usu serum sanguinis viridissimum vidit HUXHAM P. III. p. 69. multi ex fructibus horaeis vim solventissimam testatur *Abhandl. der Naturforschenden Gesellschaft. in Zurch.* P. I. p. 282.

(h) Hinc diarrhaeae a succo fructuum maxime sa-  
 ponaceo HUXHAM l. c. p. 64.

bilitate (a); queis affectibus, accedente aëris, qui copiosus inest (b), per fermentationem evoluti, immani distensione, hypochondriacis plurimum nocent (c); atque in plebe maxime, horum uti & musti pomacei abufui inhiant, ad hunc morbum producendum conferunt. Sacchari caedem noxae sunt, cuius vis insignis saponacea (d) eisdem in effectus (e) conspirat; atque uti a molliore vita vix abest, quin delicatioris gulae a teneris iamiam annis delicias perpetuo comitatur, ita merito has inter causas pertinet (f): uti dulciorum omnium, saccharatorum, mellitorum effectus nervis infestos, infantibus, feminis, hypochondriacis, hystericis maxime obesse, GAUBIUS testatur (g). Acidæ ipsius acrimoniae, a cibo vegetabili natae, si liberior dominatur, is effectus constat, ut bilem aliosque influentes in digestionis operam succos enervet

(a) Colica hinc saeva. TRONCHIN *de colic. pilet.* p. 36. HUXHAM p. 60. 61.

(b) HALLER *elem.* T. VI. p. 222.

(c) BILGUER l. c. p. 186.

(d) GERHARD *m. m.* p. 215. 237.

(e) In sanguine soluto exp. SCHWENNII est *haec* *matel.* p. 189.

(f) ZIMMERMANN *von der Erfahrung* P. II. p. 282. it. BICKER *vid. Goetting. Anz. an.* 1768. p. 143.

(g) GAUBIUS *pathol.* §. 470.



(a); sed & ultra primas vias, uti in debilibus fit (b) eluctata, ipsum fibrae terreae elementum dissolvat sensim, cum dictae haecenus debilitatis, in solidis etiam invalescentis, effectu (c). Varia alia diaetae vitia sunt, quae, vel ventriculi vires enervando, vel eius specificam pervertendo sensationem, vel ipsorum liquidorum naturalem crasim turbando, agunt: Potuum certe nimiorum, spirituosorum haec vis est, qua tum a crebra distensione languet fibra muscularis, tum papillarum nervearum sensus crebro alienoque turbatur stimulo, tum chylo, nimis diluto, hoc potuum gurgite, quin vires chylopoieticas expertus satis subactusque fuerit, in sanguinis orbitam praecipitato, crudo sanguis humore inundatur: quod vitium, licet Veterum Germanorum robore subactum facile, aliena nunc Recentiorum mollitie, quae tantopere a Veteribus descivit, retento bibendi more, absque noxis demum hypochondriacis non perferitur; debilitatem saltem insignem tremulis manibus prodit, donec adsueto hesterni poculi sti-

*Op. Med. Vol. I. D*

(a) GAUBIUS *pathol.* §. 325. HUXHAM P. III.  
p. 66.

(b) HUXHAM l. c. p. 14.

(c) MACKBRIDE *Versuch* p. 163.

mulo animetur: accedit nimia ingestorum moles, victus lauti opiparique genera (a), ac frequens ille maxime aromatum ac gelatinarum ex utrifque Indiis & omnium animalium edulium genere concentratarum usus; quo non tam intestinorum vasorumque omnium systema gravatur debilitaturque, quam naturalis sanguinis crasis pervertitur, atque intimius acrimoniae eo genere imbuitur, aequae composito, ac cibi solent arte coquinaria componi: Accedit vita sedentaria, plerumque accusata, quae exclusis circulationis venosae subsidiis, quae ab actione muscutorum pendent (b), sanguinem in minoribus vasis congerit; naturales, quae a motu sunt, dotes pervertit; atque inertiori demum systematis VP. sinu accumulat, vires chylopoiescos, porrecto ubique infarctu, accumulata cruditate, enervat: qua eadem ratione ipsos etiam opifices, mulieres, hypochondriasis obnoxios reddi, BILGUERUS testatur (c). Potuum calidorum abusus huc spectat, quo infanum non tam teneritudinem caloris perpetuo quasi incubantis opera fovere, quam omnes fere in adultis aut ventriculi, aut

---

(a) FRACASSINI l. c. p. 306.

(b) HALLER *elem.* T. II. p. 326.

(c) BILGUER l. c. p. 131. 132.

aliarum partium morbosas adfectiones , atque frigoris potissimum in ventriculo sensum solari , atque calefacere in meliorem digestionem continent : sed certe , uti frigus illud a laxitate est ; ita eo medelae genere eo increfcit magis ; quo certius constat , aquam calidam omni phoenomeno inter emollientissima remedia pertinere ; quo effectu per totum demum corpus porrecto , fluor albus , cachecticus pallor , leucophlegmatica mollities , coctionis turbatae vires , ventriculi intestinorumque languor , flatuum obmurmurantium perpetuae molestiae , phlogoses hypochondriacae nascuntur : Coffeae abusus forte maiores noxas habet , dum acrimoniam ab oleo empyreumatico , demum eliquato per ignem resinoso principio , genito , subtilissimam penetrantissimamque iungit , quae vasis minimis ipsisque nervis stimulos adplicat , vix eluendos ; quos manuum tremor , singularis diffusa per corpus irritabilitas , phlogoses crebrae , sanguinis , ut vocant , ebullitio , aliaeque & animi anxii phaenomena fat docent .

## §. IX.

Quanquam has causas inter remotiores pertinere , haud difficulter adpareat ; unde solidarum partium maior sensum mollities , teneritudo ,

debilitasque ingeneratur; potissimae nihilominus sunt, quae genus nervosum proximiorie feriunt iniuria; absque qua varii quidem morbi, viscerumque abdominalium laesiones, vix veri illi, qui ad hypochondriasmum pertinent, spasmodici adfectus gignuntur. Huc in primis acre illud refero, adeo nervis familiare, arthriticum podagricumque; quod depositum, sedem in nervis figit amatque (a); ita vitali adhuc liquidorum orbita circumvolutum, nervos miris toties phoenomenis lacessit, eorumque officia turbat, adfectus nervosos ventriculi, coctionis turbas parit (b): Inde hypochondriasis, erumpente podagra,

(a) CASTELLI *exp.* §. 64. 65. 66. TRALLES *de op.* p. 320. 322. HALLER *apolog. contr.* HAEN p. 20. HEUERMANN *chir.* T. I. p. 49.

(\*) A solo ACRI ARTHRITICO, in nervos abdominis agente, neque ad externas corporis partes, ad articulationes, adhuc deposito, hypochondriacum malum, ut a causa proxima, derivat ill. *Weikardus. Vermischte Medicinische Schriften* I. St. S. 175. 6. — In quamplurimis saltem eiusmodi aegrotis, arthritici mali vel vestigia inveni, vel, post certum aliquod tempus, artuum dolor accedens coetera mala solvisse videbatur, donec cessante illo, haec denuo recruderunt. Vix tamen simplicem adeo mali, tot diversis hominibus communis, causam semper esse, asseverim.

(b) WHYTT p. 121.

mitescit ( §. IV. n. II. ) ; quam metastaticam PLATNERUS (a) considerat . Aliae ac potissimae ipsius mentis adfectiones sunt , quae in nervos primario , nervorumque origines agunt : Quatenus quotidianis lucubrationibus atque intensiore mentis adplicatione in artium ac scientiarum studio , vel quocunque alio munere vitam exigunt , continuo animi labore terendam : sed medullares fibras , encephalique compagem his mentis actionibus mutari patique , determinationem sanguinis huc augeri , incalescentis a studio capitis phenomenon , tensionis sensus , gravitas percepta , defatigatio aliaeque molestiae , vim nervis illatam docent ; quaecunque sit pro varia , quam fingis , hypothesi , seu nimiam fibrarum cerebri dilatationem , a maiori liquidorum impulsu factam , quam maior debilitas mollitiesque excipit , impressionibus minus resistens (b) ; seu tensionem in fibris medullaribus (c) , aut arrectionem , partibus nervosis communem , aut tremorem , oscillationem , aut quae-

D 3

---

(a) PLATNER *art. med.* §. 463.

(b) HALLER *not. ad prael.* BOERH. §. 415:  
lit. p.

(c) FRACASSINI p. 297. 301.

cunque motus genera (a) concipias : adparet saltem , vim eam pro intensione adplicatione ac diuturniore , summis demum gradibus intendi ; inde fibrae nerveae debilitas , facillima oscillandi vis celeritasque , mobilitas ingens , flexilitas nimia inducta , mutata in variis partibus sentiendi ratio , & quae his iungitur , idearum , menti obversantium , conditio , summa vivacitas , sed & aberratio facilis , atque aliena combinatio consequitur : Debilitatem nervosam variosque inde pendentes morbos , vires digestionis prostratas (b) , praematurum senilem marasum inde repetit LUDWIG (c) ; qui effectus eo promptiores nocentioresque sunt ; quo vehementior cogitationum in eandem rem intentio est , non interrupta ; qua pars una sensorii communis violentiam patitur haud minorem , quam muscoli singulares fortiter diuque contracti ; stamina eius tam pertinaciter arrigi , credit GAUBIUS (d) , ut remitti dein nequeant , aut oscillandi finem non faciant , acrius commota , aut nimium distraeta , tenorem denique amittant .

---

(a) Sensus internos motu fibrarum exerceri , probabile est . ZIMMERMANN l. c. P. II. p. 502.

(b) ZIMMERMANN l. c. p. 505.

(c) LUDWIG *de studiorum contentione* §. II. VIII.

(d) GAUBIUS *pathol.* §. 529.

Iidem huc pertinent, qui a teneris severioris disciplinae ac religionis praeceptis imbuti, absque rectiore boni malique iudicio, omnia tuta timent, perpetuis animum scrupulis flagellant, hominum consortia fugiunt, atque nonnisi propriae imaginationis ideis, ac suarum vigore imaginum pascuntur, quem nec doctioris demum Theologi consilia dealeant. Similis aliorum animi adfectuum haec potestas est, praecipue quae tristitiam, moerorem diuturnum, metum ac diuturnas edaces curas spectant; quorum adfectuum, primarii in genere nervoso effectus iuculenta debilitatis nervosae phaenomena produnt; quois tum fracto motu cordis, ut necesse sit, suspiriis transitum per pulmones expedire, tum vasorum nervorumque languore adpetitus hebescit, perspiratio imminuitur (a); menses supprimuntur, vel nasci impediuntur (b), pallor inducitur, aliaque languentis circulationis, deiectaeque vis nervosae phaenomena increbescunt; quois tum contagium facilius suscipitur (c); tum febres malignas

D 4

---

(a) SANCTORIUS *sect. VII. aph. 15.* SWIETEN T. II. p. 38.

(b) *Hist. morb. Vratisl. p. 313.*

(c) DEGNER *de Dysent. p. 80.* ZIMMERMANN k c. p. 851.

nervosas (a), maxime inde bellorum tempestate (b), atque in obsessis urbibus (c), frequentes generant; terrorque ac metus variolas peiores, lethales (d), ipsasque operationes chirurgicas infelices reddere (e), febrem incurabilem lethalemque accersisse visus est (f). Imo tanta morborum vis observata est, ut subita quadam cordis paralyti, mortem subitam induxerit, cuius exempla collecta referunt cel. Viri (g): quales certe nervorum circulationisque iniuriae dum loca feriunt, praecipua nervorum vi gaudentia; primos in turbando ventriculo sensus (h), atque languesciente sanguinis circuitu, praecipuas in viscerum abd. systemate moras hypochondriacas inferunt. Terroris iidem, sed magis subiti effectus sunt; quos novi virum, summo, a subita amici morte percepta, terrore perculsum, ac praecipuis inde supra dictis symptomatibus (§. II.

(a) HUXHAM *de aëre & morb.* p. 166.

(b) ROEDERER *de morb. mucoso* p. 22. 30.

(c) BAGLIVIVS *prax.* p. 150.

(d) HUXHAM P. II. p. 132.

(e) *Recueil periodique* T. II. P. II. Art. I.

(f) *Medicinishe Anecdoten* P. I. p. 25.

(g) KAAW *de impetum faciente Hipp.* p. 431.  
GAUBIUS *serm. acad.* II. p. 26. ZIMMERMANN P. II. p. 474.

(h) HALLER *Elem.* T. VI. p. 158.



n. 2. 4. 6. ) diu conflictatum . Amoris hic locus fere princeps est , seu desiderii rei concupitae longius protracti ; sanguinem incitari , accelerari pulsus (a) , saepe cum inaequalitate , quem admixto metui tribuas , refert HALLERUS (b) ; Vehementior amor summum calorem , palpitationem , ruborem , robur , pene cum tremore , & sensum quasi ignis , per vasa ipsorum artuum fluentis facit : bene CLAUDIANUS (c) :

*Hic habitat nullo constricta licentia nodo ,  
Et flecti faciles irae , vinoque madentes  
Excubiae , lachrymae rudes , & gratus amantum  
Pallor , & in primis titubans audacia furtis  
Iucundique metus , & non secura voluptas .*

Sed quanta hic simul nervorum totiusque vitalis atque animalis oeconomiae iniuriae comitantur ! Mora vel adempta potiundi spes elegantulos toties adolescentes virginesque lurido pallore induit , tabe (d) , oculorum vigore fracto ac senili prope intra orbitas sepultura , atra bile , chlorosi , erotomania conficit , crucemque medicis tacitos hos inter malorum fontes figit : Catalepsin

(a) Venam frontis ruptam adnotant *Medicinische Anecdoten* P. I. p. 199.

(b) HALLER l. c. T. V. p. 582.

(c) CLAUDIANUS *de nuptiis HONORII* .

(d) Sine hoste victus marcet , & veneri vacat reparatque amores . *Senec. Trag. Agamemnon* p. 429.

inde inductam refert ZIMMERMANN (a) ; sed & minoribus malorum gradibus variae generis nervosi turbæ sunt ; ut Veteres de ipso Iove dixerint , eum simul amare & sapere non posse : Recte servus ille apud HORATIUM (b) :

*O Here ! quæ res*

*Nec modum habet neque consilium , ratione  
modoque*

*Tractari non vult : Amoris hæc sunt mala .*

Ne odium parerent memoriae recentis exempla , plura ex antiquis Veterum monumentis recensuit GAUBIUS (c) ; sed recentia refert ZIMMERMANN (d) . Licentioris vitæ effectus aut matrimonii vel praematurius , vel seriore ætate , vel quævis imbecillioris constitutionis hominibus initi , præcipuae hæc noxæ sunt ; quæ toties infecta mascula imitantur , quæ pleraque post Venerem intereunt (e) . Nobilissimi humoris , qui cum secretionem spirituum multa communia habet (f) , iactura nimia uti in toto corpore vim nervosam deicit , nervorumque morbos am-

(a) ZIMMERMANN l. c. p. 489.

(b) HORATIUS *serm.* L. II. S. III.

(c) GAUBIUS *serm. acad.* II. p. 33.

(d) ZIMMERMANN l. c. p. 490.

(e) HALLER *Elem.* T. V. p. 576.

(f) TISSOT *de febr. bilios.* p. 183. 208. GORTER *de perspirat.* p. 215. 219.

plissimo catalogo producit, ita debilitatis auctaeque irritabilitatis in ventriculo & intestinis symptomata procreat; ut inde morbi hypochondriaci potissimam nostra aetate causam cel. Viri repertant (a), nostrique saeculi longaevitati obesse, imminuere civium numerum videatur (b); ac regionum depopulationem plus minus sensibilem exinde demonstret BILGUER (c); quod nimis in pessimam illam mentis corporisque virium profusionem & propensio, & contracta inde effaeminatio a progenie in progeniem descendat, de quo iam suo tempore HORATIUS lib. 3. Ode 6.

*Damnosa quid non imminuit dies?*

*Aetas parentum peior avis, tulit*

*Nos nequiores, mox daturos*

*Progeniem vitiosorem.*

## §. X.

Verum quid demum viscerum; in abdomine sitorum, glandularumque obstructions, vasorum

---

(a) FRACASSINI p. 306. ZIMMERMANN I. c. p. 392. WHYTT I. c. p. 84. BILGUER p. 56. BICKER Goett. Anz. an. 1768. p. 142.

(b) BALLEXERDE phys. Kinder-Erziehung. p. 24.

(c) BILGUER I. c. p. 80. 81. 82.

(\*) Hoc variis argumentis ulterius deduxi; Vid. Medicinische Polizey I. Land.

atrabilarii infarctus ad hunc morbum producendum alendumque conferant, quaestio nobis discutienda. Atque latentibus hisce vitiis licet antiquioris, & nostri aevi complures pleramque morbi vim originemque adscripserint; ut in curando morbo etiamnum in has tollendas obstructions totis medendi viribus connitantur; neque negari possit, ipsis cadaverum sectionibus toties palam eiusmodi demonstrari vitia (§. V.); ut sub spasmis hypochondriacis gravior saepe viscerum labes subesse visa fuerit, improvise aliquando lethali, adnotante MORGAGNO (a); quorsum omnino Veterum de atra bile observationes doctrinaeque conferunt, quae late in turbandis encephali mentisque functionibus, in commovendo nervorum systemate dominaretur; communique observatione constat, posita in primis viis caussa putrida, toties emoveri mentem non tam, quam sub ingenti vitae languore, spasticos illos tremulosque motus, in malignis putridisque febribus per universos diffundi nervos.

Sed si rem paulo accuratius consideremus, alia omnino morbi phaenomena sunt, alius exitus, facies plane alia morbi est; qui hoc viscerum infarctu vel atrabilario vel scirrhuso funda-

---

(a) MORGAGNUS l. c. Ep. XLV. n. 27.

tur. Sub varia functionum læsione chronica, lentis plerumque variorum morborum adfectionibus, nunc colicis doloribus, flatulentis etiam, adpetitus prostratione chronica, molesto pressio- nis sensu in hypochondriis, & circa ventriculi regionem, nunc in icterum, nunc cachexiae alia genera facessit; nunc leucophlegmatico corpus humore inundat; vel in varia demum hydropis genera definit; nunc lentas inter miseras tabe conficit, nun febrilibus etiam motibus illudit; queis, ut saepius novi, gangraenam abdominalem evolvunt; qua iisdem fere, ac in malignis solent, phœnomenis moriuntur: sed plerumque spasmodum hypochondriacorum descripta facies abest; lienumque induratorum exempla sunt, absque ulla huius morbi suspitione (a): nisi quidem eadem hypochondriasis scaturigine, circulationis abdominalis vel a spasmodis, vel debilitate turbetur tenor; indeque adgesto in vasis

---

(a) LITTRE habet in *act. A. R. S. c.* an. 1700. Obs. 7.

(\*) Tam frequentem lienis obstructionem, quamvis Medicinam & in LOTHARINGIA fecerim, & in terris LAADENSI, SPIRENSI atque HANNOVERANA, nunquam vidi, quantam in agro TICI- NENSI hucusque observare mihi contigit; frequentiore tamen, in his saltem aegris, Hypochondriasin non observare potui.

liquido , viscerum infarctus , sanguinis a stasi mutationes atrabiliariae , adeoque effectus morbi inducantur (a) ; unde infarctorum viscerum , aut atrae bilis cum vera hypochondriasi confunduntur ac complicantur symptomata : Atrae bilis certe plerumque accusatae , quam e Veterum tenebris revocavit BOERHAVE , nulla alia ratio est , quam sanguinis diuturna stasi corrupti colliquantique , quam aliquando cadavera ostendunt ( §. V. ) vel eius inter turbatas motuum leges , e vasis in ventriculi intestinorumque cavo patentibus , sensim extorti , atque inter eorum numerosas plicas detenti , varieque corrupti (b) ; quo per vomitum quidem ; aut alvi deiectiones nigras , quas atrabiliaras vocant , eliminato , morbi levamen sit ( §. IV. n. VI. ) , haud vera curatio ; dum manens ab obstaculis ac debilitate sentina facile pristina sanguinis corruptela ac colluvie exundat : Inde est , quod toties nullas viscerum mutationes , nisi solam aliquando debilitatem flacciditatemque cadavera exhibeant ( §. V. ) ; id quod SYLVII observationibus (c) confirmatur , qui se ultra centum hypo-

---

(a) Varias viscerum mutationes ad effectus morbi hypoch. reducit . WHYTT p. 168.

(b) Eandem rationem refert WHYTT p. 183.

(c) Adducit QUELMALZ *de liene* §. 26.

chondriacos partim , partim melancholicos , liene salvo & incolumi praeditos , diffecuisse adfirmat ; docent ii praecipue , qui summis mentis turbatae erroribus , melancholiae propriis violentas vitae propriae manus inferunt , cadaveraque relinquunt , quae omni labe vacua , atraeque nefcia bilis , solos nervorum spirituumque errores recondunt , quos frustra acie anatomica quaesiveris : Inde est , quod solis animi vitiis morbus producat ac foveatur , atque voluptatis flagellum , saepe & calcar existat ; quod quo plus instiget , eo magis noceat ( §. II. n. 3. ) : Inde est , quod sola aetate toties , quae teneriores nervos indurat , aut mutato vitae genere , quo facillimae in nervis oscillationis stimulus hebescit , absque relictis in corpore noxis , vel cesset omnino , vel sopiatur ( §. IV. n. I. ) , donec nova prurientis ideae occasione , in priora vitia ( §. IX. ) animus redierit : Inde est , quod phthisin saepe nervosam ( §. IV. n. IV. ) continuato malo , relinquat ; quae potissimum solidarum partium summa fracedine , liquidorum exhaustorum aut penuria , aut pessima crasi , a spirituum proborum indole alienissima , consistit . Eadem haemorrhoidum ratio videtur , in qua toties praecipuam atque immediatam morbi hypochondriaci causam referunt ( §. II. n. 6. ) : Quae certe , uti vasorum abd. debilitate , aut circula-

tionis venosae obstaculis generantur; quae plethoram abdominalem, cum vario vasorum, quoquoeversum porrectorum, onere ac symptomate, accumulatur: ita facillimo quidem huius nevropathiae effectu fiunt; dum cum debilitate nervosa necessario illa circulationis impedimenta coniunguntur (a): Verum dum similibus adeo, quae debilitatem inferunt, causis nascuntur (b) haemorrhoides; aut eodem saltem fonte, nisi iuncta maiore nervorum iniuria, nevropathia scaturiet; aut inter causas huius remotiores pertinent; uti plures dantur haemorrhoidibus, absque hypochondriasi, obnoxii; dum inter huius quidem

- (a) Nullum iuvenem quidem haemorrhoidarium vidit *Ludwig*, nisi languidum, & variis affectibus spasticis obnoxium, *de haemorrhagiis ut causa debilitatis* p. 10.
- (\*) Hoc quidem meae experientiae non semper respondit, & ego ipse exemplo esse possum contrarium: ut qui anno aetatis DECIMO SEXTO, fortis, vegetusque, nec certe ulli spasmo subiectus iuvenis, copiosam evacuationem Haemorrhoidalem, primam &, in hos usque dies, ultimam, passus fui. Similia & in aliis plethoricis, licet sanissimis iuvenibus, observavi; neque alia mihi in illis Haemorrhoidum, quam narum Haemorrhagiae, huic aetati communissimae, ratio fuisse videtur.
- (b) Nunquam bona solida, sed morbosas affectiones ab haemorrhoidibus vidit *TRALLES hist. Choler. ac* p. 27.



symptomata frequentissimae esse solent haemorrhoides . Verum & simul adparet , ab earum fluxu etiam aut parum fiduciae solatiique , licet expectarint plurimum , aut nihil plane consequi : Novi aliquos , qui quo ferociore turbarum nervosarum paroxysmo impetuntur , haemorrhoidum copiosiore ac quotidiano fluxu , media inter solatia medicorumque expectationes , laborant ; qui haemorrhoides nunquam copiosiores , quam instantibus hisce turbis , sentiunt perinde , ac alios urinae aquae copiosaeque stimulus admonet : Enimvero qui arteriosis finibus dilatatis funditur sanguis , quod quidem tum a venosi systematis immeabilitate ac resistentia , tum retro urgente arteriarum nixu , frequentissimum esse solet , sanguinisque fusi florida indole ac tenuitate cognoscitur ; commodi nil certe , nisi ab imminuta aliquantum in continuo vasorum systemate pressione , saepe plurimum damni adfert , continuatis sanguinis arteriosi dispendiis , maxime corporis robori nervorumque vigori inimicis (a) : e venis , quae atrabiliariam piceamque sa-

*Op. Med. Vol. I. E*

---

(a) Conf. de HAEN *de haemorrh.* p. 35. LAMBS-  
MA *de fl. ventr.* pag. 124. Fraenck. *Anmerck.*  
Vol. VII. p. 499.

burram educunt , rarius funditur ; licet aliquando inter perverſas motuum leges , contrariaque circulationis itinera , vigente ſpasmorum vi poſſit (\*), levamen utique maximum malo adferet , ſed manentibus cauſis , in inſarctu vel vaſorum atonia poſitis , propediem redituro : licet & toties haec ſanguinis atrabilia conditio , quam concipiunt , plane abſit , atque cum ſequente nervorum malacia , cum diſparente haemorrhoi-

(\*) Saepiſſime venas eſſe , quae ſanguinem haemorrhoidalem fundant , *condylomatum ani* natura docet & origo . Haec enim veros Haemorrhoidaliū venarum dilatatos ſiſtere ramos , qui , niſi mature rupti , ſanguinem collectum atque retardatum regurgitent , in varices praegrandeſque ſaccos excreſcunt , dubium eſſe non poteſt . In multis vero hae venae ( quod in praxi magni momenti eſſe credo ) non tam ob ſanguinis , per abdominalem morbum , circulationem impeditam ; quam a ſolius tunicae inteſtinalis intimae laxitate & venarum ano vicinarum atonia ſpeciali , a multis cauſis facile explicabili , intumeſcunt . Hinc ſola ſaepe ſaccorum eiſimodi tunicaeque ano propendentis & infiltratae , vel calloſae , extirpatio , inteſtinalem hunc morbum , recte monente ill. THEDENIO ( Neve Bemerkungen und Erfahrungen , I. Theil S. 56. 59. ) & ſecundum meam quoque in his experientiam , radicatus tollit : qui , ſi ab alia , *non locali* , cauſa dependiſſet , alia nunc ſaltem & maiora forte ſymptomata produceret .

de , circulatio naturali ordini viisque nunc liberatis , absque relictis aliis noxis , restituatur .

## §. XI.

Verum & suis Therapia difficultatibus laborat ; dum eo tollendarum , quas vulgo concipiunt , obstructionum studio , omni remediorum aperientium , solventium conatu , omni genere conquisito intensoque , succurrere adlaborat . Eoque scopo salium diverso genere , sapone tum artificiali , tum naturali , gummi ferulaceis , succis herbarum recentium expressis , interpositis crebris cathartidis , aquis mineralibus , animose potis , imo & balneis , toties pugnat ; eoque medelae genere , dum vel peius inde habent , vel nihil saltem emendantur aegri , mutatis formulis , omnia harum classium remedia successivo ac diutissimo usu convocat . Verum lustrato satis hypochondriasis mirabili ingenio , elucet potius , omnium solventium , fundentium colliquantiumque inanem , imo nocivam operam esse : salium certe , quae praecipue acido vitriolico componuntur , uti ☐ ☐ lat. arc. dup. &c. difficiliusque solubilia sunt (a) , continuatus usus stimulos

E 2

---

(a) SPIELMANN *elem. chem.* p. 49. 124.

plus minus rigidos infert; quæis perpetua irrita-  
tione & aquosa colluvie fibra debilitatur magis  
(a); atque in sanguinis etiam massam eluctatis,  
varii in eodem solvendo effectus prodeunt, qui  
a salibus quidem lixivis promptiores (b), neque  
a mediorum I. neutrorum genere absunt (c);  
ut suspecta merito ob vasorum stimulum, &  
acre, humoribus inductum habeat cl. MALOUIN  
(d), cautelasque inde ab humorum dissolutione  
repetat POHLIUS (e). Siqua vero, uti facile  
fit, a turbata coctionis opera, atque facili inge-  
storum fermentatione pleniore, copiosos ubique  
status eructante, aut ipsa vasorum, in intestinis  
exhalantium, debilitate (f), cruditas pituitosa  
copiosior subsit, quæ glandulosos partium vici-  
narum glomeres facile infarcit; teneriorum salium  
facileque solubilium usus sat probus esse potest,  
dum roborantibus iungitur, uti ☞ solub. lau-  
datur a WHYTTIO (g) it. BALDINGER

(a) LUDWIG *infl. cl.* §. 817. PLATTNER *art. med.* p. 105.

(b) SCHWENCKE *haemat.* p. 190.

(c) GERHARD *MM.* p. 166.

(d) MALOUIN *med. chym.* p. 255.

(e) POHL *de excretionum moderamine* §. X.

(f) WHYTT l. c. p. 146.

(g) WHYTT p. 393. form. probam componit.  
KLEIN *select. med.* p. 191. ex pulv. flav. cort.  
aur. rh. ☞r. sol. addito elaeosacch. cajeput.

(a); quique a solubilitate fere reliquis praefertur (b); licet & eas aliquando noxas adnotet cl. WHYTT, queis flatus augeat, ac deliquia accersat: Eaedem certe tum saponis veneti aut alicantini, tum saponum nativorum sunt cautelae; quorum virtute maxime gummata ferulacea, succique plantarum nativi scatent; sed uti in fundendis dissolvendisque coagulis, ita in naturali etiam sanguinis densitate destruenda vi pollent; atque ea, quam praedicant, abstergendi & nudandi virtute, abrafo naturali mucoso tegmine, fibram attenuant, irritabiliorem sensibilioremque reddunt, & exorbitantes iamiam irritabilitatis auctae stimulos necessario exasperant; id quod copiosa observatione constat, nullosque non convincit, nisi eos, qui sinceritatem HIPPOCRATIS, SYDENHAMI averfantur, errores suos, ut doceant, palam profitentium. Diaetae vegetabilis fructuumque horacorum noxas ex iisdem rationibus & cel. virorum observatis supra iam adduxi §. VIII. Sed & ex his simul pares fere aquarum mineralium cautelas intelligimus, quas teneriori praecipue *li* prin-

## E 3

---

(a) BALDINGER *Kranckh. der Preussisch. Arzte*  
p. 131.

(b) CARTHEUSER *elem. chem.* p. 200.

cipio scatentes , nostris in oris Schwalbacenses commendant , atque ut efficaciores reddant., singulo primo haustui Sedlic. dosin adiiciunt : sed ea certe , qua solent , aquarum ingurgitatione , ac ingenti velut cataclysmo , tantum abest , ut vel infarctus demoliantur , vel acre eluant , vel robur fibris debilibus addant , ut potius obruant , ac quasi suffocent vires superstites ; quae validae satis requiruntur , ut eae excernantur copiae , quae intra corpus adsumptae , solis vitalibus viribus reguntur , ut suis excerni possint colatoriiis (a) : maior omnino tum a copia liquidi distendente , tum ab aqua relaxante , quam paucis dilutissimi & enervatissimi martis viribus , est effectus : quo debiliora certe & irritabiliora hypochondriaci vasa laeduntur (b) , adiecto praesertim salium usu , alvoque quotidie stimolata , iunctis adeoque noxarum utrarumque viribus (c) :

---

(a) Confer. FRACASSINI p. 338.

(b) Debilioribus cavendas vult BOERHAVE de morb. nerv. p. 153. aquas minerales iis nocivas , quibus laxior corporis habitus , & atonia ventriculi & intestinorum , pluribus momentis probat TRILLERUS de specificorum remediorum fide dubia §. XI. nocivas iis , qui imbecillitate laborant Fr. HOFFMANN med. conf. P. I. p. 91. it. in debilitate ventriculi , viscerumque abd. l. c. p. 193.

(c) Crebra purgantia ad hunc morbum disponere. Conf. F. HOFFMANN. l. c. p. 292.

salubribus mehercule effectibus ; quos spondent ; contradicit experientia ; neque ulla , nisi calidis matutinis potibus nunc substituto frigido , atque animo ad res , magis placentes , converſo , corporisque ex lege & compotantium consuetudine , facta maiori exercitationi salubritas eſſe poteſt ; ſiquidem dictis aquarum noxis ſuperandis par eſt . Thermarum ac balneorum calidorum rarior quidem uſus ac ſolet eſſe commendatio , niſi qui viſcerum ſuorum obſtacula fibrarumque ſtriſturas externa potius emolliſſione ſolari , quam curare velint ; dum cum ea interim partium ſolidarum debilitas increſcit , auctaque externa preſſione , accedente a calore rarefactione motuque accelerato , impetus in viſcera debiliora , cum vaſorum toties laeſione rapitur , frequenti haemoptoes aut haemorrhagiae cuiuſcunque aut apopleſſiae eventu . Balnea frigida , adparet , niſi hypochondriaca reſpueret mollities , maiore nervis vaſiſque robore reddito , omnino utiliora eſſe (a) . Venaeſectionis porro , ad quam fere prae reliquis frequentius inter ſuos , quos animo agitant metus , confugiunt hypochondriaci , regulas ex his haud difficulter ſtatuiſmus : Sed eam certe , quod cum

## E 4

---

(a) Ea commendat , cautelaſque addit WHYTT  
p. 263.

mole imminuta , & ipsa specifica densitas sanguinis decreseat , auctaque feri ad globulos rubros proportionem (a) , inde laxitas debilitasque cum necessario irritabilitatis & ataxiae augmento (b) inducatur , nocivam plerumque cum cel. Viris (c) adgnoscamus ; ipsique , si recte attenderint , facile consentient aegri ; qui faciliore fere animi deliquio inde obnoxii , ventriculi turbatas functiones , appetitam prostratum (d) , alias debilitatis auctae , ac ferocientium spasmodorum effectus (e) sentiunt , vel eos , etsi mitigati visi fuerint , paulo post maiori violentia redituros . Nos ea in medendi methodo melius certe a diaeta , quam in medicamentis consilium petendum , cum cl. LIEUTAUD (f) , ipsoque FR. HOFFMANNO (g) aliisque iudicamus , ner-

(a) HALLER *elem.* T. II. p. 330.

(b) TISSOT *de febr. bil.* p. 123 126. 136. it. nov. aët. N. C. T. I. pag. 81.

(c) FRACASSINI l. c. pag. 346. LIEUTAUD l. c. pag. 92. PLATTNER *art. med.* §. 467. BILGUER p. 923. nov. aët. N. C. l. c.

(d) TISSOT l. c. p. 123. CARTHEUSER *diaet.* p. 26. UNZER *arzt.* P. X. p. 156.

(e) In morbis spasmodicis per VS. spasmos intendi observat FR. HOFFMANN *med. rat. syst.* T. I. p. 302.

(f) LIEUTAUD l. c. p. 93.

(g) FR. HOFFMANN l. c. p. 415.



vorumque turbas ac ipsos sensim iuventutis errores religiosa animi tranquillitas compescet facilius quam importunum medendi studium, quod plerumque etiam hos inter metus fluctuans animi inquietudo turbat: Id agimus nimirum, ut animo ad placida obiecta, eaque saepe variata converso (a), evitatis causis omnibus, unde illa in nervis debilitas augeatur foveaturque, corpus vario sensim exercitationis genere roboretur (b), atque a sua victus aërisque mollitie consuetudine revocetur; corticis interim peruviani usu, cuius tantae in eo genere laudes sunt (c), nervosum genus, fibras solidas roboremus, sanguinis vitiosam tenuitatem corrigamus; utraque ratione tum coctionis instauretur opera, liquidorumque vitia, aucta vitali vi, sensum dispareant; addimus pro re nata, vel interponimus lenes rhabarbari doses, quod roborando non tam intestinales fibras,

- (a) Animi recreationem optimam statuit FRACASSINI atque praesertim per concentus musicos p. 348.
- (b) Equitationis summos usus observat SYDENHAM p. 522. solam hanc efficacem vid. in Hamb. Magaz. Vol. XI. p. 345.
- (c) SYDENHAM p. 519. LOESECKE MM. p. 441. FRACASSINI p. 328. TORTI *Therap. febr.* p. 429. HEUERMANN *Bemerck.* P. I. p. 145. WHYTT infusum vinosum aut spirituosum laudat & exemplis probat p. 254.

quam latentem saburram irritantem evacuando ; eosdem in effectus conspirat : Martialium quoque hic summum usum commendant , ipsaque in substantia (a) ; nisi ventriculus nimis adhuc irritabilis respuerit ; Tinct. Bl. & t. Prisata Ludov. similesque teneriore & tis Blo constantes (b) , vario encomio , virorumque cel. consensu celebrantur : adduntur extracta amara (c) ; quorum tum in maiore fibrarum robore , tum facillima illa , quae in ventriculo debili est , ingestorum fermentatione prohibita aut moderata , experimentis PRINGLIi constat (d) : dum spasmodorum interim ingruentium ferociam castoreatis , vel assa foetida , vel moschi etiam dosi addita , vel leni cautoque opiato (e) compescimus : qua medendi ratione diu continuata , & malo demum & nostrae tractationi imponimus

## F I N E M .

- 
- (a) WHYTT p. 259.  
 (b) Hist. morb. Vratisl. p. 24. pharmacop. pauper. Edinburg. p. 60.  
 (c) WHYTT p. 253. 288.  
 (d) PRINGLE p. 412.  
 (e) Crebrior usus nocivus Fr. HOFFMANN T. II. p. 277. effectus noxios , debilitatem , atoniam refert WHYTT p. 271. licet saepe necessarium & utile sit.

---

## Q U A E S T I O

*Medico-Legalis , an SECTIO ANATOMICA in  
Cadaveribus de AUTOCHIRIA suspectis ?*

*praeside FRANCISCO SCHOENMEZEL ,*

*authore IO. MICH. WINTER .*

*Heidelbergae 1766. (\*) .*

**A**Equissima , nec fat laudanda temporum nostrorum conditione invaluit , ut , cum gravia in tribunalibus etiam altioribus dubia obveniant , integrarum facultatum , prudentumque clarissimo-

- 
- (\*) Digna haec fuit , quae proponeretur quaestio : cum ea , quae a legibus respectu SUICIDARUM imperantur , magna ex parte a medicorum PHY- SICORUM depositionibus , vel sic dictis VISIS ET REPERIIS , dependere soleant , & multorum memoriae familiaeque , per id , macula iniuncta sit , quod certis in cadaveribus Suicidarum inventis signis , plus aequo tribuerint Medici forenses . Statuunt autem leges AUTHOCHIRIS malitiosus SEPULIURAM sic dictam ASININAM , seu infamem : cum HONESTAM illis concedant , qui , ob morbum , vitae adfectu taedio , violentam huic ipsimet imposuerunt finem ( Nemes. Carolin. tit. CXXXV. ) . Monstrat vero data hic ad quaestionem propositam responsio : signa Medica sui-

rum , aut probatorum consilia ; & responsa petantur . Hincque fit , ut , cum talia saepius moveantur , quorum disquisitio , & diiudicatio perfectam fabricae humanae , & medicae notionem scientiae requirant , Medici quoque in consilium vocentur ; quibus fere in dies sectiones cadaverum demandantur , ut , si quae de perpetrato crimine obscuriora lateant , scrutinio diligenti anatomico perlustrando patefaciant . Verum , cum de instituenda sectione agitur , illam tunc tantum locum habere clarum est , cum , quae ad dubium , aut latens crimen evincendum conferant , in defuncti cadavere reperiri posse probabile sit .

Huc igitur tota dissertationis nostrae quaestio tendit , an in autochiria suspectorum cadaveribus quaedam reperiantur , quibus miseros praemeditato consilio , aut coacto furentis animi impetu violentas sibi iniecisse manus certo evincatur .

Fundata profecto in illos autochiriae suspicio cadit ; qui sine apparenter praegresso delirium inducente corporis morbo propria nece concidunt , cumque autem quam repente melancholia , cuius saevus in propria affectorum viscera furor

---

CIDI CULPOSI in cadaveribus vix certa subesse , hinc longe alia requiri , quam quae , a Medicis forensibus hucusque allata , fecerunt saepe , ut , cum reum absolverent , innocentem leges prosequerentur .

nemini non est notissimus , quandoque quosdam invadat , multiplici probatissimorum virorum observatione constet , vixque à sanae rationis homine , non dicam christiano , tantum cuilibet propriae conservationis studium innatum est , voluntarie in suae vitae perniciem quid contulisse imaginari potest , merito autochiriae crimen , ne immeritam infons poenam luat , iudices in tali casu eo usque dubium habeant , à probatis donec Medicis , an defunctus melancholicus non fuerit , sint edocti .

An autem legalis ad id Medico instituenda sectio , anque talem praecipere iudici sit consultum , cum succinctam melancholiae disquisitionem praemiserimus , clarius apparebit . Primum igitur de morbi illius sede indaganda , postmodum de causa proxima , atque remotioribus prosequendis laborabimus .

Ut autem morbi sedem determinare valeamus , illius praeprimis effectus sunt explorandi : atque inter miros melancholiae effectus , qui animam afficiunt , primam sane attentionem merentur ; perpetui enim illi comites morbi huius ab omni alio differentiam constituunt .

Primum , quos malum invadit , maestri fiunt , & tristes , anguntur (a) , grata , & laeta , imo

---

(a) SWIETEN T. 3. p. 480. LAZAR. RIVIER.

amicos fugiunt (*a*), loca solitaria quaerunt (*b*), foliloquium amant (*c*), uni eidemque cogitationi pertinacissime inhaerentes circa illam vere delirant, in caeteris licet fanae mentis, quin acutissimi quandoque ingenii (*d*), vitae finem optant (*e*), de vita aeterna quandoque dubitant (*f*), tristissima sibi ominantur, timore, ira, zelotipia, & quibuscumque fortioribus animi pathematis vel ex levissima, vel etiam nulla data causa vexantur (*g*), de vita sibi auferenda cogitant (*h*), sibi violentas applicant manus (*i*). Malo autem ad summum gradum eveſto dementia, mania, convulſionibus corripuntur, vigiliis,

---

pag. 187. FERNEL. in Pathol. L. 5. c. 2.  
pag. 403.

(*a*) EBERHARD. Pathol. p. 464. FERNEL. p. 403. ALBERTI iur. prud. med. T. 5. p. 501.  
SYDENHAM oper. med. T. I. p. 260.

(*b*) EBERHARD quo supra. ALBERTI q. f.  
FERNEL q. f.

(*c*) TEICHMAYER inst. med. Forens. p. 136.

(*d*) SWIETEN T. 3. p. 459. ETMÜLL. T. 2.  
p. 946.

(*e*) EBERHARD q. f. BÜCHNER Miscel. phys. med. T. I. p. 147.

(*f*) TEICHMAYER q. f. SENNERT. T. III.  
pag. 90.

(*g*) SYDENHAM q. f. SENNERT. q. f.

(*h*) EBERHARD q. f.

(*i*) TEICHMAYER q. f.

inediam , frigus mire tolerant (a) , aliis ut noceant , student (b) , mortem intendunt , imo , quos aggredi possunt , occidunt (c) . Quae vero iuxta BOERHAVIUM (d) , aliosque in corpore contingunt , color externus , internusque pallidior , flavior , magis fuscus , livescens , niger cum maculis similibus , respiratio lenta , se-& excretiones minores , tardiores , crassiores , minor consumptio , parcior appetitus , macies , pulsus lentior , circulatio per vasa sanguinea bona , sunt . Reliqua viscerum , aut functionum manifestior laesio , quae ab authoribus melancholiae adscribitur , affectioni potius hypochondriacae , quae aliquoties ut causa remotior agere potest , tribuimus .

Quod , si nunc ea , quae ex authoribus retulimus , attente perpendantur , ad laesum fere omnia sensum internum referenda videntur ; quae enim sine manifesta causa maestitia , tristitia , anxietas , amicorum fuga , solitudinis amor , ira , timor , vitae fastidium , pertinax ad eandam ideam applicatio &c. observantur , quid

(a) BOERHAV. de cogn. & cur. morb. aphorif. 1199. SYDENH. q. f. ALBERTI q. f.

(b) EBERHARD. q. f. LAZAR. RIVIER. q. f.

(c) ALBERT. Iur. Prud. med. T. 5. p. 394.

(d) Aphorif. 1094.

aliud , quam deceptam denotant animam , seu sensum internum male affectum , atque hinc in facie , circuloque humorum apparentia pendent , cui enim faciei , & circulationis cum animi motibus sympathia est ignota , quae pudor , tristitia , ira , metus , gaudium &c. faciebus imprimant , curiosioribus motuum animi scrutatoribus non latent , pulsusque mutationes iam pridem Medici observarunt . Est autem sensus interni organon sensorium commune , illius igitur laesio admittenda erit , atque huic opinioni auctores subscribunt probatissimi . Si *crassi viscidique humores* , inquit FRIDERICUS HOFFMANNUS (a) *vi spasmodum ad superiores partes , atque caput maiori copia compelluntur , destruuntur etiam animales functiones , languescunt sensationes , vis memoriae , ingeniique laeditur , insignis est ad moerorem diffidentiamque proclivitas , vanae surgunt imagines , & inanes ideae , atque sic lentis tandem passibus appropinquat melancholia .* Malo , ait SENNERTUS (b) , *cum Araeteo melancholiam definire , quod sit animi angor in una cogitatione defixus absque febre , & furore à phantasmate melancholico ortus , ubi tamen notandum , per*

---

(a) Med. rat. syst. T. 4. part. 3. c. 6. p. 215.

(b) T. 3. L. 1. part. 2. p. 90.



angorem animi non cordis passionem intelligendam esse, cum melancholia phantasiae, & facultatum principum laesio sit. Affici autem cerebrum, & quidem, ut pars simularis, extra controversiam est (a). Causa enim, à qua prima huius mali origo, est certa & occulta spirituum animalium dispositio, quam immediate, & proxime sequitur phantasiae depravatio (b). Melancholiam esse mentis alienationem affirmat FERNELIUS (c) qua laborantes vel cogitant, vel loquuntur, vel efficiunt absurda, longeque à ratione & consilio abhorrentia, eaque omnia cum metu & maestitia; LAZARUS RIVIERUS (d) Melancholiam esse delirium sine febre cum timore & maestitia statuit, illiusque causam proximam, & immediatam esse spiritum tenebricosum nigro colore infectum; Cum enim inquit spiritum animales natura sua puri, tenues, & perspicui esse deberent ad actiones cerebri alacriter exercendas, si ab ea constitutione deiciantur, & opaci & tenebricosi evadant, maestitiam & timorem inducunt. Atque si BOERHAVIUM audiamus (e), melancholia

*Op. Med. Vol. I. F*

---

(a) Ibidem c. 8. p. 91.

(b) Ibidem.

(c) Patholog. L. 5. c. 2. p. 403.

(d) Prax. med. L. 1. c. 14.

(e) De cogn. & cur. morb. aphorif. 1089.

iuxta illum vocatur Medicis ille morbus , in quo aeger delirat diu , & pertinaciter sine febre eidem fere cogitationi semper affixus . In quem aphorismum commentans SWIETENIUS (a) addit , esse delirium , cum idearum ortus non respondent causis externis , sed ab interna cerebri dispositione mutata pendent nata praeter voluntatis imperium . Hisce profecto omnes hos authores , quorum , ne prolixiores videamur , maiorem adducere numerum superfedemus , melancholiam in certa laesione quadam cerebri , à quo sensus interni pendent , posuisse , patere existimamus . Est autem illa cerebri pars sensorium commune , in parte igitur quadam exilissima , tenerrima , quae hactenus omnem Anatomicorum aciem effugit , melancholiae sedes est ; quis enim indubie sensorium commune determinavit , non dicam , clare mirificam illius structuram , conditionemque exposuit . Melancholiam ergo pro male affecto sine febre circa quasdam ideas sensorio communi habemus , in quo vel certae rerum absentium ideae tanquam praesentes , vel aliter , quam naturaliter fieri deberet , animae repraesentantur . Hinc pertinax illa ad eandem ideam applicatio pendere , hinc inordinata intelligi pathemata , hinc mirum

---

(a) T. 3. p. 459.

vitae fastidium, atque propriae libido destructionis explicari posse videntur (\*).

F 2

(\*) Angustos nimis limites ponunt *Melancholiae*, Auctores tum alii multi, tum nos quoque, cuius Dissertationem non quidem ad ampliandam de hoc morbo doctrinam, sed ob utilitatem quam in foro habere potest, hic inserendam esse duxi. Interim ne quis miser, qui proprias sibi manus lethiferas intulit, ex *melancholicorum* numero, quibus mortis adeundae potiora sunt privilegia, ideo excludatur, quod animi quandam *laetitiam* in vita prodidisse hinc inde visus fuerit; monendum hic est cum ill. LORRYO: *moerorem* neque a summo BOERHAVIO, *Melancholiae* definitioni fuisse additum, neque addi posse a quovis alio: cum non ubique adsit, imo dentur, qui in effusos risus solvantur *Melancholici*, & ad obiecta vel leviora puerilem praetendant laetitiam. LORRY *de Melancholia & morbis melancholicis*, T. I. p. 2. In genere fatendum est, quod a cl. ARNOLDIO nuper assertum fuit: Veteres, huius morbi meliorem cognitionem habuisse, quam hodiernos medicos; *Observations on the nature, Kinds, causes and prevention of Insanity. Sect. I.* Quod quidem eo magis dolendum venit, quo maiores nunc ubique progressus facit insana mortis violentae cupiditas. Rationes huius miri atque tristissimi phaenomeni praecipuas, alibi exposui ( *Medicinische Polizey I. III. B.* ) & omnem certe tum Medicorum, tum *Magistratus* ipsius attentionem merentur. Neque enim hic officio suo satisfecisse sibi videatur, ubi in *Suicidae* cadaver famamque magis *familiae* insontis, quam demortui ipsius, saevierit: maior est enim

Sensorium commune ex confluxu omnium nervorum consistere, ex quorum affectionibus anima percipiens diversas acquirere ideas videtur ;

vitae apud plurimos amor, quam, quid de mortuo dicant, metus: & qui illum superare potuit Suicida, ab hoc vix unquam absterrebitur. In *luxu* nimio —, in *vitiis* hominum, praecipue in *praematura Venere* crimineque *onanitico*, a quibus atra nimis Melancholia tandem inducitur —, in *sensibilitate animi nimia* & convulsiva quasi, librorum, a luxuriante imaginatione editorum ( *Romans* dicunt ) lectionibus quotidianis enutrita —, in *coelibatus* ubique, non certe ob *morales* rationes, *increiscentis*, naturâ, & perversâ tum in corpora plurimorum, tum in animos actione — hinc in *crudeli parentum*, morumque in soboles *auctoritate*, qua utriusque sexus adolescentes, contra omnem saepe temperamenti rationem, relustantemque naturae vocem, vel vi coacti, vel pie decepti, vitae *coelibis* consecrantur; in *praeconceptis* de *religione* opinionibus, & incauta *Confessorum* in concientias delicatulas *austeritate* — in *populorum* denuum *miseriis*, graviori hinc inde *Principum* *ingo* atque insatiabili variarum in Republica *Sanguisugarum* oppressione ad desperationem usque adauctis, hinc in omnis *hilaritatis* & laetitiae, *balsami* scilicet *eximii*, quo humanam sortem demulcebant quondam mortales, totali fere extinctione, — in his, inquam, *Melancholiae taedione* ulterioris vitae apud plurimos ratio communissima consistit; quam armis medicis incassum adgredimur, *Scalpelli anatomici* indagatione non detegimus, neque legum in *Cadavera* severitate avertimus; nisi *Principum* cura sanitatis publi-

quod si nunc nervus cuidam ideae destinatus male se habeat, obiectumque quoddam vehementius illi vel casu, vel animae ex imperio applicetur, quid mirum, si violentioris eiusmodi actionis vestigia in sensorio residua ideam impressioni annexam diutius animae repraesentent, anima autem ideam quandam vivide percipiens obiectum praefens credit, quoties somni ludibriis ludimur, quin de dolo expergesfacti nosmet convincere nisi difficiliter possimus; hinc ille circa obiecta animae error, qui delirium dicitur.

Esse quendam sensum homini innatum, qui ab ideis obiectorum quorundam grate, ab aliis moleste afficitur, nemo, qui quasdam ideas sine intellectus concursu placere, alias displicere advertit, negabit: quem dies serena, regio amoenae, suavis musices concentus &c. non delectant, quis autem aspectum funeris putrefacti, hominis morientis non horret? nauseosum medicamen, tetrum venenum non averfatur? ad fragorem insolitum, spissiores tenebras ipsi pulsiones expavescunt, hic sensus, cum anima ap-

### F 3

---

cae, educationis, morumque rationem habere maiorem velit, sicque praevenire magis, quam, sine magno discrimine adhibito, *Suicidium* punire contendat.

petat grata , ingrata averfetur , appetentia autem , & averfatio animi pathemata excitent , merito pro illorum origine habetur , ille autem ipfe fensus in certo nervorum habitu , tensione , constitutione , & certa obiecti applicatione pofitus efle videtur , à naturali haec conditione ponas recedere , quae antea grate , aut nullo modo nunc molefte animam afficient . Cui caput dolet , & fuaviffima difplicet mufica , cui faburra in ventriculo , & primis viis latet , delicatiores quoque cibi naufeam creant , dulciffima amare fapiunt , unde anima , quae fensationis caufam ad obiectum refert , decipitur , & quae bona utilia , iucunda , horret , fiquè inordinatis maxime pathematis vexatur , eo ad illa proclivior , quo fensus ille ipfe forfan ob nervorum nimiam tensionem mobilior erit .

Atque tali depravationi vitae fastidium , & autochiria adfcribenda videntur ; fuae profecto vitae anima fensum habet , quae enim vitam conftituunt viscera , nervos habent , qui à continua horum actione non poffunt non affici , quo ufque vita nervos , unde illius fensus , grate afficit , anima hanc dilectiffimam habet , fed illis male plerumque conftitutis , quidni à vita ipfa ingrate afficietur ? vitam igitur moleftiffimam habebit , ficque illam averfabitur . Quam prompte autem ad fensum quendam ingratum

actiones illum avertendi pares excitantur? cadentes brachia exporrigunt, cum quid ante oculos propius agitur, nobis quoque reluctantibus clauduntur palpebrae, nauseosi, si quid ingeritur, vomitu reiicitur, manusque, quam ignis urit, quam prompte retrahitur? simili melancholicos modo ad auferendam sibi viram determinari nonne probabile? atque, cum male affectum sensorium commune melancholiam constituat, perversam illius affectionem pro causa melancholiae proxima habemus.

Causas, quibus sensorium commune perverse afficitur, iam remotiores, quae authoribus placent, si rimamur, quasdam immediate, mediate tantum alias, id est per consensum nervorum in parte remotiore constitutorum agere observamus, immediate sensorium commune, animi motus magni, vel ex ira vehementi, amore vesano, metu magno, iactura gravi, imo gaudio insigni &c. aggredi videntur (\*); ex maxima

F 4

---

(\*) Tres praecipue Melancholiae causas esse dicit ill. & amicissimus ZIMMERMANNUS: *Viri ex superbia, feminae ex zelotypia, puellae ex amore insaniunt. Von der Erfahrung in der Arzneiwissenschaft. Quod si stultorum visitemus habitacula, animi ut plurimum pathemata in causa morbi fuisse reperiemus; & qui, post eiusmodi*

enim fibrillarum sensorii communis agitatione oriuntur, cuius tanta teste experientia vis esse potest, ut mortem quandoque inducat; his studia protracta, intensa, profundiora annumerari quoque debent, quibus actio sensorii, quod meditationum sedes, longius protrahitur, validiusque intenditur; est autem ea partium corporis nostri conditio, validius, quod, si longiori tempore agitentur, debilitentur, & male se habeant, protractae huc ex eadem ratione vigiliae, quae spiritus consumunt, pertinent. Mediate autem tantum motus corporis validi in aëre praeprimis calido, sicco, Venus nimia, victus durus, austerus, potus spirituosus copiosior, vita sedentaria, venena, febres male iudicatae, graviditas, puerperium, passio hysterica, hypochondriaca agunt: haec enim omnia iuxta

---

occasiones, in magnis viscerum defectibus, post mortem quaesiturus est, quid *Suicidam* vel culpofum declaret, vel insontem, morbiq; pronunciet victimam: is certe in rebus quam maxime dubiis versabitur. Virgini 20. annorum, interfacing Virgines se recipere maximopere cupienti, cum id negatum esset, ilico ab audito repulsae nuncio, laborare mens coepit, & maniaca tandem facta est. MORGAGNUS, *de sedib. & caus. morb.* Lib. I. Ep. VIII. Quid vero in hoc, aliisque similibus exemplis per *anatomem* detegere licebit?



**BOERHAVIUM , & SWIETENIUM** ad genesin atrae bilis conferunt , quae vel sanguini universo admixta varie circulum partialem , fluidique nervei secretionem vitare , vel ad systema portarum demandata , plexus meseraicos , hepaticos , splenicos , gastricos diversimode irritare poterit , quibus sane sensorium diversis perverse modis afficitur , verum circa causas hactenus enarratas , nisi vel in nervis , vel in ipso cerebro iam aliqua fuerit non determinanda dispositio , illas minime melancholiam inducere notamus . Sic in dies ab harumce causarum pluribus , quin in melancholiam incidunt , affectos , videmus .

Itaque , cum , ut hactenus monstravimus ; melancholia partem cultum anatomicum fugientem occupet , hacque ex ratione neque proxima in corpore causa detegi possit , ipsae autem causae remotiores sine quadam non perlustrandae partis dispositione haud agant , cuius usus institutae cadaverum sectiones ad cognoscendum illum morbum erunt ? profecto , si quid valeant , vel ut partem morbosam , vel causas indicent , partem morbosam summam ob tenuitatem non perscrutari posse concedes ? qui causam reperiens proximam ? causas autem remotiores dubias esse , & incertas negare non potes (\*) .

---

(\*) Qui aberrantis mentis causas in corpore dete-

Esse quosdam , nos non latet , qui , cum causam melancholiae proximam in bile atra ponentes , lienem pro huius officina constituent , ex lienis depravatione hunc morbum inferre velint , alios illum ex cerebri , aut aliorum viscerum , & partium corporis vitiis quandoque deducere , atque haec observationibus constare contendunt . Verum quomodo illa pro causa haberi possunt proxima , quae toties desideratum non producant effectum , & licet causas remo-

---

gendi gratia , *cultro anatomico* utentes , huic soli nimium confidunt ; ii certe , uti iam innui , vel parum subtili de corporis animaeque commercio idea nituntur , vel oculis gaudent , quos natura MORGAGNIS & HALLERIS sat benigna negaverat aliisque summis anatomicis . Quantae non a paucis *solani furiosi* ( Plantae a DIOSCORIDE *maniaca* dictae ) vel *hyoscyami* granis , idearum perturbationes , quanta deliria observantur , quam enormes animi motus *contagiorum* plurimorum in nervos actio producit , quamque stupenda phenomena a quovis acri vel subtilissimo , ad cerebrum delato oriuntur , quin structurae in his mutationem aliquam insecutam , oculo anatomici vel maxime lynceo visibilem invenire liceat ! Vereor , ne effectus vel huius vel alterius morbi , pro causa Melancholiae saepissime habuerint Medici ; Sed vereor magis , ne , ubi aberrationes a consueti partium structura forte non detexerint , in solam miserorum mentem reiiciant facinus , quod invisibilem quidem , non tamen ideo incorpoream semper agnoscit originem .

tiores quasdam in corpore visibiles quoque mutationes inducere concedamus , cum ipsae hae causae melancholiam non necessario inducant , cum illae mutationes in melancholicis non sint constantes , qualem ex eiusmodi mutationum observatione certitudinem habebis ? quod , ut apertius pateat , explicam , atque obsoletam de generatione atrae bilis in liene hypothesein mittentes , ad ipsas authorum observationes properamus . Nihil certi , ex quo melancholia inferri possit , innotescere profecto constabit .

Ut de liene ordiamur , Clarissimi BONETI anatomicarum observationes sectionum , cum evolvimus , de melancholico quodam (a) , qui hypochondriacis symptomatis , & nephriticis doloribus crebro infestabatur , quod lien scirrhusus , iecurque floridum fuerit , legimus . Alibi (b) corpus lieni aliquo modo globosum , coloris diversi , in cuius medio digiti latitudine atra linea , in convexo venae varicosae , & crasso sanguine farctae , notat . Idem Melancholicae quoque feminae , in cuius cadavere nullus fuit lien repertus meminit (c) . BLASIUS (d) prae-

(a) BONET. sepulchr. T. I. L. 1. Sect. 9. Obs. 25.

(b) Idem q. s. Obs. 27.

(c) Idem Obs. 22.

(d) Observ. anatom. p. 127. & Observ. medic. 22.

ter lienem quatuor libras ponderantem, & admodum durum in dissecto melancholico nil observavit. Lividum, flaccidumque lienem, vasa meseraica nigro sanguine referta in defuncto melancholico testatur WOLFRIGEL (a). Lienem scirrhum cum adnato tuberculo, humorem in mesenterio nigrum in defuncto melancholico reperta fuisse apud HORSTIUM (b) invenimus. TONNERUS (c) in quodam melancholico lienem admodum exiguum reperit. Cumque LAURENTIUS (d) quosdam, in quorum familia melancholia haereditarie propagabatur, praematura morte sublatos secaret, lienem admodum exiguum quoque vidit. Van Hornium melancholicum, qui fune se interfecerat, secasse, in quo solus peccaverat lien, qui, cum tunica illius removeretur, difflebat, BARTHOLINUS (e) scribit. Debitam hisce observationibus fidem nolumus infringere, quid autem hinc inferes? lienis depravationem produxisse melancholiam? vel in omni melancholico lienem esse vitiosum? Vitiosam enim ar-

(a) Miscel. curios.

(b) Observ. anatom. 8.

(c) Epistol. 2. L. 6.

(d) BONET. sepulchr. T. I. L. 1. Sect. 9. p. 192.

(e) Epistol. 97. Cent. 3.

gumentationem à particulari ad universale nosti, vel ad minimum, ubi lien vitiosus, ibi melancholiam esse concedas, quantum autem id à veritate sit alienum, fida observatio demonstrat.

Primum, quem testimonii causa in medium proferam, sit GLISSONIUS (a). Lien, inquit, olim affectuum melancholicorum reus actus est potius, quam peractus, neque sententia illa nuperis est experimentis consentanea, plurimi enim istiusmodi affectionibus obnoxii, & post obitum exenterati, lienem ab omni culpa absolverunt, atque apud FRANCISC. SYLVIIUM (b) legimus: illud idem corpori utilissimum viscus ab inexpertorum calumniis liberat dissectio, dum in affectibus melancholicis etiam diuturnis, & post multorum annorum vexationem ad mortem usque aegros comitantibus in cadaverum plurimorum perscrutatione, innoxium, & plerumque prae caeteris visceribus satis sanum nobis manifestavit lienem, non inflatum, non induratum, non obstructum, & vitiatum quoties lien, aut minor fuit detectus, quin vel minima melancholiae suspicio fuerit. Sic THOMAS BARTHOLINUS (c) in observationibus anatomicis rarioribus de

---

(a) Anatom. hepat. c. 45. pag. 411.

(b) Disputat. med. 5. p. 23.

(c) *Ungewöhnliche anatomische Geschichte durch Georg Fegern* Obs. 19.

viro febre lenta perempto, in cuius cadavere praeter alia lien coloris plumbei. Idem de phthifico (a), cui lien crassus nigricans cum tuberculo ovi columbini, de femina ex vomitu bilioso defuncta, in qua lien duplo maior, recenset idem (b), in iuvenis cadavere violenta morte extincti, lienem adeo parvum, ut duodecim vix unicas ponderaret (c), & in hydropico (d) quoque lienem admodum exiguum observavit. Habet commercium litterarium (e) sectionem mulieris ex hydropse defunctae: omnia abdominis viscera obstrueta, lienem autem vix quartam naturalis magnitudinis partem aequantem, in externa superficie ad dimidiam partem cartilaginosum habuit, quae tantum, quo viveret, à melancholia absuit, ut hilaris semper animi ad mortem usque cerneretur. In alio loco (f) lienis monstrosi quindecim librarum, & alterius exigui adeo, ut vix nucem avellanam aequaret, sine melancholiae notis mentionem facit. Nos quoque demonstrante Clarissimo Domino Praefide lienem

(a) Ibidem Observ. 76.

(b) Ibidem Observ. 81.

(c) Ibid. Obs. 5.

(d) Ibid. Obs. 2.

(e) Ann. 1734. hebdom. 29. p. 231.

(f) Ibid. ann. 1732. hebd. 33. p. 260.

ex febre hectica defuncti ad minimum viginti ponderantem libras, plerumque extus cartilagineum, intus partim puriformi, & sanguinolenta, partim recenti caseo simili materia repletum perspeximus, in quo nec ullum unquam melancholiae vestigium fuit observatum. Quid iam de sanguine adusto, de vasis epiploicis sanguine nigro infarctis, de omento nigro, friabili, putrido, de hepate oedematoso, fissuris affecto, de pituita in ventriculo reperta, de pyloro inflammato, de mesenterio scirrhuso, de intestinis flatibus distentis, ex quibus in defunctorum cadaveribus observatis, Medici quoque celebres melancholiam inferre voluerunt, dicamus; sanguinem ab obitu nigriorem, venas, in quas ex arteriis per mortem sanguis fere omnis cogitur, plurimum tumidas, crebriores quicunque sectiones instituit, facile observare potuit; quoties autem hepar obstructione, mesenterium scirrhuso laborent, quin melancholia aegrum infestet, omnes norunt practici, & tota die inflammatio, & sphacelus ventriculum, & omentum occupant, quin de melancholia somniare liceat. Haud pridem in Cadavere febre lenta defuncti, qui assumpta omnia vomitu rejiciebat, Clarissimus Dominus Praefes lienem magnum, induratum, omentumque in enormem mutatum scirrhum quindecim ad minimum libras ponderantem, to-

tumque exulceratum reperit, qui, cum totum obduceret pylorum, hunc ulcere quoque carcinomatoso affecerat, neque per quinque menses, quo malo hoc conquerebatur, vel minimam melancholiae suspicionem moverat. Quis autem unquam colicae flatulentosae, & tympanitidi, in quibus tamen intestina flatibus maxime distenduntur, melancholiam dixit propriam?

Aequè parum firmo pro asserenda melancholia ex cordis post mortem habitu sumpta talo nituntur: humorem nigrum in sinistro cordis sinu feminae, quae ex melancholia perierat, BLASIUS (a) vidisse asseverat; auctori mehercle credo: sanguinem invenit, qui, quotiescunque sine aeris attactu in grumos secedit, colorem nigrum refert; quaeso, cum nil praeterea auctor notare potuit, nonne visibiles internarum partium mutationes in melancholia non semper existere potius inde defendamus. Hocque ulterius ROLFINCKII observatio confirmare videtur (b), nil ille in melancholica, quae laqueo se strangulaverat, quam cor exsuccum, & ventriculos sanguine destitutos notare potuit, quis autem haec pro melancholiae signis habeat? auctor in removendo sterno omnem attentionem, ne

---

(a) De palpit. cord. L. 2.

(b) Dissertat. de cord. c. 2.



vasa maiora fuerint secta , adhibuerit , thoracem-  
 que prae abdomine , & cranio , prius aperuerit ,  
 quibus neglectis ex sectionis vitio cor exsuccum ,  
 & sine sanguine reperiri facile potuit , attamen ,  
 cum compressis à laqueo iugularibus venis redi-  
 tus sanguinis interim per liberiores arterias ver-  
 tebrales ablati ad cor interciperetur , idemque  
 ob impeditam respirationem in pulmonibus con-  
 gereretur , quid mirum , si cor exsuccum man-  
 ferat . Et quoties ventriculi cordis vacui repe-  
 riuntur , cum fibrae sinuum musculares pauciores ,  
 & debiliores prae ventriculorum validioribus ,  
 motum ad sanguinem in ventriculos evacuan-  
 dum , requisitum amittant ? quis denique ex  
 vesicula illa sanguine nigro repleta , cordi ac-  
 creta , ac pituita , uti author dicere amat ,  
 in utroque cordis ventriculo reperta , quae in  
 melancholicis BONETUS observaverat , melan-  
 choliam affirmet ? pituita , illa concretio quae-  
 dam polyposa toties post mortem contingens ,  
 & vesicula , anevrismatica cordis dilatatio pro-  
 babiliter fuere . In quantum nunc , quae ex  
 habitu cerebri pro adstruenda melancholia ab  
 authoribus deducta , valeant , quoque vide-  
 bimus .

Venas cerebri sanguine nigriore plenas ,  
 limpida in illius cavitatibus aquam in melan-

*Op. Med. Vol. I.*      G

cholico BALLONIUS (a) apprehendit . In alio , iuvene melancholico epilepsia perempto piaë meningis vasa BONETO (b) multo sanguine nigro , & concreto referta videbantur . In femina diro capitis dolore afflicta , notissimos & omnia timente , in sylvas sæpius auffugiente , ac ter violentam mortem sibi inferre nitente , tandem mortua , eidem (c) vasa piaë meningis maiora , sanguineque pleniora , ventriculorum lateralis superficies lutea , quasi rubigine , & mucro obducta croceo apparebant . Haec vero ad indagandam melancholiam eo minoris sunt ponderis , cum vix nunquam vasa cerebri , gravis nisi praegressa fuerit haemorrhagia , in defunctis sanguine non sint plena , atque profecto in laqueo strangulatis de autochiria suspectis semper reperiuntur plenissima . Aqua autem in ventriculis cerebri eo minus incusari potest , cum toties in ventriculis sine melancholia observetur , quin , illam mortis potius effectum , quam alicuius morbi praegressi causam cum LANCISIO existimamus : *Magna interdum , inquit (d) , feri copia ex coacto intra pulmonum , ac cerebri vasa san-*

---

(a) Epid. & Ephem. L. 2. p. 244.

(b) Sepulchr. L. I. p. 182. Obs. 3.

(c) Idem Obs. 2.

(d) De mort. subit. L. 1. p. 24.

guine, violenter extruditur, & in thoracis, vel cerebri cavitatibus colligitur; hinc frequens erroris ansa apud minus in arte peritos, qui lympham in sinubus cerebri invenientes, illam ut causam, cum plerumque fuerit duntaxat effectus, accusare solent. Verum, quam parum lymphaeiusmodi extravasata, ipsaeque graviores cerebri affectiones pro melancholiae causis haberi possint, observationes sedulo ponderatae optime docebunt, observationes autem praecipuas iam saepius laudatus BONETUS suppeditabit.

Quendam de capitis gravitate conquestum esse notat (a), ablato mortui cranio semilibram feri tenuioris in meningibus, & ventriculis reperit. In alius (b) de dolore gravativo, dum viveret, conquerentis cerebro extraordinariam aquae collectionem deprehendit. In alio (c) immani cephalalgia afflicto, feбри demum correpto, qua iudicata cephalalgiae tamen reliquiae manserant; cum defunctus esset, non tantum cerebrum copioso humore irriguum, sed globum quoque glandulae ad instar cerebri substantiae inclusum invenit. In icterico (d) capitis dolori-

## G 2

---

(a) T. I. L. 1. Sect. 1. Obs. 32.

(b) Idem Obs. 33.

(c) Ibidem Obs. 35.

(d) Ibid. Obs. 38.

bus continuo infestato, mortuo, meninges flavescences, & in ventriculis sat copiosum liquorem limpidum, subsalsum vidit. Laboraverat quidam (a) urinae suppressione, post mortem caput aqua plenum inventum. In muliere (b) ex colica paralytica, & epilepsia oppressa in plicis cerebri, & ventriculis aqua haesit tenuissima. In muliere vertiginosa, tandem subito extincta, & aquam, & abscessum, ovum gallinaceum magnitudine aequantem inventa fuisse fidem nobis WEPFERUS (c) facit. Et de vulnerato quodam in cranio, qui restitutus videbatur, domo iam, ut consuetis fungeretur negotiis, egrediente, altera die epilepsia subito corridente, habet SALMUTIUS (d), quod dimidium in dissecto cadavere cerebrum fuerit sphacelosum (\*).

---

(a) Idem q. f. Sect. 11. Obs. 2.

(b) Ibidem Sect. 12. Obs. 12.

(c) Dissert. de Apoplex. p. 398.

(d) Centur. 3. Obs. 22.

(\*) Virum mercatorem *Bruchsaliae* in Principatu *Spirensi* vidi, qui iam per mensem, post acceptum capitis vulnus, sanus videbatur & cum parvo admodum ad frontem ulcusculo obambula- bat ad suos nunc reversurus. Cum *Aulae* Chirurgus, specillo ulcusculum necdum optime clausum visiteret, media illius pars, absque omni vi adhibita, proprioque pondere in cavum cerebri illapsa, & dein a perterrefacto Chirurgo, quin aeger animadverteret, retracta est. Vidi hominem, sanissimo in omnibus similem, mo-

Quoties igitur aqua in cerebro, gravius quoties ipsum cerebrum affectum? quin melancholia nascatur. Quis igitur ex aquae in cerebro praesentia, quis ex diversis sensibilibus cerebri affectionibus melancholiam inferat? Sexcentas adhuc in asserti fidem observationes, nisi dissertationis limites excederemus, adducere possemus, unicam tantum coronidis loco proferre adhuc liceat: Vir triginta annorum pilis nigris, temperamenti melancholico cholericis, ictero laborabat (a), qui quartana exceptus in hydropem abiit, à qua tamen convaluit, subito epilepsia extinguitur, in defuncti cadavere hepar ingentis magnitudinis duplo naturali maioris, lien naturali triplo maior, flaccidus, friabilis, colore ad lividum accedens, epiploon, & mesenterium partim sphacelosa, cor flaccidum & molle, intra meninges, & cerebri ventriculos magna aquae

## G 3

---

nuique ne itineri longiori se committeret: ea ipsa vero nocte *francofurtum* petiit, ubi per tres adhuc dies degebat, cum subito totum caput Erysipelate inflaretur, ac sub deliriis magnis sequenti die obiret aegrotus. Cadaver apertum non fuit; sed cui dubium esse potest, magnam in calvaria suppurationem latuisse, quin tamen vel minima abinde, nisi brevi ante mortem sequeretur idearum confusio!

(a) BONET. sepulchr. T. I. L. 1. Sect. 22. Obs. 13.

copia acris, subacidi, falsi saporis fuere deprehensa, quod si ille atroci impulsus scelere sibi ante terminum fune vitam ademisset, credo medius fidius! vulgi opinione ductus in illius melancholiam iurasses (\*).

Quid igitur in defuncti eiusdem cadavere splenem maiorem, aut minorem, aut obstructum,

---

(\*) Cerebrum delirantium modo *durius*, modo *mollius* invenerunt anatomici. CL. LITTRE & GEOFFROY in duobus maniacis, cerebri substantiam invenerunt multo firmiorem. Universam cerebri substantiam solito compactiorem LANCISIUS vidit. Sic & MORGAGNUS in variis cerebrum ita firmum conspexit, ut nonnulla perspicue magis ac commode, & disquirere & dignoscere potuerit. Neque in omnibus stultis omnes cerebri partes aequali duritie inveniuntur: *molle* cerebrum in maniaco sane observavit LENTINUS *Beobachtung einiger Krankheiten*, S. 113. Profundiores cerebri substantiam medullarem ex parte *valde mollem* in *quadraginta duobus* maniacis, & in aliquibus ita mollem, ut ab attractu, pultis instar, diffunderet, vidit cl. GREDINGIUS. In 33. maniacis corticalis cerebri substantia naturalis erat, aliquando quidquam firmior. Substantia medullaris mox sub cortice naturalis, vel vix firmior. *Adversaria Medico pract. Vol. II.* fatetur tamen & ipse ill. MORGAGNUS, nullius momenti in probanda stultitia observatam a se cerebri in stultis duritiem esse: cum in quibusdam, qui minime stulti erant, cerebrum non minus durum invenerit; & cum stultitiam sine cerebri duritie fuisse, quamplurimi viderint.

quid vasa abdominis sanguine nigriore turgescencia, quid cor exsuccum, & sine sanguine, quid cerebrum diversimode affectum invenisse pro adstruenda melancholia iuvet? Profecto, cum toties haec omnia sine melancholia reperiantur, quoties dubiis hisce nixus opinionibus perperam pro melancholicis quosdam habebis? cum alios vere melancholicos, ubi nil tale reperies, ab hac labe absolves? ne autem in plurimis melancholicis nil praeter mentem affectum esse, temerarium credas assertum, en, quae observatio docet: De melancholico in Iurisprudencia medica MICHAELIS ALBERTI ex depravata mente se Sodomiticum credente legitur (a), quod quoad corporis statum a Medicis sanus declaratus, & per totam vitam nullo notabili morbo afflictus fuerit. De puella, quae ex protractiori balneo vaporis in melancholiam inciderat, nil aliud meminit BÜCHNER (b), quam quod se damnatam haberet, & de femina, quae aquis se suffocaverat (c), quod praeter vehementem angorem Medicus nil ante mortem apud illam observasset.

G 4

---

(a) T. 5. p. 758.

(b) Miscel. phys. med. T. I, p. 147.

(c) Ibidem p. 1195.

In commercio literario (a) melancholici casum habes cuiusdam , qui propter imaginarium cum diabolo pactum misere angebatur , praeter angorem illum nil observans Medicus brevi illum , postpositis exorcismis , ab hoc larga venae sectione liberavit . En melancholicos , in quibus certe praeter mentem nil laborasse videtur , quodlibet enim viscus in corpore determinatam habet functionem , quodsi igitur nulla praeter cerebri laesa appareat , reliqua nonne viscera ab omni absolvenda , quod autem & post mortem melancholicorum cadavera sine ulla visibili labe reperiri possint , ex observatione à Tropponecro conscripta (b) patet , accersitus ad iuniorem nobilis feminae ancillam , quae ex furore melancholico novacula iugulum sibi absciderat , in illius secto cadavere nec minimam invenisse labem testatur .

Verum , quo in casu autochiriae dubio melancholia dignoscatur ? ex vita ante acta , & ipsa necis ratione : si quis enim diu sine manifesta causa tristis , & moestus , magnisque animi motibus angore agitato , aut , si à familia melancholica , quos ad hoc malum auctores omnes habent maxime dispositos , aut si diutius

---

(a) Anno 1734. p. 129.

(b) Decis. med. forens. decad. 5. Cas. 10. p. 195.



gravi iactura , vel curis vexatus fuerit , quod si nece violenta non ad advertendam , quam arrogantiores vitae parem habent , infamiam , non ad ultrices iustitiae manus fugiendas se perimat , & tum quoque nisi vitam egerit perditissimam , illum pro melancholico habeas , etenim , cum à sanae rationis homine , quod membrum quoddam nobilius libere velit amittere , sit incredibile , quî , quod quis vitam humanorum praestantissimum , quousque sapit , sibi auferat , credas ? non tempore ethnicorum , quo homines perversis imbuti opinionibus inter maximum necem voluntariam heroismum referebant , cum Christianis vivimus , quibus non solum cum innato vitae amore , verum , cum metu ignominiae , cum metu inferni , qui tenerrimis iam animis imprimitur , colluctandum .

Cumque igitur melancholiae sedem in parte totius corporis tenuissima , & quoad fabricam penitus ignota ostenderimus , causam , cum proximam acutissimam oculorum aciem fugere appareat , & , quae vulgo pro causis cognitae , cum viscera , in quibus melancholiae sedem figere quibusdam placuit , toties sine melancholia reperiantur affecta , toties melancholici sine ulla visibili viscerum laesione sint , vix ullam fidem mereantur , in dubio autochiriae casu à sectione nonne abstinendum ? abstinendum profecto , quod

fectio infonti semper aliquam infamiae maculam  
vulgo imprimat, ad eruendum fontis crimen nihil  
proficiat. Hisce sit studiis nostris imposita coro-  
nis, neutiquam vero quoad omnipotens vitam  
concefferit

F I N I S.

CHRISTIANUS FRIDERICUS LUDWIG

D E

## SUFFUSIONIS PER ACUM CURATIONE .

( *Lipsiae 1783. cum Professorium munus  
ibidem in se susciperet Auctor  
clarissimus .* )

**P**Raeter istas , quae calculum e vesica extra-  
here , intestinum ex sede motum reponere , &  
capitis vulneribus mederi docent curandi vias ,  
suffusionis curatio sine dubio in maxime celebra-  
tis semper fuit . Quod factum esse videtur & ob  
visus organi dignitatem & ob ipsius mali frequen-  
tiam . At vero non unam eandemque medendi  
adhibuerunt chirurgiae magistri methodum , sed  
duplicem , eamque omnino sibi contrariam , aliis  
ex oculi artificiosa capsula obscuratam lentem ex-  
trahentibus , aliis eiusdem mali causam in oculo  
ipso deducantibus . Itaque primis temporibus ea  
medendi ratio praevaluit , quae visa est prope-  
modum omnibus & quam maxime conveniens ,  
neque adeo periculosa ; usque dum medio , quo  
nunc vivimus , saeculo , celeberrimi chirurgi aliam  
proponerent curationem , quae , quamvis ab ini-  
tio priori palmam praeripere videbatur , tamen

neque omnibus, neque recentissimis inprimis magistris omnino fuit probata. Etenim veteres & mediae aetatis scriptores & recentiores quoque chirurgi, deprimere inter oculi tunicas lentem crystallinam suaferunt. Nolo iam omnes scriptores, qui a primis chirurgiae initiis hanc curandi viam commendarunt, recensere; sufficiat, modo praecipuos nominasse, inter quos *A. C. Celsus*, (a), *Paulus Aegineta*, (b), *Avicenna* (c), *Albucasis* (d), *Arn. de Villanova* (e), *Guido Cauliacensis* (f), *Valescus de Taranta* (g), *Io. de Vigo* (h), *Pareus* (i), *Bartisch* (k), *Hier. Fabricius* (l), *Durantes Scacchius* (m), *Brisseau* (n), *Antonius Maitre Jean* (o),

- (a) Lib. VII. cap. 7.  
 (b) Lib. III. cap. 22.  
 (c) Lib. III. fen. 3. tract. 4. cap. 20. p. m. 550.  
 (d) *Halleri bibl. chirurg.* I. 137.  
 (e) *Breviar. Lib. I.*  
 (f) *Chir. magna tr. 6. doct. 2. p. m. 71.*  
 (g) In *philonio pharmaceutico & chirurgico* edit. *G. W. Wedelii* Frf. & Lips. 1680. 4. p. 170.  
 (h) *Chirurg. Lib. 4. c. 7.*  
 (i) *Vffenbach thes. chirurg.* p. 356.  
 (k) *οφθαλμοδουλεια* 1583. fol. p. 60.  
 (l) p. m. 24.  
 (m) cf. *Halleri biblioth. chirurg.* I. 271.  
 (n) *Traite de la Cataracte & du Glaucoma* par Mr. *Brisseau le fils* à Paris 1709. 12.  
 (o) *Traite des maladies de l'oeil* a Paris 1722. p.

*Franciscus Petit (a)*, *Laur. Heister (b)*, *Dud-*  
*dell (c)*, *Ferren (d)*, *S. Yuesius (e)*, *Günz*  
*(f)*, *Pallucci (g)*, *Troschel (h)*, & plures *(i)*,

170. seqq. & *Boerhave* de morbis oculorum Goett.  
 1750. p. 127. seqq. 8.

(a) Memoires de l' acad. R. des sciences a Paris  
 1725. 1726. 1730. & in variis epistolis seorsim  
 editis cf. *Halleri* diss. chirurg. T. V. & Bibl.  
 chir. II. p. 1.

(b) In variis scriptis cf. *Halleri* Bibl. chirurgica T.  
 II. p. 5.

(c) A Treatise of the Diseases of the Horny-Coat  
 of the Eye and the various Kinds of Cataracts  
 London 1729. 8.

(d) Quaest. Quinam sint praecipui, quomodo expli-  
 centur & curentur lentis crystallinae morbi? Paris  
 1732.

(e) Traite des maladies des yeux Amst. 1736. 12.  
 p. 219.

(f) I. G. Günz & I. P. Schnitzlein de suffusionis  
 natura & curatione Lips. 1750. 4. c. f.

(g) Description d' un nouvel instrument propre a  
 abaisser la cataracte avec tout le succes possible a  
 Paris 1750. 12. — Histoire de l' opération de la  
 cataracte faite a six soldats invalides par *Palucci*  
 Paris 1750. 12. Methode d' abbatre la cataracte  
 par *Palucci* a Paris 1752. 12. — Lettre a Mr.  
 le Marq. de \*\* sur les opérations de la cataracte  
 faites par *Palucci* 1751.

(h) *Buchner* & *Troschel* de cataracta omni tempore  
 deponenda. Hal. 1753. 4.

(i) I. I. *Wepfer* cf. de *Vigiliis* Bibl. chirurg. T.  
 II. p. 1269. C. *Solingen* p. m. 83. *Ant. Bene-*  
*volies* de *Vigiliis* p. 1290. I *Taylor* cf. ibid. p.  
 1297. *Petrus Idema* & *Petr. Rahlaw* ibid. p. ;

illam curationem prae caeteris explicarunt, emendarunt & perfecerunt. Erant autem medio saeculo hoc chirurgorum quidam, qui, cum illam operationem non ab omni difficultate liberam animadverterent, crediderunt lentem potius ex oculo educendam, inter quos *Freytag* & inprimis *David* fuerunt sane primi & principes, quibus se multi adiunxerunt assedae, ita, ut fere uno ore in omnibus chirurgiae scholis lentis extractionem eius depressioni praeferendam esse plurimi existimarent. Fuerunt tamen, ut fieri solet, semper doctissimi & exercitatissimi chirurgi, qui non semper fidem huic curationi temere tribuerent & potius alteram methodum in quibusdam saltem casibus anteponendam iudicaret, e quorum numero *Sharpium* (a), *Warnerum* (b),

- 
1302. & 1306. *Io. de Gorter* chir. repurg. Lips. 1762. p. 247. *Walhom* in actis suecicis ad annum 1757. & seqq. I. *Fr. Henkel. Abh. der chirurg. Operationen* 1. Stück Berlin. 1770. 8. *A. F. Pallas Chirurgie.* Berlin. 1776. 8. p. 160. seqq. *H. Niemand.* de suffusione Arg. 1676. 4. *P. G. Schacher* & *G. F. laschke* de cataracta Lips. 1701. 4. *I. C. T. Wolf* de cataracta Giesae 1774. 4. &c.
- (a) A critical Inquiry into the present state of Surgery Lond. 1761. 8. p. 264.
- (b) Cases in Surgery with Remarks by *Joseph Warner* London. 1754. 8.

*Gendronum* (a), *Zachariam Vogelium* (b), *Olof Acrel* (c), *Ianin* (d), & *Morand* (e), omiſſis aliis, modo nomino. Inter recentiſſimos autem chirurgos & in hoc genere claros ſcriptores nuper varii extrahendi artificium in dubium vocare auſi ſunt, iſtorumque lucubrationibus effectum eſt, ut priſca methodus plurimis denuo commendaretur. Eminent inter hos *Percival Pott* (f), *Henr. Calliſen* (g), *Stoll* (h), *Sichold*, uti ex amiciſſimo D. *Weidmann* comperi,

- (a) *L. F. Debais Gendron Traité des maladies des Yeux à Paris 1770. 8.*
- (b) *Anatomische, chirurgiſche und medicinische Beobachtungen und Unterſuchungen Roſtock 1759. 8.*
- (c) *Chirurgiſche Vorfälle Götting. 1777. I. Band. S. 105. ſeqq.*
- (d) *Precis d'operations de chirurgie par le Blanc Tom. I. p. 512. & Memoires & observations anatomiques ſur l'oeil & ſur les maladies, qui affectent cet organe par Jean Ianin à Lyon, & à Paris 1772. 8.*
- (e) *Opuscules à Paris 1772. 4. II. p. 222.*
- (f) *Works Vol. III. Lond. 1779. 8. p. 171. ſeqq. & Modern. Improvements in the practice of Surgery by Henry Manning. M. D. Lond. 1780. 8. p. 142. ſeqq. & Richters chir. Bibl. III. p. 567. ſeqq.*
- (g) *Institutiones chirurgiae hodiernae Hafniae 1777. 8. p. 551.*
- (h) *Venerabilis noſter praeceptor in ratione medendi III. p. 443.*

& *Mohrenheim* (a). Quae res, cum plane attentione omnium eorum, qui de rerum natura & morborum medela severius cogitant digna sit, eam disquirere & horum virorum rationes ponderare nostri nunc erit. In universum autem crediderim, illos, qui lentem extrahendam censent anatomen subtiliorem, illos vero, qui ipsam deprimendam iudicant, naturam potius consulere (\*), atque sine dubio

(a) *Beobachtungen verschiedener chirurgischer Vorfälle*  
Wien 1780. I. Band. 8. p. 46. 56. 61.

(\*) His adde, quod *crumena* suae chirurgi, quos *oculistas* voce barbara dicunt, magis per *extractionem* consulant, quam per *depressionem*. Quamvis enim tam *subtilis anatomes* ad illam non requiratur semper, cum eadem fere felicitate a rudibus quandoque, & vix communis structurae oculi expertis hominibus, perfici noverim; est tamen maior operationis, & qui sanorum oculos magis percellat apparatus. Hinc enorme quandoque pretium a miseris extorquent *circulatores* illi, pro *extractione* non adeo difficili, cum parum admodum pro *depressione* cataractae solvi soleat; ut mirum sit a *Magistratu* his non prospici, & cuiusvis provinciae expertos & in his Chirurgos non conciliari, qui modico *utramque operationem* pretio, in se susciperent, neque, uti exteri solent, aegrotos, prima iam vel altera ab operatione suscepta die, postquam ante illam, pretium de quo conventum erat, extorquere quam optime didicerant, fato suo relinquerent.



plures depressione ; quam extractione curatos esse aegros .

Quae cum ita sint , liceat incommoda & commoda utriusque methodi ponderare atque ex his , quatenam optima sit & quibusnam casibus quaelibet sit accommodatissima , concludere . Enarrarunt eruditissimi viri depressionis incommoda & difficultates , inprimis *Tenon* (a), *Iusſeu & Thurant* (b), *Quelmalz* (c), *Lander* (d), *Schurer* (e), *Guerin* (f), & celeb. *Richter* (g); a quibus recensentur varia & sat speciosa adversus suffusionis depressionem argumenta , quorum alia ab aliis iam refutata sunt , alia mihi refutanda sumo . Metuunt primum in hac chirurgia aponeuroseos musculi abductoris, nervorum ciliarium , processuum ciliarium , ligamenti ciliaris

*Op. Med. Vol. I. H*

(a) *Theſ. Andouille & Tenon* de cataracta Par. 1757. c. f. 4.

(b) In *Theſi* cf. *Halleri* diſſ. chirurg. II. 165.

(c) *Depoſitionis cataractae effectus* Lipſ. 1748. 4.

(d) *Diſſ. de cataracta* Edinb. 1758. 8.

(e) *I. Lud. Schurer* num in curatione ſuffuſionis lentis cryſtallinae extractio depoſitioni ſit praefe-  
renda . Arg. 1760. 4.

(f) *Eſſai ſur les maladies des Yeux* par *Guerin* a  
Lyon 1769. 12. p. 351.

(g) *De variis cataractam extrahendi modis* Goet.  
1766. 4. & in *Faſc. Obſ. chirurg.* Goet. 1770. 8.

& vasorum choroideae laesionem : Qui haec affirmant , cogitent hasce partes laedi non posse , nisi vel acus iusto proprius corneam introducantur , quemadmodum nonnulli perverse faciunt , vel in ipso oculo ita versus anteriora ducatur , ut debeat hasce dilacerare partes . Quos errores & perverfas curandi methodos egregie perstrinxit *Günzius* (a) , qui locum inter finem processus ciliarium & ortum aponeuroseos musculi abducentis ad perforandam scleroticam omnium maxime idoneum censet . A laesis choroideae vasis non magna incommoda proficisci mihi videntur , quia raro magna interius oritur inflammatio , Processus ciliares porro & ligamentum eiusdem nominis in rite instituta administratione salvos servari posse , & ex ipso illo argumento patet , quo demonstratur , lentem in statu morbofo exsiccatam post pupillam minus occupare spatium ita , ut seiungatur a pupilla . Quod argumentum prae ceteris proponunt *Pouffe & Gentil* (b) . Porro affirmant posse acu iridem laedi ; sed hoc non nisi inepta encheiresi (c) fieri potest , & nonne idem in extractione evenire multo faci-

---

(a) L. c. Cap. II.

(b) In thesi cf. *Halleri* diff. chirurg. II. 183.

(c) *Günz* l. c. p. 36.

lius potest, & multo frequentius solet? Disfrumpi in varias particulas depressam suffusionem alii enunciant. Atque hoc etiam nonnunquam sane accidit, at tunc vel illae particulae, quae iam depressae sunt, eo facilius solvuntur, vel particula in anteriorem cameram translata, in illa facile dissolvitur, vel extractionis administratione ex ipsa eliminari potest. Legitur apud *Olof Acrel* curationis historia, in qua singulas cataractae portiones se demississe scribit (a). Posse lentem in ipsa operatione in cameram anteriorem propelli, vel ipsam depressam iterum reascendere, iidem monent. His vero respondeo in priori casu extractioni adhuc locum esse (b) & in posteriori depressionem iterum tentari posse & debere. Monent enim optimi scriptores inter quinquaginta casus, si suffusio rite demissa fuerit, vix unam vel alteram reascendisse. Aliis lens pondere suo vitreum humorem comprimere, circulum ciliarem retrahere & inflammationes procreare visa est. At vero, quod inflammationes attinet, illae in interioribus non tam subito oriuntur & gignuntur, quemadmodum externis

H 2

---

(a) L. c. I. p. 125. *Mohrenheim* l. c.

(b) *Heister* Institut. chir. p. m. 576.

in locis , & dein lentem depresso sensim exsic-  
 cari eiusdemque volumen imminui , atque dissolvi  
 a multis observatum est , ita , ut humor vitreus  
 & corona ciliaris non tantum detrimentum ca-  
 perere queat , quod etiam ipsa circumspēcta &  
 curiosius peracta administratione praecavetur . Po-  
 test , aliis observantibus , acus cellulas humoris  
 vitrei dilacerare ; quod si evenit , non ita peri-  
 culosum iudicandum est (a) , atque idem saepis-  
 sime in extractione atque multo maiore cum pe-  
 riculo accidere , quis est , qui nesciat ? Restant  
 autem & alia argumenta , quae haud minus pon-  
 dus habere videntur . Nempe a plerisque affir-  
 matur , locum habere non posse depressionem ,  
 si cataracta mollis vel semimollis sit . Sed huic  
 observationi obiiciendum est , quamvis multam  
 prae se ferat speciem , illam , quam nos com-  
 mendamus , curandi viam , si suffusio vel mollis  
 vel semimollis fuerit , multo felicius , quam ex-  
 tractionem adhiberi . Quodsi vero per infelicem  
 curationem mollis cataracta defluit & cum aqueo  
 humore miscetur , tunc illa in ipso humore mox  
 dissolvitur ita , ut plerumque nullum omnino  
 eius vestigium remaneat & camera anterior ite-  
 rum pellucens appareat . Utitur in illo casu Cl.

---

(a) Günz l. c.

*Mohrenheim* vitriolo caeruleo in aqua ad colyrium soluto (\*). Torquet *Pott*, si suffusionem mixtam curare suscepit, acum in ipsa cataracta saepius, & vulnere in capsulam lentis inciso, nihil se habere putat, quare impediat, quominus ipse semimollis lentis humor in cameram anteriorem defluat. Perpauco ignorare multo plures difficultates in extrahendi negotio mollis sive semimollis cataractae obvenire, mihi credibile est. Obesse duram atque solidam cataractam & indissolubilem visui, est aliorum atque celeberrimorum chirurgorum & medicorum opinio. Hanc vero quoque duriores, quamvis non semper, tamen saepe dissolvi, argumento sunt observationes, anatomica praeparatio, instituta experimenta, lentes post extractionem mox dissolutae. Factum vero est, ut cum perpaucae atque accuratae dissectiones cadaverum instituerentur, in quibus suffusionis depressio facta erat, chirurgi crederent, cataractam haud dissolvi. Credit *Pott* unamquamque lentem obscuratam, duriores quoque volumine imminui, dissolvi & evanescere, simulac e capsula exclusa fuerit, illosque errare, qui lentem duram atque solidam

H 3

---

(\*) l. c. p. 61.

cum lente crystallina piscis coacta comparaverint (a). Sunt, qui credant semper internas oculi partes dilacerari depresso lente, sed hoc se non ita habet, si modo depositio a chirurgo bene administratur, sicuti iam supra a nobis dictum est. Superfunt & aliae difficultates & incommoda, quae velamenti lentis cicatrices, & uveae per lentem factam irritationem concernunt, quae utpote a Günzio examinata (b) & egregie exposita brevitatis studiosus praetereo.

Sed progrediar his examinatis ad expositionem difficultatum, quae cum lentis extractione coniunctae sunt, quibus depressionis commoda subiungam. Sed brevis ero in istis commemorandis. Non quidem in omnibus, at tamen in multis casibus extractionem reiicio atque improbo, ob iridis vulnus eiusdem prolapsum (c), cuius plura vidi exempla, ob humorem vitreum effluentem, ob velamenti lentis & independentem processuum ciliarium laesionem, ob corneae, quae visum turbant, cicatrices, ob exsiccationem camerae anterioris post aquei humoris effluxum, ob nimiam saepe camerae antero-

(a) l. c. p. 202.

(b) Diff. cit. cap. 2.

(c) Gataker cf. Comm. Lips. X. 696.

ris angustiam (a), ob aerem cum impetu violento irruentem (b), ob inflammationes, quibus saepe lippitudines nascuntur (c), ob staphylomata, quae a vasculis uveae laeſis gignuntur, ob motum uveae laeſum, quam mydriases incurabiles subsequuntur, ob oculi mobilitatem (d), ob pupillam saepe nimis arctam, ob situm oculi nonnunquam nimis profundum in orbita, &c. Interim tamen non ignoramus extractionis curationem interdum cum fructu administrari, uti infra fusius explicabimus. Nollem enim talis videri, qui in universum extractionem damnaret, cum bene sciam & illam curationem sua habere commoda. Utraque enim methodus laborat quibusdam difficultatibus & utrique sua est propria praerogativa. Commoda enim depressionis non tam exigua & vilia sunt, quemadmodum statim videbimus. Conservatur nimirum hac curandi via pupilla, pars ex praecipuis oculi, uti mihi videtur. Si enim caute & circumſpecte operatio administratur, tunc sine laesione ligamenti ciliaris, processuum ciliarium & uveae posterioris, quae partes pupillam spectant, depressio fit. Aliud, neque id minus,

## H 4

---

(a) *Gataker* l. c.

(b) *Gataker* l. c.

(c) *Gataker* l. c.

(d) *Warner* l. c.

commodum est, quod neque omnis humor aqueus egrediatur, neque humor vitreus protrudatur, id quod in extractione curationi saepe obest. Porro vel omnino inflammatio & inflammationis symptomata caventur vel modo minuta aliqua suboritur. Exteriori enim vulnere acus perpauca laedit vasa, neque interiora vulnera ita periculosa censerī, cognitum est. Vidi Viennae in nosocomio S. S. T. feminam 45. annorum, cuius oculi tunica adnata ita irritabilis erat, ut modo digito admoto iam inflammaretur. Quae, si extractione curatio tentata fuisset, sane maxima affecta fuisset inflammatione, depressione autem egregie convaluit. Quod repetitio curationis locum habeat, id, quamvis plures aliter sentiant, haud leve commodum censeo. Deposuit *Warner* (a) quater reascendentem cataractam, usque tandem aegrum a malo liberaret; extant exempla plura apud *Valescum de Taranta* (b), *Ianin* (c) & alios (d), & vidimus ipsi similia. Et quidem eapropter repetitionem operationis tanquam commodum huius methodi praedico, partim, quia altera curatio, quae extractione fit, hoc non

---

(a) l. c.

(b) l. c. p. 171.

(c) l. c.

(d) *Olof Acrel*. l. c.



permittit, partim, quia, quamvis operationem repetieris, malum tamen nec increfcit nec auge-  
tur. Sic & in illo aegroto demittitur fuffufio fe-  
cure, cui eft pupilla arctior, camera anterior  
haud fpatiofa, & oculus in orbita nimis profun-  
de delitefcens. Neque defunt alia argumenta,  
quae commemoratae methodo favent. Sic obser-  
vatione & experientia conftat, cataractas fponte  
descendiffe, volumen lentium in oculo ipfo im-  
minutum effe. Primum quod attinet, referuntur  
talia exempla a *Sr. Yves (a)*, *Gendron (b)*,  
*Eschenbach (c)* & aliis (\*) Lentes autem immi-  
nui & diffolvi, probant anatomica praeparatio,  
extractio, observationes & experimenta nofta.  
Quae difquifitio, quo magis fpectat ad noftum  
argumentum, eo quoque accuratius examinanda  
eft. Quando nimirum lens cryftallina anatomica  
arte praeparatur & eiusdem capsula integra circa  
lentem fervatur, tunc quidem ifta non diffolvi-  
tur, tamen eius volumen imminuitur. Quod fi  
vero capsula feparata fuerit, lens vel tota vel  
ex parte defluit. - Expertus fum idem in lente

(a) l. c. p. 184. & *Halleri bibl. chirurg.* II. 74.

(b) *Richters chirurgische Bibliothek* I. 4. 128. feqq.

(c) *C. E. Eschenbach Observata anat. chir. med.*  
Roftochii 1769. 8. p. 38.

(\*) *Henkel* l. c.

humana , equi , bovis , cuniculi leporis , anseris & aliarum bestiarum . Idem extractio probat , qua facta , si lens ex capsula eximitur , corpus crystallinum , si non fuerit nimis durum , dissolvitur , quod unicuique notum est , qui eiusmodi operationibus spectator interfuit . Videtur enim lentis figura & forma ab ipsius sede solum pendere . Observationes doctissimorum virorum adhuc plura ostendunt . Sic cataractam depressam vel in oculo omnino evanuisse , vel saltem eius volumen imminutum esse , observarunt *Deidier* (a) , *Henkel* (b) , *Ianin* , *Acrel* & *Richter* . Idem testatur *Boerhaave* , qui ( de morbis oculorum p. m. 158. ) dicit : *depressa hac ratione crystallina lens sensim adcrescit uveae inferiori & tandem mole minuitur , quemadmodum extra corpus , si in aliquo liquore contineatur , mirifice minui deprehenditur* , Commemorat *Ianin* exemplum depressae atque iterum erectae lentis , cuius volumen ita imminutum erat , ut sponte per pupillam in cameram anteriorem prolaberetur (c) . Offert

---

(a) Consultations & observations par *Ant. Deidier* Paris 1754. 12. cf. *Halleri* biblioth. chirurgica II. 16.

(b) l. c.

(c) Refert *Ianin* historiam cataractae , quae ter depressa ascendit in cameram anteriorem , qua aperta minor vulgari lenti apparuit. *Journal de Medecine* Tom. XXXIV, 1770, & l. c. p. 267.

*Acret* sectionem cadaveris hominis , in quo olim suffusio demissa erat & humor crystallinus penitus dissolutus fuerat & evanuerat (a) . Neque ab eiusmodi observationibus abhorret Cel. *Richter* (b) . Confirmantur denique istae observationes experimentis nostris ; quae in animalium brutorum cadaveribus instituimus .

Immisimus in lagenam vitream formae rotundae , quae bulbi oculi figuram imitaretur & forsitan unam unciam fluidi cuiuslibet caperet , lentem capsula denudatam ita , ut inferiorem lagenae locum occuparet , cui humorem vitreum superfudimus , lagenae vero orificium vesica humida suilla clausimus . Vidimus post duos dies vitri interventu lentem in quatuor partes disruptam , & cum post quinque vel sex dies ipsam ex lagena parva emissemus , spumae vel glutinis mollis adinstar facile in aquam immissa dissolvebatur . Repetiimus haecce experimenta saepius atque eadem semper observavimus . Alia experimenta ita institui , ut in capite mactatae ovis lentis depressionem susciperem , & post aliquot dies lentis naturam examinarem . Dissecui nimirum post quinque dies oculum , atque reperi lentem crystalli-

---

(a) l. c. I. p. 109.

(b) *Chirurgische Bibliothek* I. 4. 13. seq.

nam disruptam atque circum circa emollitam; in medio vero haesit nucleus, qui non facile solvebatur, quamvis ipsum aeri exponerem. Repetii & haec pluries & idem semper inveni. Sed alio tempore in alio mactatae ovis oculo demisi cum lente acum, eumque demum post duas septimanas dissecai atque tum lentem quidem dissolutam, sed reliquas partes iam putredine corruptas deprehendi. Denique in cuniculo vivo, cui oculus sanus erat, depressionem administravi. Sed experimentum ob motum animalis perpetuum non bene processit; deprimitur enim lens sana multo difficilius, quam quae suffusione corrupta est, & accedit dein etiam a laesione gravis & insignis inflammatio, quae in animali haud tolli potest & qua animal iusto nimis excrucietur. Quapropter ab hisce experimentis ulterius capiendis abstinui. Lubenter in oculis e. g. equorum, qui saepe suffusione laborant, similia instituissem experimenta, at cum mihi talis opportunitas nunc non contingerit, illa experimenta, aequae ac ea, quae cum diversis liquoribus alcalinis, saponaceis & aliis fluidis tentari possent, in aliud tempus differo.

Sed de instrumentis quoque dicendum est, quae a chirurgis ad depressionem idonea iudicantur. Sunt nimirum acus, quibus haec curatio suscipitur & forma & materia diversae.

Alii rotundis subulatis (\*) utuntur , alii planis (\*\*) & attenuatis , alii acutioribus , alii obtusioribus . Aliae ex auro vel argento formantur , aliae ex calybe fiunt . Quas optimas censeamus mox declarabimus , si prius praecipuas earum diversitates indicaverimus . Scripserunt de hisce instrumentis *Salmon* (a) , *Garengeot* (b) , *Heister* (c) , *Heuermann* (d) , *Henkel* (e) , *Perret* (f) , *Brambilla* (g) , & alii (\*\*\*) .

*Bartisch* commendat acum rotundam subulatam ex argento confectam , apice inauratam , globo rotundo & manubriolo instructam (h) .

*Hildanus* proponit quoque acum rotundam subulatam & scamnum , in quod suffusione laborantem dum curationem administraret , federe voluit (i) ,

(\*) *Guil. Cowper* anatomy of hum. bodies .

(\*\*) *St. Yves* l. c. p. 224.

(a) *Synopsis medicinae* London. 1681. 8.

(b) *Nouveau Traite des instrumens de Chirurgie* les plus utiles . Paris 1727. 12. T. I. ad p. 433.

(c) *Institut. chirurg.* p. m. 579.

(d) *Abhandl. der vornehmsten chirurgischen Operationen.* Copenh. und. Leipz. 1754. 8. V. II. p. 585.

(e) l. c.

(f) *L'art du Coutelier* -- par M. *Perret* Paris 1772. p. 359. seq. Tab. 116.

(g) *Instrumentarium chirurgicum Viennense* Tab. X.

(\*\*\*) *Schacher & Jaeschke* l. c.

(h) l. c. p. 64.

(i) *Cent. IV.* p. m. 297.

*Brisseau* acus est lata atque fulcata ; mucrone latiore atque acuto & globulo instructa, ne nimis profunde in oculum descendat, habet scapum paululum compressum atque in marginibus rotundiorē (\*). Commendatur ab *Heistero* (a), *Günz* (b), & *Plenk* (c).

*Solingeni* & *Nuckii* acus ad perforandas oculi tunicas & suffusionem curandam ab *Heistero* expictae sunt (d).

*Bern. Albini* acus cuspidem planam & obtusiorē habet (e).

*Ferreni* acus plana in breve acumen definit, globulo vel eminentia in utroque latere conspicua, ne nimis profunde in oculum decidat, instruitur atque habet manubriolum satis longum, octangulare, signo notatum (f).

*Petiti* obtusior est (g).

(\*) l. c. T. I. Fig. 2. p. 202. seq. & *Perret* l. c. Tab. 116. f. 5.

(a) *Instit. chirurg.* p. m. 575.

(b) l. c. p. 50.

(c) *De morbis oculorum.* Viennae 8. 1777. p. 150.

(d) *Instit. chirurg.* Tab. XVII. 7. 8.

(e) *Bern. Albini* & *L. D. Gosky* *Diff. de cataracta* Ffti ad Viadr. 1695. 4. Fig. F. & *Halleri* *dissertationes chirurgicae* II. 47. & *Heister* l. c. Tab. XVII. 9. 10. 11.

(f) *Henkel* l. c. I. Fig. 1. & 19.

(g) *Henkel* l. c. I. Fig. 9.

*Taylor* utebatur, teste *I. Z. Platner*, acu, quae cum illa convenit, quam *Sharp* depinxit (a).

Invenit *Palucci* quoque ad depressionem cataractae duo instrumenta, quae tamen non ita constructa sunt, ut promeruerint laudem doctorum in arte chirurgica magistrorum. Invenit nimirum siphonem cum acu abscondita & annisus est imprimis acum ita collocare in vagina aliqua, ut posset punctione facta reduci in ipsam, ne laederet partes oculi internas & in reliquis, quae facienda supererant, vagina usus est. Perpauci autem & fortasse nemo praeter inventorem haec instrumenta in usum vocarunt (b).

*Portii* acum, cum nullibi depictam viderim, secundum exemplar, quod mihi ad manus est & quod ex Anglia apportavi, mihi describendam sumo. Habet manubriolum octangulare quatuor pollicum, tribus punctis albis eburneis in eo latere notatum, in cuius anteriori parte cuspis est paululum elevata. Acus vero ipsius, quae chalybea est, longitudo est pollicum duorum, & qua partem posteriorem rotunda est,

(a) l. c. Tab. X.

(b) cf. *Heusermann* l. c. II. p. 586.

qua anteriorem vero in cuspidem excurrit, cuius una acies omnino plana est, altera vero ex duabus iterum componitur, quarum quaelibet lineas duas lata est. Vidi ipse plus una vice, *Pottium* cum hacce acu suffusionem curasse.

Una ex recentissimis est *Mohrenheimii* acus argentea, conica, subulato rotunda, quae cum illis, quibus olim utebantur oculorum medici maxime convenit (a). Vidi ipsum ope huius acus dextre suffusionem demittentem. Proposuit loco cochlearis Davieliani hamulum, quem ad tunicarum portiunculas removendas vel extrahendas adhibet, de cuius vel commodis vel incommodis *Richter* legendus est (b).

Sunt fortasse adhuc plures, quas, cum non magnopere fuerint celebratae, consulto & sciens omitto. Interest enim potius, quae ex iis, quas recensui, optima sit, scire. Anteponerem semper eas, quae ex chalybe fiunt, aureis & argenteis, quas, quamvis aerugine non obducantur, nimis molles iudicaverim. Laeviganda est vero semper acus chalybea, priusquam oculo admoveatur, traiecta per pannum densum, ne superficies ipsius aspera sit. Rotundis, licet egregie perforent tunicam-scleroticam, tamen non

---

(a) l. c. Tab. I. Fig. 1. & 2.

(b) *Chirurgische Bibliothek* V. 720.



uterer, quoniam capsulam non bene scindunt, acutas reicerem, quia facillime partes internas laedunt. Optima acus, teste *I. Z. Platnero*, qui tamen aureas caeteris anteponit (*a*), ista est, cuius mucro paululum tenuatus, latior, non vero nimis acutus est (*b*). Eligerem mihi ad curationem eapropter talem, quae haberet mucronem tenuatum latiore, cuius margo inferior acutus, superior vero obtusior esset, cum inferiori scinderem lentis velamentum, dum obtusior defenderet reliquas partes a laesione. Ad figendum oculum non ita multis ferramentis ut, speculis *e. f. p.* in hac, quam commendamus operatione opus est. Vel enim solo digito, qui cantho oculi, interno opponitur, oculus satis firmatur, vel nullo omnino adminiculo indiget chirurgus, qui habet manum stabilem.

Supereſt, ut breviter de ipsa per ferramenta curandi ratione dicam. Susciperem sane, quod fortasse plures autumabunt, post *Pareum* (*c*), *Heister* (*d*), *Platner* (*e*) & *Günz* (*f*) &

*Op. Med. Vol. I.* I

(*a*) *Instit. chirurg. p. 896.*

(*b*) *Ibid.*

(*c*) *cf. Vffenbachii thes. p. 356.*

(*d*) *Instit. chirurg.*

(*e*) *l. c.*

(*f*) *Diff. cit.*

alios (a) inutilem laborem, si longus in explicanda huius curationis administratione essem, at cum mihi proposuerim, modo breviter praecipua describere & quae recentioribus temporibus sunt prolata & observata adiacere, excusationis alicuius locum me habiturum esse spero. Sunt autem in illa curatione alia, quae antequam eam suscipias fieri debent, alia, quae in ipsa eius administratione attendenda, alia denique, quae post illam curanda sunt. Maturitatem cataractae, quam dicunt, expectare, necesse non est, cum mollior suffusio saepe melius deprimatur vel dissolvatur, quam quae iam nimis dura est & cum velamento concrevit. Admonitiones aliquas postulat illud praeparandi aegrum consilium, quod alii prorsus repudiant, alii vero commendant, iubentes, ut corpus purgetur clysmate evacuetur & totum lavetur, pediluvia adhibeantur & aegro munditiei cura commendetur. Occupat etiam medentium animos aegri aetas, sexus, humorum conditio eiusque vitae genus. Saepe enim mul-

---

(a) cf. scriptores, quos pag. 4. laudavimus. Pater in instit. p. 302. *Wahlbohm* in actis suecicis ad annum 1757. qui *Tvesii* methodum sequitur, *Olof Acrel*, qui secundum *Ferren* curat. *Chandler* in a treatise on the diseases of the Eye and their remedies &c. London 1780. 8. *Henkel* l. c. I. §. 14. — 24. & plures alii.

10 felicius in sene deprimitur lens crystallina, quam in iuvene, atque solliciti chirurgi semper fluxum menstruum, fluxum haemorrhoidalem, plethoram, acrimoniam quamlibet, & opificii genus, quod tractat aeger respicientes, oculum, qui a manu curam postulat, non prius curare annituntur, quam fluxus sanguineus quilibet defecerit vel plethora in corpore praevalens fracta fuerit, vel ipsi acres humores temperatiores effecerint, vel de aegri genere vitae post curationem cogitaverint. In administratione ipsa temporis faciendae curationis, situs aegri & instrumentorum delectus habendus est. Vernale & autumnale reliquis plerumque anni temporibus anteponunt, attamen quodcunque tempus mihi convenire videtur, si modo aegrum in tali cubiculo curare poteris, quod nec nimis frigidum, nec nimis solis aestibus expositum est. Debebis porro talem eligere diem, qui sit serenus neque caliginosus, ita, ut possis acus progreßum & iter in oculo ipso perspicere; tamen neque ante meridiem, meridianus sol, neque post meridiem occidens sol in oculum aegrotantem irruat. Sedeat aeger in sedili dimissiori, in altiori autem medicus ocularius & ita, ut lux non ex adverbo, sed a latere in oculum incidat. Habeat ministros duos, alium, qui caput teneat & alium, qui instrumenta porrigat. Inter instru-

menta mihi , ut iam innui , inprimis *Briffavii* & *Pottii* acus placent ; sed priorem Pottianae etiam praefeream . Praeter acum vero ad manus habeat chirurgus & illa instrumenta , quae ad extrahendi artificium sunt idonea , ut si illud factu necessarium iudicetur , statim praesto sint , & lintea ad deligationem apta . Quibus bene compositis ad curationem ipsam accedat chirurgus . Obtegatur oculus alter , in quo nulla nunc curatio peragenda , sive sanus fuerit , sive suffusione & ipse affectus , linteo duplicato , perfricetur oculus curationi mox subiiciendus , ut venae oculi eo melius appareant , quas laedere iusto plus noxium foret , admoneatque aegrum chirurgus , ut dirigat oculum versus nasum ; mox teneat oculum aegrotantem inter pollicem & digitum indicem manus sinistrae , ne oculus moveatur vel utatur oculi specillo , quo tamen instrumento carere potest quilibet chirurgus , qui manu firma gaudet . Tum manu dextra apprehendat acum instructam manubrio signo aliquo distincto , ut prouti inverterit acum , exterius conspiciat & immittat ipsam paulo infra medium oculum , loco duabus & dimidia linea a cornea distante (a) ,

---

(a) *Petit* ll. cc. *Pouffe* & *Gentil* l. c. *Olof Acrel* l. c. I. 114. *Götz* l. c. p. 51. *Ianin.* ap. *le Blanc* l. c.

ducat eandem ex superioribus versus posteriora & inferiora lentis , ut possit capsulam lentis posteriorius aperire , qua aperta demittat lentem obscuratam versus inferiora humoris vitrei ita , ut anterior lentis facies ad interiora , posterior autem ad superiora spectet , tandem educat acum ex oculi camera posteriori , commissis oculi palpebris lente & circumspecte . Si autem suffusio in varias particulas divisa fuerit , singula particula deducatur (a) ; vel si suffusio omnino mollis fuerit , capsula antea aperiatur ita , ut turbida in anteriorem cameram defluat , in qua vel sua sponte vel adhibitis medicaminibus plerumque ita dissolvitur , ut nullum omnino remaneat impuritatis vestigium . Si reascenderit depressa lens de novo curatio administranda est , donec fixa humori vitreo inhaeserit . Curari sinister oculus dextra manu , dexter sinistra debet .

Manuum artificio sic peracto , convenit scire , qui situs aegro conducat , quae sint evitanda , quae deligatio instituenda & quoties ea repetenda . Oculo nimirum linamenta , medicamento , quod inflammationem coercet , tincta , imponenda sunt , quae quavis quarta vel tertia hora , si sicca evaserint , iterum madefacienda

## I 3

---

(a) *Olof Acrel* l. c. I. p. 125.

sunt, ne comprimant oculum, & super haec datur pannus conduplicatus & fascia circularis, quae capitis velamini affigenda neque nimis arcte constringenda est. Inter medicamina, quae oculis applicari possunt varia ab *Olof Acrel* (a), *Platnero* (b) & *Mohrenheimio* (c), enumerantur. Septimo post curationis administrationem die, resolvenda est fascia in loco obscuro, & simulac aegrotus animadverterit tenebras, sperandum est, curationem ex voto successisse; quapropter tunc luci exponi poterit sensim oculus, ita tamen, ut plures radii ab oculo removeantur charta viridi, quae capitis velamini superne affigenda est. Situs inprimis conveniens post operationem ille erit, quo aeger in lecto erecto capite, tanquam sederet, tranquillus tenetur. Inter ea, quae vitanda sunt, pertinet hoc, ut caveatur, ne aeger tussiat, rideat, sternutet, vomat vel ob cibum duriores maxillam inferiorem nimis frequenter moveat, quae omnia efficere possent, ut depressa lens denuo erigeretur. Quapropter curet medicus priusquam curationem administret, ne suffusione qui laborat, morbo afficiatur catarthali, & ut aër, in quo vivit, purus & quie-

---

(a) l. c. I. 117.

(b) l. c. p. 897.

(c) cf. p. 8.

tus sit. Emetica omnia evitentur; ut & ea, quae membranam schneiderianam possent irritare; immo propinentur antemetica, ut, laudanum liquidum cum oleo amygdalarum dulci e. s. p.

Sed sub finem huius prolusionis exponendum est, utrum in omni suffusione depressio locum habeat, an interdum extrahendi artificium quoque conveniat & a nobis commendatae curandi methodo praeferendum sit: Sunt nimirum alia suffusionis genera, in quibus lentem deprimere convenit, alia, in quibus cataractam extrahere necesse est, & examinandi sunt aegri sedulo, priusquam curandi methodum elegeris (a). Oportet autem deprimere lentem inprimis, ubi camera oculi anterior nimis angusta est (b), ubi pupilla parva, & coarctata, ubi cornea nimis laxa aut nimis rigida est, ubi suffusio mollis est, ubi oculus profunde in orbita delitescit, neque protuberat. In hisce enim casibus multum detrimenti, si lentem extrahere conareris, metuendum esset. Simili ratione praeferatur depressio extractioni tunc, ubi aeger aliqua humorum acrimonia detinetur. Namque si iis, qui vel acri-

---

(a) *Ianin ap. le Blanc l. c.*

(b) *Richters chirurgische Bibliothek* seqq. V. 717.

monia podagrica, vel scrophulosa vel siphilitica laborant, lens ex bulbo extrahitur, facile cataractae secundariae atque diuturnae inflammationes superveniunt (a), quae omnem turbant visum neque partes discissae illico consolidantur. Sic nec convenit cataractam extrahere iis, qui vina copiosius bibunt, qui dentes cariosos habent, (!) qui cephalalgis, ophthalmiis, lippitudinibus, erysipelate, hysteria, convulsionibus &c. detinentur. Tales ob causas plures aegros visu privatos vidi. Sic in viro sexaginta circiter annorum, cui una lens extracta, altera in altero depressa erat, ille oculus, qui lentis extractione curatus fuerat, adhuc lacrymabat, atque inflammatione, quamvis exigua, vexabatur, cum e contrario oculus, in quo lens depressa fuerat, neque lacrymas funderet neque inflammatus esset. Saepe etiam, si suffusio ex bulbo oculi educitur, humores maligni ad oculum feruntur. Est enim, uti notum est, haec materiae podagricae & fere cuiuslibet morborum causae indoles & natura, ut transmigret quasi ex una sede in alteram. Sic igitur accidere potest, ut talis acrimonia feratur ad lentis velamentum, uveam, retinam vel aliam oculi partem, unde mydriases,

---

(a) *Gendron* l. c. Tom. II. p. 274. seqq.



inflammationes, amauroses hypopya & alia eiusmodi mala oriuntur. Aliorum oculi tam sunt irritabiles, ut vix possis eos afflare, quin oriatur inflammatio, cuius generis exemplum supra retulimus (a). In tali casu quoque melius est, lentem deprimere, quam extrahere. In aliis hominibus tanta sanguinis copia deprehenditur, ut neque venaesectionibus, neque diaeta minui possit, e quo genere plura vidimus exempla. Et in tali casu deprimendi artificium, ei, quo lens extrahitur, praeferatur.

At enim vero nollem de quocunque suffusionis genere affirmare, depressionem extractioni semper, esse anteponendam. Nonnunquam enim extrahendi artificium optime succedit & in illis imprimis aegris: qui nulla acrimonia, nulla idiosyncrasia irritabili neque nimia laborant plethora, in istis, quibus est cornea elatior, mollis neque tamen laxa, camera anterior spatiosa, pupilla magna, oculus protuberans, bono cum successu extrahendi artificium adhibetur. Interest itaque multum scire, quibus in casibus depositio lentis instituenda & quibus aegris extractione visus servandus est.

Quae cum ita sint, vellem quemlibet chirurgum in utraque methodo exerceri ita, ut,

---

(a) p. 10. Idem notat *Ianin* ap. *le Blanc* l. c.

prouti diversitas ipsius suffusionis & reliquarum conditionum postulaverit, val hac vel illa uti posset. Hoc enim certissime mihi persuasum habeo, symptomata, quae depressionem subsequuntur mitiora esse iis, quae a lente extracta oriuntur. Et conscripsimus hanc brevem dissertationem eum modo in finem, ut referremus, quid de utraque hac curandi methodo & inprimis de depressione iudicandum sit, utque chirurgiae dediti priscam curandi rationem adhiberent eamque denuo discerent. In quolibet enim oculo extrahendi artificio uti, cum anatomicis observationibus & sectionibus, tum experientiae adversaretur. De chirurgia manuali enim in universum valet, quo plures methodos chirurgus cognoverit & in usum convertere didicerit, eo felicius eum in administrando munere suo posse versari. Singulis enim morbis atque curandi modis apparatus accommodare, methodum idoneam eligere & ipsam, si necesse est varie mutare, chirurgi exercitati atque ingeniosi est. Neque enim quavis chirurgia eadem ratione effici potest.

Sed haec quidem haecenus, ne iusto longiores simus. Nunc enim progrediendum est ad ea; quae mihi huius speciminis scribendi occasionem praebuerunt. Monet autem me officium, ut id, cuius causa haec scripta sunt exequar, iubetque pietas. Quum enim nuper SERENISSIMO

PRINCIPI ELECTORI FRIDERICO AUGUSTO, Domino meo indulgentissimo eiusque amicis pro summa, quam veneramur clementia placuerit, ut Medicinae Professoris munus extra ordinem mihi in hac Universitate demandaretur, pro clementissimo hoc beneficio decentissimae iam agendae sunt gratiae.

Quapropter peragam, quod pietas praecipit atque, uti a maioribus institutum est d. XXII. Febr. novum munus solemni oratione auspicabor.

Quem diem meum, ut praesentiae suae beneficio ornare velint RECTOR ACADEMIAE MAGNIFICUS PRINCIPES CELSISSIMI ILLUSTRISSIMI COMITES UTRIUSQUE REIPUBLICAE PROCERES GENEROSISSIMI atque NOBILISSIMI COMMILITONES ea qua par est, observantia rogo. P. P. Dom. Septuag. A. R. S. c1o1oCCLXXXIII.

---

---

ARNOLDI WIENHOLT  
BREMA-SAXONIS  
DISSERTATIO  
DE  
INFLAMMATIONIBUS VISCERUM  
HYPOCHONDRIACORUM OCCULTIS IN  
FEBRIBUS BILIOSIS PUTRIDIS .  
GOTTINGAE 1772.

---

§. I.

**I**nflammationem occultam tunc adesse dico ; cum ex signis essentialibus quibus se manifestare solet, unum aut plura, aut omnia deficient, vel si haec ita obscura sint, ut pro alio vitio potius quam pro inflammatione haberes . Tales inflammationes revera dari, post accuratissimas summorum virorum, *Morgagni*, *Swietenii*, *Pringlii* (a), *Haenii*, extra omnem dubitationis aleam positum esse videtur . Interea non inutilem ope-

---

(a) the Diseases of the army. edit. noviss. a clar.  
*Brande* german. edit. p. 182.

ram me suscepturum esse iudico ; si quasdam de istorum observationibus in praesenti repetam , forte & alias addam , tum ad probabiliora reddenda tum ad confirmanda , quae postea de inflammationibus occultis in febribus bilioso-putridis dicenda habeo .

*Febris* ergo ab omnibus quidem , ut essentielle inflammationis signum consideratur ; & tamen non una exstat observatio , quae docet , omnia reliqua inflammationis signa adfuisse , & gravissimam post mortem visceris cuiusdam inflammationem inventam esse , licet medicus per totum morbi decursum nullam febrem animadvertere potuerit . Ex *Simfone* allegat *v. Swieten* (a) , locum in quo absque febre se fixos ventriculi & intestinorum dolores ab inflammatione oriundos ut & pleuritides spurias observasse testatur , quae antiphlogisticis tantum debellandae erant . Similem observationem *ill. Schroederus* de viro mihi narravit , qui acuto & vehementi dolore in regione diaphragmatis cruciabatur , & aliis inflammati huius musculi symptomatibus afficiebatur , in cuius cadavere summam post mortem diaphragmatis inflammationem inveniebat , quanquam nec pulsum febrilem , nec ca-

---

(a) Commentar. T. I. §. 371.

lorem auctum animadvertere potuerit . Similem casum describit *Cl. Rosa (a)* , de gravissima intestinorum inflammatione , in cadavere inventa , quae quanquam acutissimo dolore aegrum affecisset , tamen nec pulsum auctum , nec ullos febriles motus concitavit (\*) .

Aliud inflammationis symptoma , quod omnes fere comitatur , & plerisque proprium esse videtur , est *dolor* fixus cum aestu coniunctus , diversus secundum varias , quas inflammatio obsidet partes , qui & eam ob causam ad praecipua & essentialia inflammationis signa pertinet , quia praecipue nos ducit ad suscipiendum alicubi

(a) A. N. C. Vol. 8. Observ. 47.

(\*) *Febrem* , inflammationis comitem , continuam acutamque plerumque requirit BOERHAVE , Aphorism. 371. pluresque alii . Quodsi per *febrem* , pulsus frequentiam intelligamus , in qua tamen illius naturam non agnoscimus , certum est , omnino permultas inflammationes sine *febre* incedere , & pulsu potius debili , nec frequentiori , nec duro comitari . Ipse SWIETENIUS Pleuritidem spuriam , epidemicam observavit , qua , per plures menses , *absque omni febre* , continuabat , nisi mox venae sectio institueretur & methodus adhiberetur antiphlogistica . *Commentar. T. I. §. 371.* Post magnas *contusiones* & laesiones sclopeto illatas , toties magna & in gangraenam mox abitura inflammatio adest , quin pulsus periculo sua frequentia respondeat . Sed haec ulterius ex infra dicendis patebunt .

inflammationem . Plura tamen exempla collegit , suisque observationibus auxit , *Ill. de Haen* (a) , quae satis probant , in gravissimis inflammationibus , & quidem talibus , ubi acutissimus alias adesse solet , dolorem prorsus defuisse . Pluries se vidisse ait herniam incarceratam absque doloris sensu , quanquam vomitus , tumor inguinalis , inflammata & gangraenosa intestina in cadavere deprehensa , satis morbi naturam indicarent . Sic *Morgagnus* (b) , postquam exempla quaedam gravissimae enteritidis absque ullo dolore aegrum trucidantis adduxerat , *nec* , inquit , *quando aut vehementem dolorem aut acutam febrem abesse aut vix esse invenies , continuo putabis , aut levem adesse , aut nullam inflammationem* : id quod idem *Valsalvae* , *Riverii* & *Albertini* testimonio confirmat (\*) .

---

(a) *Ration. med.* P. XIV. cap. de dolore & inflammatione membranarum .

(b) *De sedib. & causis morbi.* Ep. 29. n. 15.

(\*) *Insignes fixosque , cum aestu & anxietate dolores ventriculi & hypochondriorum saepissime in gastricis febribus a sola saburra observavi , ita ut nec attactum digiti nec ipsa lecti stragula perferrent aegroti , quin inflammatio ulla adfuerit : eademque fuit cl. MERTENS de febr. putrid. P. I. aliorumque repetita , nec HIPPOCRATI negata , observatio . Saepe vero contrarium obtinet & sine ullo dolorum signo gravissimae & lethales*

Tertium quod in omnibus inflammationibus viscerum adest , & quod ab iis non separari posse videtur , est *functionis ipsius perturbatio* .

---

omnino *inflammationes* in visceribus latent : & in hoc demonstrando utilissime versatur praesens Dissertatio . Omenti , mesenterii , & peritonaei inflammationes sine praegresso dolore plures adducit ill. LIEUTAUD , *Histor. anat. Med.* §. I. Obs. 229. Pleurae , sine lateris dolore inflammationes , peripneumonias , quod communissimum est , sine pectoris , acuto saltem , dolore , exempla copiosa refert MORGAGNUS , *de sed. & caus. morb.* Ep. XVI. n. 30. 40. Ep. XX. n. 51. 52. 56. 57. Ep. XLV. n. 16. In dextro cerebri Haemisphaerio viri , qui vix de aliquo capitis dolore quondam conquestus fuerat , tam magnum abscessum observavit PORTAL , ut ovo gallinaceo recipiendo fuerit capax . *Histoire de l'Académie Roy. des Sciences année 1780.* p. 324. Similem observationem propriam in praecedentibus tradidi . Quanti non absque ullo pectoris dolore *phthisici* , magnis licet pulmonum ulceribus praediti , e vita , de illorum integritate sibi gratulantes , secedunt ! Dolores etiam pectoris in uno latere summos , punctorios , neque tamen cum eiusdem loci phlogosi coniunctos fuisse , cum interim in alia & indolente pectoris parte , summa lateret inflammatio , plura exempla prostant . Aegrotum , vidit ill. SARCONE , qui attactum lateris in pleuritide dolentis perferre non potuit : cum tamen aperto cadavere , non nisi pulmones , neque tamen in loco dolori correspondente , erant inflammati . *Histor. morb. Napol. ann. 1764. grassat.* §. 131. -- 141. Atque ob similem eventum , quondam in Regia Galliae Delphina , quae



Cum enim inflammato viscere , parenchyma sanguine multum oppleatur , nervi variis modis lacerantur , vasa secretoria praecludantur , non aliter fieri potest , quin omnium secretionum contingat perturbatio , & functionum laesio . Verum & hic aliquando experientia contrarium docuit . Talis observatio existat apud *Ill. de Haen* (a) , ubi tertio ante mortem die ad mortem usque omnes functiones ventriculi exercere poterat aegrotus , edebat , bibebat , optimum appetitum ostendebat , post mortem autem valde inflammatus & gangraenosus inveniebatur ventriculus . Aliam observationum (b) , idem vir egregius habet de ventriculo inflammato & gangraenoso , qui ad mortem usque optime officio suoungebatur , adeo ut vesperi ante obitum , ius suum egregie sibi sapuisse aeger adfirmaret (\*) .

*Op. Med. Vol. I.* K

dum ad *Hepar* doleret , cum pulmones essent affecti , erroneam morbi diagnosin instituerat a morte demum correctam , ill. *TRONCHIN* , *PORTAL* l. c. p. 326.

(a) *Rat. med. T. IX. p. 24.*

(b) *Rat. med. T. VI. p. 258.*

(\*) Idem vir , cuius historiam supra exhibui , p. 90. 91. & qui magna cerebri suppuratione diu laboraverat , nullum omnino vel *delirii* , vel *stuporis* signum prodidit . Alium aegrotum anno 1766. in patria mea tractavi , qui cum ex altissimis

## §. II.

Plures adhuc observationes producere possem, quae satis docerent, ita in omnibus visce-

rupibus in profundam vallem cecidisset, atque ad diversos rupium angulos capite allidens, non solum dimidia calvariae tegumenta ad aurem usque super iugulum dependentia, sed & cranium, sic denudatum, in septem partes diffractum, habuisset, per octo tamen dies sibi semper fuerat praesentissimus, donec nono tandem, delirio paulo ante mortem affectus, mortem obivit.

Sed & alia inflammationis consueta signa deesse posse, inflammatione licet magna praesente, hic breviter subiungam. *Febris, dolor, functionis laesio*, quae hucusque consideravimus, dein *calor, rubor, tensio, tumor, pulsatio*, praecipua inflammationis phaenomena sunt. Haec quidem si externis partibus contingant, dubium de ipsarum *phlogosi* relinquere non possunt, aut internis inflammationibus saepe deesse vel saltem in illis non observari, plane constat. Ex calore maiori externo, ad *profundas* partium *inflammationes* saepe secure satis concludunt *Chirurgi*; aut quot non *incisarum* ab iis partium exstant exempla, in quibus nulla puris vestigia scalpello detecta fuerunt! Puellam decem annorum *Bruchsaliae* in Orphanotrophio observavi & eiusdem dein Sectionem publice institui: dolores insignes misera ad crus dextrum diu perpeffa erat, qui pro *arthriticis* habiti, nec ullis inflammationis latentis signis coniuncti fuerunt. Os femoris a suo cum tibia articulo usque ad collum fere corrosum & ex parte liquatum sectione detexi. *Rubor* partium, ubi de

rum inflammationibus notas essentielles defuisse ; nisi prolixior foret tractatio . Magis id fini meo respondet , ut morbos quosdam in medium producam , quibus saepius se adiungere solent inflammationes , quae vero signis suis vel omnino destitutae sint , vel adeo clam obrepant , ut propter morbum ipsum negligantur , nec non eiusmodi , ubi symptomata inflammationis cum iis , quae morbum comitantur , ita congruant , ut si tantum ad solita phlogoseos signa attendas , vix illam adesse tibi persuaderes .

Praecipue vero hic referri meretur febris sic dicta lenta nervosa , a veteribus , forte , *Hippocrate* , *Aretaeo* , *Celso* , iam descripta , recentiorum autem praesertim Anglorum industria , *Lan-*

K 2

---

internis inflammationibus sermo est , in considerationem venire non potest ; neque *tensionem* , *tumorem* , symptomata maioris fiduciae esse , ex eorumdem communitate cum aliis morbis , elucescit . Neque *pulsationis* in loco affecto , maior est semper auctoritas , cum & in *cephalalgia* & in *doloribus dentium* , absque inflammatione , vehementissimae saepe pulsationes sint ; & , si in *phlegmone* hae semper observentur , non tamen *Erysipelaceis inflammationibus* , cuius naturae , internae viscerum *phlogoses* tam saepe esse solent , propriae ideo observentur ; atque in ipsa quoque *externa chronicaque oculorum inflammatione* desiderari soleant .

*grishii*, *Manninghami*, *Homii* & praesertim summi *Huxhami* magis illustrata, & a reliquis febrium generibus rite distincta. In hisce febribus saepe occurrit inflammatio cerebri, plerumque clam incedens, omnibus fere phlogoseos signis destituta, & cognitu difficillima. Accuratissime cum hac febre convenit, quam sub hecticae febris nomine describit *Willisus* (a), de qua dicit: *ita post mortem sanguine cerebrum turguisse, quasi tota eius massa hic congesta esset: membranas cerebri insigniter sanguine extravasato suffusas & colore atro purpureo insignitas fuisse licet nulla adessent signa, ex quibus tam diram inflammationem aliquis suspicari potuisset. Idem de hisce febribus cel. Home plurimis locis confirmat: Non una vice vidit cerebrum & cerebellum sanguine, vel pure impleta: verum per totum morbum levis tantum aderat capitis dolor, mitissima febris, nec ulla symptomata inflammati cerebri* (b). Inflammationem cerebri, quam in semetipso animadvertibat *Vir cl.* (c) cum febre lenta nervosa laboraret, non nisi ex sensu quodam proprio, & analogia morbi cum aliis coniciebat, & de veritate huius coniecturae ex antiphlogi-

---

(a) De morbis convuls. c. 8.

(b) *Medic. facts and experim.* P. I. S. I. c. I.

(c) *Ibid.* P. II. S. XVII. p. 196. seq.

ficorum optimo effectu , & excretionē multi puris post finitum morbum certior demum factus est (\*) .

Sic in catarrhis pulmonum saepe inflammatio huius visceris adest . Testimonia summorum viro-  
rum , praesertim *Pringlii* (a) & *Tissoti* (b) , vomicae quae toties post catarrhos remanent , sanguis ex vena missus , qui tunc temporis sae-

K 3

(\*) Quam inique caput a Medicis accusatum fuerit , cum in aliis plane visceribus causa mali lateret , ex historia *Phrenitidis* abunde patet , in qua vel rarissime caput ipsum idiopatico affectu laborare , docuit quamplurimis argumentis ill. SCHROEDERUS , *de indole ac sede phrenitidis & paraphrenitidis* , Goettingae 1765. : ita ut nulla omnino inflammationis in utroque morbo signa saepissime defuerint , cum tamen a morte , cerebri substantia inveniretur integerrima . Certe a *contagio* in systema nervosum potentius agente , & a *sa-  
burra* nervos gastricos irritante , quamplurimae *phrenitides* . Quare iam CAELIUS AURELIANUS : „ Aliqui *cerebrum* pati dixerunt , alii eius fundum , sive basin , — alii membranas , alii & cerebrum & eius membranas , — alii diaphragma , — Nos igitur communiter totum corpus pati accipimus , etenim totum febre iactatur “ . Lib. I. Cap. VIII. Merentur quoque summam attentionem , quae ill. STOLL *de sede phrenitidis* tradidit . *Ratio medendi* T. 3.

(a) the Diseases of the army. ed. germ. cl. *Brande* p. 194.

(b) Avis au peuple T. I. §. 125.

penumero denso corio pleuritico obiectus, simulque admodum spumofus invenitur, levis pectoris oppressio, spiritus brevis, anxietas, respiratio, si erecti sedent, minus difficilis, satis id probant. Verum nonnunquam ita mitia sunt haec symptomata, ut vix ad ea aeger attendat, nec Medicus inflammationem certe suspicaretur, nisi ad morbi naturam, & constitutionem aegri simul respiceret, & accuratissime in signa modo adducta inquireret. Simili modo cum haemoptysi comparatum est, ubi etiam nonnunquam, omnia inflammationis pectoris signa adsunt, pectoris oppressio, difficilis decubitus in uno vel altero latere, dolores leves gravativi, saepe simul punctorii, sanguis phlogosin prodens. Saepe vero ita clam incedunt haec symptomata, ut, nisi ad omnia attendas, occulta tibi mansura sit inflammatio, quam tamen revera adfuisse eventus saepe docebit (\*).

---

(\*) Interim omnis medicorum fere cohors semper in eo versatur, ut quamprimum id fieri possit, quocunque modo, sanguinis sputa, tum gelidae potu multo, tum adstringentibus remediis, supprimat. Quodsi aliarum haemorrhagiarum rationes considerem: evidens saepissime est earundem mox primis initiis suppressarum damnum, & cum semper aliqua visceris sanguinem fundentis subesse

Nonne hic quoque ; quae in puerperio saepe  
penumero evenit , uteri inflammatio referenda ?  
quae solita signa , dolorem in regione pubis &

K 4

---

soleat praeternaturalis repletio , patet , cur toties  
inflammatio eiusmodi praematura conamina subsequatur . Verum est , a venaesectione revulsoria ,  
suppressi fluxus aliquando posse praecaveri effectus ; at vero , saepe vasa visceris affecti infarcta ,  
non nisi topica sanguinis missione possunt depleri , & licet magnum sit periculum , ne natura  
ipsa hanc evacuationem ex pulmonibus ita suscipiat , ut futura mala praegressis non fiant peiora ;  
vereor tamen ne , dum in hoc opere incaute nimis illa turbatur , longe maiora in pulmonibus damna insequantur .  
Noverunt chirurgi , quod si post vulnera inflictâ sanguinem paulisper effluere sinant ,  
longe minor eorundem inflammatio futura sit . Idem vero & in leviori *haemoptysi* contingere credo ,  
si non tam ex violenta vasorum pulmonalium laesione , quam ex lento sanguinis in  
iisdem decubitu & plethora locali ortum duxerit . Notum est , in pleuritide & leviori pulmonum  
inflammatione , *frias sanguineas* in sputis apparentes , benignum saepe ,  
inceptae resolutionis signum esse : quam adhibitâ mox venaesectione cum  
evidenti noxa suppresseremus : eadem vero & in chronicis quandoque sanguinis ex pulmone  
reiectionibus obtinent , & nisi tales sint , ut ex sanguinis erumpentis copia periculum instare possit ;  
magna prudentiâ medica opus est , ne in supprimendo sanguinis fluxu operosiores simus ,  
& inflammationis lentae in pulmonibus sic genesis promoveamus .

lumborum, inflationem abdominis, stimulum ad urinam & alvum, mictum difficilem cet. saepe numero non comites habet, sed ex lochiorum suppressione, febre maiori, perturbatione systematis nervosi, oculorum mutatione, imminuta hilaritate animi, eiusdemque abiectione suspicanda est (\*).

---

(\*) In uteri a puerperio inflammationibus, ob stru-  
cturam eius spongiosam & vasculosam, situm visceris singularem, mutationesque in eo contingentes varias, febris adeo vel nulla est vel parva admodum observatur, atque haec inflammatio lento & clandestino gradu saepe procedens, solo tantum genarum & faciei rubore, vaga phlogosi, & aliqua tantum versus vesperam exacerbatione, cum pulsu aliquomodo celeriore sese manifestat. MATH. GATTENHOF, *inflammationis ratio*; *Heidelb.* 1773. p. 5. KIESLING, *de utero post partum inflammato*; p. 37. ROEDERER, *de non damnando perforatorii ob capitis paragomphosin usu*; *Obs. IV.* Saepe ob praegressos ad partum dolores vehementissimos, atque obstetricum in extrahendo foetu labores improbos, aut ob nimiam quoque, tum a foetu maiore, tum ab aquis copiosioribus, uteri extensionem, atonia huius visceris inducitur, quam ut plurimum quidem haemorrhagiae lethales insequuntur; multoties vero, si haec non succedant, ab effluo in spongiosam visceris substantiam sanguine, & a quadam nervorum uterinarum paralyti, clandestina inducitur inflammatio vix febrem productura, sed paucio tempore, insequente mox gangraena, in mortem ipsam, vix cogitante de periculo medico, terminanda.



## §. III.

Nunc mihi via patet ad illas ipsas viscerum hypochondriacorum inflammationes considerandas, quae in febribus bilioso putridis eveniunt. Non necesse est, ut fusius notionem explicem, quae cum hocce febrium genere coniungi debet. Neminem fugit, tunc praesertim hoc nomen febris convenire, si a sordibus varii generis, praesertim biliosis, in primis viis & visceribus hypochondriacis haerentibus accensa fuerit, & putrida simul, quae adest diathesis, ab hacce colluvie sola dependeat. Hae febres, quae apud *Baglivium* mesentericarum, & apud *Ballonium* gastricarum nomine veniunt, varias quidem formas induere possunt, unde & ab illis autoribus, qui febres secundum symptomata dividunt, variis nominibus insigniuntur, & modo febris catarrhalis maligna, modo ardens, modo petechialis, modo leypiria & sic porro audiunt (a); sed in eo tamen omnes hae febres conveniunt, quod semper colluvies in primis viis haerens princeps febris, & symptomatum febrilium sit

---

(a) Confer. *Tissot* de febr. lausan. edit. Ien. 1770. p. 15. *Bagliv.* opera cap. de febr. mesenter. *Bren-del* Dissertat. de paraphren. & febr. malignar. cognitione.

caussa. Hoc febrium genus plurimis aliis febribus complicatum esse potest. Saepe nimirum accedunt vel putredo massae humorum, vel perturbationes systematis nervosi, haud oriundae a sordibus circa praecordia collectis (\*); haud

---

(\*) Quid sibi velit haec exceptio, minus patet, neque veri quid inesse potest. Perturbationes systematis nervosi in febribus gastricis saepenumero a sordibus circa praecordia collectis originem ducere, quotidiana certe experientia docet: cum saepe unico vel vomitorio, vel evacuante remedio mox cedant symptomata morbi, quorum, a genere nervoso summe affecto, natura, *malignitatem* summam feбри inesse aut imposuisset, aut morbo revera conciliaisset. Saepe a solo emetico omnia *malignitatis* symptomata, quae certe in systematis nervosi perturbationibus consistunt, paucis horis disparere testatur SYDENHAM, Oper. omn. Sect. I. c. IV. & summi practici fatentur. Quam funesta non a commestis mytilis, fungis suspectis, ab assumpto veneno, in toto nervorum systemate phaenomena! Atqui saburram in praecordiis collectam eisdem plane effectus edere, ex historia *cholerae* patet, quam vix venenum mediocre produceret; producit autem bilis, aestivis caloribus & victus, praecipue animalis, erroribus, acrior reddita. Sed, ne his diutius, quam par est, immorer; fatebor, ut plurimas tamen *putridas-nervosas* aut a *contagio* esse, aut saltem a subtiliori *miasmate*, in genus nervosum agente, dependere; quam ut ex primis viis originem eius derivares. Ut plurimum enim *epidemice* grassantur hae febres, atque causas longe maiores illis, quae a paucissimis, in rebus sic dictis sex non naturalibus committantur, sibi requirunt.

raro etiam simul adesse apprehenditur diathesis illa sanguinis, quae sub phlogisticae nomine venit (a): ita ut nunc ad putridas sanguineas, nunc ad nervosas, nunc vero simul ad inflammatorias, illa de qua hic loquimur febris pertineat.

- 
- (a) Talis indolis videtur fuisse febris quam *Kloechhofius* in historia febris Culenburg. 1741. describit, & *Tissot* in epistola ad Ill. *Zimmerm.* sur l'épidémie courante; & *Pringlius* l. c. p. 200. sub nomine febrium autumnal.
- (\*) Frequentissima certe inflammationis cum gastricis morbis combinatio verno praecipue & hiemali tempore existit, atque in hoc videtur vera *ardentis febris*, quae & *Καύρος* veteribus dicebatur, natura consistere, cuius praecipuum characterem nihil aliud, nisi febrim biliosam cum diathesi inflammatoria fuisse, patet. Certe & ill. *QUARRINUS*, symptomata febris ardentis enarrans, saepe quoque de amaritie oris, nausea loquitur: ex quo patet, celeberrimum hunc Medicum saepe etiam febrim *bilioso-inflammatoriam* pro *Causo* habuisse. De curandis febribus & inflammationibus commentatio; p. 25. 29. *HIPPOCRATES* evidenter, febrim fuisse ex inflammatoria & biliosa combinatam, testatur; de morb. lib. I. Sect. 27. copiosam talem observavit *GRANT*; *Observations on fevers*; atque mihi, dum in *Rhenanis* Provinciis praxin medicam exercerem multoties obvenit.

## §. IV.

Saepe numero nulla symptomata inflammationis in hisce febris observata, nec ulla eius post mortem in cadaveribus deprehensa sunt vestigia (a). Non raro autem symptomatice accedunt (b), & tunc nonnunquam solitis signis se

(a) Conf. *Tissot* febr. laus. p. 21. ubi & alios, qui idem affirmant, laudat.

(b) Absque ratione Illustr. *Ludwigius* inflammationes in febris putridis obvenientes e numero inflammationum eximere annititur. Vid. *Advers. med.* vol. I. p. I. p. 52. Ad veram inflammationem requirit sanguinem densum per minimas arterias non nisi aucta vi cordis urgendum, ideoque statim ex sanguine resoluta putrido in vasa minima pulso, & a debilitate vasorum, & spasmo per acrimoniam inducto, pendentem, qualem in febris putridis semper contingere autumat, non inter inflammationes referendam esse existimat. Verum nonne haec definitio nimis arbitraria est? Num ita iam constituta est vera inflammationis indoles & causa proxima, ut certo dicere possimus, quid & in febris putridis & non putridis inflammationem producat? Num iam extra omne dubium positum est, in inflammatione cum febre non putrida coniuncta, semper adesse sanguinem densiorem? num verum est, nunquam hic inflammationem, irritamento spasmos faciente, produci? Num omnes illae inflammationes quas, v. d. *Bosch*, *Sarcone* & alii describunt, & quas cortice Peruviano tollebant, eam ob causam non in-

produnt , saepius autem ita clam incedunt , ut medicum nisi ad omnia attendat , gravissima licet & mox lethalia symptomata inducentes facillime fugiant . Tales autem viscerum hypochondriacorum phlogoses saepe hisce febribus se adiungere , descriptiones earum , sectiones cadaverum , & natura illius magmatis primas vias obturantis , satis probant . Ita in Diario medico *cl. Vandermonde* (a) a *cl. Moucet* febris describitur , quae omnes characteres putridae biliosae habebat : Sapor amarus , nausea , vomitus biliosus , aeruginosus , foetor oris , alvi fluxus , qui morbi vehementiam debilitabat , & optimus successus evacuantium , satis indolem biliosam probabant , & in tribus cadaveribus a Viro *cl. incisis* , pleraque viscera abdominalia inflammata & sphacelata inveniebantur . Aliam epidemiam in eodem Diario (b) *cl. Darlue* describit , quam febrem bilioso-putridam fuisse , ex dissoluto sanguine , fluxu alvi bilioso , aeruginoso , vomitu eiusdem materiae , urina cruda , cet. satis con-

---

ter inflammationes numerandae sunt , quia cum febre putrida coniunctae erant , cum tamen in omnibus reliquis symptomatibus ut inflammationes vere tales se manifestarent ?

(a) Journal de medecine . T. XI. p. 61.

(b) Recueil Periodique . T. VI. p. 69.

stabat . Sectiones vero cadaverum , eodem clar. Viro teste , perspicue monstrabant , omnes quos e medio sustulerat morbus , ob inflammationem viscerum mortuos fuisse . *Spigelius* de febre semitertiana , quae ut plurimum eiusdem cum illa , quam modo descripsimus , indolis erat , idem plurimis locis confirmat (a) . *Quoties* , uno loco inquit , *mecum repeto* , quae in dissectionibus mortuorum a semitertiana & in curatione febrium tertianarum observavi , toties nil aliud potui agnoscere , quam putredines in vasis constitisse . Erant enim in dissecis cadaveribus inflammationes ex sanguine bilioso & pituitoso factae , circa iecoris partem concavam , in ventriculo , mesenterio , intestinis , liene . Idem de febre flava Americanorum , the yellow fever , cl. *Lind* (b) asserit . Dicit nempe : *Upon opening the body , we find the stomach and liver , and adjoining parts full of livid blackish , mortified , spots , and sometimes gangrenes* . Denique & *F. Hoffmannus* in febre petchiali , quam in *Medicin. ration. systemat.* (c) , & in alia febre , quam in propria

(a) De febre Semitertiana . L. II. c. 19.

(b) Essay on the diseases incidental to europeans in hot climates .

(c) *Medicina ration. system.* T. IV, P. I. S. 1. c. 11.

Diff. (a) descripsit, ( utraque vero vitiosae in primis viis colluviæ signa prae se ferebat ), post mortem stases inflammatorias ac sphacelosas se invenisse testatur. Plures aliae observationes, quae idem confirmant apud *Bonnetum*, *Lieutaud*, & in Diario medico & apud alios autores occurrunt, quorum nonnullos adhuc adducere, ulterior huius materiae pertractatio mihi occasionem dabit.

## §. V.

Nec est quod miremur, toties hic inflammationes viscerum evenire, cum tot adsint causae, quae eas producendi occasionem praebere possint. Sanguis acris & dissolutus, qui eo facilius in vasa minora & cellulofam adigitur, cum viscerum hic adsit laxitas e putredine orta (b), unde sanguini irruenti minus resistunt, saepe quoque adsit diathesis illa phlogistica sanguinis, quae illum ad inflammationes propensorem facit. Hisce accedit causa illa, quae toties sola phlogoses viscerum accendit: nempe acris, corruptum, atque biliosum magma, irritans, spasmos

---

(a) Diff. de febre maligna, Halae 1699. grassante, in Supplem., ad opera T. II. P. II. p. 60.

(b) Conf. *Pringle* l. c. p. 502.

inducens & maiorem sanguinis cumulum alliciens. Inde collegium Medicorum Rothomagensium in epidemia illa, quam *cl. Malouin (a)* describit, iubebat, ut quamprimum acris illa materia e primis viis educatur, & inflammatio viscerum, quam frequenter post mortem observabant, impediatur. Idem confirmat *v. Swieten (b)*, ubi *bilis acrior facta est mora vel per calorem aeris aestivi ad putredinem vergere incipit, & vicinum hepatis pessime afficere potest. Hinc post aestates fervidissimas autumnali tempore oriuntur febres biliosae, hepatitidem saepe comitem habentes*. Praecipue vero audiamus de hac re disserentem *Valcairenghium (c)* ita inquietem: Si tertianae febres a furentis bilis variis tumultibus derivantur, magna ex parte praesto est ratio, propter quam fluctuosae hae inflammationes in lymphis huic febre accedunt. Bilis haec tenax partim hepatis colatorii ductibus, partim cystidi felleae, partem intestinorum parietibus & rugis, atque ipsi ventriculo adhaerens, membranaceas fi-

---

(a) Mem. de l' Acad. des sciences de Paris 1753. p. 56.

(b) Commentar. T. III. p. 96.

(c) Medic. rational. S. I. c. 3. §. 52. confer. & eiusd. egreg. viri contin. epid. crem. Sect. II. c. 2. §. 32.



*brillas corrugat , atque in fortes corrugationes cogit , eas fortiter irritando , quare paesto est canaliculum constrictio , & sanguinis impeditus motus , eiusdem concretio , & affectarum partium inflammatio .* Hisce causis plures aliae saepe se adfocciare possunt , quae reliquas in statibus inflammatoriis producendis adiuvent . Quoties enim , quaeso , non contingit , salubres diarrhoeas , & vomitus adstringentibus aut similibus cohiberi , & irritantem materiam retineri , diaeta vero & regime , calefacientibus , & medicamentis sudoriferis novum igni oleum addi ? Quoties emeticis fortioribus , vel intempestive datis , colluvies acris , tenax , minusque involuta prolicitur , unde magis irritantur fibrae , viscera in fortiores contractiones coguntur , & inflammatio producitur ?

## §. VI.

Reliquum est , ut probem , inflammationes , quas saepe hisce febribus se adiungere dixi , occulte evenire . Difficillimum esse , symptomata colluviei biliosae ab iis , quae accedente inflammatione contingunt , distinguere , facile , puto , quotus quisque mihi largietur , qui consideret , plurima utriusque affectionis phaenomena inter se convenire . Verum & id probare annitar , signa inflammationibus propria , vel prorsus hic , de

fuisse, vel levissima fuisse, quanquam gravissima inflammatio adfuerit. Ut vero eo melius hic procedamus, & qua in re occulta harum inflammationum natura consistat, tanto clarius perspiciamus, praecipuas inflammationes hic obvenientes speciatim contemplemur, signa eorum essentialia cum iis symptomatibus, quae in febribus hifce veras inflammationes comites habentibus, contigerunt, comparemus oportet: tunc enim sponte sua patebit, num ab iis ad praesentiam inflammationum concludere licitum sit: signa denique quaedam adducemus, ex quibus inflammationes adesse, probabiliter saltem colligere liceat.

## §. VII.

Omnium, quae febribus putridis biliosis se adiungere solent, inflammationum frequentissima est, & maximam attentionem meretur, illa, quae in hepate existit. *Galenus* (a), *Forestus* (b), *Riverius*, *Sennertus*, & praesertim *Bianchius* (c), & *Valcarengius* (d), principes facile illi in morbis hepaticis autores, illam hepatis inflam-

---

(a) De locis affect. L. V. c. 7.

(b) Observat. L. 19.

(c) Histor. hepatic. P. III. p. 340.

(d) Continuat epidem. Crem. S. II. c. 2. §. 40.

mationem , quae in parte convexa contingit , ab illa , quae in parte concava, distinguunt, & hanc divisionem propria experientia confirmant (a) . Illa , quae in parte gibba evenit inflammatio , secundum horum virorum observationes , praesertim se manifestat tussi sicca , & dolore acuto tensivo , qui per singulas respirationes crescit , immo saepe ad iugulum usque assurgit . Febris vehementior , pulsus durus atque fortis est , & tumor inflammationem prodit , nisi haec sub costis spuris lateat (\*) . Illa e contrario, quae par-

L 2

---

(a) Vid. *Boerhav.* eiusque commentator v. *Swieten commentar.* T. III. §. 915. qui existimant quoque , inter illam hepatitidem , quae cum magno & tensivo dolore , & illam quae cum parvo & gravativo tantum coniuncta est , distinguendum esse . Verum illam quam veteres in parte concava ponebant , in ramulis venae portarum sedere , & illam partis gibbae in ramis arteriarum hepaticarum . Verum haec opinio nonnisi hypothetica esse videtur , quae nulla vera observatione nititur , & plurimis simul dubiis obnoxia est , cum e contrario illa veterum divisio magis experientia fundata sit , sectionibusque cadaverum confirmetur , quin & cum diversis symptomatibus optime conveniat .

(\*) Dolorem acutissimum in *hepatitide pleuritica* , cum pulsu vix 79. ictus minuto primo habente , comitatum observavi : interim & sano quondam Homini pulsus erant tardiores . Tumorem , quamvis adsit , saepe in carnosiss admodum corporibus ,

tem concavam afficit inflammatio, dolore potius exiguo, gravativo, & ab aegroto saepe non percipiendo, nisi tangatur pars affecta, se manifestat: (a) minus turbatur respiratio, magis urgent ventriculi & intestinorum affectiones, nausea, vomitus, inappetentia, cet. Rarior accedit in illis, de quibus hic loquimur, febribus biliosis putridis inflammatio partis gibbae hepatis,

vel quae iam hydropse laborare incipiant, vel si ille, vel ad *posticam* & superiorem sub diaphragmate, aut ad inferiorem & dorsalem sub costis latentem partem haereat, non senties. Si adfectum hepar neque costis, neque peritoneo adhaereat, neque, ob maximam istam, praeter modum turgeat, ideoque, vi ponderis, diaphragma secum haud trahat: frustra, monente iam ill. VALCARENGHI, in inflammationibus eiusdem, dolores usque ad humerum & iugulum distendi expectabimus; quamvis nervorum varii decursus, & praecipue *diaphragmatici* & *sympathici magni ex cervicali medullâ* origo, tum dolores illos ad claviculam & humerum, tum vero *torporem brachii dextri* ab ill. HOME observatum, alias sat facile excitent. Apparet ergo neque in hoc morbo adeo claram semper inflammationis notitiam existere, ut non saepius, ubi de ea non cogitatur, possit adesse.

- (a) *Valcarengi* l. c. S. 2. c. 2. §. 34. *Bianchi* historia hepat. P. III. p. 340. v. *Swieten* commentar. T. III. §. 918. *F. Hoffmann* Diss. de morbis ex hepate oriundis §. 17. & *de hepatis inflammatione vera rarissima, spuria frequentissima.*

frequentior autem illa, quae in parte concava eiusdem sedem figit, ut unanimi fere consensu testantur auctores, qui febrium epidemicarum descriptiones reliquerunt. Ita nempe *Brendelius* (a) se in cadaveribus paraphrenitide & febribus malignis mortuis, inflammationes potissimum in parte hepatis concava invenisse testatur. *Spigelius* (b) in multis, qui semitertiana occubuerunt, intestina inflammata vidit cum parte iecoris concava. *Cl. Boucherus* (c) in descriptione febris putridae biliosae, *viscera*, inquit, *inflammata & gangraenosa erant, hepar, praecipue vero eius pars concava*, cet. In febre flava Americanorum *cl. Lind.* (d) hepar hac parte gangraenosum & putridum observavit: *resembling an honey comb*. Nec mirum in hac parte hepatis potissimum inflammationem accidere, cum haec, acris illius materiae, quae turbas inflammatorias producit, sit sedes. Quodsi igitur inflammatio hepatis hisce febribus accedit, ac in parte concava potissimum occurrit; minus facile

## L 3

---

(a) Dissert. de paraphr. & febr. malign. cognat.

P. 4.

(b) Tr. de semitertiana L. II. c. 16.

(c) Journal de Medecine T. X. p. 455.

(d) Essay on diseases incidental to europeans in hot climates p. 89.

a Medico deprehendi poterit . Pleraque enim symptomata , quibus se indicat , acri quoque saburra biliosa producantur , uti nausea , vomitus , appetitûs defectus , reliq. Icterus , quem nonnulli putant cum hepatis inflammatione coniunctum esse , saepius hic abesse potest , secundum optimorum autorum observationes , & saepenumero a multis aliis causis in hisce febribus originem trahit (a) . Nihilo magis inflammationem hanc produnt febris & pulsus , quae in inflammatione huius partis hepatis non multum crescere solent , nec dolor ille parvus & gravativus . Plerumque enim inflammationes viscerum hypochondriacorum , praesertim hepatis , caput obnubilare , mentem abalienare & varias systematis nervosi perturbationes producere solent , unde nec quaeruntur aegri , etiamsi dolorem aliquem sentiant (b) . Sectiones cadaverum idem confirmant , in febribus

(a) Conf. v. *Swieten Comment. T. III. §. 918. Valcarengb. l. c. & alii .*

(b) Veteres iam observaverunt , hanc saepenumero causam esse : quare dolores acutos in hisce febribus non animadvertant aegri . Sic *Aetius L. V. c. 129. de inflammation. & suppurat. iuxta os occygis , ait : Inflammantur & exulcerantur saepe hae partes in febribus malignis , sed in his mens quoque violata est , ut neque dolorem percipiant , neque ad ardorem attendant .*

de quibus loquor tales hepatis inflammationes existisse, quanquam nullus dolor ipsas prodere-  
ret (a).

### §. VIII.

Prius vero, quam ad signa veniamus, e quibus, num inflammatio hepatis adsit, nec ne, probabiliter diiudicari possit, in inflammationes ventriculi & intestinorum, quae non raro hic accidunt, inquiramus, & quomodo occultae dici possint, ostendamus. Inflammationes horum viscerum, quae alias satis manifestis signis se prodere solent, in hisce febribus haud facile cognosci, & cum signis colluviei biliosae commutari posse, improbable forsitan non nemini videri possit. At vero rem extra omne dubium ponit experientia, quae characteres, quibus se ab omnibus aliis imi ventris vitiis distinguunt, haud raro defuisse docet. Inter signa pathognomonica, quae has inflammationes comitari dicuntur, febris est cum pulsu magno & duro coniuncta, dolor in parte affecta fixus, urens, acutissimus, obstructio alvi, nausea, vomitus, tumor abdominis. De fe-

L 4

---

(a) Cl. *Lientaud*. in *Histor. anat. med.* L. 1. Obs. 602. & 604. & L. 3. obs. 270.

bre tamen haud inter omnes constat ; cum nonnulli dicant , febrem in hisce inflammationibus saepius mitem esse , cum pulsu parvo , debili (a). Quod ad dolores attinet , hos inter signa essentialia primo loco numerandos esse , nemo facile inficias ibit . Hi vero saepius in illis defuerunt , quanquam haec viscera post mortem gravissime inflammata , & sphacelata apparuerint . Ita *Spigelius* (b) intestina tenuia , in febribus continuis ardentibus malignis , ( quas , si viri clariss. descriptiones cum signis febris biliosae putridae conferas , eiusdem indolis fuisse , invenies ) inflammata & sphacelata , & ventriculum maculis lividis plurimis locis insignitum deprehendit , etiamsi aegri de dolore non sint conquesti . Describit

(a) *Glass.* observat. de febr. comment. de sanguinis detract. *Brendel* Diss. de febr. divis. p. 32.

(\*) Pulsus in ventriculi & intestinorum inflammationibus saepe omnino & duritie & plenitudine caret , quae alias febribus inflammatoriis propria sunt ; ut plurimum vero subdurus , contractus , frequens & parvus esse solet . Hanc pulsus conditionem ex eo derivat ill. *WHYTT* , quod , ob magnam *nervorum ventriculi* , cum illis *cordis* , sympathiam , huius ita hic aucta sit irritabilitas , ut contrahantur cordis ventriculi , antequam sanguine venoso hos alluente , repleti sint . *The Works of Robert WHYTT* , p. 241.

(b) De febre semitert. L. I. c. 14. 16.



etiam *F. Hoffmannus* (a) febrem putridam gastricam, quam malignam vocat, in qua viscera post mortem inflammata & sphacelata vidit. Verum inter symptomata nullius doloris mentionem fecit. *Cl. Malouin* duas describit epidemias febrium eiusdem indolis, in quibus gravissimas post mortem viscerum inflammationes observavit. In descriptione unius, dolorem pectoris tantum, cum respiratione difficili & tussi commemorat, (b) in descriptione alterius, Rothomagensis nempe, expressis verbis dicit, inflammatum & tensum fuisse ventrem, verum nec a contactu doluisse (c). Attamen sapienter medicorum colle-

(a) Dissertat. de febre maligna 1699. in supplem.

(b) Memoires de l'acad. des sciences de Paris 1753. p. 52.

(c) Ibid. p. 56. Eorum causa, qui existimare possent, has inflammationes vel stases potius a debilitate venarum ortas, & in agone productas esse, aliis argumentis omissis id tantum urgere mihi liceat, in hisce cadaveribus, quae *cl. Malouin* secuit, ulcuscula plura in intestinis conspicua, & crusta illa gelatinosa intestina obiecta fuisse, quam ill. *Haenius* & alii egregii viri in inflammatis partibus post mortem saepe viderunt, *ils étoient*, dicit *cl. Malouin*, *parsemés des ulcères*, & leur partie veloutée, étoit, *fardee d'une espece de glaire*, quae satis manifeste testantur, veris inflammationibus annumerandas esse, & diu iam ante mortem adfuisse.

(\*) Ex summo dolore ventriculi ad inflammationem

gium praecepit, purgantia aegris propinari, quibus acris faburra educeretur & viscerum inflammatio impediretur. Quid causae fuerit, cur haec viscera in illis febribus doloris essent expertia, pro certo affirmare equidem haud ausim. Verisimillimum tamen mihi videtur, eandem hic subesse causam, quam supra de inflammatione hepatis adduxi: ita nempe sensorium commune ab hisce inflammationibus affici, ut non ulterius afficiant aegrum. Forte & id aliquando ita insensibilia

---

illius concludendum necdum esse, supra dictum est, sed & recentissimo exemplo id in aegroto *Ticinesi* observavi, qui, cum ex febre perniciofa emetica laborare videretur, atque, ob ingentes ventriculi dolores, nec minimam tum potus, tum medicamentorum copiam sine mox insequente vomitu, anxietate magna & intensis cruciatibus, posset deglutire, mox ab omnibus his paucarum horarum tempore liberatus est, cum emplastrum vesicatorium stomachi regioni, donec ruberet, adplicari iussissem. Sed & mirae varietates in situ ventriculi, in uno eodemque homine, prout magis vel minus flatibus aut ingestis repletus est, observantur: ut & ex hac regione huius visceris inflammatio facile occultetur, & *gastritis muscularis* seu *deceptiva* SAUVAGESII, pro vera habeatur. Gastritidem quoque absque vomitu describit ill. HALLERUS, *Opuscul. patholog. Obs. XIV. Hist. III.* sine signis praegressis consuetis, inflammatum vidit ill. STOLL, *Rat. med. T. 3. p. 383. 4.*

viscera facit , quod nempe tunc , cum inflammatio accedat , iam paralyfi perculsa sint (a). Tanto magis probabilis redditur haec coniectura , cum in aliis quoque partibus saepe syderationes in hisce febribus contingant , veluti in lingua , faucibus , sphinctere ani & vesicae , quidni ergo etiam in intestinis ? Sin autem minus placeat haec coniectura , lubenter confitemur , nos causam huius phoenomeni , uti tot aliorum , quae in humano corpore contingunt , ignorare . Si ad reliqua signa respicias , quae in inflammationibus intestinorum & ventriculi obveniunt , sunt nausea , conatus vomendi , & ipse vomitus . Verum , haec a bile abundante , acri , corrupta , etiam produci posse , nulla indiget probatione . Obstipationis alvi , quae princeps harum inflammationum constituit signum , vel nulla in laudatis descriptionibus fit mentio , vel expressis verbis monetur , diarrhoeam largiorem adfuisse .

---

(a) Consentit *Morgagnus* de sedib. & causis morbor. epist. 29. n. 11. , qui eandem causam subsuisse putat , in gravissima quadam , quam describit , enteritide : quae etiam absque ullo dolore lethalis evadebat .

## §. IX.

Cum igitur ita occulte saepe hic inflammationes accendant , quaestio oritur , annon alia quaedam signa dentur , ex quibus , probabiliter illas adesse , nobis concludere liceat . Solebat optimus praeceptor b. *Schroederus* , in egregiis suis praelectionibus , talia adducere , quae , cum viri accuratissimi auctoritas maiorem fidem dictis meis sit factura , cumque ego ipse plurimis observationibus , unde haec signa abstrahi debent , destituar , hic loci , una cum aliis , quae alio tempore ex ore summi viri hausi , proferam . Quodsi itaque morbo longius iam durante symptomata acrius urgent , appetitus pertinaciter deficit , nec acidis nec lenibus catharticis se revocari ullo modo finit , vomitus etiam nullam allevationem , sique congestio ad caput , & symptomata quae inde eveniunt , post venaesectionem , temperantia , evacuantia , cedere nolunt , si porro lingua simul fuscam , lividam , nigram , aridamque induit superficiem , si spiritus simul brevior & cum maiori anxietate trahitur (a) , quam secundum causas manifestas . & circum-

---

(a) *Valcarengi med. rat. S. I. c. 3. §. 78.*

stantias trahi debeat, si denique singultus accedit, tunc omnino timenda erit viscerum hypochondriacorum inflammatio. Praecipue vero hic ad hypochondria attendere oportet; aliquando enim, quamvis manifestus haud adsit dolor, aestum tamen & sensum quendam circa has partes iniucundum, molestum, gravativum, fixum tamen & non transeuntem, quem ipsi satis describere nequeunt, aegri experiuntur. Interdum ipsi quidem de nullo eiusmodi sensu conqueruntur, sed si accurate inquiras, tunc demum hunc sensum molestiae tibi fatebuntur. Saepe vero omnem doloris sensum negantes imo sibi circa haec loca bene esse dicentes, nihilominus hypochondria si tetigeris, aut sono emisso, aut vultu, aut denique levi concussione corporis, doloris sensum quendam produnt. Praeterea num dura, vel tensa vel alio modo affecta sint hypochondria, probe investigandum. Ulterius vero has inflammationes adesse, varia affecti systematis nervosi symptomata confirmant (a). Si hilaris

---

(a) Inde venire videtur, quod plures auctores malignitatem in inflammatione viscerum posuerint, ut *Valcarengi* Med. rat. S. 3. c. 2. §. 305. *Bagliv.* Oper. L. I. c. 9. de febr. malign. & mesent. *Brendel.* Diss. de serior evacuant. usu in febr. malignis, & de cognatione paraphrenit. & febr. malignar. divertis locis.

& serena sit facies, si oculi haud immutati, non facile timenda est circa haec loca inflammatio. Si vero oculorum obtutus acris sit atque intentus, si aegrotus quasi cogitabundus, ad omnia inattentus, nihil eorum, quae coram ipso fiunt, curat, & animo est abiecto, si praeterea plures affectiones spasmodicae adsunt, tunc verisimillima erit inflammatio (a). Si vero soporofus aeger existit, & admodum debillis, si pulsus parvus & inaequalis, si affectiones capitis & systematis nervosi valde incrementum, si denique nec audit, nec videt, nec suarum perceptionum sibi conscius est, tunc in gangraenam transire inflammationem, statuendum est (\*).

---

(a) Conferri hic inprimis meretur *Morgagnus* de sed. & caus. morb. Ep. 35. n. 21. *Pringle*, qui idem confirmat l. c. p. 182.

(\*) Praeclara est haec signorum inflammationem ventriculi & intestinorum constituentium enumeratio; sed nisi *Epidemicus morborum character* faciem accendat, in multis casibus errori locus est: cum vix unquam singula illa in uno aegroto collecta videas. In *Dysenteria*, febre biliosa, toties observavi dolores ventriculi a minimo tactu intolerabiles, cum vomitione perpetua, ardore regionis epigastricae & aliis signis inflammati ventriculi; haec tamen a porrecto emetico, & eiecta copiosa saburra biliosa protinus sedabantur; quae certe cum STOLLII observationibus egregie correspondent. Ante paucos hos menses ad Virginem *Ticinensem* febre biliosa & summo dolore cardialgico laborantem

## §. X.

Quod curationem harum inflammationum at-  
tinet, Medicum peritum aegro hic succurrere  
posse, nullum est dubium: verum & grave, au-  
xilium si differatur aut minus opportunum adhi-  
beatur, instat periculum. Hinc illa de hypo-  
chondriis tensis, praevulsis, duris, dolentibus,  
cet. sapientissima dicta Hippocratica. Ita vero  
procedendum hic esse opinor, ut primum blandis,  
lenibus purgantibus, acres illas & biliosas  
fordes, quae causam harum inflammationum con-

---

pro consilio vocatus, non dubitavi & nono quo-  
que morbi die emeticum porrigere; quin dolorum  
atrocia, cum causam novissem, absteruisset.  
Emeticum vero, opii virtutem exseruit, & eiecto  
hoste, cardialgiam facile sanavit. Attentionem  
merentur signa, ab ill. CULLENIO, ad digno-  
scendam subinde praesentem *gastritidem* praecipue  
*erysipelaceam*, tradita. Erysipelas sc. aliquando  
ad oesophagum ipsum dispergitur, & tam in  
pharynge, quam in ipsa oris cavi superficie, ru-  
bore suo adparet. Quodsi tunc maior addit ven-  
triculi ab acribus sensibilitas, frequensque vomit-  
us, non dubium erit de morbi natura. *First  
lines of physici* §. 400. Tria esse potissimum si-  
gna, ex quibus verosimiliter occultam inflam-  
mationem adesse, cognosci queat, *linguam* nimirum  
*rubram*, *aridam*, *dolorem fixum in ventriculo*,  
& *pulsum celerem, durum*, testatur BODE, *Diff.  
de gastritide*; p. 3.

stituunt easque alunt, resolvere atque imminuere annitatur. Huic scopo tinctura rhei mihi inprimis inservire videtur: quae simul vim resolventem & evacuantem habet & spasmos sopit potius, quam inducit; quacum acida & secundum varias indicationes, alia remedia coniungere vel seorsim propinare ut nitrum, camphoram, liquorem anodyn. min. H. & similia, possumus. Externe optime emollientia cum discutientibus e. g. olea at unguenta emollientia cum camphora, cataplasmata vel sacculi ex flor. sambuc. herba malvae, & similia applicantur (a), quae ad spasmodicas viscerum affectiones tollendas, stricturas imminuendas, stases inflammatorias incipientes repellendas, egregie inserviunt, quanquam modum, quo id faciunt, ignoremus. Simul nec negligendos esse duco clysteres, qui balnei instar omnia intestina relaxant, stricturas e spasmō ortas auferunt, & ad acres sordes eliminandas multum conferunt. Venaesectio a multis auctoribus hic dissuadetur, utpote quae raro admodum bonum hic producere possit effectum, cum plerumque

---

(a) In febre leipryia cum intensis hypochondriis laudat *Hippocrates* cataplasmata ex semine lini & oleo, super hypochondria imponenda. L. de *viclu in morbis acut.* Confer. & *Valsii* commentar. in hunc locum p. 554.



corpus sit debilitatum, vires imminutae, pulsus debiliior, multaeque tunc temporis adesse deprehendantur systematis nervorum perturbationes. Verum tamen istam non dissuaderem, si non admodum immutata sit crasis sanguinis, si pulsus & vires non multum debilitatae, & reliqua venaesectionis contraindiciantia deficient. Verum & hic summam cautionem necessariam esse, nec in larga quantitate mittendum esse sanguinem, facile largior. Optimum auxilium hoc in casu praecipue nobis promittunt vesicatoria. Credo equidem plurimis hoc remedium non arrisurum esse, qui *Tiffoti* (a), *Valcarenghii* (b), *Bianchii* (c), & aliorum auctoritate, suaeque forte propria experientia nixi, omnem vesicatoriorum usum in febribus hisce damnant. Verum non possum horum virorum experientiae adstipulari, cum contra a summis in arte viris, *Hoffmanno* (d), *Pringlio*, *Huxhamo* (e), *Hillario*, *Monroo*, & pluribus alijs, tot laudibus secundum experientiam extollantur, iustis modo sub cau.

*Op. Med. Vol. I. M*

---

(a) De febre biliosa Lauf. p. 50.

(b) Medic. rat. S. 3. c. 2.

(c) De morbis hepatic. p. 308.

(d) Diss. de vesicantium usu.

(e) Oper. T. 2. p. 115.

tionibus applicata . Quum enim tam potenter omnis generis inflammationes resolvant , ut quotidiana experientia id satis confirmat , praecipuum quoque locum in febribus putridis gastricis tenebunt , si inflammationes viscerum hypochondriacorum repellendae sint . Accedit , quod plerumque , supervenientibus his inflammationibus , symptomata adesse deprehendantur , quae per se haec remedia desiderant . Ita nempe uti iam dixi , tunc plures affectiones spasmodicae hic adesse deprehenduntur , simulac extremorum refrigeratio , internorum calor , circulationis languor , & comatosum quid adesse solet ; quibus symptomatibus optime conducunt vesicatoria . Igitur si inflammatio urgeat , & , ut modo praecepi , lenibus purgantibus , externis emollientibus & discutientibus cet. usus iam fueris , & tamen inflammatoriae stases cedere nolint , duo vesicatoria furis applies ; sin ulterius urgeat , aut si ab initio cum accesserit , iam gravius affligat , tum ipsis hypochondriis imponas vesicatorium (a) .

---

(a) In febre lenta nervosa , in qua post mortem magnas corruptiones viscerum imi ventris inveniebat cel. *Horne* , ob dolores hypochondriorum vesicatorium loco dolenti imposuit . *We applied* , inquit , *a blister to the part , which always removed the pain .* Medic. facts and experiments . P. 1. S. 1. p. 6.

Non facile errorem hic committes, si etiam nulla adesset visceris alicuius, inflammatio, cum etiam spasmos & strictureas viscerum egregie tollant ista (a), si alias causae evidentiores antea remotae fuerint. Auctoritate & frequenti experientia *b. Schroederi* hoc remedium hic commendavi, qui saepius se absque noxa, & felici cum successu eodem usum fuisse mihi testabatur. Ante unum mensem similem casum egomet ipse observavi, quem breviter hic enarrabo. Femina annorum circiter quinquaginta, febre biliosa putrida laborabat, & multum iam erat progressus morbus. Aderat extremorum frigus, & plures aliae affectiones spasmodicae. Pulsus erat parvus & duriusculus. Mens obnubilata erat. Nullum dolorem abdominis querebatur, sed e contrario sibi

M 3

---

(a) Non possum, quin hic memorabilem sane observationem apponam, quam mihi *b. Schroederus* narravit. In pleuritide quadam epidemica biliosa, medicus summo cum successu emetica dabat, quae vero saepenumero solummodo alvum solvebant, &, si vomitus non concitaretur, moriebantur fere semper aegri. Ad hoc igitur praecavendum, in regione epigastrii, priusquam vomitorium propinaret, vesicatorium imposuit, & in omnibus, quibus hoc applicatum erat, emesin civit vomitorium, & aegri servabantur. Nonne hoc probabiliter a spasmis veniebat, qui vomitum impedirent, quos vesicatorium auferebat?

bene esse dicebat ; verum si tangerentur hypochondria , voce & vultu dolorem significabat . Applicabatur abdomini vesicatorium , & ecce ! sequenti die caput serenum , & pulsus maior erat , abierant hypochondriorum dolores & discussa esse videbatur inflammatio (\*) .

---

(\*) Multa his addenda essent , quae vero prolixiorem nimis dissertationem redderent ; pauca circa venaesectionis & vesicatoriorum in *gastrica inflammatoria* usum , monebo . Non raram esse inflammatoriae febris cum biliosa combinationem , certum esse dixi : hinc patet venaesectionem in hominibus praecipue succiplenis & iuvenibus aliquando omnino requiri , & evacuantibus , ne stimulo suo inflammationis metum augeant , esse praemittendam . Magna tamen inter solitariam puramque inflammationem , & bilioso fomite commixtam phlogosin , differentia iacet : neque enim in utraque idem est remedium *venaesectio repetita* . Certe saepe nimis *adparens* tantum huius evacuationis necessitas in febre putrida est , & observante cl. MERTENS , singula symptomata , quae in huius initio saepe inflammationem mentiuntur , post primos morbi insultus absque venaesectione , in plerisque nocivâ potius , sponte disparent ; atque si *primum* febris istius stadium a detracto sanguine videatur brevius reddi atque mitius : *tertium* certe , ob vires aegri nimis fractas , periculosissimum redditur . *De febr. putrid. P. I.* Neque , si *venaesectionis* necessitatem , praesente simul inflammatione , fateantur practici summae auctoritatis , celare potuerunt , eam non liberali nimis manu esse suscipiendam . Primis diebus ,

## §. XL.

Nunc cautiones quasdam haud supervacaneas , sed necessarias omnino , atque utiles ad-

M 3

---

cum pulsum in eiusmodi epidemica febre plenum , frequentem , capitis dolorem magnum observaret DONALDUS MONRO , optimo effectu sanguinem emisit ; raro autem repetita , aut sera venaesectio profuit , aut noxam non attulit . *Observations on the means of preserving the health of soldiers . The second Edition , Vol. I. p. 241.* HUXHAMUS , quamvis venaesectionem saepe necessariam esse dixerit , fatetur tamen , a secunda mox venaesectioe saepe insigniter deprimi pulsum . *Essay on fevers , chap. VIII.* Atque PRINGLIUS , qui venaesectioni in primo morbi stadio , si cum symptomatis inflammatoriis incederet morbus , locum dedit , quamvis pulsus adpareret ut plurimum oppressus : monuit tamen , in secundo stadio , largam sanguinis evacuationem fere semper fuisse fatalem , atque , sub pulsu summopere depresso , delirium auxisse . *Observations on the diseases of the Army , part. III. ch. VII. Sect. 5.* Neque tamen & haec semper & sine exceptione vera esse , monuit experientia sua edoctus MONRO , dicens : „ When the patient was strong , the pulse quick and full , the eyes looked red , and the breathing was difficult , after the *petechiae* appeared , i took away more or less blood before giving the bark . Most practitioners of late years have been against bleeding in this stage of the disorder ; but trusting to the assurances giving by Dr. HASENORF.

dere mihi liceat . Prima nempe concernit vomitoria . Quanquam de summa utilitate , saepe etiam necessitate horum remediorum adeo convi-

of its being safe , nay of advantage to bleed ad this time , if the symptoms required it , i ventured upon it , and found it to be of the greatest service , in many cases “ . *L. c. p. 259.* Idem fere cl. ROUPE dixerat : „ Cum vanum , ait , timorem erga venaesectiões , in his morbis ( febris putrida cum petechiis ) putredinem augentes , mihi initio formatam , seposueram , nemo amplius in navi obierat . *De morbis navigantium.* Videantur quoque de hac tam seria materia , ill. BURSERII *Institut. Medicinae pract. Vol. I. §. 390.* Dict. APFEL , de phlebotomiae , inprimis in febribus biliosis , recta administratione ; Helmstadii 1779. in ill. BALDINGERI *Sylloge Opuscul. Med. pr. Vol. VI. p. 330.* — Henr. Car. God. BODE , *de sanguinis detractionis recto usu in morbis biliosis . Goettingae 1782.* — Magna interim prudentia medica , & adcurata omnino epidemicae constitutionis consideratio requiritur ad determinandum , quid in singulis casibus venaesectio vel prodesse queat , vel nocere . In genere observavi , crudeles venaesectionis in putrido-biliosa incaute nimis adhibitae effectus esse , atque plus certe in hac , quam in illius omissione peccari . Quae vero sub *finem* putridarum , oriri solent viscerum inflammationes , eae maiori adhuc difficultate premuntur , si sanguinis missione eisdem mederi coneris . Ab acrioribus & corruptis humoribus vasa , tono suo iam fere destituta , infarctus sanguinis patiuntur , qui a cruore *phlogistico* utplurimum diversissimus est , & defectui potius virium vitalium , atque spasticis va-

Etus sim , ut credam , plures aegrotos multo difficilius absque emetico , morbum superaturos , imo multos morituros esse , qui , iusto tempore

M 4

---

forum irritatorum crispationibus stagnationem suam adscribit. In his ergo circumstantiis venaesectio loci non datur ; sed in causam morbi convertenda est omnis attentio , & decocto tamarindorum potius , aut , quod putredini potentius resistit , corticis peruviani , cum leni rhabbari dosi , atque mucilaginis , vel & emulsionis arabicae additione symptomatis adaptatis , intestino adfecto succurrendum est .

Quod ad *cantharidum* in hisce circumstantiis usum pertinet , hunc , non obstante *theoria* , qua sanguinem in putridis *resolutum* , magis adhuc abinde resolvi dicunt ; ubicumque inflammati visceris adest suspicio , quin illi venaesectio possit securri , egregium esse , si ipsi parti dolenti imponerentur , observavi , neque desunt argumenta etiam *theoretica* , quae *experientiae* , si opus esset , rationem redderent . Gaudeo & in his consentientem habere , praeter alios , ill. MONROUM , dicentem : „ A late author has affirmed that blisters , instead of being of service , allways do mischief in that Kind of fever ( putrid and petechial ) ; from a notion that they introduce a very acrid salt into the blood , wick is a most powerful solvent of its textur ; but this opinion is certainly founded on mere theory and not on practice and observation ; for i have seen many hundred examples of their good effects in such fevers „ . L. c. p. 247. Interim & linimentum volatile toti abdomini illinitum , & fomentatio-

emetico dato , morti eripi potuissent (a) ; nullus tamen dubito , quin , in eo statu , de quo hucusque locutus sum , noxia imo lethalia evadere possint . Tanto magis vero hoc circa vomitoria monitum necessarium esse videtur , cum inflammationes viscerum , nauseam & conatum vomendi faepe producentes , colluviem biliosam mentiri possint , quae emetico quamprimum educenda esse multis videatur . Verum male aegro consuleres , si id ipsi propinares . Si enim eas mutationes , quae inde in visceribus abdominalibus producuntur , consideres , omnia nempe haec viscera valide tum hic concuti & agitari , sanguinis circuli augeri , istumque maiori impetu in vasa minora irruere , unde stases augeantur & novae oriantur necesse est , tum nullum est dubium , quin omnia mala augeant emetica . Simul autem novo hoc irritamento vel hyperemesis producat , vel cum ob affectus spasmodicos , qui cum inflammationibus coniuncti esse solent , vomitus excitari nequeat , per inferiora agit emeticum &

---

num emollientium , antisepticorum usus , commendanda veniunt in hoc periculoso rerum statu , cui medendo vel optima methodus parum satisfacere observatur .

(a) De usu vomitoriorum in febribus biliosis vid. *Huxhamus* Oper. T. 2. p. 158. *Tiffot* de febre bil. Lausan. variis locis , praesertim p. 25.



hypercatharsin producit . Non video igitur quomodo probari potest , quod *Brendelius* (a) dicit , cum de vomitorio dando in febribus suis malignis praecipit : *Non timendas esse praecipites adeo ventriculi inflammationes , nisi singultus iam adsit . F. Hoffmannus* (b) in malignis & petechialibus febribus cavendum summopere suadet , ne vomitus concitetur , si inflammatio ventriculi iam adsit . *Valcarengius* (c) in febre biliosa , quam describit , vomitoria quidem laudat , hac vero cum admonitione prudenti , antequam lipyria , quae saepissime in hac febre ex inflammatione viscerum oriri videbatur , adsit . Saepius optimus Praeceptor , qui alias tot encomiis vomitoria in hisce febribus extollebat , praesentibus hisce inflammationibus lethalia esse posse pronunciabat . Memorabile est , quod *Cl. Hillary* (d) de febre flava american. memorat , nauseas & vomitus saepissime indicare emeticum , cum vero latera ventriculi saepius acri materia violenter iam irritata , & nonnihil inflammata essent , lenissimi etiam emetici dosin vomitum saepe producere ,

(a) Dissert. de seriori evacuantium usu .

(b) Medic. rat. system. Tom. IV. P. III. p. 505. confer. & Tralles de Opio P. II. p. 181.

(c) Medic. ration. S. I. c. 3. §. 55.

(d) Diseases of Minorca p. 159.

qui omne remedium respuat, & maiorem inflammationem & gangraenam producat. Nonne hinc etiam evenit, quod plures medici sinistrum vomitoriorum eventum in hisce febris querantur, cum ea viscere aliquo iam inflammato propinarent? Non satis igitur circumspēcti medentes esse possunt in dando emetico & ad omnia signa attenti, ita, ut si inflammatio adsit, eam prius resolvere studeant, cum postea summo cum fructu emeticum saepe propinari queat (\*).

## §. XII.

Magni usus plerumque in hisce febris corticem esse peruvianum, multi Medici putant, nec ego saepius utilem esse, si iustis sub cautionibus detur, negabo. Verum id quoque mihi persuasum habeo, summum huius remedii hic subesse contraindicans. Magis enim impingere videtur stases inflammatorias, bilis corruptae liberum exitum impedire, & sanguinis motum in hisce partibus adaugere: cum ergo causam ha-

---

(\*) Videatur de his sequens *de larvis morborum biliosis* tractatio, quam, ut incautos a nimio emeticorum usu abstererem, *Goettingae* conscripsi, & praesenti dissertationi, ob materialium affinitatem, non sine utilitate adiungendam esse credidi.

rum inflammationum , bilem acrem , non corrigere , multoque minus educere queat , difficiliorrem potius reddet resolutionem . Crescere tunc solet calor , mens magis obnubilatur , & omnia symptomata capitis & nervorum exacerbantur . Illae inflammationes , quas viri praestantissimi largiori corticis peruviani dosi feliciter curabant (a) , non erant eiusdem indolis cum illis , de quibus hic sermo est ; sed potius ex dissoluto ac putrido sanguine , non ex acri & corrupta bile originem traxisse videntur .

### §. XIII.

Aliud adhuc , quoad hasce inflammationes mihi diiudicandum restat remedium , nempe epithemata frigida & haustus aquae frigidae . Inter omnes constat , quantis encomiis in hisce praefertim febribus a veteribus aequae & recentioribus efferantur (b) . Putredini enim resistunt ,

(a) V. d. *Bosch* Historia constit. vermin. p. 252. & diversis aliis locis & cl. *Sarcone* de morbis epidemicis Neapolit. diversis locis p. 212. 223. cet.

(b) De usu aquae frigidae in febribus legi meretur , qui & plures alios auctores adducunt , *Tissot* de febre bil. Lauf. p. 92. *Kloekhof* in opusc. p. 18. *Lommius* de febribus continuis , denique cl.

fluida & solida densiora reddunt , systema nervosum roborant , & aestum febrilem imminuunt . Verum cum plurimae harum virium etiam cortici peruviano insint , idem quod modo de cortice adduximus , etiam de aqua frigida valebit , nec igitur hac unquam secure uti poterimus (\*) .

---



---

*Kirkland , essay towards an improvement in the cure of those diseases , which are the cause of fevers , qui vero nimis audax est in usu eiusdem , & eam in omnibus fere febribus laudat .*

- (\*) Defuit auctori tunc adhuc iuveni , nunc vero claro apud *Bremenses* practico , experientia sufficiens , ut de tantis remediis , in tam magnis angustiis adhibendis vel fugiendis , absolutum ederet iudicium . Datur certe & hic persaepe *cortici* locus , datur quoque *glaciei* subinde & frigidis fomentis , dummodo ab experta in his manu porrigantur . Longior esset conditionum enarratio , atque has in Clinicis nostris occupationibus ad lectos aegrotantium potius demonstrabo .

IOANNIS PETRI FRANK

*Ph. & Med. D. Magnae Britanniae Regis  
Consilarii Aulici & Medicinae practicae  
in Academia Goettingensi Professoris  
P. O. &c. prolusio*

D E

LARVIS MORBORUM BILIOSIS.

GOETTINGAE 1784.

**A**Rtem salutiferam iisdem ac humana quaecun-  
que subiacerere conditionibus, eam a temporum  
iniuria dependere & a causis tam physicis, quam  
moralibus, quibus subiugatas dolemus omnes  
fere alias scientias, hinc illam, pro siderum vi-  
talium positione diversa, & fluxum pati & reflu-  
xum, nemo mirabitur, qui bene intellexerit,  
mundum hunc, sine exceptione, regi opinionibus,  
quarum ubique fabri aluntur innumerabiles.  
Aft ad fatalia artis medicae pertinet, a  
coecis ipsis, quasi sola coecutiret, notari, atque  
cum oculos revera habeat subinde obductos caligine,  
paucos invenire iustos, qui id non arti,  
non artifice tribuant, sed opinionum falsarum  
torrenti vix evitabili, quo vel agri fertilissimi

ingrato sterilique fabulo cooperiuntur : *Adducite mihi artem sine Medico* , exclamat I. I. ROVSSEAV , & *fiduciam dabo* ! . . . quasi vero id non fere de omni scientiarum classe exclamari posset , in qua humani quid patimur omnes & errores vendimus vicissim !

Pauca haec ad excusationem medicorum prolata sunt ! Ast dum culpam omnem a nobis avertere nequeamus ; dum fatales adeo errores nostri effectus in genus humanum edere soleant : quare non , cum ex opinionum vel novarum vel absque serio examine susceptarum affluxu , tam frequens inundatio imminet , quare non hinc inde turres erigimus , quas patres nostri lustratorias appellabant , e quibus reipublicae medicorum acclametur , hostem prae foribus esse & novae invasionis periculum ?

Occasio autem acclamandi mihi videtur adesse , quotiescunque magna quaedam in receptis semel sententiis revolutio imminet , quas , etsi in multis erroneas , raro non commutamus cum peioribus , nisi cautissimi esse velimus : vel quod nova ardentem nimis appetant homines , vel quod his cito satis examinandis impares sint , vel demum quod & medicis suae sint mutationis dulcedines , neque solus sexus sequior nunc hoc , nunc alio incedere praeferat amictu .

Heu fatum hominum triste ! sub passionum

iugo prae animantibus caeteris degere & colla medicis submittere malunt , quam naturae sequi vocem paucisque contentam vitam vivere facultate salutifera inegentem ! obiurgant , nec corriguntur ab errorum conscientia quibus nos subiectos noverunt ! nos interim saeculo hoc secamus venas , altero urimus , tertio stimulamus aluum , prout saeculi genium iusserit , nec nisi elapso hoc , fatemur , neque tam ferociter urendum , neque tam abunde mittendum sanguinem , neque stomachum , neque aluum tam pertinaciter movenda , sed omnia pro naturae indigentia magis , quam saeculi more instituenda & moderanda fuisse . Quodsi hae meditationes non minimam felicitatis publicae partem concernant ; merentur sane in considerationem duci omnes praxeos medicae praecipuae mutationes & regulis certis mox submitti : ne , quod boni ab illis expectare licet , ob generaliore applicationem in generis humani detrimentum abeat .

Nos nostro nunc aevo , abiecta , uti pridem decuisset , sanguinem in morbis omnibus fundendi insatiabili cupidine , in *bile* horum originem quaerimus & in *intestinorum sordibus* ; nec me Hercle valdopere fallimur ! Corporis culina stomachus est & ab oesophago ad anum usque canalus ducit , per quem ingesta varie mutata , cruda , semicruda , cocta , crasso flumine fe-

runtur & derivatis per vasa bibula ad omnes corporis partes liquidioribus, tandem secernuntur corrupta & foetentia. Si canalis mortui ideam tibi formares; mox ex fluminum historia tibi persuasum haberes, impuritarum continuo allatarum, fundum canalis implentium copia eiusdem capacitati quidquam detrahi, ingestis poni obicem, at retardata in putredinem abitura esse, cuius pestifera exhalatio viciniam & mox universam inquinaret machinam. At vero in vivo corpore canalis mortui idea exulat, & totus tubus, quem materia alimentaria habet percurrendum, vi gaudet contractili fibrisque propriis brevior redditur, mox incurvatur, mox constringitur, mox in se ipsum suscipitur. Extensionis capax est & sensu gaudet, quod ex doloribus colicis bene novimus & ex vermium irritationibus, exquisitissimo. Vasorum innumera serie pingitur insuper canalis hic longissimus & mille modis contorquetur. Ex hinc facile quivis perspiciet, ingesta a stomacho in chymum transmutata, non tam proprio pondere & a tergo urgente nova materia, quam vi canalis alimentarii propria protrudi, ascendere, mox in descensum venire, nunc moram trahere, nunc celeriori cursu exitum moliri.

Nec in hac de intestinorum functionibus idea acquiescendum nobis erit. Receptaculum



est , e quo corpus ; teu plantae ex radicibus suis , vires amissas refarcit ; ast & caminum nobis sistit , in quem ex humorum massa corruptae & noxiae partes exhalant & in certis morbis eximio cum fructu , praegressis variis tumultibus , eiiciuntur . Haec tamen ita se non habent , ut non praeter optimos succos ex intestinis corpori affluentes , non & perversa subinde reforbeantur liquida & , quod radices plantis non faciunt , venena ipsismet fatalia praeparentur sanguinem lente inficientia . Ex altera parte , irritatis stomacho & intestinis , affluxus humorum & vasorum repletio in hisce partibus , hinc & liquidorum exhalatio , augentur ; quin corruptionis ullius notam incurrissent : quemadmodum lacrymas morbosas nullus dixerit , quas Tabaci pulvis oculo inspersus alicui & per genas copiosius devoluit . Quod vero maximi momenti est , imperium nervorum infimi ventris in caeterum corpus summum existit , uti & cerebrum & reliqui corporis nervi regium in partes & viscera abdominis dominium retinent : sic ut reciproce sibi transmittant irritationis affectus , quin causae indagare vel in his vel in illis sedem , tam facile sit .

En originem malorum quae digestionis vitia & corruptorum humorum accumulatio vel motus segnior producant , & quorum numerum

pro mutata hodiedum vivendi ratione auctoque in omnibus luxu , quin & ob transmutatum in mitius patrium clima fibrasque hominum relaxatas , incredibili modo auctum esse novimus .

Ast & lapsis iam saeculis haec corruptae digestionis vis morbifica in omnes corporis partes , notissima fuit , quamvis in ipsa explicanda non eadem fuerit felicitas . Oculorum morbos a stomacho derivare nonnisi attenti causarum scrutatoris erat , cuius vices GALENUS implevit , postquam de capitis morbis locutus esset , *qui a bilioso humore in ventriculo contento proveniunt , qui per vomitum eiecta bile , protinus quiescunt* , addens : *Similia suffusioni accidentia oculos infestant , cumalatis in ore ventriculi excrementis (a) .* Alibi refert : *in universum Visa ob humorum in ventriculo contentorum vitium oborta utrique oculo similiter accidere* , valdeque accuratus est in eo auctor , ut signa exhibeat , quando e ventriculo , quandonam ex ipso oculo nascatur suffusio , docetque in primo casu stomachi evacuationibus curare oculum & restaurato per amara remedia ventriculo , ac restituta concoctione , quod in diversis terris obtinuerit , visum restituere . De capitis dolore ait : *frequentissime videmus , flava in ventriculo bile contenta , caput dolore affici , mox*

---

(a) De locis affectis , lib. I. c. 1.

*ea per vomitum eiecta, illico dolorem mitigari; quibus subiungit: Huiusmodi dolorum genera mordendo, exedendoque infestant, quemadmodum alia gravitate, alia tensione, alia cum mentis delatione moleſtare videntur. Atque inter optimos medicos convenit, non ſolum hæc accidentia, verum etiam morbum comitalem capiti a ventriculo procedere (a).*

Neque certe, ſi aliquando a vaporibus ad caput aſcendentibus, hæc explicare aniſi ſunt Veteres, veram ideo experimenti cauſſam ignoraverunt. *Cerebrum*, ait idem vir magnus, *ventriculo & ventriculus cerebro*, ſuas affectiones transmittit, idque propter nervorum a cerebro ad os ventriculi deſcendentium magnitudinem, per quos etiam ſenſus huic particulæ, quam ulli reliquarum corporis partium acutior eſt. Quocirca capitis fracturas, cum ad membranas uſque perveniunt, bilioſus vomitus, ac interdum dolores capitis, quomocunque ſiant (en philoſophiam Viri egregiam!) ſubverſioque ſtomachi & morſio comitatur (b).

De Angina medici antiquiores non aliter cogitabant. ARCHIGENES ait: "*Occultæ an-*

N 2

---

(a) L. c. lib. III. c. 7.

(b) L. c.

*ginæ causam esse in quibusdam nervos, qui ad stomachum deferuntur, dum male afficiuntur & post inferioribus membris, pulmoni inquam & cordi respirandi principium inflammant. Hinc eis ea conveniunt, quæ vomitoriam vim obtinent „ (a).*

Si in hac causarum morbificarum cognitione subsequētia tempora continuassent, in tam stolidos certe nunquam errores cecidissent, nec tantam tamque inanem sanguinis iacturam genus humanum hucusque fecisset. Ast quod in hisce, ad nostra usque tempora peccatum fuerit, & præcipue in pestifero conatu, per cutis poros sudoris ope eiicere peccantem in corpore materiam, id nobis ansam dare non debuisset, omnes fere morborum causas bilioso submittendi imperio & omnem fere artis operam in solis fere collocandi abdominis evacuationibus. Nescio certe, quam sibi futura tempora de Saeculi decimi octavi genere humano ideam formabunt, & vereor ne *biliosam* in nobis maculam videant: ut quorum omne fere morborum genus ad hanc classē a medicis reducebatur totaque horum scientia in copiosa emeticorum porrectione constitisse videri posset.

---

(a) AETII tetrabibl. secund. ferm. IV.

Interim non defunt omnino viri , quos genium saeculi a severiori morborum examine non absterruit , vivuntque plures , qui amplitudinem morborum biliosorum & a primarum viarum for-  
dibus oriundorum agnoscendo , aliis caussis non minores in corpus humanum effectus tribuunt (a) , dolentque tam multos novitatis titulo deceptos , in omnibus bilem quaerere & dum vel e longinquo detegunt , omnem symptomatum in hanc causam coniicere . Opposuerunt se torrenti plures primae notae medici , nec tamen id obtinere potuerunt , ut ulterius larvam permultis morbis biliosam detrahendi conamen censeripot sit superfluum . Paginae hae tam magno sane argumento non sufficient ; liceat tamen , quae temporis penuria nunc permittit , paucissima super his monere , quorum repetitio iunioribus saltem medicis utilitatem quandam afferat & ab epidemico fere errore hos tandem absterreat .

De bilis natura , secretionem & utilitate nihil hic monebo , contentus illis , quibus se liquidum hoc animale vel copia , vel excretionis viis , vel

N 3

---

(a) DE HAEN rat. med. PLATNER in versione huius operis germanica , 1. B. S. 373. CLIFTON WINTRINGHAM in den Samml. außerl. Abhandl. zum Gebr. praktischer Aerzte , 8. B. 2. St. S. 206. 7.

coloris varietate , ut signum offert practicis , ex quo falso ad ipsius morbi causam biliosam concludi possit .

Et primo quidem nervorum in hanc oeconomiae animalis partem summum & mobile adeo imperium est , ut turbae in excretionem bilis & in eiusdem varietatibus maximae , a sola , & leviori quidem , quam quod morbus dici mereatur , cerebri nervorumque irritatione nasci soleant . Sanissimam mulierem rheda vehi & mox ingentem bilis , seu biliosi liquidi copiam vomitu excernere videbis : quin , pro tanto symptomate , ad praegressam huius humoris morbosam accumulationem vel stagnationem concludere queas . Idem illis contingit , qui se primo navi comittunt marisque fluctibus . Vidi solam imaginationem malo in puella posuisse obicem , quae facie ad anteriora conversa in rheda nullos patiebatur vomitus : quandocunque vero aliter sedebat , ut loca relicta aspiceret , copiosissime bilem vomebat . Atqui haec ipsa sibi primum semper in rhedis locum expetebat , nec in eo vomitus patiebatur , quod retro sedenti communissimum erat . Ad locum venit , à quo , post brevem moram , domum erat retrovertendum , rheda interim hunc in finem conversa . Ilanc puella mox intrat oblita mutationis & peiori se loco nunc esse commissam . Amicae , experimentum capturae silent ,

mox subrident ; vomitus sequitur nullus : mirantur , interrogant , num bene habeat ? quin optime , respondet , quandocunque mihi in rheda non est retrovehendum . Exspectant deceptae puellae querelas : sed pro prima vice nunc bilem non reddit , ut quae se de periculo securam credebat , & errorem magno tandem amicarum cachinno agnoscit , dum iter sana perfecisset .

Novi in permultis locis quondam matres illegitimas , instrumento rotatorio , in poenae locum fuisse commissas , quo in orbem violentissime movebantur , ingrato bilis & assumptorum mox supra & infra eiectionum spectaculo . A quacunque re ante sensibilibus mulierum oculos in gyrum acta , ortos novi biliosos vomitus , & vir fortis pridem , sed a morbo acuto reconvalescens , pauper , cum maiores labores suscipere necdum posset , domesticis inservit & glomerando incipit : vix rhombum aliquoties circumduxerat , dum biliosi vomitus copiosi subito insequuntur ; causam ignorans , post horam ad opus recedit : novi tumultus & stomachi biliosa subversio ! quae dum in tertiam vicem infecuta vidisset , rhombum a se proicit nec se huic natum esse labori foemineo suscipiendo sanus declarat . A venae sectione , etiam non copiosa , vomitus saepe vidi in delicatulis esse insecutos .

Fere omnis Lypothymia nausea incipit, vomitu vero frequentissimo finitur bilioso. Vomitus sequiori sexui instantibus mensibus familiaris, & quis non feminis virilis in quam plurimas mulieres effectus noverit, quae paucis a foecundo coitu diebus, bilem in tam immensa quantitate eiiciunt, ut nec biliosissimam febrem maiorem eiecisse noverim. Ad mediam graviditatem ut plurimum cessat nervorum hoc symptoma ad omnia rebelle; tantumque abest ut a bile malum ducat originem, ut purissima existente & humidiori lingua, appetitus interim vigeat, subsequente forte abortu mox turbae cessent, & vomitus compescatur. Ab ira pluribus mox incedit vomitus. A levi faucium per plumulam irritatione, vel & a digito in illis emetici officium praestante, in sanissimis bilis praesto est & largo mox flumine assurgit. Quod faucium in stomachum imperium & in semimortuo adhuc existit, irritabilitatis diutissime & dum in caeteris partibus, corde forte solo excepto, plane obmutesceret, retentae exemplo. A sola lucis vividioris, a solis aspectu, vomitus in aliquibus oboritur caeterum sanissimis & in proverbium abiit vomitum nobis cieri, ubi rem horrendam spureamque vel videmus, vel narando in nobis illius renovatur idea.

Haec & multa similia in sanissimis observare cuiusvis attento facile est, videturque vom-



rus bilem magis , quam bilis vomitum hic movere , qui a sola nervosi generis irritatione & ab affecto stomacho , vires partium , illius evacuationem adjuvantium , in consensum trahente , ortum ducit , spongiosum hepar & felleam vesiculam comprimit , a bile liberat , hancque cum affluente aquoso latice copiosissimo (a) intime miscet , donec totam massam , quam incauti pro corpore delicti habebant , reiiciat , spasmique sedentur , sub quibus ex duodeno intestino , cursu inverso , liquida gastrica regurgitant in ventriculum , viaque per quam intraverant , impetu facto evacuantur .

Nunc & morboſi vomitus non a bilis vitio vel copia derivandi , facienda mentio .

Summa hic dolorum & irritati nervi in bilem vis est . A vulnere toties bilioſi vomitus , quos lenientia & mollientia superimposita tollunt . Sub dolorum partus ultimorum invasione vomitus frequentes & bilioſos norunt obstetrices , partum egregie promoventes . In cephalalgia & hemicrania vomitus bilioſi tunc etiam obtinent , ubi in

---

(a) Singularis est nausae in fauces viasque salivales actio , sub qua liquida hic secerni solita , longe maiori copia affluunt & secernuntur , ita ut sputa frequentia , si aliquando consuetudini adscribenda erunt , quam saepissime laborantis stomachi iudicium sint . Eadem & in hoc fieri , analogia & experientia confirmatur .

ventriculo mali sedes non est & a quacunque stomachi evacuatione non levatur. Iunioris foeminae exemplum habet WILLIS, quae hemicrania periodica laborans, illius accessum ex fame canina diem invasionis praecedente, praedicere potuit: sequebantur vomitus acidissimi & simul amarissimi subinde liquidi (a); quam violentiam magis quam causam mali demonstrare recte asserit ill. TISSOT (b). Caput vel contusum, vel fractum, vel & caeteri corporis valida cunctio, bilem movet saepius aeruginosam, copiosam. In inflammationibus vel ipsius stomachi, vel intestinorum vel uteri, continui bilis vomitus. Observavi in colica cum diarrhoea, quod cum caeterum non adesset vomitum: adfuerit tamen, dum in intestinis dolores urgerent. Intestini herniam formantis strangulatio enormes caussat vomitus; & pungente vel renes, vel ureteres calculo, vomunt bilem aegri copiosissimam. In doloribus hysteriarum & hypochondriacorum spasticis saepenumero stomachus subvertitur, & copiosa egeruntur viridissima, herbacea. Vermium effectus in ventriculum notissimi: sed hi saltem materiem sistunt evacua-

---

(a) De anima brutorum, Part. II. c. 1. p. 174.

(b) Abhandl. über die Nerven und ihre Krankheiten, 3. Band. 1. Theil. p. 531.

tioni aptam ; non ita erosio a quocunque acri , emeticis haudquaquam obtemperante , qua praesente vel guttula liquidi stomacho allata , dolores renovat & cum iis fatales vomitus ; &c.

Contagiorum natura stomacho insensibilissima est , primosque fere hic effectus edunt vel deglutitae cum saliva vel aliter admotae illorum particulae . Et primo quidem ab omni febrili accessu ventriculus mobilissimus redditur . Quanti non vomitus singulos intermittentium epidemiarum paroxysmos concomitant , cum , infecuto hos sudore , saepe nulla latentis bilis indicia observantur ! Inde vidit celeb. GRANT cum periculo a neglecta distinctione , sub larva *biliosarum* , autumno haerere febres intermittentes , quarum paroxysmi continuas remittentes mentiuntur (a) . Vidi saepissime sub intermittentium frigore enormes vomitus nullis praecaveri potuisse emeticis vel evacuantibus remediis , & , signis cruditatis in primis viis plane absentibus , singulis paroxysmis repetitos . Quodsi ex his ad latitantis in visceribus infimi ventris & in ventriculo hostis conclusissem praesentiam : vanam certe morbi curam suscepissem , quam tamen mox praestare solebat corticis peruviani usus ,

---

(a) Beob. über die Fieber , f. 351.

a quo , ut summo tunc antiemetico , caussa morbi , certe non biliosa , mox est sufflaminata . Sic variolarum suscepto contagio & a pluribus aliis contagiorum speciebus , vomitus familiarissimi . SYDENIAMUS, ubi vomitio , ut in peste ac febribus pestilentialibus saepissime accidit , interpellaret ; medicamentum sudoriferum tantisper propinare distulit , donec solo tegumentorum pondere ( nisi quod linteaminis pars subinde ad colligendos halitus vultui superinduceretur ) sudor promanare inciperet . Nam , cum materiae morbificae radii versus ambitum corporis sese exporrigant , illico alvi profluvium & vomitiones eisdem introrsum reflexis ac in ventriculum & intestina decumbentibus provenientes ultro sedantur : adeo ut quantacunque stomachi subversio praecesserit , assumpta deinceps medicamenta probe retineantur , ac ad sudores ex voto prolicandos conducant (a) .

Sed & alia nervorum in bilem actio est coloris in herbaceum & viridissimum nitorem mutatio . Neonatis commune symptoma est a ventris torminibus convelli & postea alvum habere aeruginosam . Ab acido in primis viis derivant , experimentis non quidem refragantibus , colo-

---

(a) De febre pestilentiali & peste .

rem; quem tamen & ab urinoso salis ammoniaci spiritu ortum vidit cl. SCHROEDERUS (a), & quam deesse novimus ubi summa acidi in primis viis indicia adsunt. Quare tam varios bilem per morbos colores inducere, ut in systema vix consentiant, recte monuit ill. HALLERUS, & idem homo ab admistis contentis ventriculi & intestinorum bilem colore tam diversam eructat, ut ex ordine nunc pallidam, nunc vitellinam, nunc aeruginosam, nunc demum isatoden revomuisse visus sit (b). In febribus intermittentibus mali moris, febribus malignis, peste, phrenitide, hydrophobia, dysenteria, cholera morbo, in morbis ab ira, a capitis percussione, in colica pictonum, a calculo, ab arthritide retrogressa, viridem bilis colorem induit, quin ipsa semper morbum fecerit.

Quam dubia igitur erit in multis certe casibus a bilis sic dicta turgescencia desumpta indicatio (c). Videntur & antiquiores medici sensisse difficultatem: cum vel plurimae bilis artificiali

(a) De alienata bilis qualitate, ubi viridis alve excretorum aut vomitu reiektorum color.

(b) Element. Physiolog. Tom. VI. lib. XXXIII. Sect. III. §. IV.

(c) Monebat circa haec ill. DE HAEN, qui tamen in aliis emeticorum utilitatem non recte perspexerat. Rat. med.

eiectione morbum, quem a bile deduxerant, discuffum non videbant, vel & sub bilis in stomacho haerentis indiciis praefentibus, datoque ad vomendum remedio, nullam insequi eiusdem excretionem conſpiciebant. Sic GALENUS ait: *Si humor quifpiam ( flava bilis ) in ipſius ventriculi tunicis contineatur, naufea quidem vexabit, ſed inanis & ſine vomitu, & quae turbat & convellit duntaxat, nullum humorem evacuans, quemadmodum fieri ſolet, ubi ſecundum internam ſpatii latitudinem in ventriculo humor continetur (a).* Certe ab arthritica materia ad ventriculi parietes retrogreſſa & pertinaciter haerente, vel ab acri quocunque viſcus hoc erodente & inflammante, enormes vomitus emetico nequaquam auſculantes ſed quamplurimum exaſperandi. Toties obſervatum eſt, & ipſemet novi, ex longa ad regionem epigaſtricam oppreſſione, appetitu deieſto, naufea, vomituritione fere perpetua, ad emetica uti ad ſacram anchoram confuſiſſe medicos: cum interea malum a vaſorum ventriculi ſanguineorum turgelcentia & a craſſi atrique ſanguinis in iifdem ſtagnatione proveniens, in funeſtos cruoris vomitus ab emetico converteretur &

---

(a) De locis affectis, lib. I. c. 4.

arti maculam inureret, circa quod cl. KLOEKHOF monebat omnes, ne vaforum ventriculi obstructionem cruditatibus adscriberent (a). Ipse ego ardore laborans ventriculi perpetuo & appetitu depravato, repetito ingessi emeticum, bilem sat copiosam quidem eiiciens; sed malum ab acido ortum duxerat, in quod nullae emeticorum vires esse poterant & cui debellando absorbentium optimorum usus vix non erat impar. Communis litteratorum fere omnium morbus est stomachi debilitas viscerumque digestionis inservientium inactio: sub his quotidiana fere ad ciendum vomitum nasceretur indicatio; a quo tamen remedii genere malum quam plurimum exasperabitur. Commutata vitae ratione & moderatis animi contentionibus redit sua iterum ventriculo virtus &, quod capiti nimis affluserat vitalium virium, hoc digestionis operi impensum, omnia mox incommoda aufert a nullo emetico auferenda; quamvis non ita raro ab accumulatis his fordibus vera vomitionis artificialis nascatur indicatio suasque tunc utilitates habeat experientia comprobata.

In ventriculi intestinorumque occultis inflammationibus, ubi toties pulsuum summa est

---

(a) Hist. febr. epid. Culenb. in opusc. p. 79.

fallacia , quamplurimos novi leto traditos , cum ex nausea , vomituritionibus , oppressione stomachi , quin & ex oris amaritudine & linguae viscositate ad bilis turgescentiam concluderent incauti . Quantas non strages ederet medicus , qui in cholera morbo non demulcentibus magis & antispasmodicis remediis aegro subveniret , quam bilem moventibus medicamentis , cuius motus iam tanti sunt tamque saepe a bile ipsa originem non trahunt , ut quodcunque acre iisdem producendis par sit , & in specie quidem diversam , in genere vero consopientem nervorumque tumultus nimios moderantem medelam requirat . Vereor , ne in dysenteriis malignis ob nimias in hoc morbo emeticorum laudes , saepissime peccetur : cum a solo intestinorum dolore , nervorumque ventriculi consensu , & nausea & vomituriatio facillime producantur , inflammatio vero iamiam intestinalem tubum occupans , omnem certe , nisi haec abacta fuerit , emeticorum usum intercludat .

In periculosissimis peripneumoniis , summe inflammatoriis , a solo consensu non raro vomituritionem observari est , quem & vomitus insequitur & hunc oris amaror . Atqui exitialis erit in symptomatico hoc vomitu emeticorum ( nisi in minima & refracta dosi & resolvendi scopo porrectorum ) actio : a quorum usu iuniores medi-



cos recte absterret cl. VOGEL (a). Quodsi in herniis incarceratis, praesente iam validiori intestini prolapsi inflammatione profuerit aliquando vomitorium remedium: id quidem sub certis circumstantiis non omnino negaverim; ast in malo, cuius exitus in Ileum tam frequens est, quodve tam imanes semper vomitus habet comites, nisi omnis inflammatio iam cesset & regressus impedimenta sublata sint, emeticorum usum maxime dubium ego quidem habuerim, donec non per unius sed plurimorum experimentorum fidem convictus fuero. Hepatis, renum, uteri & vesicae inflammationes bilioso per saepe stipantur vomitu & funeste illos decipiunt, qui systematis biliosi auctoritate capti, symptoma a morbo ipso non separant, illique medendo, causam istius exasperant &c.

Quemadmodum vero incerta saepenumero sunt turgescientis bilis indicia: ita morbi dantur biliosae revera indolis, in quibus materia turgere non videtur, summa tamen est emeticorum mox a principio porrectorum utilitas. Perdifficilis est in hisce morbis diagnosi; nisi epidemicus eorum character & nota anni constitutio lucem

*Op. Med. Vol. I.* O

---

(a) Handbuch der practischen Arzneywissenschaft. I.  
Th. p. 314.

afferat & ad bilis excretionem, antequam diarrhoeam ulterius progressu morbo afferat taediosissimam, moveat. Sic in biliosa pleuritide venae-  
 sectio dolorem haud leniebat, quamvis morbus fuisset ex rheumatico inflammatorius. Signa bilis iam non amplius aderant, nec nausea, nec vomituritio: cum interim morbi genius epidemicus mihi ex multis aliis aegris iam notus fuerat, cum genae ruberent intense, circa labiorum oris commissuram vero ex livido pallefcerent, aegra-  
 que a primis morbi diebus vomitum passa fuisset spontaneum; praesente respiratione perdifficili & dolore lateris atroci, dedi sexta morbi die, qua primum vocatus eram, emeto-catharticum, a quo bilis multa ore & alvo reiecta est. Siluit abhinc dolor lateris fere omnis, aegraque somnum recuperata est eoque amissum & transpirationem maxime proficuum, moderatam, quae non minima emeticorum in corpus humanum virtus est. Inter potiora diagnostica redundantis intra praecordia bilis reposuit & ill. STOLL hunc ruborem genarum quasi minio affictum, dum ad oris labiorum commissuram & narium pinnas procurrit, ruborem pallor excipit ex flavo virefcens, & praecipue dum splendor quidam oculorum, quasi lacrymis innatantium accedat (a).

---

(a) Ratio medendi, T. II. p. 129.

Similes meis , quae copiosae sunt , observationes adduxit Vir hic egregius , ubi nec minimo bilis turgescantis praesente signo , eandem tamen adesse , felici omine concludebat morbumque ex voto curabat .

Cum ergo tot sint tantaeque bilis in morborum decursu fallaciae : certe non supervacuam censeo brevem circa haec admonitionem illis saltem dicendam , qui artis necdum cum inimico vires coram lecto aegrorum metiri didicere satis , & a symptomatum biliosorum cohorte ad biliosum hostem concludere se pronos nimis sistunt . Labor hinc erit summae in genus humanum utilitatis , biliosi fomitis , ipsum morbum proxime occasionantis , & symptomaticae tantum effervescentiae naturam & signa propius investigare , quod sane non levioris momenti obiectum erit & cui hae pagellae furtim adeo conscriptae non sufficiant . Alia nempe mihi supersunt *oratione publica* prosequenda , quam , dum Professoris Medicinae ordinarii officium Clementissime mihi demandatum legibus Academicis auspiciari iubeor , *de instituendo ad praxim Medico* habebo , eaque occasione singulare *Regis Maximi* Beneficium gratumque ob id animum publice effari & pro *Augustissimo Rege Summisque Georgiae Augustae Mecaenatibus* piissima Vota facere contendam . Cui Orationi Die XXII. Maii hora locoque con-

fucto habendae ut interesse velint *Princeps Sere-*  
*nissimus, Magnificus Academiae Prorektor, Illu-*  
*strissimi S. R. I. Comites, Patres Academiae &*  
*Professores* honoratissimi, denique *Comilitones*  
 atque omnium ordinum *Fautores* generosissimi  
 nobilissimique, ea qua decet pietate, observan-  
 tia ac humanitate rogo atque obsecro. Scrib.  
 in Academia Georgia Augusta die 15. Maii  
 1715 CCLXXXIV.



IOANNES IACOBUS SCHÆRTLICH

SCHWARZBURGO - RUDOLSTADIENSIS

*D I S S E R T A T I O*

*D E U S U O P I I*

IN FEBRIBUS INTERMITTENTIBUS .

*Goettingae* 1783. (\*).

§. I.

**O**pium opponere febribus intermittentibus novi nil est, nam iam antiquissimis temporibus Opium inter febrifuga est relatum. GALENUS vomitu excitato, ac die sequente succo absinthii pro

O 3

- 
- (\*) Perutilem compilationem sistit haec dissertatio, atque experientias cum heroico medicamento institutas, novas etiam, neque ulli certe pratico non utilissimas, succincte collectas tradit. Est vero *opium*, unum ex illis Medicae artis instrumentis potissimis, quod, sub tyrannico *opinionum* iugo, iniquissimam sortem semper expertum, atque mox ad astra elatum, mox vero infami ma-

potu dato, theriacam duabus ante accessum horis praeiuit. Plerosque aegrotos, quartana laborantes hoc modo a febre liberavit, nec morbus postea invasit (a). ALEXANDER TRALLIANUS tradit Antidota quotidianae, quae ante invasionem dat, hisque Opium inest (b); variaque illius Antidota quartanae Opium ingreditur (c). AETIUS theriacam maximae quartanis conducere, si perfecta coctio in urinis apparet, contendit (d). AEGINETA hoc remedium etiam laudat (e). ARABES etiam theriacam in febribus intermittentibus adhibere.

cula notatum est; donec, consulta rerum magistra experientia, aequiorem tandem iudicem natum esset. Hoc demum duce sperandum est, remedii, quod in *mortalium solatiū* floret, post paucos forte annos, longe aliam futuram esse historiam, quam a solertissimo TRALLESIO, licet eximio doctrinae Medicae ornatu, exarata fuit. Illustrissimorum Virorum, LINDII, ODIERI & HOFFMANNI experientiae insignem certe hic lucem accendunt & in uno eodemque medicamento contrarias omnino virtutes esse docent, de quibus soli quondam theriae nec in somno quidem cogitare licuisset, & quas omnibus quantocumque innotescere publica exposcit utilitas.

(a) De Theriaca ad Pisonem cap. 15.

(b) L. XII. c. 7.

(c) L. c. c. 8.

(d) Terrabibl. IV. Serm. I. c. 96.

(e) L. II. c. 23.

## §. II.

Nec sequentibus temporibus defuere medici, Opium in febribus intermittentibus exhibentes. PLATER Opium in febribus intermittentibus commendari tradit (a). RIVERIUS theriacam in tertiana ante accessionem adhiberi & frequenter praeceptorem suum VARANDAEUM, tanquam specifico, illa usum esse, memoriae prodit (b); & in quartana theriacam hora ante paroxysmum cum vino, decocto chamaedreos, sed non cruditatis studio dandam esse, dicit (c). RIVERIUS multas febres tertianas longissime durantes, phlebotomia purgationibusque frequenter repetitis, theriacae drachma mane per triduum data, sanavit (d); ibique Laudano opiato in accessu ob Choleram febri intermittenti associatam dato, febrem haud rediisse (e), tertianamque duplicatam aqua theriacali una hora ante invasionem data, sublatam legimus (f). HORST theriacam febre in quartana, sed non ante vigorem prodesse,

O 4

---

(a) Prax. medic. T. II. p. m. 138.

(b) Prax. med. L. XVII. c. 3. de Tertiana.

(c) L. c. de Quartana.

(d) Observ. Centur. II. Observ. XLVI.

(e) L. c. Cent. II. Observ. XLII.

(f) L. c. Centur. IV. Observ. XL.

(a) quartanamque theriaca atque purgantibus saturatam, refert (b). HEURNIUS in febre quotidiana ac quartana theriacam & mithridatium ante paroxysmum praebet (c). ZACUTUS LUSITANUS theriacam cocto morbo datam, admirabile in quartana nominat auxilium (d). SYLVIUS Opiata febrium intermittentium vehementiam minuere, illasque interdum propellere dicit (e).

### §. III.

ETMULLER opiata praemissis digestivis evacuantibusque brevi temporis spatio tollere febres intermittentes, inprimis si accessiones ex charactere nervis impresso magis quam ob fomitem morbosum pertinacius redeunt, & si graviora quaedam symptomata in paroxysmo apparent, refert. Illa autem nunquam sola, sed aliis febri-fugis coniuncta & ante insultum febrilem porrigit. Opiatis frigus febrile mitigari statuit. Affirmat, succum absinthii ad unciam dimidiam cum

---

(a) Problem. therap. Dec. I. Qu. 9.

(b) Observ. singul. L. 1.

(c) Oper. omn. T. II. c. 23. & 25.

(d) Oper. omn. T. I. p. m. 612.

(e) Oper. med. p. m. 783.



theriacae drachma una in haustu vini, tribus ante invasionem horis datum, certo a quibusvis febribus intermittentibus liberare (a). W. WEDEL affirmat, Opiata optime convenire febribus intermittentibus, si materia praeparata evacuataque, febris remanet, accessionesque saeviores evadunt, atque febris magna cum sanguinis ebullitione, maxima virium resolutione, dolore ac vomitu est stipata; hoc in casu opiata saepe propellere febres nullo alio remedio proficiente, feque haud raro febres intermittentes esse medicatum, testatur. Casum tertianae ex simplici in duplicem mutatae, quae nullo remedio auferri poterat, a ROLFINGIO Laudano opiato, quo aeger obdormivit, curatae, narrat. Ipse WEDEL felicissime brevissimoque tempore plerasque febres intermittentes, recidiva haud subsecuta, pulvere suo antifebrili ante paroxysmum exhibito depulit (b).

#### §. IV.

PIENS etiam Opiata in febribus intermittentibus & cum successu adhibuit (c). COLE Opium

(a) Prax. L. I. c. 2.

(b) Opiologia p. 95. 96.

(c) De febribus in specie p. 260. 274. 277.

etiam inter febrifuga refert (a). BLANCARD praegressis vomitoriis vel purgantibus expulsa faburra, diaphoretica quibus Opium annumerat ante accessum dari suadet; electuarium antifebrile sudoriferum, cui Opium inest, quo plusquam mille aegros a febribus intermittentibus liberauit, tradit (b). TALBOT saepe Opium cortici peruviano addidit (c). SYDENHAM pilulas cochiae maiores & theriacam cum aqua vitae in tertianis autumnalibus, sudore iam quatuor ante invasionem horis sero lactis cerevisiato, cui salvia incocta est moto, dedit, ac sudores continuo elicit, donec aliquot horae ab illo tempore elapsae sint, quo accessio ingruere debet. Multas febres intermittentes hac ratione vicit (d). In tertiana duplicata eodem remedio omisis tamen pilul. cochiae usus est (e). FR. HOFMANN aqua theriacali & cardui benedicti purgatis primis viis, tribus quatuorve ante insultum febrilem horis, & post accessum data, innumeris experimentis in quartana comprobata est (f).

---

(a) MORTON opera medic. T. II. p. 74.

(b) Oper. p. m. 71. 72. 74.

(c) Blegny, le remede anglois pour la guerison des fievres p. 82.

(d) Opera medic. T. I. p. 54.

(e) L. c. p. 55.

(f) Medic. system. rational, c. de febre quartana.

FREIND febrem intermittentem Opio solvi credit (a). PITCARNE laudano cortici peruviano coniuncto citius ac perfectius febres intermittentes sanari ait (b). NIGRISOLI corticem peruvianum centaurio, ac mithridatio coniunctum nunquam irrita effectu dedit (c).

### §. V.

Ex sententia Ill. VAN SWIETEN febres intermittentes potibus diluentibus, sudoriferis, ac leniter narcoticis, quibus etiam Opium additur, sudore duabus tribusve ante paroxysmum horis excitato &, donec binae ultra tempus initii accessionis sint elapsae horae, continuato, saepissime tolluntur, sin minus, haec curandi methodus est repetenda (d). Haec methodus raro in febribus tertianis fallit, interdum & quartanas tollit. TRALLES Opiatis, imitatus DE HELWICH, mediocri dosi aliquot ante frigus horis datis, susperptis lignorum decoctis, febres intermittentes tertianas, breviores insultus habentes, praecipue nec aestu insigni nec dolore capitis graviore co-

---

(a) Emmenolog. c. 14.

(b) Element. medic. L. II. c. 1. §. 47.

(c) Febris China Chinae expugnata p. 44.

(d) Commentar. T. II. §. 761.

mitatas , sanavit ; sed haud raro diaphoretica le-  
niora haec praestiterunt (a) . TRALLES tamen  
profitetur , Opio cortici admisto febres intermit-  
tentes citius certiusque vinci : ipse Cortici peru-  
viano diascordum FRACASTOR. & theriacam  
duce DE HELWICH saepiuscule effectu cum in-  
signi admiscuit . Praesertim hoc connubium illi  
arridet , si febris absque omni materia solo ani-  
mi a pathemate ortum ducit , nullo vitio humo-  
rum existente . Exemplum simul annectit , febris  
intermittentis ex terrore & nausea ortae , cuius  
nullus accessus cortice peruviano Laudano liqui-  
do confociato exhibito , comparuit (b) .

## §. VI.

Iam vero experimenta , quae BERRYAT  
cum Opio in Febribus intermittentibus instituit ,  
sunt tradenda . Is sex annorum spatio experi-  
menta fecit . Plurimum praestitit Laudanum li-  
quidum in infuso summitatum centaurii minoris  
datum ; hora hoc remedio administrato praeter-  
lapsa , pulsus maior evadit , cutis relaxatur ac  
humida fit , & paulo post somnus accedit . Si

---

(a) Usus Opii salubris & noxius Sect. II. §. 3.

(b) Sect. II. §. 4.

febris haud statim aggreditur horis , hoc remedium statim prodromis apparentibus est dandum ; si vero prodromi deficiunt , exhiberi nequit . Raro huius remedii repetitione est opus . Aliquot horarum spatium caput grave est , siccitas linguae lenisque sitis remanet , & omnes excretiones sudore excepto , ad tempus supprimuntur . Multi aegrotorum radicalem ad curam aliis remediis haud indiguerunt ; generalioribus tamen remediis haud exhibitis , postea illa adhibuit , ac aliquot per dies corticem peruvianum dedit . Quo vehementius est frigus , eo plus Laudanum liquidum effecit , ac quo minus adsuit frigus , eo difficilius febris abigi potuit ; nullum si adest frigus , hoc remedium est inutile . Plures tertianas ac quartanas hoc remedium vicit , quae magno corticis peruviani ponderi , vario modo exhibiti haud cesserunt ; quartanas quindecim ac octodecim mensium hoc remedium curavit . Plures infantes , ac illos , quibus cortex debile ob pectus non est datus , primum secundumve huius remedii praebium sanos reddidit . Id etiam commodi hoc remedium affert , ut si illo utimur , magna corticis quantitate carere possimus . Dosis vehementia morbi est accommodanda ; dedit a guttis decem ad triginta ; plerumque adultis guttas octodecim seu viginti in patera infusi Centaurii minoris praebet . Hoc remedium una hora ante fri-

gus febrile propinat (a). Infans triennis febre tertiana duplicata rebelli laborans; quae nullo remedio auferri poterat, Laudani liquidi guttis quindecim una ante frigus febrile hora datis, indormivit, sudavit ac febris hoc unico praebio est victa (b).

## §. VII.

Nec silentio cl. SENAC est praetereundus; referens, medicum sibi notum opium cum camphora coniunctum dedisse, effectusque felices huius remedii magnopere praedicasse. Nec dubitat, quin opium, si cum croco exhibeatur, febres intermittentes praecaveat. Sed addit, maxima cum cautione haec remedia esse danda, illa nihil praestare, nisi evacuantia, ac resolventia fuerint administrata; & magis prodesse in febribus ad quoddam tempus iam durantibus. Ill. HEVERMANN capitis doloribus, calore nimis vehementi ac Cephalalgia etiam diebus liberis praeferte, Uzione adhibita, omni secunda tertiave vespere extracti opii thebaici granum

---

(a) Memoires presentés à l'Académie royale des sciences T. II. p. 255. 260.

(b) Memoires de l'Académie royale des sciences 1757. P. 31.

unum aut Laudani liquidi SYDENHAMI guttas viginti dedit, simulque specifica adhibuit; diebus tribus seu quatuor his remediis administratis capitis dolor evanuit, nec calor febrilis fuit nimius. Extractum Opii thebaici ipsi multa in febribus intermittibus praestitit, nunquam tamen illud remedium solum, sed semper cum febrifugis coniunctum dedit; attamen febres intermittentes curari hoc remedio posse, ac febribus inveteratis, aegri viribus iam valde fractis usum remediorum anodynorum perneceffarium atque utilem esse, existimat (a). Pluribus quam centum aegris illa remedia praebuit, ac fere semper bonos exinde vidit successus. Eius ex sententia ea haud brevi temporis spatio ante febris accessum danda sunt (b). Cl. QUARIN admissionem Opii cortici peruviano, in febribus intermittibus a terrore aliove animi pathemate ortum ducentibus, praesertim in hypochondriacis ac hysteriis, laudat (c). Cl. GRANT belgio in gallico corticem peruvianum theriacae, rhabarbaro ac sale absinthii coniunctum, multo cum emolumento datum, seque hoc medicamento multo

(a) Von Wechselfiebern p. 269. 270.

(b) Vermischte Bemerk. und Untersuchungen der Arzneykunst Th. I. p. 34. 35.

(c) De febribus & inflammationibus p. 173.

cum fructu esse usum, tradit (a). FORDYCE quartanam biennem pulvere sudorifero DOVERI, bihorio ante accessionem dato, paucorum dierum spatio sustulit, variis remediis cortice peruviano ipso antea frustra datis (b). Cl. RAHN combinationem Opii cum cortice peruviano egregie convenire, si febris a terrore & animi pathematibus, ex sola nervorum perturbatione, sine causa materiali oritur, tradit (c). DUCHANOT aegros duabus horis ante frigus febrile in lectum calefactum reponi, eosque plus quam illis est moris, stragulis operiri, tranquillos iacere, nec illis potum praeberi, curat. Una hora ante paroxysmum guttas XX., XXV. aut XXX. Laudani liquidi in patera infusi calidi florum chamomillae aut centaurii minoris exhibet. Sudore proveniente insutum dictarum plantarum idque calidum abunde praebet. Prima huius remedii dosi exhibita, accessio permittit, sed sudores sunt abundantes. Sequentibus paroxysmis hoc remedium est repetendum, donec perfectam curationem praestitit. Numerus dosium huius remedii

---

(a) Beobacht. über die Natur und Heilung der Fieber p. 98.

(b) Medical Commentaries of Edinburgh. Vol. VI. in ill. Murray med. pract. Biblioth. B. III. p. 408. 409.

(c) Adversar. medic. Vol. I. p. 145.



constitui haud potest , aliquoties multa prae-  
 sine omni malo eventu aegris exhibuit . Eius ex  
 arbitrio melius haud existit remedium prae-  
 di obstructions . Prodromis paroxysmi hora aut  
 tertia horae parte ante frigus febris apparenti-  
 bus , hoc remedium administrari , suadet ; acces-  
 sione iam praesente haud exhibendum , ac sem-  
 per plena dosi , casu contrario magnum effectus  
 vim perdi , esse dandam , tradit . Usionem ,  
 emetica ac purgantia , illorum si adsint indicatio-  
 nes , esse adhibenda , declarat . Propinavit hoc  
 remedium , & praemissis & postea adhibitis re-  
 mediis generalioribus , praefert tamen Usionem ,  
 illius si sit necessitas , instituere , antequam detur  
 Laudanum liquidum ; emetica , & purgantia nar-  
 cotieorum usu meliores ac leniores praestare effe-  
 ctus , testatur . Dicta decem documentis illu-  
 strat (a) .

## §. VIII.

Nunc vero methodus , Opium in febribus  
 intermittentibus exhibendi , quam cl. LIND in  
*Op. Med. Vol. I.* P

---

(a) Memoire sur l'usage des Narcotiques dans les  
 fevres intermittentes , in gazette salulaire de  
 Bouillon 1780. X, L.

venit , quamque recentiores quidam medici , inter quos summos in arte viros conspicimus , sententia comprobarunt ipsorum , effectusque , quos iam dictus LIND ab Opio , hac methodo dato , ortos vidit , sunt indicandi . Is Opiatum ex aquae fontan.  $\xi\text{ss}$ . aq. alexiter. spirit. syrup. e Mecon. ana  $\text{z}\text{ij}$ . Tinct. thebaic. gut. XV. ad XX. plus trecentis aegris dedit . In apyrexia sumtum hoc remedium ne minimum quidem praestitit , nec praecavendo , nec levando accessiōnem subsequēntem ; tempore frigoris , si propinatum est , una alterave vice frigus propellere , videbatur . Quodsi vero *dimidio horae post incēptum calorem* exhiberetur , plerumque proximum efficit levamen . Si Opium tempore caloris febrilis administratur , accessiōnem praecidit atque imminuit , allevat caput , aufert calorem febris urentem , sudorem efficit grata cum mollitie cutis coniunctum , & semper copiosior est his aegris sudor , quam illis , qui Opium haud sumserunt ; saepe recreantem procreat somnum , ex quo madidus sudore & maxima ex parte molestiis solutus aeger evigilat . Nullus aegrotorum , cui Opium est datum , hydrope aut ictero afflictus est . Si opium haud proxime symptomata febrilia diminuit , tamen illa vehementiora haud reddidit ; quodsi delirium in accessu adsit , Opium aegro mentis compote facto demum est dandum ,

hoc in casu maxima ex parte debilitatem & languorem, delirium plerumque insequentem proficiat. Interruptionem perfectam efficit, & per exigua quantitate corticis peruviani est opus. In infantibus initio paroxysmi spinam dorsi tinctura thebaica & linimento saponaceo illinendam curavit; hoc saepe accessionem avertit. Quodsi vero hoc effectum optatum haud praestiterit, Syrupi e Meconio cochlearia parva duo aut tria in stadio caloris data, plerumque minuunt symptomata. Ad morbum penitus propellendum, magnesia alba ad alvum purgandam data, Clysmata e corticis extracto ac guttulis aliquot tincturae thebaicae iniicienda curat (a).

### §. IX.

Hunc cl. virum secutus ODIER quoque Opium idque Laudani liquidi guttas viginti quinque dimidio horae post initium caloris febrilis exhibuit. Symptomata ex eius narratione minuuntur, atque paroxysmus brevior redditur. Quidam hoc remedio solo sunt sanati, in uni-

P 2

---

(a) Von den Krankheiten der Europäer in heißen Climates p. 297-301.

versum tamen paucae quaedam doses corticis peruviani & evacuantia requiruntur. Vehementi etiam praesente delirio opium exhibet. Haec experientia GENEVAE saepius est repetita. Si aeger sudat, paroxysmus penitus evanescit, sin autem non sudat, accessio tamen hoc remedio minuitur (a). Cl. WITHERS Opium Usione antea instituta initio frigoris calorisve febrilis maximo cum emolumento administrari posse, illudque symptomata mitigare, durationem accessionis praecidere, humores ad cutis superficiem propellere, spasticam vasorum cutaneorum constrictionem auferre, sudoremque calidum ac lenem totius corporis promovere, affirmat (b). Illustr. DAHLBERG se aliquoties veritatem usus Opii a LIND praedicati vidisse, in stadio caloris datum antecellere omnibus notis remediis in levando capitis dolore & accessum tolerabiliorem reddendo, dicit. Effectum huius remedii hoc modo dati, tam securum ac praestantem existimat, ut illud remedium se didicisse haud satis gaudere possit (c). Cl. GREGORY etiam Opio

---

(a) Medical and philosophical Commentaries of Edinburgh Vol. VI. in Gl. MURRAY medic. pract. Biblioth. B. III. p. 408. 409.

(b) Bemerk. über die Fehler im Gebrauch der Arzneymittel p. 295. 296.

(c) Cl. MURRAY l. c. Vol. III. p. 321.

In febribus intermittentibus est usus, ex huius-  
que experientia Opium quidem & ante acces-  
sionem & stadio frigoris febrilis cum fructu ad-  
ministrari potest; initio stadii caloris autem ex-  
hibitum, est efficacissimum (a). Alio libro idem  
cl. GREGORY Opium remediis febres intermit-  
tentes profligantibus, uti & remediis calorem miti-  
gantibus ac recidentibus, atque sudorem promo-  
ventibus, annumerat (b). Cl. CULLEN Opiata  
remediis recursum paroxysmorum praecaventibus  
refert, illaque caloris stadio adhibita, febres in-  
termittentes tollere pronunciat (c). DESAIVE  
in tertiana vehementi, Opium parca manu ae-  
gro exhibitum, brevi infecutos esse sudores co-  
piosos ac criticos, febremque haud reddiisse,  
narrat (d).

### P 3

- 
- (a) BRANDRETH Diff. de Febribus intermittenti-  
bus Edinb. 1770. in Götting. gelehrte Anzeigen  
1771. Zugabe XLIV.  
(b) Anfangsgründe der Behandlung der Krankheiten  
p. 34-36.  
(c) Anfangsgründe der pract. Arzneywissenschaft p.  
226-228.  
(d) Gazette salulaire de Bouillon 1777. N. VII.

## §. X.

Sunt etiam medici, qui Opium in febribus intermittentibus, quae *soporosae* dicuntur, administrarunt. Hoc quidem primo intuitu temerarium videtur consilium, nam quis est, quem fugiat, Opium somnum conciliare, nec desunt tristes casus, ubi Opium in febribus intermittentibus exhibitum, soporem procreavit. Cl. MORTON dicit, Opia initio accessionis exhibita, multum periculi afferre, ac paroxysmum febrium intermittantium legitimum haud raro in funestam Apoplexiam vel Coma mutare. Adiicit casum, quo instituta Usione, purgante ac vomitorio exhibito aegro sub initium invasionis haustus ex aqua theriacali propinatus, aegerque stragulis est tectus; paulo post somnus profundissimus ac sudores colliquativi sunt secuti, & aeger spatio viginti quatuor horarum apoplectice periit (a). ELLER a Laudano instante accessione exhibito, Coma somnolentum, & die sexto mortem phreniticam vidit (b). Attamen Opii effectibus accuratius perspectis, a ratione abhorreere haud videtur in fe-

---

(a) Pyretologia p. 39. 40.

(b) Observaciones de cognoscendis & curandis morbis Sect. IV. p. 103.

bribus sic dictis soporosis Opium administrare ; nam character harum febrium intermittentium spasmus est , & Opium maximum antispasmodicum habetur , nec experientia deest , Opium solvere spasmum , qui character est febrium intermittentium soporosarum . Iam RIVERIUS narrat , in febre intermittente soporosa Laudani granis tribus ante paroxysmum exhibitis , accessionem quidem apparuisse , duabus autem horis transactis , omnia symptomata remisisse , aegrum tota nocte se bene habuisse & postridie apozema hystericum , ac purgans datum curationem perfecisse (a) . Cl. HOFFMANN , qui dicto iam morbo Opium aliquoties optimo cum successu adhibuerat , aegrae , febre intermittente soporosa laboranti Laudani liquidi guttas quadraginta quatuor in os infudit . Minutis aliquot praeterlapsis pulsus maior & respiratio liberior est facta ac intra horae dimidium sopor cessavit . Die tertio iterum paroxysmus soporosus apparuit , etsi cortex peruvianus larga copia clysteribus est iniectus , sed Opio est victus . Sequenti paroxysmo hoc remedium ante accessionem est datum ; febrilis quidem paroxysmus secutus , sed

P 4

---

(a) Observat. Centur. II. Observat. 26.

sopor accessionem haud est comitatus (a). Etiam WIRTESENHN utilitatem Opii in febribus intermittentibus soporosis aliquoties vidit, ac duo refert exempla (b).

## §. XL.

Opium corticis peruviano esse addendum, si diarrhoea corticis peruviani usum insequatur, quod interdum accidit, aut si diarrhoea se

---

(a) WIRTESENHN Diff. Opium vires cordis debilitare §. 62.

(b) L. c. §. 64.

(\*) Eadem fere cl. BERRYAT observaverat, quae de Archiatro *Monasteriensis*, illi. HOFFMANNO, refert WIRTESENHN. Accedens enim ad aegrotum sexagenarium febre *perniciosa* detentum, sub prima visitatione invenit illum sine omni sensu, oculis distortis, ac ore obliquo decumbere; pectus erat pituita repletum aegerque stertebat; contracta cutis, pulsus tactum fugiens. Praescribebat tunc cl. BERRYAT confectionem de *Hyacintho*, a qua pulsus quodammodo insurgebat. Ut vero futurum paroxysmum praeveniret, horam ante eiusdem ingressum una, *Syrupi diacodii unciam unam* exhibuit, a quo remedio (certe debilissimo, & cui in his circumstantiis nequaquam in adultis erit confidendum) febris omnis praescindebatur. Interim *Laudanum liquidum* SYDENHAMI a X., ad XXX. guttas in centauri minoris infuso, in his circumstantiis largiri non reformidabat. *Mémoires présentés à l'Académie des Sciences* T. 4.



febris intermittenibus associat, auctores uno ore atque consensu affirmant. Sufficiat igitur quosdam tantum nominare qui connubium corticis peruviani ac Opii commendant, cl. SYDENHAM (a), MORTON (b), hic etiam in febris intermittenibus, rheumatismum pleuritidem, ac peripneumoniam, colicam, choleram, diarrhoeam, scarlatinam, erysipelas mentientibus in paroxysmo Opium & accessione finita corticem peruvianum cum Opio praebet (c), atque exempla harum febrium intermittentium hac methodo curatarum refert (d); WERLHOF, etiam cortici Opium coniunxit, tussi doloribusve praesentibus (e); CLEGHORN qui etiam vomitu apparente Opium cortici peruviano addit (f), & Laudanum cum tinctura castorei ad singultum compescendum, porrigit (g); PITCARNE, hic etiam vomitu febris intermittenti accedente, cortici peruviano Opium admiscet (h); SENAC,

(a) Opera Medica p. 189.

(b) Pyretologia p. 71.

(c) L. c. p. 40.

(d) L. c. Hiitor. 3. 4. 6-9. 12. 13. 15-19. 21. 22. 27.

(e) Opera Medica p. 133.

(f) Beobacht. über die epidem. Krankheiten in Minsk p. 209.

(g) L. c. p. 211.

(h) L. c. §. 47.

etiam cortici peruviano Opium associat, si vehementes artuum, ventriculi, viscerum & intestinorum dolores, vomitusve adsunt (a); TIS-SÓT (b); LIND (c); QUARIN (d).

## §. XII.

Iam usu Opii in febribus intermittentibus experientia demonstrato, mihi Opii in febribus intermittentibus administrationem rationi haud contrariari sed illam Opii exhibitionem postulare, est probandum. Persuasum mihi habeo, febres intermittentes morbos ad spasticos esse referendas. Argumenta huius assertionis primo repetam a symptomatibus febrium intermittantium. Accessionem perierumque oscitatio, languor ac pandiculatio & dolores in dorso praeceunt. Mox frigus vehemens accedit, pori cutanei sunt contracti, cutis aspera ac interdum insensibilis est, adest pallor faciei, quin immo labia interdum evadunt livida, unguis livent, omnes partes gracilescunt, pulsus perceler ac parvus, intermittens digitis tangitur, spirandi difficultas ma-

---

(a) L. c. p. 373.

(b) Avis au Peuple p. 339.

(c) L. c. p. 293.

(d) L. c. p. 173.

gna , respiratio parva ac celeris est ; adest pulsatio cordis , siccitas oris , sitis , anxietas , magna praecordiorum oppressio , tremor ; urina pallida ac limpida est . Frigus interdum unum duntaxat membrum occupat . Quandoque spastica thoracis constrictio aegros afficit , quae sensum pectoris laqueis obstricti exprimit , eaque saepe tam valida est , ut respiratio impediatur ; interdum horror tam validus est , ut ipsum lectum , in quo aeger iacet , concutiat . Quandoque graviora symptomata sese febribus intermittentibus associant , febres intermittentes ad spasticos affectus esse referendas , demonstrantia ; huius generis sunt , cardialgia , icterus , haemoptysis , tussis vehemens , convulsiones , tetanus , vesicae urinae spasmus , singultus , sopor , vehementes dolores colici , contractio abdominis , spasmus maxillae inferioris . In cadaveribus in stadio frigoris febrilis mortuis , cor , cerebrum ac pulmones sanguine quam maxime repleta , reperiuntur . Haec symptomata mea ex sententia spasmum cutis arteriarumque minimarum , stadio frigoris febrili adeste , probant . Etiam stadio caloris febrilis spasmus cutis ac minimarum arteriarum adest , id quod cutis arida , sitis , exsiccatio fonticulorum aliorumque ulcerum manantium , lotium minori copia emissum , anxietas , ac alvi obstructio demonstrant .

Febres intermittentes esse spasticam affectionem (\*), etiam causae praedisponentes ac occasionales quas vocant, confirmant. Nam ad causas proegumenas praegressae febres intermittentes, debilitas, ac nimia irritabilitas referuntur, & causis procataceticis dictis vehementiora animi pathemata, permagna defatigatio, multae vigiliae, nimiae excretiones, sudores suppressi, exanthemata retrograda, dolores vehementes annumerantur; frequentissima vero febrium intermittentium causa bilis est, hancque frequentissimam esse morborum spasticorum causam, cuilibet notum est. Febres intermittentes sublata causa non semper cessant, praesertim si febris intermittens diutius adfuerit, id quod etiam spasticis morbis est commune.

Saepius febres intermittentes sub specie aliorum morborum latent, pluresque horum morborum sunt spasmodicae indolis v. c. epilepsia, catalepsis, tremor, mania, melancholia, malum hypochondriacum, paralyxis, haemorrhagiae, cholera.

Febres intermittentes spasticis esse annume-

---

(\*) Eodem fere argumento utebatur cl. BERRYAT, atque auctor noster, CULLENII insuper in explicanda febris natura theoriam adhibet, quae forte eodem, quo febrium theoriae omnes, defectu laborat.

randas morbis , Opiumque dicto morbo magno cum emolumento administrari posse , ostendunt denique remedia febres intermittentes profligantia ; varia enim antispasmodica in febribus intermittentibus magna cum utilitate sunt exhibita . Corticem peruvianum , spectatissimum in febribus intermittentibus remedium , vires febrifugas etiam ex parte a virtute , quae ei inest antispasmodica , nec solum a vi roborante acceptas referre , ex eo colligi potest , quod nullum medicamentum roborans tam certo febres intermittentes vincat , ac externe cuti applicatus quoque febres intermittentes sanaverit . Emetica una hora ante paroxysmum exhibita saepius accessionem depellunt , quin immo quandoque accessus haud redeunt , etiam sordibus haud praesentibus , hunc effectum a viribus antispasmodicis exoriri , emetica alio tempore data hunc effectum minime certo praestare , & una hora ante accessum etiam sordibus biliosis non praesentibus interdum omnem febrem tollere , probant ; mihi ipsi hunc emeticorum usum iterata vice in nosocomio academico , quod auspiciis Ill. consilarii RICHTER ad cineres usque colendi , cuiusque maximum in me collatum favorem semper grata agnoscam mente , regitur , animadvertere obtigit occasio . Oleum animale Dippelii febribus intermittentibus felici cum successu est oppositum ; nec minus Valeriana in fe-

bribus intermittentibus est administrata ; flores chamomillae egregio cum eventu a viris experientissimis in arte medica sunt adhibitae in febribus intermittentibus ; etiam nucem vomicam magno cum fructu adhiberi posse , recentioribus temporibus quidam statuerunt . Castoreum magna dosi exhibitum etiam quartanas sustulit . Praecipue vero radice Ipecacuanhae exigua dosi exhibitae , vim ac efficaciam in febribus intermittibus paulo prolixius referendam esse , credo .

**CL. WICHMANN** radicem Ipecacuanhae , eadem qua cortex peruvianus administratur methodo , pauperibus , quibus cortex peruvianus nimis est pretiosus in febribus intermittibus praebuit . Is evacuantibus rite praegressis Ipecacuanhae radice granum unum cum saccharo vel magnesia in florum chamomillae infuso aegris exhibuit . Scrupulis duobus hac ratione datis , febris intermittens plerumque propellitur , etiam si evacuationes nec sursum , nec deorsum sequantur ; octavo , sublata intermittente febre die radice Ipecacuanhae scrupulum tertium praebuit . Si necessitas urgeat , corticis peruviani unciam unam roborandi causa subiungit . Magna in epidemia annorum 1777. & 1779. numerosas febres intermittentes hac methodo vicit . Febrem tertianam per plures menses aegrum vexantem , quam varia remedia ac cortex peruvianus ipse tollere non

poterant, subinde recidivantem, nocturna cum tussicula & macie corporis coniunctam iam dictus WICHMANN Ipecacuanhae, supra dicto modo exhibitae, elapsis aliquot hebdomadibus sanavit; febre iam profligata, corticem roborandi causa aegro dedit (a). MEYER Ipecacuanham quoque in febribus intermittentibus bono cum eventu exhibuit. Aegrum feбри intermittente longo iam tempore laborantem, leucophlegmatia totius corporis stipata, Ipecacuanhae granis duobus quovis trihorio administratis, quatuordecim dierum spatio, sensibilibus excretionibus non insequentibus, liberavit; octo diebus praeterlapsis per octiduum iterum eadem ratione Ipecacuanhae radicem praebuit. Aeger infusum florum chamomillae ut adiuvens bibit (b). Cum igitur febres intermittentes morbis spasticis esse annumerandas, spasmus cutis ac arteriarum minimarum in paroxysmo dicti morbi adesse, ac remedia antispasmodica maximo cum emolumento exhibita esse ex supra dictis lucide appareat, Opium, ut maximum antispasmodicum, in febribus intermittibus administrari posse, concludi potest. Accedit, Opium etiam gaudere vi diaphoretica qua

---

(a) MEYER Diss. de eximio Ipecacuanhae refracta dosi exhibitae usu §. 23.

(b) L. c. §. 23.

eo melius spasmus cutaneum & minimarum arteriarum remove potest, quam alia antispasmodica remedia quae nil diaphoretici habent. Effusus Opii etiam ex parte a vi diaphoretica dependere, ex eo colligi potest, quod Opium experientia cl. ODIER, uti in antecedentibus indicavi, si aeger opio dato suadet, plus commodi praestet, & etiam alia diaphoretica saepe febres intermittentes sanarint.

### §. XIII.

Attamen tristem interdum eventum Opii intermittentibus in febribus administrationem esse infecutum, passim apud auctores legimus. GALENUS iam commemorat, theriacam non legitimo tempore in quartana datam, accessionem vehementiorem reddidisse (a); quam tamen quartanam GALENUS postea theriaca legitimo tempore data profligavit (b). Opii infelicis usus casum, quem MORTON memorat, supra iam tradidi. TULPIUS improvidum theriacae usum febres intermittentes in continuas saepe mutare refert (c). TRALLES, Opio in frigore febrili

---

(a) De Praenotione, cap. 2.

(b) L. c. cap. 3.

(c) Monita medica N. XXX.



summo convulsivi quid habente exhibito, parum abfuisse quin verae paene convulsiones summos inter angores accederent, tradit (a). ELLER Opio aromaticis iuncto, largiori dosi ad frigus febrile arcendum ante accessionem exhibito, accessum quidem non apparuisse, sed praecordiorum inflammationem secutam, ac febrem intermittentem in febrem paraphreniticam esse mutatam, affirmat (b). Ill. STOERK Opium methodo BERRYAT multis aegrotis magna cum attentione praebuit; duo tantum post profundum somnum sunt curati, sed debiles & stupidi deinceps manserunt, nec appetitus rediit; unius tantum aegri accessiones minus violentae evaserunt, febris tamen non tota est propulsa. In omnibus aliis aegris Opium temulentiam, paroxysmos longiores, ac alvi obstipationem effecit. Interdum symptomata quaedam in accessu apparentia, hoc remedio mitigari si prudenter adhibeatur, febresque mere nervosas Laudano liquido SYDENHAMI una hora ante paroxysmum somno moto, propelli proficitur (c). Ap-

*Op. Med. Vol. I. Q*

---

(a) L. c. Sect. II. §. 2.

(b) L. c. Sect. IV. p. 103.

(c) Annus medicus primus p. 77. 78.

(\*) Hinc *palliativum* tantum remedium esse in *opio*

paret igitur ex damnis Opii in febribus intermittentibus usu exortis, illud non semper in dicto saepius morbo cum spe successus boni praebere posse, sed rationem praeceptorum quorundam esse habendam, si illud remedium cum emolumento dare velis.

#### §. XIV.

Quodsi igitur Opium in febribus intermittentibus cum fructu administrari velimus, leges quasdam observemus necesse est, quas iam determinare annitar. Sciendum igitur est, Opium tantum dari posse, si causa materialis deest. Quodsi vero causa quaedam materialis v. c. bilis, pituita, cruditates primarum viarum, vermes, obstructions viscerum, adsit, illa tollenda est, antequam Opium aegro exhibeas. Namque

---

inquit cl. MORISOT DESLANDES, a quo aeger ad meliora aut securiora remedia praeparetur: quamvis non diffiteatur, & a se ipso perniciosas febres quasdam feliciter opio fuisse impugnatas. *Palliativum* adpellet remedium, sine quo ipse *cortex* saepe nullam virtutem habet, nihil interest: dummodo *palliativo* hoc medicamento rectius uti ex tantis effectibus tandem addiscamus. Vid. *Séance publique de la faculté de Médecine de Paris tenue le 9. Decembre 1779. Paris 1780.*

Opium, uti & Cortex peruvianus in febribus intermittentibus, causa quadam harum febrium praesente, administratum, maximum aegro potest inferre detrimentum atque casus, in quibus Opium magnae fuit aegroto calamitati, ab illegitimo huius remedii usu ortum trahere videntur. Opium enim his in casibus, causa febrium intermittantium nondum sublata, adhibitum esse, ex eo colligi potest, quod in plerisque documentis in quibus Opium aegrotis obfuit, alia remedia esse exhibita, non legimus. Opium igitur tantum dictis in febribus cum commodo administrari potest, si character nervis impressus sola febrium intermittantium est causa; in febribus tamen intermittantibus malignis, quas inter soporosae eminent, Opium causa materiali adhuc praesente, vitae ob. periculum maximum est praebendum, & causa materialis propulsis demum his febribus est tollenda, uti & cortex peruvianus etiam his febribus intermittantibus malignis, causis materialibus nondum sublati, est adhibendus. Opium in omnibus quidem febribus intermittantibus, servatis modo dictis conditionibus, exhiberi potest; praecipue vero illius usus dictis in febribus, si quae sequuntur res in promptu sunt est suadendus. Si febris intermittantis paroxysmi aut nullo aut perpauco finiuntur sudore; Opium enim, uti in antecedentibus

est dictum ; copiosum elicit sudorem , hacque ratione febrem tollit . Accedit , quod cortex peruvianus intermittentibus in febribus , earum si accessiones sudore haud terminantur , administrari nequeat , Opium hoc in casu solum aegris praebendum est . Si febris intermittens diutius adfuerit , ac character febris nervis firme fuerit impressus , hoc in casu magna corticis peruviani praebenda est quantitas , & tamen hae febres intermittentes interdum cortice peruviano abigi non possunt ; his in febribus combinatio Opii cum cortice peruviano est suadenda , maxime si hae febres saepius recurrunt . Dantur interdum epidemiae febrium intermittantium , in quibus omnes fere febres intermittentes difficulter cortice peruviano tolli possunt , ac saepius maximae corticis peruviani doses dictas febres propellere haud valent ob morem harum febrium epidemicum ; his in febribus etiam ad augendas corticis peruviani vires Opium datum , multum ad tollendas has rebelles febres conferre , sperare possumus . Quodsi transpiratio suppressa febres intermittentes gignat , administratio Opii quoque praecipue suadenda esse videtur , cum egregium sit diaphoreticum & hac ratione transpirationem suppressam restituat . Si aegroti febribus intermittentibus laborantes , nimis irritabili sint praediti corpore , id quod inprimis apud hypochondriacos

driacos ac hyſtericas invenimus , commendanda quoque eſt Opii adminiſtratio . His quidem ut iam dixi in caſibus , Opii exhibitio maxime eſt ſuadenda , attamen etiam intermittentibus in febris , dictis conditionibus haud praefentibus , Opium dari poſſe cum emolumento , ex ſupra enarratis auctoribus apparet . Diſſuaderem autem huius remedii uſum ſaepeius dictis in febris ſi harum februm paroxyſmi multis terminentur ſudoribus , cum ſit timendum , ne Opium hoc in caſu ſudores adaugeat , ac vires aegroti magnopere deiciat . Suaderem , Opium methodo cl. LIND dimidio horae poſt inceptum calorem adminiſtrari , cum experientia & huius cl. Viri & cl. GREGORY Opium plus efficaciae praeflet , ſi hoc tempore exhibeatur quam ſi in apyrexia ſtadiove frigoris febrilis detur , id quod iam ſupra dixi . Cortex peruvianus , quem ſimul dare proderit ad citius ac perfectius curandas ſaepeius dictas febres , excipe , ſi febres intermittentes ſudore haud finiantur , quo in caſu Opium ſolum eſt dandum , in apyrexia eſt exhibendus . Cortici peruviano Opium eſt addendum , ſi diarrhoea corticis uſum inſequatur . Sopor qui febris intermittentibus interdum accedit , a congeſtione ſanguinis ad caput ac pulmones oritur , cuius cauſſa vehementior eſt ſpaſmus . Nam iam in antecedentibus , ſpaſmum cutaneum atque mi-

nimarum arteriarum frigoris ac caloris febrilis stadio adesse, testimoniis confirmavi. His in febribus intermittentibus soporosis Opium in accessione est adhibendum, idque magna dosi, cum aegroti maximo versentur in periculo; quavis tertia parte horae Opium est dandum, donec sopor cessaverit. Quodsi vero hoc sopore afflicti deglutire non possint, Opium forma clysmatum est praebendum, & id quidem magna dosi (\*);

---

(\*) Periculosum est, *vago* adeo termino, remedii, cuius tanta activitas est, dosin determinare. Studiosum Medicinae novi, qui, cum a Praeceptore suo audiisset, anginam quondam sanatam fuisse, cum ex errore Chirurghi *magna* laudani liquidi *dosis* ano fuisset iniecta, *magnam* & ipse *dosin*, & brevi quidem tempore ultra *unciam integram* huius somniferi remedii clysteribus tam infelici exitu morbi inflammatorii curavit iniici, ut aeger mox soporosus e vita miser decederet. Cum vero duplex ad abdominis viscera via, una per *oesophagum* ducat, altera per *intestinum rectum*, atque frequenter obveniat, primam illam, vel ob spasmos, lipothymias, vomitum continuum, vel mechanicas ob rationes, vel demum ob aegroti resistantiam, esse impeditam: optandum esset, ut maiori diligentia, quam hucusque praestitum fuit, diversi effectus variorum medicamentorum in corpus humanum, prout hac vel illa via eidem inferuntur, adnotarentur. Quamvis enim *crassorum intestinorum* non eadem semper sit irritabilitatis & sensilitatis, ob mucum magis vel minus tenacem, vel ob maiorem vel minorem saecum hic

Laudanum liquidum SYDENHAMI medullae spinali est illinendum, ac charta bibula Laudano

stibulantium quantitatem, ratio; cum tamen ante *clysteris medicinalis* exhibitionem, lex sit, *simplici* prius *clysteris* intestinum rectum deplere atque eluere: posset certe, repetitis desuper institutis experimentis, calculus iniri, ex quo *differentia* utriusque viae, tum *superioris*, tum *inferioris*, aliqua maiori certitudine determinaretur, atque ex ea, dosis medicamentorum, prout per hanc vel illam ingerantur, erueretur. Aliquid in his praestitum est ratione febrium cortice chinae in *clysteribus* porrectae curandarum, atque eximias certe regulas tradidit ill. KAEMPFIIUS, de actione clysterum resolventium in morbis viscerum abdominis; sed neque haec doctrinam de possibili *clysterum medicinalium* virtute exhaustiunt, atque multum adhuc abest, ut exactam dosium notitiam habeamus, quâ diversa medicamenta, dum per alvum ingeruntur, cum spe aliqua certioris effectus, debeant praescribi. Nullus dubito, hanc viam saepe nimis a Medicis negligi, quam salus aegrotorum sibi expeteret: vel quod ridicula horum pudicitia illis oblit; vel quod illi ipsi minus quam par sit medicamentorum in has partes actioni confidant. Sed sufficiant haec, ad iuvenes medicos, arreptâ sic mihi occasione, excitandos & hortandos, ne *turpem* medicinam esse putent, quae toties servandae adhuc miserorum vitae inservire poterit, neque credant, ipsorum laboribus nihil remanere excolendum, quod non anteriorum industria iam satis fuerit elaboratum. Ingens certe *opii* dosis, ob maxillae tetanum, &c. saepe ano debet iniici, & non ita pridem aegroto, *rabie canina*, duobus iam

liquido madefacta scrobiculo cordis est superimponenda. Paroxysmo febris intermittens soporosae finito, statim cortex peruvianus addito Opio, isque magna dosi ac parvis intervallis est administrandus, propterea quod aegri in summo sint discrimine. His in febribus intermittentibus soporosis ac malignis in universum, Opium in accessione ac cortex peruvianus Opio iunctus praesente etiam causa materiali, accessione finita, est administrandus, cum hic indicatio vitalis sit, si enim causam materialem tollere vellemus, aeger moreretur (\*). Si usus Opii in morbis ve-

*ab infectione mensibus elapsis, adfecto, octo etiam opii grana, mox vero duos integros scrupulos, totidemque Moschi per clysterem iniecit clarissimus & amicissimus mihi Placentinus Chirurgiae Professor D. MORIGI, quin a tanta opit, etiam oesophago largiter propinati, dosi, in lethali morbo, vel minimus somnus vel quies inducetur. Sed neque in his regula deest, quam morbi tantum gravitas & experientia dictare potest, ignota vero remediorum in hanc partem corporis actio, satis saepe reddit perdifficilem.*

- (\*) Nollem ego in omnibus *soporosis* febribus, quas *malignas* dicunt, in universum & absque causarum consideratione, *opium* suadere, in quantum infelix illud *malignitatis* vocabulum a practicis tam vaga significatione accipitur. Certe si *saburra putrida* ventriculum onerans, hunc soporem generaverit; *emetici* maior necessitas erit, noxiamque *opium* vim exercebit. Si in plethorico



neris, quod his in morbis summo cum successu est adhibitum ac radicalem morborum variorum a causa venerea ortum ducentium curationem perfecit, ut cl. MICHAELIS (a), & SCHOEPPF, quique posterior plures aegros ab ulceribus venereis liberavit & ex decem mensibus nulli aegrotorum mercurium praebuit & affirmat, se nondum coactum esse permutare Opii admini-

---

homine annique constitutione *inflammatoria* eiusmodi febres obrepant, pulsusque sint magni, fortes, facies rubra, livida, tumida, &c.; nemo prudens, ante celebratam ex venis praecipue *angularibus* sanguinis missionem, *opium* administret. In universum ergo ad *nervosas* potius *febres intermittentes*, tam *simplices*, quae v. g. ab animi pathemate, vel a nimia corporis sensilitate, originem ducunt, quam *perniciosas TORTII*, quae ad eandem omnino classem pertinent, sed maioribus stipantur symptomatis & periculo, *opii* usum cum cortice coniunctum esse restringendum putaverim. Legi vero & relegi merentur, tum quae Illustris Eques & amicissimus quondam mihi Collega MURRAY de virtute opii tradidit in *Apparatus Medicaminum*, Vol. II. p. 212--300., tum, quibus vera in *opio* agendi ratio cordi est, Ill. Collegae mei & Professoris Ticinensis BASSIANI CARMINATI, de *animalium ex mephitibus, & noxiis halitibus interitu*, eiusque propioribus causis, lib. p. 132--166.

(a) Ill. RICHTER chirurg. Biblioth. B. VI. St. I. p. 139. 140.

strationem atque Mercurium exhibere (a) , nobiscum communicarunt , pluribus amplius morborum a causa venerea provenientium curationibus erit confirmatus ; hoc remedium etiam intermittentibus in febribus a materia venerea natis esse exhibendum , censeo . Hoc in casu id remedium , causa materiali nondum remota , est administrandum ; cum Opium causam ipsam materialem nempe miasma venereum tolleret , ac simul characterem nervis impressum removeret , egregium sane remedium his in febribus intermittentibus esset . Sed ut iam dixi ; pluribus primum Opii morbis in venereis usus experimentis est firmandus , antequam illius administratio in febribus intermittentibus venereis suaderi poterit (\*) .

(a) SCHOEPPF von der Wirkung des Mohnsafts in der Lustseuche p. i - 10.

(\*) Attentionem merentur novae observationes de virtute opii in lue venerea , quamvis minus eidem faveat recentissimus Auctor , in utilissimo libro : *Practical observations on the more obstinate and inveterate venereal complaints . By I. SCHWEDIAVER M. D. London, pr. for Johnson 1784.* , qui liber gallico nunc idiomate prodiit sub titulo : *Observations pratiques sur les maladies Vénériennes, traduites de l'Anglois de M. SVEDIAUR, par M. GIBELIN, &c. a Paris 1785.* — Quaedam hinc experimenta aliorum , in commodum

eorum adducam, qui libros, qui de hac materia tractant, non possident, vel cum linguae germanicae cognitione destituantur; legere nequeunt. Primus quidem in *Germania*, cl. SCHOEPPF, casu quodam improvise, sanatum *venerea lue* laborantem aegrotum vidit, huiusque rei per litteras ad ill. DELIUM transmissas, cognitionem dedit, quam dein ill. TODE in *Bibliotheca sua Medico-Chirurgica*, Eruditis communicavit. Sed & *America*, teste ill. MICHAELIS, tunc ibidem degente Proto Medico, nunc *Archiatro Hassio casselano*, casui fortuito medicamenti novi experientiam debuit. Vir enim iuvenis, qui per longam moram ulceribus venereis, & doloribus nocturnis atrocibus, magnam *mercurii* copiam opposuerat, tandem vero pertaesus remedii, ob insignes cruciatus, grana *quatuor ad quinque opii* quotidie, absque ullo alio medicamento, assumpsit. Praeter expectationem ulcera sanata fuerunt aegerque sanitati omnino restitutus est. Incepit hinc D. NOOTH aegrotis syphilide laborantibus *opium* exhibere, atque virtutem remedii oblitupuit. Vidit ab eo tempore plures aegrotantes MICHAELIS, hoc solo remedio curatos fuisse, qui pessimis ulceribus venereis, carie inveterata, & atrocissimis doloribus nocturnis cruciabantur. Somnum hoc medicamentum, in aliis nullum, in aliis paucum, promovebat, alvum vero potius solvebat, quam obstruebat, atque sudorem ut plurimum excitabat. *Briefe von Herrn General-Staatsmedicus D. MICHAELIS, zu Newyork, in Ill. RICHTER Chirurgischer Bibliothek VI. Band., I. Stueck, S. 139. 40.* Confirmavit hanc opii virtutem apud ill. TODE, iuvenis 24. annorum ulcusculis cancriformis venereae naturae (Chancres) male tractatis affectus. Adiunxerat se malo, febris, quae ad vesperras invadebat, mane vero cum sudore cessabat, & dolor capitis vehemens, qui

somnum omnino impediēbat. Adparebant simul ad cranium multae exostoses atque tandem fauces quoque exulcerabantur. Per varia itinera maritima impeditus, medicinam nullam faciebat aeger, donec *Havniā*, praeter enumerata mala, cachectico habitu praeditus, revertēbatur. Praescripsit ill. **TODE** Pilulas ex mercurio dulci, alias vero ex *opio* & succo glycyrrhizae. Ex illis bis de die grana tria, eodem vero tempore *opium*, primo ad granum unum, dein quotidie ascendendo per granum, tandem ad grana tria, assumebat. Ob multum vero, quem iam in corpore gerebat mercurium, & quod transpirationem minus curabat validam passus est salivationem. Fauces quidem incipiebant depurari, sed salivationem aeger ulterius sustinere non poterat. Alteri hinc lecto commisso aegrotō, mercurium suspendere illum iussit, *opium* vero ob difficultatem deglutitionis in aqua solutum ita sumebat, ut tandem sex eiusdem grana tam mane, quam ad noctem adhiberet. Cessabat mox salivatio; sequebatur sudor copiosus & foetens, alvi excretio non immutabatur, caput, praeter levem soporem, nihil patiebatur, & ulcera faucium quasi ex miraculo sanabantur. Gradatim ergo usum *opii* imminuebat, evacuans denique remedium & confortantia adhibebat, & sanitati integrae ita restitutum observabat **TODE**, ut post sex menses vegetiorem ac unquam iuvenem conspiceret. *Medicinis-Chirurgische Bibliothek*, IX. Band. 3. Stück, Copenhagen 1781. p. 565. 6. Paulo post in *Actis Regiae Societatis Medicae Havniensis* Vol. I. p. 424. seqq. Idem Vir cl. varias observationes de eximia *opii* virtute antivenerea cum Regia Societate communicavit atque docuit, se propriis oculis perlustrasse duos aegrotos hac medicina a cl. **SIBBERNIO** in *Sophronisterio Havniensi* curatos in optima convalescentia iam constitutos, atque

Ac de egregia *opii* in sanandis malis syphiliticis efficacia certiore & *insperati*, *quinimo inauditi* & *vix credibilis eventus* testem se fitebat. Cum vero cl. SIBBERNIUM ad nova & accurata in hac re experimenta excitavisset, mox plurimos aegrotos lue venerea affectos, ab eodem, praedicta methodo curatos ipse quoque ill. TODE perlustravit. Elapso denique anno (1784.) cl. nunc Professor Medicinae *Goettingensis* D. FISCHER, in litteris ad ill. RICHTER *Londina* datis, testatus est, se aegrotum observasse, qui, ob varia & pertinacia symptomata venerea, praecipue vero ob ulcera in regione pubis & perinaei, variis iam mercurii praeparationibus, ad salivationem usque binis vicibus tractatus fuerat, cum autumno demum dysenteria affecto *opium* a D. Van EMMINGEN proscriberetur. Vix per tres, quatuorve dies hoc usus erat, cum non modo dysenteriam curatus esset, sed & ulcera eius pertinacia longe meliorem iam faciem praeserferrent. Hinc *opium* continuabatur, & eiusdem *grana quatuor*, de die *quater* assumebat, quin sopor aut alvi obstructio insequerentur. Tempore vero quo cl. FISCHER aegrotum hunc conspexit, sanationi integrae proximum fuisse fatetur. RICHTER, *l. c. VII. Band.*, 4. *St. p.* 768. Tandem & post duos annos, novorum experimentorum cum *opio* in *America* institutorum rationem reddidit MICHAELIS. Confirmabat effectus, quos in multis aliis aegrotis venereis ab eo tempore cum D. NOOTH in syphilide curanda *opium* praestiterit, & hos aliquando votis non respondisse fatebatur quidem; sed in raris his casibus, ait, saepe apud medicum in porrigendo *opio* non satis audacem, culpa iacebat. Mox huic assuescit corpus remedio & post paucas septimanas aliquando duos etiam eiusdem porrigebat scrupulos raroque sopor alique effectus *opii* in aliquibus obser-

vabantur. Neque secretiones alias omnes, praeter illam cutis, ab *opio* debilitari, ex eo vidit MICHAELIS, quod raro alvum siccam, apud plures quotidie ter quater motam, apud quosdam vero laxam omnino & sat fortiter evacuatam observaverit. Saepe *salivationis* lenioris speciem produci vidit ab *opio*; apud plurimos vero urinam movebat, ita ut quarta parte potus assumi quantitatem superaret. RICHTERS *Chirurg. Bibliothek VI. Band. 4. St. S. 737. 8.* Experimenta quoque *Havniensia* docebant, ab *opio* sudorem potentissime, praecipue matutino tempore, moveri, qui simul ingratisimum spiret odorem. Idem quoque de urina monetur, quae coeterequin non raro valde mucosa existeret. Interim somnus totam noctem & omne tempus antemeridianum aegrotos occupasse dicitur, ita tamen ut facili negotio inde excitarentur. De dolore capitis, excepta unica filia, nemo conquerebatur; alvi vero beneficio nunquam non omnes gaudebant. TODE in *Act. Societ. Med. Reg. Havniens. l. c. p. 430.* Hoc vero modo sat brevi tempore, & in primis iam quidem octo diebus, bonos *opii* effectus experiri aegrotos, qui nullo modo ad austeras dietae tenuioris regulas adstringantur, monet MICHAELIS.

Haec celeberrimorum Virorum experimenta omnem practitorum mox in se animos converterunt; neque tamen magnos hucusque inter nos progressus fecit inventum novum, ut vel ulterius confirmatum fuisse hucusque noverim. In *tumore* quidem *testis venereo*, remedium maxime proficuum esse *opium* laudabili dosi porrectum, vel clysteris ope injectum, fatetur quoque cl. SCHWEDIAUR *Ch. IV.* In *Ischuria* etiam *venerea*, necdum penitus distenta vesicâ, evacuatis primum, *clystere simplici*, alvi foecibus, *Emena* ex olei lini & aquae hordei partibus aequalibus cum sat lauta

*Laudani liquidi* dosi, utilissimum ad urinae evacuationem promovendam esse remedium, testatur idem. *L. c. Ch. VI.* In *Ophthalmia*, inquit, *venerea*, *Laudanum* oculo instillatum lenimen aliquando evidentissimum producit. *L. c. Ch. XVI.* Hoc idem confirmatur a cl. & amicissimo HUNCZOWSKY de *Ophthalmiis non venereis*, quas *Londini*, si chronicae essent, neque tamen ab acredine humorum orirentur, egregiam a *tinctura thebaica* opem accipere refert. A principio aliquot tantum eiusdem guttulae cum aquae rosarum uncia una commiscuntur, dein vero augetur successive *thebaicae tincturae* dosi. Iam pridem cl. WARE ipsam sine aqua *tincturam* oculo instillabat; sed dolores haec *sola* in oculo excitare solet; & hoc sibi proprium habet utraque methodus: ut si non mox auxilio esse videatur, ab eadem sit desistendum. *Medicinisch-Chirurgische Beobachtungen auf Seinen Reisen durch England und Frankreich.* In *arthritide venerea*, a longiori iam tempore, magno cum effectū, *opii* & *mercurii* partes aequales porrigere solebat cl. DE PLENCIZ, *acta & observata medica. Prag. & Vien. 1783.* — Interim haec singula *opium* necdum videntur ad *mercurii* in lue venerea auctoritatem elevasse. Fatetur ill. RICHTER, neque suas, neque amicorum experientias novo huic remedio favere: quamvis mox addat, se in *tam magnis dosibus*, *opio* uti non ausum fuisse. *L. c. p. 741.* in qua forsā omissionē experimentorum latet differentia. Concludit vero Vir hic clarissimus, ab *opio* levamen quidem atrocium dolorum, quos *lues* gignit, posse expectari; luem tamen ipsam nequaquam curari, atque sic *palliativam* potius esse virtutem remedii. Hoc ab aliis quoque *sudoriferis* impetrari, & aegrotos ad *calidiores* regiones peregrinantes, saepe per fat longum tempus a *lue* apparere liberos, donec, in

*frigidiores* reversi , nova eiusdem patiantur symptomata , monet , atque , donec experientia plures aliter doceant , nonnisi communes *sudoriferis* aliis vires *opio* attribuit . Videntur tamen instituta hucusque pericula maiorem aliquanto auctoritatem *opio* largiri , quam coetera sudorifera vix habeant . Saepe certe *mercurius* , ob nimiam ventriculi irritabilitatem , & sensibilitatem aegrotantium summam , virtute sua destituitur ; saepe cito nimis tam per alvum , quam per vias salivales corpore elabitur , quam ut sufficienti dosi in humores agere possit . Nota hinc est methodus *mercurium cum opio* ita combinandi , ut sine magno nunc incommodo remedium perferatur , & infelices hinc vocat aegrotos cl. CRUICKSHANK , qui , cum opium ipsorum naturae repugnet ; hac combinatione *mercurii cum opio* uti non possunt . Vid. CLARE , *Essai on the cure of abscesses by caustics and of the treatement of Wounds and ulcers , with observations on Some Improvements in Surgery , also a new method of introducing Mercury into the circulation for the Cure of Lues venerea* . London 1779. Quare & cl. SCHWEDIAUR , si sub ulu *mercurialium* , inquit , symptomata oriantur *irritationis generalis* , suspendenda sunt illa per quosdam dies , & *opii* dosis ingerenda , vel si *inflammatoria* diathesis observetur , *venaesectio* instituenda est . L. c. Ch. XI. Cl. quoque FABRE ait : „ Il ya des malades , dont le tempérament est tel que le mercure ne peut pas déterminer en eux le mouvement de la Crise , & les évacuations qui en sont les suites , dans la juste proportion qu'il faut , pour opérer la dépuration de la masse du sang . Dans les uns , ce mouvement & ces évacuations sont trop lentes & imparfaites ; dans les autres , elles sont tumultueuses & trop abondantes . Dans ces cas particuliers , on éprouve souvent que des reme-



des pris dans le regne végétal , réussissent beaucoup mieux que les mercuriels. La guérison du Baron de HUTTEN , dont la maladie , après onze traitemens infructueux par les frictions mercurielles , céda au bois sudorifiques , en est un exemple “. *Traité des maladies vénériennes , par M. FABRE , quatrième Edition . Paris 1782. p. 274.* Hinc & MICHAELIS , *opio prae mercurialibus* fidendum esse apud *scorbuticos venereos* monet , quos ob temporis moram non semper a scorbuto curare possumus , antequam ad litem curandam descendamus . Quidquid sit , in eo positi sumus , ut mereatur *opium* ulterius a Medicis practicis in experientiam trahi , & cum huius mihi in *Clinica Ticinensi* copia data sit quamplurima ; suo tempore , quid haec nobis magistra responderit , cum Lectoribus communicabo ; quibus praesentem digressionem , brevemque *opii* in morbis venereis historiam non ingratham fore confido .

---

---

BURCHARDUS FRIDERICUS MÜNCH

CELLENSIS

D E

BELLADONNA

EFFICACI IN RABIE CANINA  
REMEDIO .

Goettingae 1781.

---

S E C T I O . I

*Belladonnae , in rabie canina , historia , usus ,  
& quibus morbi stadiis , & quae Plantae  
partes adhibitae sint .*

§. I.

QUm a tot tantisque in hac re viris , distinctissimisque characteribus planta , de qua hic acturus sum , iam descripta sit , multis illam verbis denuo describere , non e re mea putavi , potius brevibus tantum commemorare , eam me hic intelligere plantam , quam LINNAEUS *Atropam Belladonnam* appellat , cauleque herbacea ,

*foliis ovatis & integris* praeditam esse dicit (a) quam & alio loco (b), nec non HALLERUS (c) describit. Inter veteres quoque iam a CONR. SICELIO (d) ut inter recentiores, a Cl. FRID. GMELINO (e) clare & distincte descriptam habemus, neque Commentationem *Virt exper.* RULINGII (f) silentio praetermittendam esse censeo, ita ut his dilucidis muniti descriptionibus, eo minus solliciti simus, ne quis illam cum aliis similibus commutet plantis, quod quidem GATAKERO (g) accidit, qui illa cum *Solano nigro Linn.* commutata, hoc in ulceribus cancrofis, aliisque dolorosis affectibus, nec sine fructu usus est.

## §. II.

Verum enim vero, quanquam veterum libros, quos de usu huius *Belladonnae* adversus

R 2

---

(a) In System. vegetab. p. 185.

(b) Speciebus Plant. p. 260.

(c) Enumerat. Plant. Helvet. p. 507.

(d) Diatribe Botan. med. de Bellad. five Solano furioso.

(e) *Allgemeine Geschichte der Pflanzengifte* Nürnberg. 1777. pag. 289. & *Abhandlung v. giftig. Gewächsen* &c. Ulm. 1775. pag. 118.

(f) *In den Goetting. gemein. Abhandl. Ann.* 1773. Stück 74. seq.

(g) Observ. on the internal use of the Solanum.

rabiem caninam & hydrophobiam egisse suspicarer, saepius evoluisse non nego: non possum, quin fatear pauca tantum me reperisse, indequo iure quodam colligi posse mihi videtur, antiquioribus temporibus rarum huius remedii adversus hunc morbum fuisse usum, cum alias verosimile non sit, plane nullas super hac re observationes in veterum scriptis reperiri, praesertim cum iste morbus omnium omnino hominum, imprimis medicorum, oculos nunquam non in se converterit.

### §. III.

Auctorem huius remedii ignotum esse, non adeo mirum videbitur consideranti, plurima nova remedia casu quodam fortuito esse inventa, ut auctores ipsorum de iis gloriari non possint; quamquam altera ex parte similitudines etiam quorundam morborum inter se comparatae occasionem, inveniendi remedia, praebere poterant, quibus medici ex nota remedii in certis morbis virtute aliam nondum cognitam in simili morbo efficere adducerentur. Quae quidem forte etiam fuit causa, quam ob rem *Belladonna* adversus rabiem caninam adhiberetur. Morsus enim serpentum veneno armatorum, scorpionum, araneorumque quodam modo cum morsu canum ra-

bidorum comparari potest; adversus illum vero; PLINIO (a) & APULEIO (b) referentibus, iam tum *Belladonnae* foliis cum oleo contusis, externe & quidem optimo cum successu usi sunt, eodem PLINIO (c) narrante, *aspides*, *Serpentum venenatorum species*, modo *Belladonnae herba contactae*, statim necatae sunt. Ab externo vero eius usu, quam facile erat transire ad internum!

Eadem quoque via similitudinem quandam hydrophobiam inter & melancholiam atque maniam detegere licet. Primo prioris morbi stadio omnia symptomata cum posterioribus sunt communia. *Suspiria*, *tristitia*, *solitudinis amor*, SWIETENIUS inquit (d) sunt omnia symptomata melancholica, atque in *Ephemerid. nat. cur.* (e) casum relatum legimus, quo hydrophobia; hydrophobiae ex contagio ortae omni respectu similis, melancholiam, solam praecedentem, excipiebat. In curanda vero melancholia & mania iam dudum *Belladonnae* vim novimus salutarem,

R 3

---

(a) In Historia Plant. Vol. I. pag. 679.

(b) De Herbis Cap. 22. & 74.

(c) L. c.

(d) In Comm. ad Aphorif. BOERHAVII T. III.

p. 573.

(e) Observ. 220. p. 455.

ideoque & Ill. Equ. MURRAY (a) *praeceptor pie colendus*, cognationem rabiei caninae cum melancholia & mania, ansam dedisse in utroque morbo *Balladonnam explorandi arbitratur*.

#### §. IV.

Sed ne iusto diutius in his morer, cum plures adhuc viae excogitari possint, quas quis ingressus in usum huius remedii incidere potuisset, ista pauca tantum, quae de usu huius remedii in hoc morbo certa atque explorata habemus, afferam.

THEODORUS TURQUETUS DE MAYERNE, regis Magnae Britanniae Archiater, sub initio saeculi decimi sexti florens, medicorum primus fuit, qui usus huius remedii in hydrophobia mentionem fecerit. Is enim *specificum*, ait (b), *contra hydrophobiam decoctum baccharum aliquot Solani maniaci dicitur*.

Hoc vero remedium inter alia, quae contra hunc morbum suadet, leviter tantum attingit, neque magis auctor illius esse, quam ipse experimenta cum eo instituisse videtur. Cognoverat

---

(a) Appar. Med. tam simpl. quam compos. Vol. I. pag. 440.

(b) In Praxi Med. syntag. alt. Tract. de morb. ext. pag. 136.

forte tamquam remedium empiricum ; quod a nonnullis utiliter exhibitum erat .

Hoc excepto , alios eo usos esse , nulla in libris apparent vestigia . Quod si vero alii auctores in libris practicis idem adducunt , omnes omnino MAYERNE auctoritatem sequuntur . Atque haec quidem sunt , quae de veterum huius remedii usu referenda habeo . Forſan vel a multis aliis ſpecificis , quae deinde laudabantur , expulſum , vel ab aliis , non recte , ideoque ſine ullo levamine , in hoc morbo curando adhibi- tum , tamquam inutile reiectum eſt . Veritati vero proxime accedere videtur ea opinio , qua poſtea ſingulis hominibus id nequaquam ignotum fuiſſe , putatur , qui quidem ſui ipſius utilitate , quam inde capere ſtudebant , commoti celarent , uti ſaltem ex ratione , qua iterum reiectum in vulgus manavit , ſatis certo patere videtur . Nam remedia ſaepius per multa ſaecula eodem modo arcana eſſe habita , uſque dum in honeſti viri manus inciderent , illa longius abſcondere nefas putantis , aut dum cuiquam ſive fraude ſive pecunia , illa expiſcari atque divulgare contigerit , pluribus exemplis docemur .

#### §. V.

Eodem quoque modo *Belladonnae* uſum contra rabiem caninam denuo reiectum , omni-

busque notum esse factum , ea , quae ignotus quidam in *Hannoverano promptuario* (a) refert , testantur ; sunt fere haec :

*Metallifossorem quemdam ( Bergmann zum Schichtenhäusern am Osterwalde im Amte Lavenstein ) iam multo inde ab XXXIII. annis cognitum habuisse arcanum , quo & homines & animalia , canum rabidorum morfu laesa , contra insaniam & hydrophobiam inde timendam tueri potuisset , eiusque remedium fuisse quemdam pulverem , quem , ne innotesceret , secrete praeparatum , unicuique postulanti , pro parata pecunia distribuisset . Saltuarium quemdam in tractu Göttingensi familiariter cum illo metallifossore viventem , arcanum ex ipso elicere studuisse , finemque propositum , magno adhibito studio , tandem natum , simulque expertum esse , illum , Belladonnae radicem circa St. Ioannis festum investigatam praeparare ; cui quidem saltuario nos debere , hoc remedium publici iuris esse factum , auctor huius commentationis sibi persuadet .*

Equidem vero eadem fide lectoribus nuntiare possum , illud remedium iam anno 1728. ab eodem fodinarum operario cuidam machinarum directori Clausthalienſi *Hansen* , dono aliquo

---

(a) Ann. 1768. pag. 601. seq.



dato , eodem modo , quo postea in *promptuario Hannoverano* 1763. ann. descriptum fuerit , monitum , ne hac radice , quippe quae venenum esset uteretur , nunquam rem ipsam experiri ausum esse. Quam quidem notitiam *Patri meo optimo* , cum quo iam mortuus Director HANSEN anno 1769. per litteras communicaverat , debeo , indeque etiam didici , metallifossori huic RICHTERI nomen fuisse .

## §. VI.

Quibus ex relatis itaque apparet , huius remedii usum contra hunc morbum , iam sub initio huius saeculi in nostris regionibus fuisse cognitum , neque tamē a medicis ipsis tentatum esse , sed in paucorum privatorum hominum notitia occlusum mansisse , usque dum , uti iam commemoravi , in *promptuario Hannoverano* , anni 1763. a vener. SCHMIDT , verbi divini ministro tunc Luttienſchneenſi , vulgaretur , qui quidem , unde acceperit , non professus est , haud dubie tamen vel ab ipso fodinarum operario , iam saepius nominato , vel per alios ab eodem rescivisse videtur . Dubius adhuc est in ista commentatione , quodnam nomen plantae tribueret , tandem *Solanum maius* appellat , radicisque internum commendat usum , dosin vero satis incerto modo ,

mensura parvorum cochlearium vel adhuc minori, non pondere, definit. Ad infinitum quidem observationum numerum provocat, quarum tamen nullas singulas allatas esse, vehementer dolendum est, in quibus id remedium in canina rabie, & ad avertendam eam, optimo cum successu exhibitum fuisset. Sequenti deinde anno eadem commentatio inserta est in *den Stutgardischen ökonomischen Aufsätzen* (a). Anno 1768. (b) *idem* remedium iterum commendando, plantaeque verum nomen *Belladonnae* imponendo, priores eius effectus confirmat, aliaque experimenta in hominibus & animalibus instituta, subiungit, neque tamen *singulas observationes*, vel *dosis mutata* invenimus.

Exinde quidem, huius remedii efficacia usque magis magisque innotuit atque diffusus est, nec alia res, nisi dosis haud satis certo definita, metusque, ne plantae virus noceret, multos ab illa propinanda retinuit.

## §. VII.

Cum *Pater meus optimus*, tunc temporis iam in aliis morbis cum *Belladonna* tentamina

---

(a) Ann. 1764. B. 4.

(b) *Hannöv. Magazin.* 33. Stück pag. 513. seq.

instituisset (a) atque eius vim ita expertus esset; ut de ipsius utilitate, dubitare nullo modo posset, neque contra rabidorum canum morsus, eiusque vires explorare neglexit; nec defuit occasio, quippe *qui* in regione habitet, ubi ille morbus saepius canes invadit, quaeque inter paludes multamque arenam sita ob maiorem longiusque durantem aestivi caloris vim, imprimis hunc morbum promovere videtur. Prima quidem experimenta anno 1767. instituta, deinde, occasione oblata, continuavit, denique in promptuario Hannoverano (b) primas in lucem edidis observationes, ubi non solum *radicem*, sed etiam *folia Belladonnae* commendans, utriusque dosin, & hominum & animalium aetatis ratione habita, pondere constituit, rationemque utendi praescribit, certis singularibusque observationibus additis, secundum quas id remedium optimo cum effectu contra hunc morbum exhibuerat. Multo frequentiore deinde occasionem continuandi ex-

---

(a) Haec Tentamina memoriae mandata sunt in *Hannöverschen Magazin*. ann. 2767. *Stück* 64. & 65. ann. 1768. *St.* 67. & 105. ann. 1769. *St.* 14. 15. 62. 90. 94. 95. ann. 1770. *Stück* 25. 80. 81. 82. ann. 1773. *Stück* 46. 47. ann. 1774. *Stück* 51. 52. 53. & ann. 1775. *Stück* 68. 69. & 70.

(b) Ann. 1768. *Stück* 38.

perimenta nactus est, paucisque mensibus interiectis, ea quae porro fecerat, in eodem promptuario retulit (a).

### §. VIII.

His experimentis, & medicos, & alios adductos, eadem post hac imitatos esse, probe scimus, quorum vero nullus observationes edidit, viro *exp.* RULING (b) excepto, qui puellae, canis rabidi morfu admodum vulneratae, ex Belladonnae foliis praeparatum pulverem tanta cum utilitate propinavit, ut postea valetudine uteretur prospera.

Experimentorum, quae *Patri venerando* literis nuntiata sunt, ea tantum commemorabo, quae b. SCHROEDER *Archiater* d. octavo mens. Ianuar. & d. nono August. anni 1770. cum ipso communicavit, qui quidem *Belladonnae radice* in quatuor hominibus sanandis, quorum tres a rabido cane, unus a felle vulnerati erant, eo successu usus est, ut omnes sani periculo evaderent.

Quae feliciter iam facta experimenta *Pa-*

(a) Eod. anno *Stück* 103.

(b) In *Goettingischen gemeinnütz. Abhandl.* ann. 1773. *Stück* 78. pag. 618. seq.

*rem*, ne ab iis cessaret, admonuerunt, neque tamen prius *ipsi* contigit, ut ea publici faceret iuris, quam anno 1779., quo *Ill. Archiatri RICHTERI praeceptoris pio colendi*, bibliothecae chirurgicae (a) infererentur, in qua undecim observationes una cum accurata huius remedii praeparandi, applicandi, & exhibendi descriptione expositae sunt, ubi non solum tamquam praeservationis, sed etiam curationis remedium optime se praebuerat. Observationes, quarum gravissimae & dilucidissimae tantum enumeratae sunt, iam tum centenarium longe excesserant numerum.

#### §. IX.

Atque haec sunt, quae de usu & efficacia, huius remedii contra adeo pestiferum morbum hucusque, & in prisca & in recentiori aetate, notata sunt, ex quibus facile apparet, nostris demum temporibus id remedium inprimis adhibitum esse; nec longiori defensione usus eius indigere videtur, cum iam tot experimenta, optimos eius effectus declarantia, fatis superque defendere possint. Quae quidem cum saepius meis

---

(a) *V. Band. Stück 2. pag. 377. seq. & Stück 3. pag. 557. seq.*

260  
viderim oculis, tanto magis meum esse duxi, adiuuare diffusionem remedii, quod contra morbum, ex omni parte atrocem, certo tuetur, eademque etiam medetur.

## §. X.

Ad hoc usque tempus *Belladonnae* vires contra rabiem caninam empirico tantum modo tentatae erant, atque plurima, quae cum ipsa instituta sunt, experimenta, eo spectaverunt, ut hydrophobiam ab iis, qui a cane rabido aliove animale morfi essent, arceret, ideoque remedii prophylactici instar fuit, neque tum haud insignem famam assecuta est.

Nec vero semper hoc tantum modo, sed interdum etiam sanandi causa, exhibita est *Belladonna*. Atque *Pater* quidem *optimus* quosdam, in quibus morbus fere iam eruptus ac in primo stadio esset, periculo eripuit, quarum observationum duas in *Ill. Archiatri RICHTERI* bibliotheca chirurgica (a) dedit.

Neque tamen eadem remedii vis salutifera tum, cum morbus ingravesceret, horrendaque hydrophobiae signa iam apparerent, cognita est, aut nullae saltem a quodam litteris consignatae

---

(a) V. B. St. 3. p. 563.

sunt observationes , praeter eas a venerando SCHMIDT (a) commemoratas , ubi affirmat , nec iis , qui iam tanto correpti erant furore , ut vinculis constricti tenerentur , Belladonnam , quamvis vi ingestam , defuisse immo plene redintegrasse sanitatem , quanquam haud certo indicatur , num vera hydrophobia adfuerit . *Venerandus* quidem *pater* finem , in quem intenderat , in duobus miseris haud attigit . Quatenus vero vel in hoc morbi momento aliqua spes , Belladonna nec sine fructu utendi , concipi possit , in alium locum , ubi in huius morbi naturam eiusque curationem paululum accuratius inquirere animus est , differam .

Experimenta vero huius remedii bene cedentia non modo ad cavendum morbum , sed ad ipsum etiam morbi momentum , quo iam haud mediocribus veneni perturbationibus affectum erat corpus , extendi , inde conspici licet .

## §. XI.

Omnes huius Plantae partes , semine , cuius usus nullibi commemoratus reperitur , excepto , ad eundem finem adhibitae sunt . *Baccas* , earumque quidem *decoctum* commendavit de MA-

---

(a) *Hannoev. Magaz.* ann. 1768. St. 33. p. 513.

YERNE, neque tamen earum numerum, vel decocti menstruum, eiusque quantitatem, nec magis, num baccae unacum semine, vel eo separato, adhibendae essent, praescripsit; quae quidem, coniuncta cum baccarum imprimis venenosa vi, quarum incautus usus iam multum noxae adtulit, denique omnis observationum, cum hac plantae parte institutarum, penuria, me impediunt, quo minus ad experimenta cum eadem prosequenda suadeam.

Sed *radicis* in hoc morbo fuit praecipuus & creberrimus usus, quam supra nominatus *metallifossor*, iam optimo cum successu propinavit. Qui deinde experimenta coeperunt, fere omnes *radice* usi sunt, ac *Vener.* SCHMIDT refert, permulta fauste experimenta, quibus, in ea commendanda, nititur, cum hac esse facta. Eodem modo *Parens optimus* non solum statim ab initio, sed postea quoque *ea* usus est, atque bono eventu, quem experimenta habuere, aliorumque narrationibus, qui eundem experti erant, eo adductus est, ut hanc plantae partem contra hunc morbum adhibendam imprimis suaderet.

Sed praeter *radicem* plurimum contra hunc morbum exhibitam, eadem quoque experimenta cum *Belladonnae foliis* instituta sunt, nec minorem exseruerunt virtutem. Notabile vero est illud, *Belladonnae foliis* haud pares cum *radice*



*in esse vires* . Quod si igitur utrisque eadem efficere vis , folia altero tanto maiori dosi , quanto radicem , praebeas necesse est . Semper quidem hanc rationem *in foliis utendis* secutus est *Parentis optimus* , nec eo fine proposito aberrasse , nonnulla probant experimenta . Quod idem etiam *vir. exper.* RULINGII experientia confirmat , qui a puella , canis rabidi morfu in superioris brachii parte usque ad os laesa , Belladonnae foliis adhibitis , omnem sequentem morbum avertit .

## SECTION II.

*Vires & effectus Belladonnae singulares  
in hoc morbo .*

### §. XII.

CUM autem *Belladonnam* acre in se continere virus ignoraret nemo , magnaue exemplorum copia , ubi haec planta & ipsa incaute , tamquam medicamentum , adhibita , & eius baccarum usus improvidus quam maxime nocuisset , litteris consignata esset : haud mediocris inde usque ad nostra tempora , illa utendi , exortus est metus . Nec sane inficiandum est , pravum atque incautum huius plantae usum multum detrimenti attulisse , neque illi eatenus , ut multis

*Op. Med. Vol. I. S*

aliis usitatis iisque efficacissimis medicamentis ,  
 veneni nomen immerito tribui . Ex quo vero  
 remediorum , quae venena vulgo putabantur ,  
 virtutes accuratius contemplari atque diiudicare  
 licuit , ex quo convicti sumus , his cum pru-  
 dentia ac diligentia applicatis , omnium esse effi-  
 cacissima ; etiam in Belladonnae usum vanum  
 & nimium timorem abiicere sensim coepimus , at-  
 que tantum abesse , ut detrimenta hinc inferren-  
 tur , ut potius magno cum fructu exhiberi possit ,  
 optimi satis superque ostenderunt successus .

Enim vero cum mihi persuasum sit , che-  
 micam plantae analysin parum lucis ad eius  
 sanandi vires atque efficaciam indagandam af-  
 ferre , hanc ut instituem , omnino nullam dedi  
 operam , idque eo magis , cum iam GEOFF-  
 ROY (a) atque OETTINGER (b) fere omnia ,  
 quae ad hanc rem pertinent , confecerint , ad  
 quos igitur lectorum eos , qui accuratiorem  
 huius rei notitiam acquirere cupiunt ablego .

### §. XIII.

*Belladonna* itaque cum omnium medicorum  
 testimonio *planta sit narcotica* , atque propter

---

(a) In Materia Medica .

(b) In Differt. de Bellad. tamquam Specifico in Can-  
 cro . Hal. 1739.

vires narcoticas stupefacientes , circa omnes eius partes distributas , maximos producat effectus ; eadem , nimia dosi vel secundum falsas indicationes data , omnia ista mala , a multis iam notata , imprimis vero ab *celeb.* GMELIN (a) MATHIAE (b) DARIES (c) aliisque collecta concitare potest .

Noxiis vero his effectibus , qui non nisi ex perversa utendi ratione originem ducunt , plane omissis , eos tantum in medium proferam , qui Belladonnae & radice & herba rite adhibita , observati sunt .

#### §. XIV.

Remedio scilicet sumpto , plerumque aliquot horis post , in aliis forte citius , in aliis ferius , sequentes hoc quidem ordine se exerunt mutationes . Et primum quidem aegroti singularem quamdam oris , linguae imprimis & faucium siccitatem sentiunt ; in deglutiendo gravantur , nec ipsa fluida sine omni molestia absorbent , siccos vero cibos non nisi permolestie

S 2

---

(a) Geschichte der Pflanzengifte pag. 289.

(b) Hannöv. Magaz. 1771. St. 25. seq.

(c) In Diff. de Atropa Belladonna. Lipsi. 1776. p. 20.

deglutiant. Quam oris siccitatem fere semper fitis, saepius magna & ad bibendum multum incitans, comitatur. Oculi sunt rigidi, immobiles, protuberantes, omnia quasi nebula aliqua offusa cernunt; res singulae ac propiores quasi duplices, remotiores contra clariiores apparent; interdum oculorum ardor, interdum pressio, ut ab inspersis arenulis, rarius dolor totidemque rubedo adest; pupilla fere semper dilatata. Crebro sentiunt vertiginem, imprimis corpore erecto. Respiratio plerumque libera nec impedita, interdum vero anxietatem quamdam, mox praetereuntem, percipiunt. Pulsus est parvus ac celer. Paulo post languescunt, lassi fiunt, ad somnum proni; membra ipsis sunt gravia, omnesque motus magna cum opera peragunt. Haec symptomata augentur, somnus illos occupat, plerumque placidus & reficiens. Initio horripilationes experiuntur vagas, pallor faciem occupat, mox calefcunt, vultusque rubore suffunditur. Tunc temporis, magna dosi data, interdum delirant, nec mentis compotes. Cutis, antea dura & sicca, fit mollis & madens, pulsus plenus, & transpirationem auctam copiosus nunc sequitur sudor, cum quo omnia, modo commemorata, symptomata decrescunt, somnusque levamen novaeque vires adfert.

## §. XV.

*Sudor*, qui huius remedii usum fere semper excipit, est princeps atque frequentissima excretio; praeter illam etiam urinae se = & excretionem crebro auctam invenimus, quam quidem saepissime *Pater venerandus* observavit, atque ex medicis, qui vires huius plantae tentabant, inter alios, quam plurimum inquit GREDING (a) crebrius largiusque urinae profluvium excitavit *Belladonna*, & GATAKER (b) quum *Belladonna* urinae profluvium & perspirationem valde augeat, adversus hydiopem feliciter adhiberi posse putat, & DARIES (c) asserit qualitatem diureticam cum omnibus *Solanis* communem habet *Belladonna*. Interdum diarrhoeam inde excitari observatum est, cuius rei nonnulla GREDING (d) nobis suppeditat exempla, levis diarrhoea, inquit, brevi plerumque transiens, saepe observabatur post usum *Belladonnae*, interdum sic & alvi notabilis laxitas per totam curam perspicua erat; neque

S 3

---

(a) *Ludwigii Advers. med. pract.* Vol. I. P. IV. pag. 695.

(b) *Observ. on the internal use of Solanum*, p. 82.

(c) *Dissert. de Atropa Bellad.*

(d) *L. c.* pag. 697.

in *Parentis optimi* observationibus hanc évacuationem omiffam, immo faepius commemoratam invenimus. *Excretio*, quae rarius occurrit, cuiusque praeter GREDING (a) mentionem fecit nemo, est *salivae aucta*, quam nunquam vero nimiam in tribus tantum aegrotis, nec ullas insignes mutationes efficientem, observavit.

Atque hi sunt vulgares post Belladonnae usum notati effectus, qui quidem nec tum, cum adversus caninam rabiem adhibeatur defuerunt. Praeter hos saepe etiam *tumor* eius partis, cui canis rabidi venenum admotum erat, apparuit, cum vago atque tensivo dolore coniunctus, ad proximas usque partes saepe se diffundens. Singulare ac huius symptomatis notabile, ex quo etiam verisimile fit, non veneno solo, sed simul Belladonnae vi id effici, illud est, quod tunc remedium hoc, sudorem nunquam excitavit, quamvis magnis dosibus, datum esset; continuatis vero Belladonnae dosibus tumor semper evanuit, eoque non amplius apparente, recurrit sudor. Symptoma autem hoc plerumque tum demum, cum venenum per salivam scli epidermidi, sine alia laesione, applicitum esset, *Parentis optimus* vidit. Quodsi

---

(a) L. c. pag. 646. 656. & 684.

vero tumor iam antea adesset , *Belladonnae* prima quidem dosis eundem semper auxit , sequentes autem rursus imminuerunt , ac tandem sudor rediit . In nonnullis etiam infantibus ; quibus canis rabidi saliva venenata in diversis corporis partibus admota erat , *Belladonna* adhibita , praeter tumorem *idem* observavit ruborem , qui una cum tumore totum corpus occuparet , *Belladonnae* vero continuo usu rursus evanesceret nec optimos effectus impediret .

### S E C T I O III.

*Miasmatis hydrophobici origo , communicatio , prophylaxis qualis , & quid valeat Belladonna.*

#### §. XVI.

**I**N tanta observationum copia , quae efficaciam *Belladonnae* contra rabiem caninam luculenter fatis demonstrant , quanquam , quo tandem modo eadem in hoc morbo effectus producat , explicare superfedere posse videor : tamen commemorando , quinam sint verisimiles huius medicamenti in hoc morbo effectus , qualesque eius vires imprimis requirantur ad ea efficienda , quae usus eius nos docuit , egregiam *Belladonnae* virtutem magis confirmari persuasus sum ,

ac saltem magis probari spero , dum illam non solum , tanquam remedium empiricum , commendari posse , sed etiam indicationibus , quae in huius morbi curatione adesse solent , convenire ostenderim . Quantam igitur & in indicatione prophylactica & curativa utilitatem adferre possit , exponere studebo .

### §. XVII.

*Curz prophylactica* in eo quidem versatur , ut arceat *hydrophobiam* , adeoque ubi ipsa locum habere potest , *curativam* reddat supervacaneam . *Causa proxima* , quae morbum , brevi aut fero ingruentem minatur , est *miasma sui generis* , cuius vero naturam non , nisi ex effectu , cognoscimus . Primum virus hoc in quorundam animalium corporibus , praesertim canum , eorumque , quae ad idem genus pertinent , v. c. vulpium , luporum &c. rarius in aliis generis animalibus paratur , in quibus morbum quemdam , vulgo *rabie*m , seu *hydrophobiam* dictum , excitat , quod virus ab iis etiam multis modis transferri potest in homines aliaque animalia , quae omnia , cum primum morbus eruperit , aliis eundem inferre valent . Atque in canibus saepissime ille morbus sponte nascitur , qui quum ob commoda , quae hominibus praebent , & ob



societatem inter eos frequentius versentur , plerumque cum illis communicant venenum .

Modorum vero , quibus id fieri solet , magna est varietas , quorum frequentissimus omniumque periculosissimus est *morsus* , ubi saliva , cui venenum imprimis inest , immediate vulneri recenti inseritur , adeoque veneni susceptio certissima ; quamquam & *recens saliva* , *modo epidermidi applicata* , contagio inficere potest , quoque tenerior est eius loci epidermis , eo facilius venenum recipit ; ideoque maximo cum periculo ori applicatur . Sunt exempla , quae per oscula hunc morbum propagari tradunt , quorum unum SCHENCKIUS (a) refert , *virum ex patricia gente prius osculatum esse canem rabidum , quam in aquam immergeretur , posteaque hydrophobia correptum , mortuum esse* . PALMARIUS (b) commemorat *rusticum quemdam , brevi se moriturum morbo hydrophobico cognoscentem , unicum hoc solatium ab illis , qui vinculis tenebant eum , obnixè rogasse , ut ante mortem liberos osculari liceret , quod cum concessum esset , paulo post periiisse hoc morbo ; verum liberos eius septimo die post eodem morbo correptos esse omnes* . Sed &

---

(a) Observ. Med. Lib. VII. p. 848.

(b) Morb. contag. p. 266.

aliorum partium epidermidi recens animalis rabidi saliva applicata contagionem efficere potest, de quo observationes in *Ephemerid. nat. curs.* (a), in *Phylosophical Transactions abrigd* (b), in *Donato* (c), nec venerando Patri idem observandi occasio defuit (d). Sed & saliva iam exsiccata aliquantum temporis hanc vim retinet, cuius rei exemplum nobis dat SCHENCKIUS (e). *Puer abstergebat gladium rubiginosum, quo ante plures annos canis rabiosus confossus fuerat. Mala fortuna digito suo infligebat vulnusculum, atque inde periit hydrophobus.* HILDANUS (f) de sartrice narrat quae lambendo humectaverat suturas chlamydis, moribus rabidi canis iam longe ante scissae, in hac autem simpliciter filum, per vestes, saliva huius animalis infectas, adactum mordendo abruperat, tertio die ex post in rabiem incidit.

Quanquam SAUVAGES (g) sola saliva neque aliis humoribus inquinatis hunc morbum pro-

(a) Decur. 1. ann. 6. & 7. Observ. 142. p. 204.

(b) Tom. V. p. 366.

(c) De Med. histor. mirab. p. 589.

(d) Ill. RICHTER *Chirurg. Bibl. V. B. 3. St. pag. 557.*

(e) Obs. med. L. VII. Obs. 87. fol. 116.

(f) Obs. Chirurg. Cent. I. Obs. 86. p. 62.

(g) Diff. sur la Rage p. 32.

pagari posse, contendit, tamen aliae eaeque crebriores observationes huius rei contrarium probare videntur, quarum nonnullas tantum recensabo. Sic post *lac hydrophobicae vaccae* gustatum hunc morbum propagari viderunt Timaeus a GULDENKLEE (a), & BUSCHER (b). *Canis, hominis hydrophobici sanguine hausto, eodem morbo correptus est* (c); porro ab *esu carnis animalis, quod rabie defunctum erat* (d). Rarissima vero omnium contagia, si modo fides ipsis est habenda, sunt ista, ubi *sola inspiratione venenum illatum ac susceptum esse dicitur*, quae quidem nobis in *Recueil period.* (e), *Journal de Med.* (f), & a Coelio AURELIANO narrantur.

Ex his igitur diversas contagii rationes intelligere licet, quarum tamen semper *ea, qua rabiosi animalis morfu virus infertur manet frequentissima atque usitatissima.*

(a) In Cas. med. Lib. VII. Cap. 23. p. 327.

(b) Hannöv. Mag. 1763. St. 89. p. 1419.

(c) Vide LEMMERY in Hist. acad. reg. Scient. Paris. ann. 1707. pag. 31.

(d) Vid. FERNELIUS de abdit. rer. caus. Lib. II. Cap. 14. p. 223.

(e) Tom. VII. p. 413.

(f) Tom. VIII. p. 316.

## §. XVIII.

Simul ac vero *vulneri injectum est virus ; nervos irritat*, ex quo spastica fibrarum muscularium, ab ipso contactarum, oritur contractio, quo spasmus illud vulnere quasi infigitur. Haec autem specifica eius est qualitas, ibi aliquamdiu commemorari posse, priusquam corporis humoribus se assimilaret, in ipsum penitus penetraret, adeoque dirissimum gignit morbum. Virus autem *stimuli vim habere*, testantur effectus spastici qui succedunt. Initio quidem imbecilliores exerit vim, sed mutationes, quibus obnoxium est, priusquam furere incipit, ignoramus; illud tantum certo dici posse videtur, nunquam iners atque otiosum corpori inhaerere quanquam primi effectus adeo leves sunt, ut nec aegrotus, nec alii eos animadvertere queant. Magna vero est temporis, circa quod atrocia progignit symptomata, diversitas; interdum statim aliquot diebus vel mensibus interiectis, vel ut alii volunt, post multos demum annos (a). *Diversitas haec*, BOERHAVE (b) inquit *pendet a calore tempestatis anni, a temperie hominis morfi, a diverso victu, medicamentisque adhibitis*. Atque

---

(a) In Miscell. Curios. Decur. I. ann. 9. pag. 117.

(b) Aphorism. §. 1137.

hac veneni qualitate, qua per aliquod tempus sine notabili effectu corpori inesse potest, imprimis cura prophylactica nititur.

### §. XIX.

Quod si certum atque exploratum habemus, virus quamdam ad nervos vim exserere, illosque stimulare: malis illius effectibus quadruplici modo occurri posse videtur.

*Primo, Nervos contra veneni impressionem obdurare, obduratosque servare conando, quod quidem per medicamenta narcotica, nervos sensu privantia, effici potest, quibus etiam dolores, causis eorum nondum remotis, leniri solent.*

*Secundo, Venenum eiusque partes irritantes adeo involuendo, ut nervos irritare nequeant; quam ad rem externa involuentia remedia, atque imprimis oleum olivarum adhiberi solet.*

Quod ad *primam curae methodum* spectat, quisque facile intelliget, illam *palliativam* tantum esse posse. Stuporem enim nervorum continuum si quis inferre vellet; via ad corpus destruendum uteretur aequae certa, ac si venenum libere agere pateretur, accidit quod neque internis neque externis remediis ad propositum perveniret.

Nec minus *palliativum* erit, si *venenum*

*oleosis remediis involveretur* ; quis enim posset venenum semper his vinculis constrictum cohibere ? Attamen posterius remediorum genus aliquam habere vim , probant observationes , secundum quas contra serpentum ac ipsum canis rabiosi morsum ea valuisse reperta sunt (a) . Haec vero duo remediorum genera , palliative adhibita , prodesse possunt , quatenus tempus atque occasionem praebent , utendi cura radicali , quae in eo versari posset , ut .

*Tertio , veneni natura ita everteretur , ne ullam vim atque effectum ad corpus , qualem alias venenum producit , amplius exserere posset , eodemque quasi modo , quo acidum per alcali , & vice versa , mutaretur ; cui remedio iure meritoque specifici nomen imponi posset ; sed tale quidquam excogitare usque ad hoc tempus contigit nemini , & sane ardua res esse videtur , usque dum propriam huius veneni naturam , cuius vero admodum tenuem habemus notionem , penitus cognoscere licebit . Omnium vero tutissima , unica & commodissima ac necessaria ea videtur methodus , qua .*

---

(a) Vid. Abrahami Vateri Diff. de antidoto novo adversus viperarum morsum praestantissimo , in Anglia detecto , & Eiusdem Progr. de Olei olivarum efficacia contra morsum canis rabiosi , experimento Dresdae facto , adstructo .

Quarto , *id imprimis efficere studemus , ut venenum , quam celerrime potest , ex corpore rursus eliminetur .* Breyi enim post , veneno applicato , & interdum etiam diutius , certo adhuc vulnere ipsi inhaeret , adeoque illud ex eodem loco tollere optimum est . Quod quidem semper etiam propositum habuerunt omnes medici , diverso modo viam ingressi eo , quo vellent , perveniendi . *Alii enim externis ut remediis venenum ex vulnere eiicerent , operam dederunt , alii internis idem efficere tentarunt , quo quidem studio duplex curandi methodus exorta est , altera quae internis , altera quae externis eundem finem persequitur .*

In adhibenda autem *cura externa* eo tendunt scriptorum consilia , ut vel *remediis externis excitantibus maiorem humorum copiam versus vulnus agant , simulque ipsum venenum eliciant .* vel *externis cauteriis potentialibus venenum deleant vel continuato externorum remediorum excitantium , stimulantium usu maiorem inflammationem & profusam suppurationem moveant , ut una cum pure venenum evacuetur , vel ligatura veneni resorptionem caveant , insectaque parte resecta , venenum quoque a corpore separent .*

Ut vero maior humorum copia in loco affecto contrahatur , varia excitantia tam veteres , quam recentiores commendant medici , ideoque

vulnus scarificare , nec non cucurbitulas adhibere , ut simul cum sanguine venenum extrahatur , suaferunt , idque iam a GALENO , DIOSCORIDE , AEGINETA , atque AETIO factum esse videmus . Inter alia etiam muriam salis marini , acetum , aquam nitrosam , urinam , vinum tepidum , in quo sal ammoniacum solutum erat , eam ob causam praeceperunt , ut his vulnus totum irritaretur , indeque largior affluxus & effluxus efficeretur .

Cauteria potentialia iam a DIOSCORIDE (a) , tamquam princeps ac tutissimum veneni destruendi remedium , commendata sunt , tum ab HILDANO (b) qui vero etiam exempla , quibus omnino nihil profuerunt , commemorat .

Vulnus vero excitantibus remediis ad vehementem adducere inflammationem , profusamque ciere suppurationem , recentiorum medicorum probant & suadent plurimi ; nec aliam ob causam iam DIOSCORIDES cantharidum pulverem externe adhibendi consilium dat , quo quidem remedio nostris temporibus iterum uti coeperunt , una cum mercurio praecipitato rubro , qui forma unguenti vulneri inferretur ; ideo

(a) Theriac. Cap. 11. pag. 424.

(b) In Observ. Chirurg. Cent. 1. Obs. 86. pag. 62.



*Angli quidam* vulnus pulvere pyrio explere , eumque incendere iubent . Inter recentiores cl. SCHMUCKER (a) imprimis hac methodo feliciter usus est , illamque laudavit , atque observationes & ab ipso & ab *Exper.* OPITZ , *doctiff.* HOFFMANN & HORN factas adiecit . Atque *ipsius* curandi methodus fere haec est ; ut vulnus scarificet , sanguinis fluxum crebris aquae tepidae lotionibus promoveat , posteaque cantharidum pulverem exhibeat . Suppurationis quidem quatuor hebdomadam , SWIETENIUS (b) vero sex mensium terminum constituit . Cl. SCHMUCKER simul interne camphoram & nitrum , quamquam minori dosi , propinavit .

Infectarum vero partium *ligatura* , qua veneni resorptio praecaveatur , iam GALENO , post ipsum CELSO , nostra denique aetate HEISTERO admodum probatur . Partium quae ad vitam sustentandam non necessario requiruntur , vel quibus sine maioribus incommodis careri potest , *resectionem* inter ceteros imprimis SAUVAGES (c) & SWIETENIUS (d) adhibendam esse vo-

*Op. Med. Vol. I* T

(a) In chirurg. Wahrnehmungen. Th. II. p. 544. seq.

(b) In Comment. ad Aphor. Boerhavi Tom. III. pag. 570.

(c) L. c. pag. 43. & 44.

(d) L. c. pag. 568.

lunt — Atque his variis, adhibitis remediis medicos saepius optimum successum esse nactos, neque itaque omnes has methodos esse reiiciendas, ex locis librorum adductis satis patet. Quamquam vero illae omnino omnes eo tendunt, ut corpus a veneno liberent, tamen magis aliae, aliae minus probandae esse videntur. Methodus, qua ferro candenti venenum in vulnere ipso destruere tentatur, adeo dura ac crudelis est, ut nostrae aetati nullo modo conveniat; neque semper ea uti licet, eamque ob causam iam reiicienda, quoniam minus saevis ac lenioribus remediis idem obtinere licet.

Partium ligatura, qua veneni resorptio caveatur, nullo modo admittenda est; primum enim fieri non potest, ut venenum tam subtile cohibeatur ligatura, tum eadem arte adstricta, quod quidem necessarium esset, noxam adferret, neque tamen scopus ea attingeretur. Ut vero pars aliqua refecari possit, non medici modo consilium, sed aegroti etiam consensus necessario requiritur, quem vero saepius renuet. Quod si autem vulnus faciei vel alii nobiliori parti inflatum esset, nequaquam ista methodus adhiberi posset.

## §. XX.

Ideo methodus , quam prosperis experimen-  
tis iterum instauravit *Cl. SCHMUCKER* omnium  
maxime digna esse videtur ; *ipsius* enim aliorum-  
que observationes efficaciam eius satis superque  
declarant . Attamen vel haec nunquam non variis  
adhuc vitiis magnisque incommodis laborat . Sa-  
ne enim inter medendi rationes , maximis cum  
doloribus coniunctas , referenda est ea , qua  
vulnus saepius ac profunde scarificetur , tum can-  
tharidum pulvere expleatur , sui saepius , etiam  
si parce , ac ne laesis quidem partibus applica-  
tus , iam saevos dolores excitat ; nimium teneris  
certe ac irritabilibus corporibus eum propinare  
nequit is , qui vehementissimas convulsiones evi-  
tare studet . Qui vero eadem methodo , facie ,  
vel pluribus partibus simul vulneratis , vel de-  
nique vulnere , praecipuis nervis aut magnis ar-  
teriis contiguo , uti cogeretur , quantum aude-  
ret ? ne deformitatem , nullo modo evitandam  
commemorem ; & quamvis summa in scarificatio-  
ne cura ac diligentia , uti fas esset , adhibere-  
tur , postea tamen laesae hae partes correctivis  
cantharidum viribus haud subtraherentur . Can-  
tharidum pulverem , largiter laesis partibus ap-  
plicatum , saepius atrocissimos in urinae vias pro-  
duxisse effectus , *strangurias , vesicae tenesmos* ,

*pidum balneum missos esse narrat , atque ut ipse dicit , ut ibi patientes desudarent dum vires corporis sinant , vulnere adaperto , quo magis ex eo quoque virus destillet . SWIETENIUS (a) ad eundem CELSI locum haec addit , manifeste patet , balneum tantum adhibitum fuisse ut vñnus humesceret , & soveretur ; simulque , per sudorem excitatum illud virus , quod vulnere inhaeserat , expelleretur . Eandem ob causam BOERHAAVE acetum aromaticum , sal marinum , aquam calidam commendat , ut omni mane sudet aeger ; & commentator eius , aromata blanda , ait , copia aquae diluta , prodesse possunt ; quatenus perspirationem & sudorem movent , & alio loco (b) dicit idem , movere humores versus corporis superficiem convenit , ut sic venenum susceptum per eandem viam , qua applicitum fuerit corpori , expellatur . Atque historia , quae in Philosophic. Transact. abridgm (c) commemoratur , idem confirmat . Duorum puerorum , manus in canis rabiosi collum , morbi cognoscendi caussi , immittentium , alter non multo post hydrophobicus mortuus est , alter , qui nullo quidem remedii usu ,*

T 3

---

(a) Comment. l. c. p. 570.

(b) L. c. p. 173.

(c) Tom. V. pag. 366.

*magno tamen corporis motu , multum sudoris profuderat , pristinam sanitatem eo servavit .*

Specifica , ad hunc morbum praecavendum crebro commendata , quum altius scrutemur , frequenter eiusmodi esse remedia invenimus , quibus vires insunt *diaphoreticae* , quaeque eodem modo ipsorum vim produciunt ; talis nempe est *famosus ille pulvis antilyssus* , qui *Lichenis terrestris* , *moschi* , *piperis nigri* , *aequales partes in se continet* , porro *Pulvis Cobii* , alias *Tunquinenfis* dictus , *XVI. grana Moschi* , ac *XX. cinnabaris nativi & facitii complectens* , & ut res postulant , pluribus vicibus cum hausto spiritus fermentati , ex oryza praeparati ( *Arrack* ) sumtus teste SWIETENIO (a) eundem habuit effectum , ut plerumque intra trium horarum spatium somnus blandus , auctaque perspiratio sequeretur . Le CAMUS idcirco *Alcali volatile* , ut virtute eius , sudorem movente , virus e corpore eiiciatur , commendat ; & balnea calida cum herbis aromaticis parata , egregiam inde opem tulisse , videri potest in comment. de rebus in scient. natur. & medicina gestis (b) .

---

(a) Comm. l. c. pag. 581.

(b) Tom. IV. pag. 57.

## §. XXII.

Quae quidem omnia nos docent , medicos inde a remotissimis temporibus hoc miasma hydrophobicum externis remediis e corpore expellere iam contendisse , illisque diaphoretica huic rei accommodatissima visa esse ; nec vero illa omnia hic prodesse , neque ea , quae vehementi motu nec minori corporis exaestuatione id efficiunt , fini proposito ullo modo congruere arbitror , in quorum numerum omnes potus spirituosos , omnia aromata , calefacientia , omnemque nimium corporis motum refero . Ut vero convenienti hanc indicationem modo expleamus , non id solum spectandum est , ut sudor excitetur , uti iam supra commemoravi ; *virus* enim in vulnere instar *corporis excitantis* agit , spasmusque , quem late circum diffundit , altius se infingit . Quod si quis igitur id internis remediis evacuare vult , simul antispasmodica det , necesse est , quae illud in vulnere movent , ut sudor inde sequens idem virus secum auferre valeat . Quam quidem sententiam iam NUGENT (a) fovet , *princeps regula prophylactica* , inquit , *in eo consistit* ,

T 4

---

(a) Essays on the Hydroph. p. 171.

quo ieves isti spasmi virulenti in laesa parte , & circa eam prorsus exstinguantur , id quod fit sapiente . Eiusmodi itaque remedium vi & sapiente & diaphoretica instructum esse deberet , cum quo indicationi satisfieri atque canis rabidi morfu laesus prorsus a periculossimo morbo tueri posset , idque eo melius , quam solis externis remediis , quo minus , his internis adhibitis , quisque valde sollicitus sit necesse est , num etiam virus , in vulneris superficie remanserit nec altius intraverit , illo enim tantum posito , idem ab externis arreptum auferri posset . Quae quidem remedia etiam tum , cum contagium non vulnere , sed aliis modis , cute per salivam venenosam tacta , ortum sit , ubi externa remedia applicari nequeunt , multum valent neque a scopo aberrant .

Quod si vero id , quod volumus , virus scilicet ut e corpore expelleretur , consecuti sumus ; tamen erat , cur malos effectus a *characterere nervis impresso* derivandos , metueremus . Nervi enim stimuli impressionem vel aliquantum post , eoque iam sublato , saepius percipiunt ; eodem modo febres intermittentes crebro continuant , quamvis febrilis materia e corpore depulsa est . Quod idem etiam hoc loco iure timendum esse censemus , praesertim cum virus , diu corpori inhaerens , nervis fortius impressum esset , vel effectibus haud mediocribus

iam apparentibus , peiores etiam postea verendi essent , quos ad cavendos remedia antispasmodica continuare oporteret , quibus omnis omnino nervorum impressio deleri posset .

### §. XXIII.

Atque hac quidem posteriori ratione *Belladonnā* , ut remedium praeservativum , contra rabiem caninam cum fructu exhiberi posse opinor . Neque vero persuadere mihi possum , illam *per se esse specificum quoddam* contra canis rabiosi virus . Quae autem secundum indicationes , hoc loco obvias , ipsi necessario inesse debent , minime defunt , ideoque est *prophylacticum remedium indicatum* . *Virium* enim *antispasmodicarum* ope , quae haud ab ullo medico ipsi denegantur , quasque per bonos effectus , multis in spasticis morbis proditos , satis superque monstravit , spasmos , veneni stimulo in vulnere excitatos , lenire , ac eadem vi obtufofaciente nervos contra veneni stimulos torpidos reddere potest . Quam quidem vim etiam semper exseruit , ubi vulnerati canis rabidi morfu dolores in ipso vulnere & circa ipsum sentirent , qui statim post huius remedii usum evanescerent .

Tum igitur nihil amplius requiritur , nisi , ut humorum versus vulneratum locum incre-



mento , atque sudore virus eliminetur ; quod quidem *eadem Belladonna* effici potest . Effectus , quem vulgo producit , in eo consistit , uti iam supra memoravi , ut , paucis horis praeterlapsis , profusum excitet sudorem , cum quo simul virus expellit ; continuatus vero eius usus characterem nervis impressum penitus extinguit . Quod si igitur una cum interno huius remedii usu simul ea externa adhibentur , quae cum minima molestia coniuncta sunt ; sane absolutissima omnibus regulis accommodata utemur sanandi methodo , quae quidem eo efficacior erit , quo crebriores probant observationes , *Belladonnae folius usum* fere semper optimo cum successu fuisse coniunctum .

#### S E C T I O    I V .

*Primum morbi stadium . Morbi natura .*

*Indicationes , & quo modo Belladonna eas expleat .*

#### §. XXIV.

**I**Am eo progredior , ut doceam , *qua ratione Belladonnae vires etiam tum valere possint , cum morbus iam erupit ; atque primum quidem , quo modo indicationibus , quae in primo huius morbi stadio occurrunt , satisfacere possumus .*

*Stadium primum* incipit , cum primum perturbationes , a veneni effectibus profectae , in corpore sentiuntur . Cum vero inter huius morbi , & melancholiae symptomata maxima intercedat similitudo , omni iure huic stadio *melancholici* nomen imponitur . Miasma hydrophobicum nunquam , uti iam commemoravi plane iners corpori inhaeret , sed inde a spasmis lenibus , quos statim ab initio in vulnere & circa idem excitat , adeo mite , ut animadvertere nequeamus , agere pergit , usque dum effectus ad tantum vehementiae gradum assurgunt , ut perturbationes in corpore aperte cognosci possint ; eamque ob causam haud facile est , verum temporis momentum , quo stadium initium capit , accurate constituere , adhuc magis , quum interdum & hoc ipso stadio tam minori gradu symptomata molestiam exhibeant aegrotis , ut vix se aegrotare sentiant , quare quidam medici illa omnino non observarunt , quod quidem eo facilius evenire poterat , quo minus illi aegroti statim post infectionem a peritis medicis observati sunt . Frequentissime vero eadem satis manifeste apparebunt , atque tunc temporis eorum decursus est qui sequitur .

## §. XXV.

Aegrotus in vulnerata , atque a veneno infecta parte obtusum sentit dolorem , cuius acerbitas sensim increfcit , vicinas partes invadit , atque sensum distentionis aut ictus a vulnere usque ad collum & cerebrum movet . Vulnus saepius iterum se inflammat , atque una cum proximis partibus tumet . Eius labia livescunt , indurantur , atque se extollunt . Interdum recrudescit atque virulentum ichorem emittit , non nunquam exoriuntur pustulae rubicundae , eadem se aperientes eundemque humorem eiicientes . Interea dum vulnus se hoc modo immutat , aegroti singularem sentiunt inertiam atque membrorum gravitatem , quae omnes labores molestos ac taediosos ipsis reddunt . Saepius oscitare atque pandiculare coguntur . Simul fiunt tristes , afflicti , ingemiscunt , timidi evadunt , facile perterrescunt , vel ob res levissimas . Ut moestis curis indulgere queant , petunt solitudines , atque hominum consuetudinem fugiunt . Quidam imprimis omnia statim aegre ferunt , ad iram proclives , offenduntur vel rebus minimis , perpetuo sunt inquieti , atque saepius anxietatibus vagis invaduntur . Somnus eorum nunquam non est inquietus , neque recreans . Surgendo magis languescunt quam cubitum eundo ; dormientes

saepius excitantur , atque somniis terribilibus vexantur . Ciborum appetitus evanescit . Atque ii , qui non ignorant , se ob canis rabidi morsum in periculo versari , maximum adversus haec animalia prae se gerunt metum , quippe quae ipsis vigilantibus atque somniantibus adsunt . Raro quidem , interdum tamen amentes loquuntur . Nec vero temporis spatium , quo aegroti his malis premuntur , certo quodam modo definire licet , in aliis enim quosdam dies , in aliis totidem hebdomades permanent . Quod si longius continuant , oculi ipsorum concidunt , pallor ora obducit , ipsique marcescunt . Omnia hic memorata symptomata sunt vaga & inconstantia , tum ratione numeri , tum ratione perpetuitatis atque vehementiae .

## §. XXVI.

Quae si quis accuratius exquirat , ad nullum aliud , quam spasmodicorum genus revocare poterit . Atque eorum inconstantia , magnaque decursus varietas id quidem satis declarant ; praeter ea etiam in eo omnes consentiunt scriptores . A solo enim in nervos stimulo — quum humores adhuc semper incorrupti neque depravati reperti sint , — omnia symptomata derivari possunt . Venenum ipsum non amplius in eo tantum loco ,

quo applicatum est , insidere videtur . Aliquam huius veneni partem semper in isto loco remanere , ut NUGENT contendit satis probant vulneris istae mutationes remediorumque topicorum hic adhuc salutaris effectus . Nec autem minus veritati conveniens , ea opinio esse videtur , alteram eiusdem veneni partem iam profundius in corpus penetrasse , nervosque plurimis locis irritare . Quod si enim fieri etiam potest , ut stimulus ; vel in minimam nervi partem agens , atrocissimos spasmos in toto corpore excitare possit , ut in tetano & spasmo maxillae inferioris conspicitur ; tamen nullo modo mihi persuadere possum , miasma hydrophobicum stimulo , quem in nervos habet , solo in vulnere , omnia ista symptomata excitare , praesertim cum id stadium tam arcte cum sequenti cohaereat , in quo omnis corporis humores tanto veneno impregnati sunt , eiusque naturam prorsus induunt , ut minima eorum pars morbum in alios transferre valeat . Quare veneni particula iam in hoc stadio corporis vasa ingruisse , minus quidem principio , maxime vero brevi , antequam hydrophobia erumpit , asserere nulli dubito .

#### §. XXVII.

*Indicatio igitur hic maxima necessaria esset , ut spasmi mitigarentur ac sedarentur , atque ve-*

*venenum e corpore expelleretur* ; utrumque vero ad solidam curationem necessario requiritur . Ad nervorum autem systema rursus componendum , adhibenda sunt *antispasmodica sopientia* , NUGENT (a) magnas *opii* , *assae foetidae* , *camphorae* ac *moschi* doses commendat , cuius methodo WHYTT (b) plane assentit . Nervorum itaque systemate remediis sopientibus sedato , id imprimis est agendum , ut venenum , malorum causa , e corpore exturbetur ; quo vero neglecto non possunt , quin iterum redeant omnia symptomata . Verum enim vero cum veneni pars aliqua in vulnere adhuc lateat ; ut illam eadem quidem via , quam in cura prophylactica cum venenum certo tandem loco inhaereret , sequendam esse docui , ex eodem tollamus necesse est . Neque vero venenum , corpori iam altius infixum , in eo retinendum , immo expellendum est , in quo quidem fere omnes conveniunt medici , modo in via , quam evacuationis causa ingressuri erant , inter se discrepantes .

Quorum *alii* , cum virus magnam imprimis ad salivales glandulas habeat vim , per easdem id eiicere , facillimum rati , propinarunt *mercu-*

---

(a) L. c.

(b) *Säm. l. zur pract. Arzneyk. gehörig. Schriften. übersf. Leipz. 1771. p. 55.*

*rialia*, mercuriumque vel *externis inunctionibus*, vel interne *mercurii dulcis forma*, aut *turpethi mineralis*, in corpus ingesserunt, atque *salivatione instituta*, virus simul eliminare putarunt; illum enim tamquam resolvens, primum humores resolvere, ac deinde virus separare atque expellere posse existimarunt. Enimvero salivationis via in hac re neque iusta neque commoda esse videtur, cum plures observationes exilem eius efficaciam produnt. FOTHERGILL (a) *puellam aliquam duodecim annorum, a cane rabido morsam*, narrat, *inunctionibus mercurialibus a chirurgo quodam Massiliensi adhibitis*, ut in *lue venerea*, ad *magnam salivationem redactam esse*, inter ea tamen *hydrophobia correptam periisse*. Alii mercurium eo modo, ut nulla inde oriretur salivatio, interdum quidem cum successu, saepius vero frustra, adhibuerunt (\*).

---

(a) Medical Observ. and Inquir. Vol. V. Apend. pag. VII.

(\*) Recentissimum exemplum *Rabiosi* supra, p. 238. adduxi, cui magna *opii* dosis, eo morbi stadio, quo *hydrophobia* iam conspicua erat, cum ipso *moscho* inutiliter adhibita est. Morbi atrocis & ad optima saepe remedia rebellis natura meretur, sane, ut singulae observationes probe adnotentur, quae tandem collectae, Medicos in diiudicanda meliori medendi methodo reddant feliciores. En ergo brevem facti illius enarrationem, prout per

Medicorum alii, imprimis MEAD (a) venenum cum urina emovere arbitrati sunt, ideo-  
*Op. Med. Vol. I. V*

litteras a cl. MORIGI ad me exaratas, ante paucas septimanas mihi innouit. Canis nempe Viri perillustis \*\*\* aegrotare visus, venatui tamen adhuc interesse aquamque lambere continuans, morosior evasit, ita ut, cum hero minus obediret, durius hinc ab illo correctus, eundem mortu laederet & manum dentibus vulneraret. Paulo post, viri rustici praetereuntis manum *ferocius* adhuc dilaceravit, dein vitulum adgressus est & similiter sauciavit. Canis hic, qui pridie adhuc aquam, saltem non horruitse, si non vere bibisse, observatus, quamvis vacillans & debilis, alio tamen morbo laborare videbatur, ob tanta facinora praemature, *quod dolui*, trucidabatur. Mox idea de suspecto canis morbo nata, atque meum super his consilium petitum fuit. Canem fuisse *rabidum* mihi credibile adeo non videbatur. Cum, quamvis iam aegrotans, venatui tamen non defuisset, aquam e fossa sponte lambisset, & per quasdam adhuc dies non omnem cibum recusasset, sed sui generis more medico, gramine vescendo aegrotans delectatus esset. Interim fatebar ingenue, rem hanc *dubiam* posse videri: enectus enim canis erat, antequam morbi finis observatus fuisset. Quod si aquam revera eadem etiam die bibisset: non repugnabat tamen, in secundo *rabiei* statu canem haesisse, in quo *hydrophobia* non semper iam praesto est, sed serius aliquando accedit; quid quod *rabies* sine *hydrophobia* aliquando adesse possit; & in animali ad hunc morbum adeo prono, *morositas* in herum cum morbo iuncta, saltem



que hanc excretionem diureticis augere studuerunt. Ipse iam AVICENNA eo consilio commen-

suspecta videri queat. Suasi ergo, ut, methodo ab ill. SCHMUCKERO commendata, *cantharides* vulneri, iam prius probe eloto, inspergerentur; dein ut hoc idem, *Emplastro vesicatorio* obtegeretur, & sic larga procuraretur suppuratio. Praeter haec vero quotidie circa vulnus unguentum mercuriale infricari, balnea tepida adhiberi & potus diluentes, refrigerantes copiose ingeri curavi, quin tamen ad ipsam usque *salivationem* procederetur. Singula haec cum *Viro perillustri* \*\*, & cum ipso denique *rustico* ad nosocomium recepto, ita observata sunt, ut in hoc per *triginta*, in illo vero per *quadraginta quinque* iam *dies*, vulnus adpertum teneretur, atque tunc sanationi sponte infecutae committeretur. Interea *Vitulus* morte obiit, quin *rabiem* in caussa fuisse nunciaretur.

Post duos denique menses per litteras cl. MORIGII, sequentia mihi nunciantur. „*Rusticus* me accessit, in quo prima *rabiei* signa iam conspiciuntur. A *decem* hinc diebus dolorem senserat in *manu & brachio* per canem pridem vulnerato: dolor usque ad *collum & nucham* ascendebat; & ab eo tempore tristis, adpetitu atque somno carebat, & nocte inquietus erat. Nosocomio tamen se committere, prout iubebam, heri nolens, hodie saltem ad noctem sese commisit. Altero mane *rabiei* declaratae & *hydrophobiae* signa in misero invenio, Consilia tua pro hoc, ego nunc non petiturus sum: neque enim his amplius locum esse doleo; sed quid cum alio aegroto, viro nobilissimo, suscipiendum sit, quamvis optima adhuc sanitate fruatur, de hoc quantocyus ut tuam mihi

davit cantharides ; quod vero remedium post  
ipsum multos per annos abiectum , nostra recen-

V 2

---

opinionem transcribas enixe precor , atque interim quasdam *frictiones mercuriales* repetendas esse credidi . De *Vitulo* pridem iam defuncto referunt , eum ex pectoris atque hepatis affectu obiisse “ . Suasi , ut *inunctiones mercuriales* moderatae quas de novo iam in *perillustri* aegroto instituire coeptum erat , *decem* ad minimum vicibus , non omisso balneo , continuarentur , dein , ut potu copioso colatoria corporis , transpirationis , urinae , aperta servarentur . Vulnus clausum adaperiri non consului , eo quod , si iulceptum ad massam sanguinis esset contagium , hac methodo non foret eliciendum , neque credendum esset , *sub cicatrice* venenum tamdiu , quin ad sanguinem resorberetur , latere . Nunc etiam radicem *Atropae Belladonnae* , quae pridem ad manus non erat , eo modo adhiberi suadebam , quo in praesentis dissertationis fine tradetur . Interim post octo dies ulteriorem *russici* historiam accepi sequentibus : „ Cum ergo *metum aquae* iam proderet aegrotus , neque , praeter pauculam *iufculi* , quidquam ab eo potuisset deglutiri , pilulas tamen eidem ex *moschi* granis XV. , & *opii* granis IV. compositas , volumine minores ingessi . *Vesicatorium* quoque brachio affecto adplicui . Ad vesperam Enema iniiciebatur cum *moschi* gr. XXIV. , & *opii* gr. VIII. Noctem inquietissime peregit , neque per momentum somno gaudere potuit . Sequenti mane *convellebatur* aeger & saepissime *salvum* , sed parca copia *sputabat* . Pilulam ex *moschi scrupulo uno* , & *opii granis octo* aliquomodo adhuc deglutire poterat . Videns vero , opio in nervos necdum con-

cedi effectum, omnem autem nunc deglutitionem esse praepeditam: clysterem iniici curavi cum *moschi scrupulis duobus*, eademque opii dosi. Sed post septem demum horas, miser sub iisdem *convulsionibus*, sub *clamoribus*, & *magnam* ubique *salivae quantitatem exscreans*, vitam amisit “.

En fidam morbi truculenti historiam, cuius non absque fructu erit attenta consideratio. De *Vitulo* quaerenti mihi, num *certissime* etiam constaret de peracta eiusdem nunc defuncti, atque de alterius canis bene adhuc valentis, ab *eodem animali rabido*, laesione? Adiungitur, eandem viro clarissimo, ac mihi ipsi, cum hanc rem *propriis oculis* non conspicuisset, *incertitudinem* superesse. Interim in hanc usque diem, quae vigesima quarta a morte *rustici* est, perillustrem aegrotum bona omnino valetudine gaudere, & *frictionibus* quidem praedictis, necdum vero *radice Belladonnae* usum esse, experior. Altera tamen in mendi methodo differentia non iacet, nisi quod, cum *rusticus* in rabiem delapsus, 30. tantum diebus eadem uti voluisset; Vir natu altior per 45. dies hanc ipsam sedulo adhibuerit. — In alio viro a cane rabido demorso, ante quatuor hos annos methodo SCHMUCKERIANA a me pertractato, eiusdem me non poenituit, suntque plures aliorum experientiae, quae optatos effectus habuerunt. Videmus tamen, *rusticum* nostrum hac ipsa methodo, dein, cum *rabies* ipsa erumpere visa sit, & *opio* & *moscho* in magna dosi usum esse, quin mortem tamen aufugere datum fuisset; ut igitur semper certioris in his methodi superesse debeat desiderium.

(a) Op. omnia. Goetting. 1749. T. II, p. 123.

cūra , iterum in medium prolatum est (a) , qui quidem pilulas ex dimidio camphorae scrupulo , uno pulveris cantharidum grano , uno ac dimidio mercurii dulcis grano , ope mucilaginis Tragacanthae componendas curavit , quas per sex menses omni vespere propinavit . Atque hoc remedio , urinae effluxum semper copiosum producente , a multis morbum illum averruncavit vel iam eruptum sanavit . Ob virtutem diureticam postea nonnullae *aliae scarabaeorum species* commendatae sunt . Iussu *Regis potentissimi* patefecit anno 1771. *Collegium medicum Berolinense* medicamentum quod maxime Meloën proscarabaeum & Meloën maialem L. complectebatur . Iudicium de hoc remedio ingeniosissimum vid. in *Ill. Equit.* MURRAY *Biblioth. med. pract.* , atque usus horum remedium historiam nobis dedit nuper *exper.* STOKAR a NEUFORN (b) .

Permuli quoque medici ea remedia , quae aucta diaphoresi , venenum , ad interiores corporis partes transgressum , educerent , tutissima ac certissima esse crediderunt . Qui enim diaphoretica , tanquam praeservativa , suaserunt , iidem

V 3

---

(a) Op. omnia Edit. Wichmanni Hannov. 1775. pag. 699.

(b) Diss. inaug. de usu Cantharidum interno. Goetting. 1781. p. 22. seq.

illa in hoc stadio in ipsa curatione adhibenda esse praeceperunt. Verum enim vero, quanquam aliorum remediorum nulli efficaciam quamdam in hoc morbo denegare audemus, tamen diaphoreticis id certissime ac facillime effici posse videtur. Nam illo quod simul venenum topicum ex vulnere eliciant omisso, etiam alteri veneni particulae, altius in corpore inhaerenti, diaphoresis aucta, viam aperit planissimam, latissimam atque proximam. Sane quidem fieri potest, ut per alias excretionum vias semper aliquid veneni simul expellatur, neque igitur dubitare possum, quin e medicamento, quod omnibus his indicationibus simul satisfacit, maximam utilitatem capere, iure exspectare liceat.

#### §. XXVIII.

*Belladonnae* vero secundum omnes indicationes, quae huic morbi stadio adsunt convenienter agit. Ope enim virium eius narcoticarum ac sedantium auctam systematis nervorum irritabilitatem comminuere, atque perturbationibus, in eodem excitatis rursus mederi valet. Virium autem eius diaphoreticarum ope venenum, quod vulnere adhuc inest, humorum impetu versus idem vulnus aucto, eliminare potest, idque eo magis, cum hic effectus externis remediis sustineatur; quod vero iam altius

corpori infixum est , per auctam diaphoresin ; ac sudorem evacuare eodem potest .

Neque a mercurio , tantopere contra hunc morbum laudato . Belladonnae vires multum discrepant , sed quodam modo idem efficiunt . Mercurium magna resolvendi vi praeditum esse , inter omnes constat ; neque vero medicamento , quod , stases alvi pertinacissimas , scirrhus , tumores chronicos resolvere valet , id quod Belladonna saepius effectum est , vires resolventes iniuria tribui possunt . Quod si itaque resolventem virtutem adversus venenum exseruit mercurius , nec aliud quidquam a Belladonna sperare debemus . Mercurio autem aliquid specifici inesse , non magis asseverari potest , quam , aucta salivae excretionem , venenum ab ipso expelli , quum tam saepe frustra usurpatus sit , contra vero interdum sine salivatione profuerit . Nonnunquam etiam salivae excretionem *Belladonna* auxit ; cum vero id rarius fieri soleat , nil certi atque constantis inde colligere licet .

Quemadmodum vero Belladonnae in melancholia egregius ac frequens fuit usus , uti *celeb. EVERS* (a) aliorumque experimenta testantur :

V 4

---

(a) In SCHMUCKERS *vermischte. chirurg. Schriften.*  
B. I. p. 173.

ita vel in hoc morbi stadio , quod melancholiae proxime accedit , multum valere potest . Neque in malo hysterico eadem sine optimo successu plerumque exhibita est . Omnino vero eius efficaciam demonstrant observationes , secundum quas in hoc stadio , nec sine maximo fructu propinata est .

Ac quidem *Belladonnae radice* usu Pater optimus sanavit virum , cuius manus a cane rabido vulnerata , paululum post , inter acerbissimos dolores intumuit ; qui semper inquietus , mentis anxietate vexatus , in intervallis modo furens , omnia , quae ipsi obvenerunt , dentibus frangebat , custodibusque elabi tentabat ; modo aliquantum temporis sanus erat ; in quo denique omnia fere huius morbi symptomata , hydrophobia excepta , apparebant . Prima *Belladonnae radice* dosi sumta , symptomata increverunt , secunda vero data remiserunt , iam aegrotum oppressit somnus , cui sudor profusus succedit , atque postea omnino convaleuit .

Feminae annorum quinquaginta , quae post vulnus , a rabioso cane inflatum saepius capitis dolore , tremore artuum , horripilationibus , & vehementi artuum motu tentabatur , *Belladonna* , venae sectione praevia , propinata est , quae eundem effectum produxit pristinamque valitudinem restituit .

## S E C T I O V.

*Secundum morbi stadium . Ratio eius &  
Indicationes . Num Belladonna frugi?*

## §. XXIX.

**S***ecundum vero stadium incipit , ex quo aegrotus primum liquida deglutire non potest . Inde morbus ab antiquissimis temporibus Hydrophobiae vel Hygrophobiae nomen accepit ; stricto autem sensu hoc tantum stadium ob unum constans , atque pathognomonicum symptoma ita appellari meretur (\*) .*

Aegrotus quidem non statim ab initio liquida abhorret , sed plerumque tum , cum potus

---

(\*) In *rabie* , quae male *canina* dicitur , cum a cuiusvis alterius animalis *rabie* laborantis morfu , in hominem ~~quæ~~ communicari , subinde *hydrophobiam* deesse , — & vice versa in eodem morbo a *rabidi* animalis morfu exorto , cum *hydrophobia* adsit , *rabiem* tamen ipsam saepe non apparuisse , exempla innotescunt . SELLE , *Medicina Clinica* p. 377. KEMME , *diff. de nonnullis ad rabiem caninam & hydrophobiam pertinentibus* Halae 1767. in ill. BALDINGERI , *Sylloge Opusc. Med.* Vol. I. p. 297. V. GILDEN , *Cent. I. Obs.* 86. JAMES , *on canine Madn.* p. 21. BAGARD *on the bite of a Mad. dog.* p. 34. &c.



ipsi porrigitur , primum spasticam oesophagi con-  
 strictionem experitur , qua saepius tam celeriter  
 increscit , ut mox inde difficilis ac plane impe-  
 dita liquidorum deglutitio oriatur , quam subitam  
 mutationem aegroti ipsi valde mirari solent . Si-  
 mul ingens eos premit sitis , quo autem saepius  
 bibere conantur , eo magis difficultas augetur ,  
 quae denique in omnium liquidorum averfationem  
 tranſit , ac postea animum adeo occupat , ut sine  
 concuſſione & convulſionibus , ſicut antea , ne-  
 que liquida videre , neque , ut nonnulli obser-  
 varunt , eorum nomina audire poſſint . Omnia  
 prioris ſtadii ſymptomata exacerbantur . Omnis  
 deficit appetitus , quanquam frequentiffime ſiccos  
 atque ſolidos cibos deglutire poſſunt . Porro ſom-  
 nus eos prorsus fugit , perpetua inquietudine  
 aguntur , in lecto ſe iactant , neque locum , in  
 quo parumper quieſcant , reperire poſſunt . Fre-  
 quentiores ac vehementes imprimis circa praecor-  
 dia oriuntur anxietates , difficilisque respiratio .  
 Nervorum ſyſtema quam maxime concitum eſt ,  
 omni re vehementiffime afficiuntur , omnem liqui-  
 dorum contactum , in quacunque corporis parte ,  
 omnes etiam res ſplendentes , quae oculis eorum  
 incurrunt , averſantur , ne aëris quidem motum  
 miſerrimi ſuſtinere poſſunt ; itaque , vicino cum  
 ipsis loquente , ſe vertunt ; lumen fulgens , fu-  
 mus ac pulvis , corpori admotus , denique quivis

strepitus ita eos afficit, ut horreant, concutiantur, convellantur. Quidam nunc delirant, omnia perversè loquuntur & agunt; qui morbum a canis rabiosi morfu ortum esse sciunt, eorum menti ista animalia semper obversantur, atque saepe ita impressa sunt, ut nunquam ea cogitare cessent. Plerumque in intervallis solummodo furunt, alii nunquam, potius ad mortem usque rectè sapiunt. Proxime adstantibus nocere nunquam eorum animus. Saliva autem, cuius ob deglutiendi difficultatem magna in ore copia colligitur, valde onerat, ideoque eam expuunt, neque vero eo consilio, ut alios laedant. Nec eam ob causam, quemadmodum multi incusant cum ore captant, ut alios mordeant, sed maxillae tantum, spasticus neque voluntarius est motus. Nam si furoris aliquem impetum praesentiunt, eos, qui cum ipsis sunt, ut caveant, monere solent, etiam rogant, ut ligentur. Saepe eisdem miseros inter haec mala febris invadit, quae pro diversa corporum indole, diversum quoque assumit characterem; neque tamen magis constans est, quam delirium.

Plura adhuc symptomata in his aegrotis observarunt medici, quae tamen non admodum frequentia adesse solent, e. c. vomitus glutinosos, fuscis, biliosos; priapismos; satyriases; anthoniam, delirias, strangu-

rias , frequentem micturitionem . Atque hæc quidem sunt præcipua huius stadii symptomata , quæ vero omnia , ut in priori stadio , timore aquæ excepto , minime fixa ac perpetua esse probe tenendum est . Neque minus diversus est morbi decursus eiusque duratio . Morbus quidem plerumque die quarto finitus est , cum frigidus , tenax ac viscidus sudor totum per corpus erumpit ; atque plurimi inter convulsiones vitam efflant .

### §. XXX.

Omnes quicunque tandem naturam huius morbi investigarunt , nil nisi spasticum esse morbum , affirmant , quorum NUGENT imprimis dignus est , qui nominetur , qui in commentatione quadam singulari (a), morbi naturam multo cum acumine disquisivit , doctrinaeque , quam proposuit , plane consentientes habuit , FOTHERGILL , MACBRIDE & WHYT . Quod si prioris stadii symptomata cum his comparemus , ea , præter hydrophobiam , gradibus solummodo

---

(a) Essay on the Hydrophobia ; to which is prefixed the Case of a Person , who was bit by a Mad Dog , had the Hydrophobia ; and was happily cured. London 1753. 8.

differre animadvertimus . Sunt enim aequae instabilitates , eorum decursus & duratio eodem modo ac in priori variat . Atque vel hoc , morbum non nisi spasticum , huncque characterem nervosum in toto morbi decursu praecipuum esse , luculenter probat . Corporis systema nervorum ad tantum sensibilitatis gradum erectum est , ut vel minimus stimulus , qui in statu sano solas sensationes producit , nunc vel vehementissimos ac perturbatissimos gignit motus . Sic lenis aurae afflatus , exemplo ut utar , causa fuit vehementissimorum convulsionum , uti in *Philosophical Transactions abrid. (a)* & *actis acad. Mogunt. (b)* commemoratur . Quin ipsa hydrophobia est symptoma , ex solo incitato nervorum systemate originem ducens . Si ulla ex causa , ait WHYTT (c) faucium , oris & ventriculi nervorum talis orire potest sensibilitas , qualis a natura nervis asperae arteriae data est , statim vehementissimi convulsivi motus inde nascantur necesse est , licet eos lenissimum fluidum attingat . At in hydrophobia faucium & oris nervi etiam modo sensibiles esse videntur ; aegri enim liquida sola tangere , ferre non possunt , siccos contra cibos

---

(a) Vol. V. pag. 336.

(b) Tom. I. pag. 341.

(c) *Pract. Schriften.* pag. 344.

plerumque sine ullo impedimento deglutire possunt. In statu naturali autem arteria aspera pari modo & a siccis & a liquidis rebus afficitur. Rariores denique observationes declarant, hanc singularem adversus liquida sensibilitatem etiam cum intestinis crassioribus interdum communicari, ita ut aegri nec liquida, clystere in ventrem illata, perferre possint. Nec ab iisdem liquidorum applicationem in externo corpore factam tollerari posse, nemini latet.

Ipsa etiam mortuorum cadavera secta maximam praebent probabilitatem, morbum, qui mortem ipsis afferebat, vehementem tantum spasticum fuisse. Tum summa, quam BONETUS aliique in iis observarunt, varietas docet, nullum constans ac determinatum vitium, cum in solidis partibus, tum in humoribus fuisse.

Alii eundem morbum summe inflammatorium esse opinati sunt, inter quos hanc opinionem tuentes, atque anthiphlogistica curandi methodo niti censes, ipse erat BOERHAAVE. Cuius quidem theoriae fundamentum erat faucium, vicinarum aliarumque partium inflammatio, quae nonnunquam in cadaverum sectionibus videbatur, atque febris, illum morbum comitans, & interdum inflammatoria. Verum enim vero neque febris, neque inflammatio proprie ad essentiam atque naturam huius morbi

pertinet. MEAD (a) enim hac BONETUS (b) in secandis his cadaveribus ne inflammationis quidem vestigium totidem, ac ipsi aliique eandem colli, oesophagi, tractus intestinorum, aliarumque partium observarunt. Atque febrem in illo morbo haud necessariam esse, saepeque defuisse, iam supra monui. Ex quo NUGENT (c) colligit, a BOERHAAVIO aliisque, hanc opinionem sequentibus, morbi effectum cum eiusdem causa commutari, ipseque BOERHAAVII Commentator (d) *Inflammatio illa inquit; potius effectus morbi iam facti, quam causae esse videtur. Inflammatio enim ac febris nunquam, morbo incunte, sed paululum iam durante apparuit.*

Alii denique morbi originem ac fontem in tractu intestinorum quaerentes, ac theoriam corruptis biliosis aliique humoribus, interdum observatis, stabilientes, in eundem inciderunt errorem, ut effectum cum causa permutarent. Nichil enim saepius accidere solet, quam ut eiusmodi corruptiones, aequae ac dispositio humorum inflammatoria, post spasmos inprimis, in abdomine exoriantur. Eodem modo putris etiam hu-

(a) Philosoph. Transact. abridg. Tom. V. pag. 368.

(b) Sepulchret. anat. Lib. I. Sect. VIII. pag. 211.

(c) L. c. pag. 56.

(d) Comment. Tom. III. p. 562.

morum resolutio, nonnunquam observata, non aliunde nisi ex nimis atque vehementibus spas-  
 mis derivanda est, qui sanguini humoribusque aliis dispositionem inflammatoriam inferrent, quae ad summum fastigium elata, semper in putredinem transgreditur. Nullus itaque dubito, his rationibus omnibus in unum collectis, plane evinci, neque inflammationem, neque biliosos corruptos neque putridos resolutos humores morbi veras esse causas, sed tantum effectus *verae causae*, *vehementer scilicet irritati nervorum systematis*, indeque *enatorum spasmodorum* considerandos esse. Et *caussa* quidem *proxima*, nervorum systema tantopere movens ac irritans, *miasma est hydrophobicum*, quod quidem iam per totum corpus dispersum, cum eius humoribus, imprimis saliva, tam arcte commixtum est, ut illa, una cum omnibus fere aliis morbum in alia corpora propagare valeat. Causa vero, cur oris, faucium & ventriculi nervis semper tantam erga omnia liquida sensibilitatem imprimat, non magis explicari potest, quam cur mercurius in glandulas salivales, plumbum in intestina, atque cantharides in renes & vesicam urinariam effectus producant. Neque pudet ignorantiam profiteri, cum ipse WHYTT, qui in nervorum naturam atque effectus tam

accurate inquisivit , haec dicit (a) *quo modo faucium ac primarum viarum nervi mutantur , inter eas difficultates referendum est , quas unquam extricandi physici omnem abiciunt spem .*

### §. XXXI.

Exploratum igitur est , morbum illum ad genus nervosorum pertinere , atque a primordiis usque ad extrema inprimis esse spasticum . Prima quidem , gravissima ac maxime necessaria indicatio est igitur *spasmos vehementissimos sedandi* , qui alias corpus brevi tempore quam maxime evertunt , talesque relinquunt effectus , quos certa ac inevitabilis sequitur mors . Ideo omnes medici recentiores , e quibus SWIETENIUM , NUGENT , FOTHERGILL , MACBRIDE , WHYTT nominare sufficit , idem tanquam conditionem sine qua non poscunt , atque NUGENT quidem hunc morbum , ut affectum hystericum , & MACBRIDE (b) ut tetanum , tractare suadent . In eo igitur rei cardo vertitur , ut motus tumultuosi , quam celerrime fieri potest , leniantur , antequam

*Op. Med. Vol. I. X*

(a) *Pract. Schrift.* p. 344.

(b) *Methodical Introduction to the Theory and Practic.* cf. *Physic, Book. v. pag. 553.*



inflammationem aliosque pessimos effectus in corpore relinquant, & NUGENT (a) *felicitis enim*, inquit, *eventus spes fere omnis perit, simulac advenerit inflammatio*. Quod vero ut efficiatur, ut spasmi sedentur atque systema nervorum, vehementer irritatum, rursus leniatur, efficacissima sopientia & antispasmodica, & quidem tanta dosi requirantur, ut eorum effectus pares sint spasmorum vehementiae, qui ergo haud exigui atque leves esse debent. MACBRIDE & WHYTT magnas idcirco opii doses interne & per clysteres datas, commendant. Atque NUGENT interno opii, moschi, camphorae, & assae foetidae usu, & externis circa collum extracti Thebaici fomentis, oleique inunctione in vulnus vicinasque partes feminam ab hydrophobia, quae diversis temporibus revertebatur, sanare contigit, aliud exemplum hominis, vere iam hydrophobi iisdem medicamentis sanati legitur apud WHYTT l. c. pag. 556. in nota. Eodem optimo successu etiam Ill. TISSOT (b) in homine sanando externa inunctione olei, in quo camphora & opium resolutum erat, ac interne spiritu salis ammoniaci, vino permixto, propinato usus est,

---

(a) Essay ecl. pag. 85.

(b) *Sämmtliche Schriften, Th. I. pag. 198.*

Quantum igitur remedia antispasmodica valeant, & quam grave sit, huic indicationi, tam celerime quam fieri debet, satisfacere, inde satis patet. Quod si huic satisfeceris, necesse adhuc est, ad aegrum de morbi reditu cavendum eumque prorsus sanandum, ut miasma hydrophobicum, spasmodum causa, e corpore tollatur. NUGENT (a) etiam secundum hanc indicationem antispasmodica convenienter agere putat. Quod si id efficere possunt, sane nulla alia via fieri potest, quam ut venenum per auctam diaphoresin aliamve excretionem eliminent.

Quod ad ceteras vero indicationes attinet, scilicet effectus, qui ex spasmodis in hoc morbo oriuntur, saepius adeo vehementes, ut mortem certam neque evitandam adducant, quo modo praecavendae, aut, si iam apparent, tollendae sint, non nisi secundum generales indicationes hic agendum esse existimo, ad quod exempli causa referendum est, si aeger sanguine abundat, & ad morbos inflammatorios dispositus est, ut frequentes instituantur venaesectiones, remediaque antiphlogistica adhibeantur, quae antispasmodicae curationi haud repugnant. Quae quidem remedia eo magis necessario adhibenda

---

(a) L. c. pag. 55.

sunt, si ullius partis inflammatio iam vere conspicitur. *Nugent* tribus vicibus venaesectiōem instituere necessarium duxit. Plura exempla, ubi venaesectio, opportuno tempore & sub necessariis indicationibus instituta, bene adiuvens remedium fiebat, dantur in *Histor. acad. Reg. scient. Paris. (a)* & in *comment. de reb. in scient. nat. ac med. gestis (b)*. Idem etiam de vomitoriis & purgantibus remediis valet. Si manifestae fordes aegroto insunt, eas proxima via remove-re, proque eo, quod aut sursum aut deorsum turgescunt, aut vomitoria aut purgantia & clysters adhibere necesse est; in quo autem semper id cogitandum est, eas fordes nunquam ad essentiam morbi pertinere, sed potius symptomatici quid constituere, omniaque vomitoria & purgantia drastica, vehementi stimulo, quo intestinorum tractum iam valde concitatum adficiunt, hic magis nocere, quam prodesse. Hae igitur sunt praecipue indicationes, in hoc morbi stadio curandae.

Ea, quae morbi naturae maxime conveniunt, intuitum esse, mihi quidem sufficit, atque magnum empiricorum remediorum numerum, quae in hoc morbo ex parte tanquam specifica,

---

(a) Ann. 1699. pag. 67.

(b) Tom. IV. pag. 57.

laudata sunt, quorum vero recentior usus non eam utilitatem, quae sperabatur, praestitit; omnino silentio praetereo, quum harum paginarum angustiae, atque breve temporis spatium, quo inclusus sum, impediunt, quo minus rem fufius tractare possim.

### §. XXXII.

Quemadmodum vero ille morbus tot ac tantis dirissimis malis toto in decursu obnoxius est; ita aliud nec minus grave ac triste accedit, quod perpauca sint exempla, quae miserimos in hoc stadio adhuc servatos esse narrant. Attamen cum recentiori aetate morbi natura accuratius cognita sit, cumque certae observationes, a NUGENT & TISSOT nuper factae, manifeste declarant, morbum non ita comparatum esse, ut prorsus sanari nequiret; non est cur tantopere metuamus, atque BOERHAAVII *sententia, aquam iam paventium sanatorum exemplum duci certa fide nullum*, merito nunc arctioribus restringenda est limitibus.

Causae autem, cur medicis, morbum iam eo provectum rarius tantum sanare, contigit, in eo primis positae esse videntur, quod systema nervorum adeo vehementer commotum sit, ut vel efficacissima antispasmodica, & sopientia, ea quae alias praestare possunt, perficere non va-

leant; tum quod maxima aegroti adsit difficultas liquida aut in corpore perferendi, aut deglutiendi, quod quidem medico omnem tollit rationem efficacissimorum remediorum multa adhibendi, quae non solum vehementes spasmos lenire nervorumque systema sedare, sed etiam malos eorum effectus aut cavere aut sanare possent. Omnia igitur medicamina aegrotantibus sicca tantum forma exhibenda sunt, quae vero forma haud raro parum proficit. Omnes contra potus, ad inflammationem praecavendam, & corpus humectandum quam maxime necessarii, inutiles redduntur, atque raro etiam balnea tepida, tam salutaria, hi aegroti ferre possunt. Quod si his omnibus difficultates, quae obeniunt, addimus, venenum, tantos effectus prodens, in toto corpore late diffusum, humoribus adeo assimilatum, ut eius naturam venenosam plane assumserint, ex iisdem rursus eliminandi; plures causas cur iste morbus rarissime curatus sit, indagare minime necessarium videtur.

### §. XXXIII.

Iam oritur quaestio, num etiam in hoc stadio commendanda sit *Belladonna*, atque eundem fructum, quem in priori praebebat, sperare iubeat. Quanquam vero hanc ipsius effi-

caciam nondum experientia stabilivit , ex iis tamen , quae supra de huius remedii effectibus monui , apparet eam fortasse vel in hoc stadio cum fructu adhiberi posse . Nam si quae alia antispasmodica remedia illos vehementes spasmos sopire nervorumque systema rursus sedare possunt , fane *Belladonnā* id facere posse ac debere existimo . Nam in morbis huic simillimis , ut in mania , *Belladonna* saepius multum profuit ; hypochondriacis & hystericiis malis , narrant *Cl. EVERS (a)* *eadem non minus tuto medetur , quam feбри intermittenti Cortex Peruvianus* . Nonne ergo *Belladonnae* hydrophobicos spasmos , hystericiis adeo similes , etiam sopire posset ? Iam supra docui quo modo in priori huius morbi stadio *Belladonnae* usus salutaris esse possit , cur tandem in hoc idem locum non obtineret , cum prius stadium quoad symptomata , hydrophobia excepta , solis gradibus ab hoc differat ? Quod si igitur in posteriori adhuc fieri potest , ut venenum , ulla excretionē aucta , e corpore expellatur , *Belladonnā* quoque iisdem viis , quibus , ut verisimile est in priori fiebat , id efficere posse arbitror .

X 4

---

(a) In Schmuckers chirurg. Vermischten Schriften  
B. 1. pag. 181. Not. 5.

## S E C T I O VI.

*Cautelae sub usu Belladonnae observandae .*

## §. XXXIV.

MUltus sane fui in demonstranda ratione , qua per narcoticas & diaphoreticas *Belladonnae* vires venenum canis rabiosi e corpore eiici , morbusque tuto praecaveri , ac ipse curari possit . Quo vero eundem *Belladonnae* effectum aequo certo in posterum consequi possimus , restat adhuc , ut declarem , quonam tempore , quibus cum cautelis , & quamam dosi illam exhibere debeamus . Cum vero incertum sit , quam diu corpori inhaesurum sit virus , antequam effectus producat horrendos , nec sine iniuria timendum sit , ne multo maiores inde excitentur difficultates , venenum , si iam dudum in corpore fuerit , aut perturbationibus haud mediocribus idem vexaverit , rursus expellendi : *Belladonnae* , praeservantis remedii usum nequaquam proferendum , immo quam citissime , statim infectione facta , illam adhibendam esse , facile quisquis videt . Quo proprioires huic momento accedimus , eo maior & certior optimi successus enascitur spes . Tempus quidem *Belladonnae* sumendae commodissimum , nisi necessariae immi-

nentis morbi indicationes celeriores poscunt effectus , est vespera . Somni enim proclivitas , lassitudo inde orta , atque sudor succedens , imprimis hic utilis , cogunt , ut aeger dum vinum suam exferit Belladonna , in lecto se retineat .

### §. XXXV.

Aegrotis vero unicuique ut apta dosi porrigatur , unde optimi successum expectare liceat , omnium regularum , quae in dosi omnium remediorum destituenda , gravissimae sunt , rationem habere necesse est . Praeter aetatem enim solam , etiam ad diversas corporum dispositiones , eorumque naturas animus advertendus est ; doses etiam pro diversis temperamentis mutandae sunt . Phlegmaticus enim maiorem fere omnium medicaminum sustinet dosin , cholericus & sanguineus contra a minori eisdem effectus consequitur . Idem cadit in diversam hominum educandorum rationem . Sicuti enim mollis educatio reddit corpus delicatulum , cui a dosi parva magnus oritur effectus : ita eadem durior in corpore efficit omnino contraria . Porro ad iustam debitamque Belladonnae dosin contra hunc morbum determinandam , necessario finis , quem propositum habemus , respiciendus est . Cum itaque hic adversus pertinacem causam



sam pugnandum , atque venenum validum e corpore expellendum , eoque morbus avertendus sit , qui eruptus , omnibus medicamentis pertinaciter repugnat , cuique difficillime medetur ; cum quidem finem non , nisi medicina magnam efficaciam prodeunte , dosibusque plenioribus consequi licet : ideoque omnes medici huius morbi remedia praecipientes , nunquam non has desiderarunt conditiones . Aegroti salus poscit , ut omnia quam celerrime peragantur ; parvis autem Belladonnae dosibus non possumus non a fine proposito aberrare . Neque igitur continuatus eius usus parvis quidem dosibus admittendus est , praesertim quum experientia cognoscimus , nullo modo ipsi in sanando confidere non posse . *Pater optimus* feminae , a rabioso cane demorsae , veritus , ne magna dosi malos ipsi pararet effectus , quippe quae admodum debilis erat , simulque lactans , initio parvas radicis Belladonnae doses dedit , foliorumque usum parvis item dosibus diu continuavit ; spatio autem trium mensium & quod excurrit , praeterlapso , incidens in *hydrophobiam* periit .

### §. XXXVI.

Cum *Belladonna* in promptuario Hannoverano , ut caninae rabiei remedium primum pu-

blicaretur ; dosi radicis admodum vaga , non pondere , sed mensura cochlearis minimi aut cultri cuspidis , tam pro hominibus quam pecoribus constituta est . Ibi enim praecipitur , *adulto unum minimum cochleare vel cultri cuspidem , infanti bienni octavam cultri cuspidis partem tribus quidem vicibus , spatio quadraginta octo horarum semper interiecto , exhibendam esse* . Quam quidem minus accuratam rationem ac incertam iam *Promptuarii editor* in nota quadam observavit , simulque optans , ne dosi incerta mensura , sed granorum pondere determinata esset . Quem quidem *venerandus meus Parens* eatenus sequutus est , quatenus post quadraginta octo horas novam semper Belladonnae dosin propinavit , eoque intervallo id assequutus est , ut aegroti vehementibus eius effectibus nunquam nimium debilitarentur maioraque mala ipsis adderentur . Tres etiam doses frequentissime ad hydrophobiam cavendam sufficere expertus est . Sed doses , quas aegrotis dedit , nunquam tam incerto modo dimensus est , qui forte in aliis medicaminibus , Belladonnae virtutem non aequantibus , atque in pecore fortassis , nunquam autem in hominibus , defendi potest . Iam ab initio , cum prima experimenta in *Promptuario Hannoverano* patefaceret , dosin radicis & foliorum Belladonnae accurato pondere definivit . At multo ac-

curatius atque etiam magis determinatae *Belladonnae radiceis dosi*, qua in hoc morbo praecipue usus est, in *Ill. Archiatri RICHTERI* bibliotheca chirurg. iam saepius laudata (a) convictus erat, quantum valeret, ut hoc medicamen dosibus continuatis augeretur, cum hominis natura *Belladonnae*, remedio narcotico, eadem facilitate, qua opio, cicutae aliisque his similibus, assuesceret, ac deinde, quam necesse esset, ut dosi semper aucta exhiberetur, si quos effectus a prima dosi, eosdem a secunda, tertia, reliquisque sperare cupimus. Tam frequenti igitur ac felici experientia duce, *radiceis Belladonnae* doses ita demum determinavit.

*Infanti anniculo, prima dosi granum unum, secunda & tertia granum unum & dimidium.*

*Infanti Bienni quoque dosi grano duo. Infanti trienni, prima dosi grana duo, secunda & tertia duo & dimidium ad tria. Infanti quadrienni aut quinquenni prima dosi duo grana & dimidium, secunda & tertia grana tria vel tria & dimidium ad quatuor. Infanti sexenni vel septenni, prima dosi quatuor grana, secunda quatuor & dimidium, tertia quinque ad quinque & dimidium. Annorum octo vel novem infanti prima quatuor & dimidium, secunda & tertia dosi*

---

(a) V. Band, 2. St. pag. 383.

quinque ad sex grana . Decem vel undecim annorum puero prima dosi quinque , secunda quinque & dimidium , tertia sex grana & dimidium . Annorum quatuordecim aut sexdecim iuveni prima dosi sex grana & dimidium , secunda septem & dimidium , tertia octo & dimidium . Septemdecim ad quinquaginta annorum viro prima dosi decem grana , secunda duodecim , tertia tredecim ad quatuordecim . Annorum quinquaginta ad sexaginta viro prima dosi grana sex , secunda octo , tertia novem . Annorum sexaginta ad septuaginta seni prima quatuor grana , secunda & tertia dosi sex ad septem . Septuaginta ad annorum seni prima dosi tria grana , secunda & tertia quatuor .

Id autem tuto asserere posse existimo , eum , qui tot experimenta cum medicamine aliquo contra ullum morbum coeperit , uti *Parens optimus eum Belladonna adversus rabiem caninam* , mediam remedii dosin definire optime callere . Quam ob causam & quoniam crebra *eius* experimenta fere semper prosperrime cesserint , tutissimam viam sequi opinor , si dosin laudatam , tanquam mediam , etiam in futurum usum commendo . Neque vero id indicare omittendum est , plurima *eius* experimenta , uti *ipse* monet , in hominibus durioris educationis & robustioris naturae esse instituta , ideoque in delicatioribus ab ista regula esse discendum . Tres quidem doses earumque

augendarum ratio solummodo constituta est, tum quia *optimus Pater*, uti iam monui, fere semper trinis diversis dosibus morbum omnino cavere potuit; tum quia facillimum unicuique erit, ceteras doses, si continuandae essent, augere atque determinare. Temporis vero spatium, quo Belladonnae usus nequaquam intermittendus est, morbo finito potius, quam ante eundem definire possumus; Semper quidem adhibenda est, dum ullum praesentis veneni signum in vulnere adhuc conspicitur, quod venenum ex dolore, tumore, ac vulneris adiectarumque partium tensione cognosci solet. Insuper tutiori via incederemus, si remedium longius, quam opus esset, continueremus, quam si ante iustum tempus seponeremus, quum illud nihil, hoc multum damni inferre posset.

### §. XXXVII.

Effectibus vero *Belladonnae*, non parvis adhibitae dosibus, uti, ne indicationibus repugnetur, hic necesse est, quaedam aegroti incommoda perpetuo succedunt, quae tamen, praeter id, quod gravant, nunquam nocent. GREDINGER saepissime hoc medicamine usus *molesta*, ait, *inter Belladonnae usum symptomata sunt capitis obnubilatio, vertigo, oculorum*

*caligines, rubores, quae maiori sub dosi solum oriuntur. Eadem quoque Parens venerandus saepius in aegrotis expertus est, in iis praesertim, qui, cum aliis comparati, magnam sumserant dosin. Nunquam vero alia inde orta sunt mala, nisi quod lassitudinem nonnulli per aliquot dies sentirent. Illa vero aegris frequentissime eo allevare potuit, ut lac frigidum ipsis porrigeret.*

Ut autem vehementes hos Belladonnae effectus, quibus saepe etiam delirium accedit, praecaveamus, ad primas vias antea respicere, quam maxime valet. Sordes enim, imprimis biliosae ventriculi & intestinorum maximam ad Belladonnae effectus vim exferunt, eosque haud raro ita augent, ut aegroti quam maxime inde graventur. Notabile eiusmodi exemplum b. *Archiater SCHROEDER* litteris communicavit cum *Patre optimo*, quod hic adponere liceat. *Seni septuaginta annorum, ita enim refert, a cane rabido morfu laeso, decem radicis Belladonnae grana e vestigio, a quodam medico propinata sunt, eaque dosi quatuor horis post repetita est. Grave delirium inde secutum, duodecim horas durans; in ipso linguam impuram, saporem amarum, depravatum apprehendi; vomitorio deinde exhibito, & ventriculo quamvis sordibus adhuc repleto, 48. horis praeterlapsis, iterum decem radicis Belladonnae grana dedi. Delirium deinde valde increvit.*

*Rhabbarbari & salis usu per aliquot dies continuato, lingua cum pura saporque naturalis esset, denuo decem eiusdem radices grana propinavi, neque delirium ullum exortum, neque ipsius sanitas interrupta est. Idem postea, antequam Belladonna in canina rabie uteretur, uti saepius ei contigerat, semper dedit vomitorium, eiusque effectus, licet magna dosi datae, nunquam enormes, absque delirio, expertus est. Praesentibus itaque sordium signis, idem observare imprimis suadendum erit. Terror, hominis animum, cum a rabido animale invaditur, occupans, metus, vehementioresque animi commotiones, quibus deinde agitur, omnino sunt eiusmodi causae, quae bilem depravare, corrumpere, brevique fordes in primis viis gignere possunt. Quod si vero nihilominus Belladonnae effectus adeo crescerent, ut aegrum nimia afficerent molestia, neque lacte hausto satis minuerentur; quaedam solummodo aceti cochlearia ipsis porrigenda sunt. Quod quidem iam *Conr. GESNER* (a) laudat; idem *MILLER* (b) & *MAY* (c) confirmant, & *FRICCIUS* (d) ait, si solum, ut venenum no-*

---

(a) Epistol. Lib. 1. fol. 34.

(b) Plants. Vol. 1. pag. 41.

(c) *Hannoev. Mag.* 1773. St. 97.

(d) *Paradox. de venen.* Cap. XX. pag. 363.

*est & corpus laedit, acetum, omnium venenorum commune alexiterium, ei opponendum est.* Paulo infra, eundem ob finem, *succum limonum* aut *Citri* recenter expressum commendat. Atsi Belladonnae vel radicis vel foliorum vel aliarum partium, quae quisquam sciens, vel ignorans sumferit, copia tanta fuit, ut mali atque venenati effectus inde metuendi essent; eas particulas, dum adhuc in ventriculo latent, vomitoriis praesertim expellere annitendum est.

### §. XXXVIII.

Quum aeger inter Belladonnae effectus molestam saepissime oris siccitatem, magnamque sitim sentit, utramque potu levando, Belladonnae effectus minui, vel etiam cohiberi, olim autumarunt; ideoque, cum Belladonna primum adversus caninam rabiem publicaretur, graviter ventarunt, ne octo horis post, medicamine sumto, aegris potus, quid? quod ne illud quidem remedium aqua aut alio liquido permixtum, daretur. Quae vero agendi ratio non solum immitis ac saeva adversus aegrotum, sed etiam plane inutilis est, adeoque omnino reiicienda. Dure quidem aegrotum tractant, quoniam id denegant, quo molestam oris & faucium siccitatem allevat, etsi sitim, hoc loco spasticam potus extinguere non valet; inutile etiam esse, docet



experientia, cum potus, imprimis aqua non nimia quantitate, Belladonnae effectibus nunquam obsuit.

Longe gravius est, aegroto inter eosdem huius medicaminis effectus omnia interdicare esculenta, quippe quae ipsum modo gravarent, effectusque potius impedire possent, nisi id monere supervacaneum est; cum iam inde ab antiquissimis temporibus, annotantibus quoque MATTHIOLO (a) & Conr. GESNERO (b) notum sit, Belladonnam, dum effectus producit, omnem ciborum appetitum delere. Maxime vero ii vituperandi sunt, qui ab aegroto toto quidem die, quo Belladonnam sumsit, somnum arcere iubent, quodque OETTINGER (c) in primis urget, ibidem dicens; *hanc cautelam adhuc repetendam esse censeo, quod somnum post Belladonnam sumptam, aegrum per diem ne invadat, omni diligentia per motum corporis impediri debeat*. Aegrotus autem eo nimium languesceret, idque eo magis, cum admodum frequenter Belladonna magnam somni proclivitatem adfert. Omnino autem nihil mali a neglecta hac regula metuendum esse, quotidie experimur. Contra vero id in hac re praecipuum est, ut in Belladonnae usu eo respiciatur, ne transpiratio aucta ullo pa-

---

(a) Comment. ad lib. Dioscoridis co. Cap. 69.

(b) Epistol. Lib. 1. Fol. 34.

(c) Dissert. de Belladonna p. 55.

cto impediatur , sed potius promoveatur ; idque eo magis necessario hic curandum est , cum aucta transpiratio in hoc morbo via longe princeps est , qua venenum e corpore expellatur . In Belladonna quidem adhibenda iam in genere hoc suaserunt , atque OETTINGER (a) ait *frigus & aestus sub huius remedii usu sunt fugienda , animi pathemata evitanda , & praecipue illud respiciendum est , quod transpiratio , aliaeque excretiones promoveantur* . Quam transpirationem promovendam , parens venerandus aegrotis commendavit , ut inter Belladonnae effectus lectum tenerent , atque nonnullos potus Theae aut alius potus calidi cyathos fumerent . Atque transpiratione bene cedente aegroti semper levatos se senserunt , eademque suppressa male se habuerunt , angoribusque vexatos . Inprimis igitur utile erit , si partem veneno infectam nunquam non calidam servari curamus , ut transpiratio aucta , ubi maxime necessaria est etiam extendatur . Ceteras diaeteticae regulas , secundum quas sub Belladonnae usu ab omnibus crudis ac dyspectis cibis se abstineat aeger , omnesque potus spirituosos serio evitet , ne ullius rei oblitus esse videar , obiter tantum attingam .

Y 2

---

(a) L. c.

## §. XXXIX.

Quomodo autem *Belladonnae* radix haud frustra in ipsa hydrophobia adhibenda sit, ut vel hoc etiam exponatur, breviter admonendum est, maxime esse necessarium, ut in hoc morbi stadio satis largae eiusdem medicamenti dentur doses. Cum autem fieri non possit, ut aegroto fluida sub forma medicamen porrigatur, *radicis Belladonnae* pulverem ope syrupi glutinosi, in holum redigere aut oblati involutum aegrotis propinare experiendum est. Atque id remedium, usquedum ulli motus spastici appareant, vel etiam paululum longius continuare necesse esset. Neque minores indicationes, quae requiruntur, negligendae essent.

Si v. c. aeger plethora laboraret, aut ex aliis signis inflammatio metuenda esset, venaesectiorem instituere, eamque pro temporum ratione repetere deberemus. Quod si sordium signa in primis viis se ostenderent, illae aut sursum aut deorsum secundum indicationes evacuandae essent. Tartarum vero emeticum praecipue suaderem, quippe cui praeter vim, vomitum excitantem, singulares vires antispasmodicae & diaphoreticae, hic valde indicatae, iure tribui possum.

Ad secundaria remedia imprimis tepida balnea referenda sunt, quippe quae iam a tam

multis commendata , saepius efficaciam prae se tulerunt . His igitur , dummodo aeger ullo modo ea ferre possit , per tantum temporis spatium , tantaque copia , quanta fieri potest , utendum esset . Praeter vero antispasmodicas & sopientes eorum vires , etiam id efficere possunt , ut corpus , quod potu deficiente , vehementibusque illis spasmis admodum exsiccatum est , rursus madefacerent . Rarissimis casibus , ubi in hoc morbo intestina eandem , quam fauces ac os adversus liquida sensibilitatem proderent , exceptis , clysteres emollientes , quos WHYTT cum opio miscendas commendat , certo eandem adferrent utilitatem , quam in aliis morbis spasticis ex his percipere licet . Externa autem olei olivarum iniunctio in vulneratis vicinisque partibus , quod NUGENT purum , TISSOT vero cum camphora & opio mixtum , tam salutare expertus est , eo gravius suadenda erit , cum aeger , uti haud raro fieri solet , acerbissimos earum partium dolores atque convulsiones perferat .

Frigida autem balnea , quanquam inde a vetustissima aetate commendata , tamen denuo suadere dubito . Famâ enim , quam consecuta sunt , nullo modo digna esse videntur , neque magis primariis quam secundariis conveniunt indicationibus , hoc est , neque sunt antispasmodica , neque inflammationem cavent ; aut sanant , aut

aegrotis aquae metus notionem vi tollere possunt. Nec raro insuper omnino nihil profuerunt, immo saepius nocuerunt.

Ceterum vehementer laetabor, si experimenta in posterum capienda, me haud vanis rationibus commotum usum huius remedii commendasse demonstratura sint; nec parvo mihi erit solatio, si vel tantillum eo contulerim, ut medicamen adversus morbum, hominibus adeo horrendum, in cuius medela saepius medici in errores delapsi sunt, magis innotesceret (\*).

---

(\*) Litteris ab amico viro ill. Archiatro, Consil. Aul. & Professore Med. *Herbipolensi* D. WILHELM, die 13. Septembris 1784. ad me datis, sequentia insunt, quae his addere oportet. „*Belladonnam*, inquit, certissimum esse contra *hydrophobiam* prophylacticum *quinque* casus a me observati (in magno, quod sub huius eximii Viri praesidio floret, Nosocomio *Iuliae*) evicerunt. Expertus & sum remedium *Borrussicum*, bis, item cum salutari effectu; at horrendam (quod & alii iam observarunt) *stranguriam* cum mictu cruenta excitavit: hinc *Belladonnam* praefero. *Hydrophobiâ* natâ, & *Moschus*, & *Belladonna* non profuerunt. Quodsi Medici singuli suas in tam arduis circumstantiis institutas experientias eodem candore aperirent, & cum Publico communicarent, non dubito, & in hoc morbo tractando spem superesse melioris tandem methodi. Inserviet *delectus* hic *Opusculorum Medicorum* & nostris & alienis, si communicentur in posterum, observationibus eiusmodi mox arrepta mihi occasione patefaciendis.

---

IOHANNIS PETRI FRANK

M. D. CONSILIARII AULICI AC ARCHIATRI  
S P I R E N S I S

E P I S T O L A

I N V I T A T O R I A

A D

E R U D I T O S

D E

*Communicandis , quae ad Politiam Medicam  
spectant , Principum ac Legislatorum  
Decretis (\*) .*



VIRI AMPLISSIMI,  
DIGNISSIMI!

QUanta sit in conservanda populorum atque  
civitatum valetudine dignitas , & quam insignis

A 4

---

(\*) Quamvis haec *Epistola* , ante decem hos annos a

regularum ad hoc spectantium tum multitudo , tum necessitas , nemo fane dubitaverit , qui verae felicitatis inseparabilem comitem , corporis integritatem puto , multiplicem eius amittendae occasionem , & eximium in incrementum Reipublicae influxum intellexerit .

Cognoverunt rei gravitatem Principes ad

me conscripta , ad labores *academicos* neutiquam pertineat ; lubens tamen , & eodem animo , *Italiae* Eruditis , data mihi nunc occasione , eandem transmittito , quo Patriae quondam Litteratos in subsidium operis vocavi , cuius nunc *tria Volumina* , atque primi Tomi nova mox Editio , sub *Politiae Medicae* titulo , germanico Idiomate a me delineata , apparuerunt . Cum non inutile opus hoc visum sit Lectoribus : facile quondam eiusdem in sermonem latinum in me suscepturus sum versionem , atque ut maiorem labori perfectionem conciliem , preces meas & hic terrae repetendas esse duxi . Primus ego hanc arduam scientiae medicae partem pro sua dignitate excolui , medium nunc opus absolvi : quin tamen , quod exspectare decebat , subsidia aliena , multa saltem , impetraverim . Felicior forte sub hoc coelo , in rebus coeterum non me , sed humanum genus omne , ni fallor , proxime concernentibus , futurus sum ; & si esse non contingat , feci tamen , quae suscepti laboris gravitas a me , cum solus humeros eidem submitterem , postulabat , contentus & mea in his viriliter praestitisse , neque maiorem viribus propriis quam par erat , — minorem forte , quam benignum litteratorum possea iudicium in me posuit , fiduciam adhibuisse .

exemplum nati, & ad hoc ab illis instituta sunt, nostris tandem temporibus, illustria illa sanitatis publicae in diversis regionibus collegia, quorum praecipua & nobilissima certe in hoc ponitur cura: ut, quae incolumitati publicae obfunt, removeantur, quae conservandae & adaugendae civium saluti inserviunt, instituantur.

At vero, cum amplissima rerum in hunc finem considerandarum series, & adhuc nimium recens sit omnino, pro obiecti auctoritate, institutum; multa, & in confirmando sanitatis publicae statu non sane infima, intacta relinqui oportuit, quorum accuratior demum inquisitio, rerum vix aestimatarum praetervisum fere influxum ulterius investigandum, atque, prout huic vel illi provinciae ac populo conveniat; eruditis serio diiudicandum, iniungit.

Praecipua quidem, ac ferme ubique iam recepta regula est, & in hac fere sola, multis in locis, universus Politiae medicae cardo vertitur, ut Pseudomedicorum & agyrtarum pestis ac rabies ab incautis, quorum numerus in omni Republica mirum quantus est, avertatur, & medicinam faciendi facultas peritis saltem in arte; viris concedatur; ast vero, quemadmodum lex haec vix centesima est illarum, quas integrum corpus Politiae medicae sinu benefico comprehendit; sic nec in hac quidem viam breviorē



ingressi sunt Legislatores , ad eruendum radicatus malum , neque solis verbis oppugnandum , neque poenis sine arte , & humani ingenii cognitione iniunctis , delendum . Mirum sane ! . . . a tot iam saeculis legi huic ( ut pro exemplo rem hic prosequatur ) illudi , nec tamen , quare malo tollendo impar fuerit , cognosci ; cum tamen sat parvo saepe labore opus sit , noto civium ingenio , invenire viam in propulsando malo tutiorem , certior em ; exemplum ad id largientibus Milesiis , quorum virgines , ignota de causa , mente subito alienatae , indiesque crebrius , quin ulla ad id adhibita medicamina furorem infringent , mortem quaerentes , solo hoc decreto absterri potuerant , quo corpora a semetipsis suspensa , cum eodem laqueo , quibus essent pervinctae , nuda efferrerentur . Superstructa scilicet cognitae sexus verecundiae lex a fine aberrare vix potuit : a quo & similis , ni omnia me fallant , nunquam aberrabit methodus , pro modo , & rerum circumstantiis variata . Suicidium enim est , insanae mentis , & nulla vel doctrina , vel abhinc deducenda auctoritate praedito homini periclitantem salutem committere , mortemque sibi adsciscere ; idemque pro qualicunque Republica funestum civium delirium , a quo nec aegyrtam , nec aegrum quaevis alia absterrebit poena , nisi talis sit , quae pseudomedicum red-

dat infamem , hinc ab omni humano confortio propellendum ; hunc vero , ubi sub ignoranti manu decedat , curet , legibus id caventibus , a medicis physicis publice secari : ut ab hinc status morbi lethiferi , & adhibita medendi methodus quandoque comparentur , & ubi haec contraria fuerint , inquisitione in agyrtam facta , verum homicidam , quem strictissime agatur .

Quare , sicuti his , quae pridem ad Politiam medicam , sine meliori tamen effectu , revocata sunt , multa certe vel addenda , vel mutanda insunt ; ita praecipue manca sunt , quae in innumeris fere aliis sanitatem publicam respicientibus circumstantiis obtinent , in quibus vel leges omnino silent ; vel non pro rei dignitate loquuntur , vel sparsim saltem & in quibusdam tantum provinciis promulgatae sunt .

Quam optatum igitur quamque desiderabile opus , ac succincta praecipuorum decretorum collectio , quae olim & nostris etiam temporibus , circa publicam civium salutem , ubicubi fuerit , lata sunt : eorum ad rationis & experientiae principia ulterior diiudicatio , & ubi talia , ut in quamplurimis obtinere solet , plane deficiunt , prout res postulat , nova expositio ! — Ast vero , quam simul , arduum , quamque impar unius hominis viribus opus ! quanta rerum hic considerandarum copia , ac diversitas , & quam difficilis in singulis ratio !

Neque tamen haec omnia , quo minus ab opere ante plures iam annos incepto , ac , prout videbatur , humano generi necessario ac utili , abstinence , possunt : neque summum in rebus maximis vacuum absterret ; quod , si vel ad dimidium replevero , non inutiles mihi dies transegisse videbor . Vacuum dico : quid enim sunt aliquot , in hac rerum elaborandarum serie , felicia quamvis virorum celebrium sparsim & in tam diversis temporibus & academiis edita tentamina , ut ( quod scriptorum talium indigna certe , sed tandem a clarissimis viris , MURRAY , BALDINGER , & TODÉ , vindicata fors fuit ) vel haberi amplius non queant , vel , si possidentium favore communicata fuerint , opus exhibeant sine consensu & ordine totius digestum , repetito eadem pertractans , particularia , & saepe parva nimis , valdopere extendens , neque a longe quidem summam rerum attingere solitum ; consueto scilicet in humanis progressu : ut , in rebus arduis , plures eruditorum manus , singulae vel lapidem ad futurum aedificium conferant , quo ex his dignum tandem humanae miseriae refugium posteritati exurgat .

Pluribus igitur ad exoptatum hoc opus a me iam pridem paratis , & sub manu crescentibus materialibus ; ad eruditos litterarii orbis omnium classium viros , iis me , quibus par

est , precibus converto , ut pro suo in felicitatem humani generis glorioso influxu , & ad hoc aedificium impertiri manus beneficas dignentur , laborem cum honore dividant , & , si quid in me est , quod ad suscipiendum hoc opus aptum reddat , id amicis monitis erigant , auxilio sublevent , consiliis dirigant .

Ne vero de necessitate laboris suscepti , qui in exstruendo Politiae medicae pleniori opere ponitur , in longius hic differam , ut , quae ab omnibus uno ore agnoscitur , qui legum in hac amplissima materia defectum , & exortum abhinc annum , in quacunque Republica , vix refarcibile damnum attendunt ; id mihi saltem hic loci incumbere arbitror , ut de ordine mihi in tali labore proposito , atque de illis sermonem faciam , in quibus praecipue hic implorata Eruitorum benignitate indigeo .

Multa sunt ; cur praeivisse meis his conaminibus valdopere desiderassem viros celeberrimos , BALDINGERUM , & praemature nimis abreptum beatum RICKMANNUM , quorum uterque operis Politiam medicam spectantis quondam a se edendi spem fecerat , quam & nuperime renovari video (a) . Quamvis enim pro-

---

(a) Magazin vor Aerzte , Vorrede .

priam ipsis & huic suo labori perfectionem fore conciliaturos mihi lubens persuadebam; tantum tamen abfuit, ut crediderim socium laboris, in hoc opere difficiliore, ut forte superfluum, aegrius laturos fuisse; ut potius hanc, quam nunc ego viam, mutuum scilicet super his cum Eruditis commercium, pro operis perfectione, uti saltem mihi videbatur, absolute necessarium, ingressuros fuisse, mihi non difficulter persuaserim.

Exposuit, quod tamen omne est, operis futuri planum RICKMANNUS (a), in quo hunc sibi in Politia medica edenda imposuerat ordinem, ut doceret: primo, a vita civium quaevis generaliter noxia avertere: secundo, in praesentibus miseriis opem citissimam optimamque, in quantum liceat, adferre; tertio, periculum quod a morbis epidemicis imminere solet, diminueret. Quamvis autem in his omne fere bonum lateat, quod ab arte medica sperari licet; generalem tamen nimis ideam crediderim, & ex qua minus pateat, quidquid hoc opere pertractandum foret.

Cum & ego, quemadmodum retuli, iam pridem de suscipiendo hoc onere serio cogitaviss-

---

(a) Von dem Einfluß der Arzney-Wissenschaft auf das Wohl des Staats.

sem; saepius volvi animo, quamam via incedendum foret, ut exquisitior in rebus pertractandis ordo, in elaboranda tam copiosae materiae compage, non levi forte auxilio esset; tandem post varia tentamina, hanc mihi in laboribus legem imposui: ut in primo ordine tractarem ea, quae circa generationem & multiplicationem sanorum civium, utpote primum ac validissimum cuiusvis Reipublicae fundamentum, occurrunt, quo in genere sese plurima obtulerunt, primo, de coelibatu laicorum, de praemature matrimonio, tum de illo, quod inter aetate maxime inaequales fit, discurrere. Sequebatur damni expositio, quod ex illorum connubio infertur reipublicae, qui, deletis iam plane, per morbos liberis communicabiles, vel alios, generationis viribus, semine perquam corrupto ad opus hoc accedunt, & morborum fatalium ulteriorem in civitatem propagationem vel facilitant, vel saltem prolem largiuntur, nec patriae idoneam, nec utilem agris, nec bellorum parem, & pacis rebus agendis.

Postquam varias in his, nec levioris momenti res exponendi se obtulisset occasio; ad ea me convertendum credidi, quae, curam Magistratus circa nuptiarum rationes caeteras, circa praegnantas, circa infanticidia & expositionem illegitimorum avertenda, tandem vero circa par-

nutrientium & nasciturorum privilegia, exposcentia merito considerata erant. Ut vero tam puerperarum, quam & nascentium, prout vivi vel mortui, soli, aut gemini nascuntur, status & mortalitatis ratio pateret: ex recta horum, &, prout me. praxis edocuit, obstetricum etiam ingenio accommodata & facili in classes distributione hic tradita, quid boni tandem expectari posse arbitrabar.

Addita est his, quae iam pridem Romanorum cura exercuit, legis sic dictae Regiae consideratio, circa quam, uti de matre quondam adhuc servanda, sic & de prole educenda, & praemiis ad id expositis, ubi mortua appareat, a praesentibus ad vitam, non dubiis certe experimentis revocanda, non indigna notatu obveniebant. Memor nunc eram & illorum, quae, ut ad tuendam puerperarum ac neonatorum valetudinem & nutritionem attinentia, — de iniusta & legibus praecavenda uberum detractio, de nutricum in civitatibus necessaria provisione, quibus cautelis nutriendi facultas iisdem, post exactum corporis & animi examen, concedi debeat? de lactationis diuturnioris in populationem damnis, & temporis huic operi impendendi ratione, — de Baptismo, hiemis tempore, non sine omni discrimine, administrando, & de huius incongrua ut plurimum prope puerperas

celebratione , revera Magistratuum curam exposcunt : quo capite & de frequenti puerorum in matrum lecto , somni tempore , suffocatione impedienda , tandem vero & de horum , ubi adolefcunt , cum senioribus , noxia saepe in uno eodemque lecto accumbendi consuetudine , ubi aliter fieri potest , reformanda , ac de caeteris quam plurimis mortis causis non magna opera praecavendis , agitur .

Ad ulteriora progressio , videbatur mihi imprimis incumbere , ut & ea attingerem , quae circa vestitum puerorum , nec a Romanis quondam neglectum , & a quo per saepe corpora juvenilia laeduntur , dicenda essent . Sequitur de artis gymnasticae ad firmanda iuventutis corpora , necessaria reintroductione , oratio : ubi & de balneis frigidis publicisve ordinandis , ad quae sub necessaria inspectione , in locis praecipue maritimis , adolescentes admittantur , ibique natandi artem saluberrimam addiscant , sermonem faciendi occasio arripitur . Nunc quidem de praematura adolescentulorum ad difficiliora vel mentis vel & corporis opera adstrictione , eiusque multiplici noxa disquiritur ; ut tandem plenior fiat persuasio : non soli patrum curae futurorum civium salutem , mentisque & corporis vel rectam , vel deflectentam ab ea , institutionem committendam esse .

*Op. Med. Vol. I.*      Z.



Adest iam necessaria quoque rationis consideratio, qua in scholis publicis pueri congregantur & docentur: ubi tam de locorum, ubi id fit, constructione, quam de cautelis sermo habendus erat, quibus rudior saepeque exitialis magistrorum in parvulos saevitia cohibeatur; eorum sanitas vero, quae adeo multiplici occasione, tam contagii, scabiei, variolarum, vel & alterius epidemiae tempore sibi mutuo communicandi, quam & caeterarum caussarum concursu, destruitur, conservari, Patrum Reipublicae gratia, valeat.

Cum sic hominem ab utero, adusque virilem fere aetatem considerassem; ad ea me convertendum credidi, quae, in communi vita, Magistratuum circa sanitatem publicam attentionem exposcerent, quo in argumento cum egregio certe successu versatus est celeberrimus apud Lipsienses PLAZIUS. Ergo, quae de habitationibus hominum, earum saniori exstructione, positione, de urbium munditie, salubritate, & securitate; de aeris puritate; de tempestatum, fulminis, terrae motus, atque inundationum effectibus civium valetudini ac urbium integritati noxiis, vel avertendis, vel saltem pro humanis viribus imminuendis; quae de paludum venenosa indole, fluminumque in progressu noxia tarditate, vel, ab immixtis variis,

depravatione; de plantis venenatis eradicandis; & animalibus nocivis, vel & rabiosis coercendis; quae de victus diversimoda, & vasorum, in quibus parantur, sic & de aquarum, fontium, & potulentorum variorum ratione, puritate ac natura; tandem, quae de funesta in civitatibus intemperantia, ac de legum sumptuariarum utilitate, sic & de vestitu tum civium, tum praecipue militum ordinando, varia adducenda erant, adducuntur.

Ad alia conversus, de illis praecipue mentionem facio, quae de re medica & pharmaceutica, de sic dictis collegiis sanitatis, &c. monenda sunt. Chirurgiae in plurimis locis incredibili vix non modo neglectae, & qua demum ratione illi succurrendum credam, praecipue rationem habeo. Nunc de illis, quae ad instituendas in omni Republica obstetrices eruenda sunt: quo loco non tam earum in ardua scientia instructionem, ab aliis in arte dignissimis viris luculenter traditam, quam sanissimam methodum, qua id optato cum emolumento fieri queat, afferendam credidi, cum non parvae, hic, ibi, difficultates desiderato huic operi renitantur, quas mihi, sub auspiciis maioribus, perpetuo meo solatio, in Bado-Badensi Marchionatu, ubi Medici aulici vice quondam fungebar, & in Spirensi nunc demum Principa-

tu , vincere licuit ; ut in his tandem locis , omnia , quae circa haec expectari poterant , sat feliciter proficiant . De agyrtis & pseudomedicis recoctum saepius , sed infelici semper cum successu , a multis , articulum , quantum oportet attingere , & receptis iamdum vulgo principiis accommodare studeo .

Non immerito expectatur hic obligationum , quas medici versus Rempubicam habent , diversarum expositio . Hinc & de variis morbis ac epidemiis conversandi locus , & de his , quae , vel ad praecavendas vel avertendas imminuendasque , vel & , quantum licet , eradicandas fieri debent . Nec pecudum hoc loco morbi contagiosi ac epidemici , & quid quid a medicis vel scholis veterinariis hic , non tam in medendo , quam quidem in statuendis cautelis ac regulis , circa pascua , malique propagationem , praestandum sit , reticenda sunt . De morborum endemiorum natura ac origine , quae a medicis physicis successivis experiētiis , & quomodo detegenda sint ; quamque sollicita ubique naturalium productorum , & praecipue aquarum mineralium thermarumque investigatio , descriptio , ac ordinatio , ab iisdem expectanda sit , exponitur .

Quid cum submersis , suffocatis , fulmine tactis , hiemali frigore , vel alio modo apparenter extinctis , lege publica id cavente , praemiis-

que adeo , ad exemplum diversarum Hollandiae civitatum , expositis , tentandum fit , monendum , & quid felicia in hac re , Principum iussu , tentata conamina docuerint , adducenda cogitavi . De Daemoniacis , fictove morbo caduco , vel alio , civitates infestantibus , quave ratione haec mala feliciter expelli queant , investigatio fit .

Quae circa milites in diffusa loca subque variis tempestatibus , ducendos , & ad leges sanitatis , in quantum illis obtemperari licet , regendos , circa castrorum , classiumque ad maritimas expeditiones ordinationem , desiderantur , & a medicis dependent , nunc dilucidanda videntur . Nosocomiorum , Xenodochiorum & Orphanotrophiorum , tum & caeterarum quae miseris pro refugio inserviunt , habitationum , Pistrinorum quoque & carcerum , in quantum hic commiserationi locus est , considerationem habui , & quae in singulis , pro humanae fortis allevatione mone-ri possunt , monenda censebam . Pauperum quoque , in quavis civitate bene constituta , praecipue aegrotantium , necessaria administratio , & quae in hac materia ad allevanda media excogitanda sunt , pro viribus traduntur . Cassae sic dictae sanitatis ( Gesundheits-Casse ) ratio & utilitas expenditur . De morborum in classes perquam simplices reductione , & fideli , quonam mortuorum singuli occubuerint adnotatione , tum quaestio fit , qua

tandem morborum uni cuique ditioni propriorum seu endemiorum natura clarius elucescat , & mortalitatis ratio , ubi cum natis quotannis inducto accuratiori calculo conferatur , pateat .

Sepulturae usque ad maiorem mortis certitudinem differendae momenta , cimeteriorum extra civitates ordinandorum , cadaverum , tempore epidemico vel & pestilentiali efferendorum , & quae aliae huc pertinent , rationes ; discutiuntur ;

Atque in his , pluribusque aliis , quorum enumeratio hic loci vel inutilis esset , vel litterarum terminum longe excederet , subiectis , futuri operis planum quam maxime circumscribi , mihi persuasi semper , atque omnibus viribus laboravi continuo , ut , quae huc pertinerent , sollicitè ex diversis locis ac regionibus colligerem atque ordinarem . Fateor , cum naturalis aliqua me dispositio ad hunc praecipue laborem invitaret ; primum vix omnem operis me perspexisse ambitum , neque forte vires , qua par erat , diffidentia mensurasse . Terruit , cum aliquantum processissem : quo fit , ut appropinquata obiecta magis oculum feriant , terruit , inquam , materiarum & multitudo & qualitas : ad quod accedebat , quod abunde agnoscerem , me salutem pia in multis desideria formaturum , & , quod triste esset , celeberrimi HENSLERI effectum veritati nimis convenire : scilicet , „ quod

caput prospiciens , & manus ; quae exequantur ; non eiusdem semper activitatis sunt , & quod ars medica , & qui civitatibus praesunt , sese mutuo eadem facilitate negligant “ .

Ast vero , neque hae , quaecunque fuerint ; quas ipse mihi in prosequendo opere rationes iterato opposui , maiores fuerunt , quam , ut saltem circumspectiorem reddere , ac in tractando labore operosiores , quibus in eo imaginationis lusus & nullius executionis commenta evitare , & amicorum super his monita magis attendere assuescerem : quorum quidem tanta hucusque in me potestas esse non potuit , ut opus hoc in meis certe oculis difficilis valde executionis , nec minoris momenti res pertractans , pro votis accelerarem , antequam & aliorum humano generi faventium & celeberrimorum Virorum super his monita , manusque adiutrices , prout nunc facio , sollicitè implorassem .

Ad Vos igitur Viri dignissimi , amplissimi ! repetitas preces votaue transmitto , ut dignemini ; quae hic Vobis praeterivisse videbor , & quae illustrando operi humanitati sacro inservire possint , praecipue , quas , ab experientia novoritis hic aut ibi cum successu adhibitas aut certe adhibendas regulas Politiam medicam attinentes , benigne communicare , super his mecum amico commercio conferre , & , si quae ad manus ve-

nerint scripta digna, quae consulantur; haec ea cum fiducia impertiamini: me grato animo, pro singulis, expensas fideliter redditurum, &, prout decet, ne cui fautorum molestus evadam, quae alia adhuc observanda sunt, me pie observaturum.

Verum, cum, quod dixi, non contemnendum rerum huc spectantium thesaurum iam possideam, monendum iudico: me hic neutiquam opera in vulgum nota & maiora, vel & quasvis forte minutias, quas aequi viri iudicii ipsimet discernere poterunt, desiderare; sed talia me hic praecipue intelligere, quae in diffitis saltem locis innotescunt, vel solis muris academicis defensa, nec pro dignitate expiscanda, meam hactenus attentionem sefellerunt. Caeterum amica litteris communicata monita, & placide in his suscepta insuper, quid in hac vel illa materia adhuc desiderandum esset, informatio, eo mihi semper erit magis praefenda; quod sic inutiles aliquando futuras expensas, tam evitatione duplicitatis operum transmittendorum, quam in modo transmittendi magis & minus mihi oneroso, praecavere potero. Neque unquam me quidquid sit, retinebit, nomina illorum, in grati animi tesseram publicare, quorum in genus humanum & in me merita & benevolentiam ultro agnoscere non desinam.

Pauca sunt, quae addam quoad ordinem la-

bori huic propositum : unusquisque etiam alius aliquo laborare defectu videtur : cum , quae hio elaborata sunt , primo intuitu , cum aliis rectius coniungenda fuisse appareant ; quae tamen non iniquum subinde locum obtinere videri possunt , ubi , quae hoc capite dicenda erant , attentius considerantur , & ubi fatendum est , unumquodque in circuli circumferentia punctum , vel primum , vel ultimum poni posse .


Postremum id est : scilicet me in elaboratis hucusque operis partibus , lingua patria , quae germanica est , scripsisse ; tum , quod mihi sit maior huius in communicandis ideis usus ; tum , quod sat extensa sit idiomatis notio , & denique , quod cuiusvis nationis Eruditi hoc tandem privilegio gaudeant , & liberaliter utantur . Dabam Bruchsaliae die 6. Ianuarii 1776.

*Finis Primi Voluminis .*



## ELENCHUS.

- I.) *Georg. Math. GATTENHÖFF, de Hypochondriasi.* pag. 1--64
- II.) *Franc. SCHOENMEZEL, an Sectio anatomica cadaveribus de Autochiria suspectis?* 65--96
- III.) *Christ. Frid. LUDWIG, de Suffusionis per acum curatione.* 97--129
- IV.) *Arnold. WIENHOLT, de Inflammationibus viscerum hypochondriacorum occultorum.* 130--178
- V.) *Io. Petr. FRANK, de Larvis morborum biliosis.* 179--202
- VI.) *Io. Iac. SCHAERTLICH: de usu Opii in febribus intermittentibus.* 203--247
- VII.) *Burch. Frid. MÜNCH, de Belladonna, efficaci in rabie canina remedio.* 248--328
- VIII.) *Io. Petr. FRANK, Epistola invitatoria ad Eruditos.* 329--347





0056 42332

[illegible]